

Buk Ngr Sam

Natq Ngr Nzaplxtqngr Mz

Buk Ngr Sam

Sam lcng tqnginidr nabz kxtr ngrdr lr Jiu x nzkrka'-krdr kx nzngr-zvz-ngrdr. X mrlz nzvz-nqblq-krung mz nzangio-krug Gct x nzkrka'-krbzku bade. Sam nzkrzlzr nzokatr-krdr nigu x nzamqtr-krdr drtwrgu. Takitrde kxnzetu rgung nzyapwxtipx-krmlr bagu drtwr ngr Sam lcng.

Leplyz nzqqlung kx nzryrng Sam lcng x nzyrtir yiz siu-esz' (1,000). A' Devet kx ryrbz kxkqlu mz Sam kcng trtqki-esz'-nzpnu-nzlvqn (150). Nza-kiolr Sam lcng mz dzu rdr nzlvqn nzrpibzlr 'buk.' Kxnzalvztrng mz Nzryrngkxtr nzrpilr kx namrlzu r Sam nzpnu-esz'-nrade-esz'. A' kzdung Sam nzrlxlvgng, x rblx nzrpinger namrlzu r Sam kznike.

Namrlzu R Sam Lcng Nidr Seleng

- 1) Nabz ngr nzyrni-krbz ncblo o leplyz kxkqlu mz Gct murde narlxtibzlr bade nzokatr-krde nidr mz nzxpxu-krdrng. Mc Sam 13 x 44.
- 2) Nabz ngr nzrglqpxngr Gct. Mc Sam 8 x 115.
- 3) Nabz ngr nzawi-ngrbz mz Gct. Mc Sam 34 x 67.
- 4) Nabz ngr nzbrtikr drtwr ncblo o leplyz kxkqlu kx Gct sa na-arlapxle nidr mz nzayzlu-krbzle nzkrka'-krdr. Mc Sam 11 x 125.
- 5) Nabz ngr Jerusalem mrkc tqtungr Mangr-nzangiongr Yawe mz Newz Saeon, murde Gct mnc mrlcde. Mc Sam 46 x 87.

6) Nabz ngr nznginikr Gct King r lr Jiu. Mc Sam 29 x 93.

7) Nabz ngr nzabrtzlvzkr lr Jiu king rdr kc tqyrlqbz Yawe badr mz nzaovxio-krde en-qmi rdrng. Mc Sam 2 x 72.

8) Nabz kx nzngnelz-ngdrdr Jerusalem mz nzangiongrr. Mc Sam 84 x 122.

9) Nabz ngr nzyrplapxngrr kx na-alvztr-ngdrdr leplz mz nqmqq kxtubq x nqmqq kx vz-rbr. Mc Sam 1 x 73.

10) Nabz kx rpile doa kx takitrde nzprtr-krde mz Mangr-nzangiongrr Yawe, x doa kx takitrde nzayrplapxkr Yawe nide. Mc Sam 15 x 24.

11) Nabz kx pipxle be ngr lr Israel badr Yawe. Mc Sam 68 x 105.

Mzli kc tztwzngrr lr Jiu nabz nedrng, ngaldrdr li lxblr. X ngaldrdr lcng nzngi-kzte-lzbqng, murde ngalrde krali yokaetipxle drtwr ngr krkc kai. Rblx nzpipx-krgr kxmu ngaldrdr krali amrlx. A' kzdung nzpipxlr drtwr kcpwz mz natq kx blepxngrr. Mc Sam 146:2.

Naglqlzx Gct rngc mzli ka tqlube-ngrne,
X na-angrlvzx nide.

Kzdung nzpipxlr drtwr kcpwz mz nzymne-ebzpxngrr. Mc Sam 18:2. Kzdung natq kx apule 'lrpalvc' nzkrlyz-tpwzlr lrtzlvz ngrgung. A' natq lcng nztakitrrdr nzpipx-krdr drtwr kcpwz tzpipxlr lr Jiu. X krlzamu nzrmcti-krmu drtwr ngrde mz ngalrde krali o veatibzmu mz kzdq lrtzlvz o rlwxamu natq lc mz Nzalvztr-ngrrng Kxmyapxbz kc tqyc mz nibr buk lc. Kzdq kz natq kxmule lc tqngi 'temz ngr lomr kc tqyrputrngr nipna.'

Nim lrpalc nyznge peto,
 X Mevalu nge kx arlapxle ninge.
 Kzdung nzpipx-krdrle nzayzlulr. Mc Sam
 75:10.

Rpile kx, “Sa naodatix zmatq ngr kxdrka'-
 ngrng,

A' zmatq ngr kxntubqng sa na-aetunepxbo.”

Sam rtqmq nzvz-nqblqlr letz ngr alfabet scdr
 lr Jiu. X Sam lcdeng nidr seleng: 9—10, 25, 34,
 37, 111, 112, 119, x 145. X nztekqtr-ngrleng mz
 Natqgu vz-nqblqlr letz ngr alfabet scgu. Delc
 nzxlr-kruleng blepx kxpipz mz nzxlrngr mz
 nzycmne-krqu. Mz drtq Sam lcng, kzdq natq
 kxtpwz rpile kx, ‘Kzdq nabz ngr A, B, C.’

Mzli kang kqlu nzycmnebzng mz Gct mz nzrpi-
 krbzlr kx, ‘Yawe.’ Murde krle drtqde kc tqpibzle
 badr. X drtq lc yr-kzkr mz Natqgu.

Kzdung mzli kxmu nzwznglr lr Jiu Sam nedr
 tutr angidr mz nzngngr mz nabz negung. Delc
 tztekqtrngr kzdung Sam x kzdung nctr mz nzvz-
 nqblq-krde nabz negung. Sam lcng nidr seleng:
 13:6; 41:13; 47:6; 72:18-19; 75:1; 89:52; 106:48;
 107:8-9, 21-22, 31-32; 116:1-9; 118:1-4, 10-12, 15-
 16, 28-29; 134 amrlx; 136 amrlx; 141:1; 148
 amrlx. Sam 23 yc mz Buk Ngr Nzangiongr mz
 #87, mz nzvz-nqblq-krde nabz negu.

Buk Kc Kai

1

Sam 1—41

Nzmnc-zpwxngr

¹ Nzmnc-zpwxngr trvzpxpuu mz nzvz-nqblqngr
 nqmq kr kxdrka'-ngrng,

X nztu-ngrbz mz lrpzki nyz kxnzaleng alwx.

X trvzpxpuu mz nzprtr-ngrbz mz
kxnzxrnga-ngrdr Yawe.

² A' nzabrtzngr angidr lc vzpxm mz drtwr kx
elalm mz nzvz-nqblqngr Loukxtr sc Yawe,
X mz nzaoti-zvzkr drtwr natqde ngrlx x
nrckxbq.

³ Leplz lcng nzapulr nounc kcng dzbrdr tzkrlzob-
zlr lue,
X leu rdr trnzbloung.

X nzdo-zlwzng mz nzvz-krm nrpr angidr.
Da kx nzalelr nradr yc-zvzbz.

⁴ A' kxdrka'-ngrng trnzwailru.
Nzapulr leu kxglr kcng tztakitrpwzlr nzngc-
ngr.

⁵ Delc trnatu-amqngi-ngrdru mzli kc na-ayzlu-
ngrbz Gct da mz leplz.
X trnaprtrpwzung mz kxnztubqng.

⁶ Murde lrpzki rdr tutr me nzayrplapxngr.
A' Yawe aclvebzle nnti r leplz kxnztubqng.

Sam Krali (2)

Kxnmcpx Ne Gct

Kxnzngqngung

¹ Lr mrkzbleng nzngqngung mz nzngyatikr
drtwrdr Yawe.
Murde mane nzyrlqtingr drtwr mz nzatrkat-
ingr nide.

² King rdrng x kxnzrmailz rdrng nzyrlwr-lxblrng
Mz nzoliqti-krdr nzota-krdr badr Yawe x
Kxnmcpx nede. ☆

☆ **Sam Krali (2):2** Aposol 4:25-26

- ³ Nzrpilr kx, “Na-axtxbzku nzmnczlz-krbzku mz
zmatq ngrdr,
Mz nznikitx-krgru nqvi kc tzpe-ngrrdr nigu,
murde drtqgu naopx.”
- ⁴ A' King Yawe kc tqmncom Heven yrpalelvzle
nidr,
X xtrnga-ngrrde drtwr kcng tzyrlqlr.
- ⁵ Ycmne-zngyabz badr,
X nzmwxlr-ngrrdr natqde kxpq.

Natq Yawe

- ⁶ Murde rpile kx, “Yrlqpex King kc tqmcpxpex
Jerusalem
Mrkc Saeon, newz kxtr nyznge.”
- ⁷ X King kc tqmcpx Gct, rpile kx, “Napibo nike
pim Yawe bange.
Rpimle kx, ‘Nim Mrlxnge, abzo mzbq ka, sa
na-aelwapx-ngrrbo mz leplz nzngini-krnge
Trtem. ☆
- ⁸ Rlxtim bange x sa nakabo bam zmatq ngr
nzaclvengr neidung amrlx,
Murde leplz mz nrlc tulvzo nangi nemqng.
- ⁹ Sa na-aovxioq mrnyzdr mz nzxplr-zlwz-krm,
Kc na-apule bz kc tqrniglc botol.’ ” ☆
Natq kx pibz Yawe mz Mevalu nede delcng.

Kxnzyrplapxng

- ¹⁰ Delc nimu king x kxnzrmailzng mz nrlc nayr-
plapxamu,
X nalalztq-angidramu, mzli ka tqycbe-ngrrbz
mzli.
- ¹¹ Narnrctrpzmz mz nzamrlue-krmu Yawe,

☆ **Sam Krali (2):7** Aposol 13:33; Hibru 1:5 ☆ **Sam Krali (2):9**
Nzaelwapxng 2:26-27

X mz nzwztr-krbzm bade.
 12 Yrngzobzm mz Mrlxde,
 Murde ma tqodatile nimu,
 Mz zngya ngr drtwrde kc tqwou.
 A' nimu amrlx kcng tzlatrtpzng bade, sa
 namnc-zpwxamu.

Sam Kratq (3)

Nou Nzarlapxngr X Nzaovxiongr

Nabz ne Devet,
 kc tqyrle mzli kc tqdwasz-ngarde mrlxde Absa-
 lom.

¹ Yawe, enqmi rngeng nzkqlu-zlwzng,
 X nztutitr zvz nardr ninge.

² Nzrpilr mz nzyapwxti-krdr ninge kx,
 “Gct trtxpnzngr nzokatr-krde nide.”

³ A' Yawe, nim kx mnc-ngale-zvzle ninge.
 Nim nou nzaovxio-krnge x nim kx apqtrp
 drtwrnge.

⁴ Delc tqrlxti-ngarbo nzokatr-krm ninge,
 X ayzluome natqnge mz newz kxtr nyzm.

⁵ Murde namwi-angidrx mz nrlckxbq x melz-
 mopwc' mz nourla,
 Mz nzaclve-angidrq ninge.

⁶ Kxmule-esz' nztu-ngalelvzlr ninge siu ngr en-
 qmi,
 A' trtxpnzngr nzmwxlr-krnge.

⁷ Murde krka'-ngrne kx, “Yawe, Gct rng, vzm
 arlapx ninge,
 X katxpxbz zmatq ngrdrng.”

⁸ Yawe, nim nou nzarlapxngr,

X da kxmrlzting amrlx kabzme mz leplz
nemqng.

Sam Krapwx (4)

Abtrtpzmu Drtwrmu Mz Gct

Nabz ne Devet.

Gct Rnge

- ¹ Gct, ayzlum nzkrka'-krnge,
Murde dwaki-zvzme bange.
X mzli kc tqkxpu-ngrne, okatrq ninge.
Delc naycngz mz drtwrm ninge x naxlr-
ngrme natqnge.

Kxnmnc-mrbrng

- ² ?Nimu leplz, myx mzli kx naesakingr nzatrkatikrmu nzmyalz-krnge?
?X myx mzli kx naesakingr nzmrlzkr bamu
da kx ngi brmrda x nzpokianger?
³ Murde nakrlzamu kx Yawe mcpdle nigr leplz
kxntubqng kx nanginedeng.
X mzli kc nakrka'-ngrbo bade, sa na-
ayzlumle natqnge.
⁴ Bzkq nabztq ngr nelzmu mailzle nimu mz alwx.
A' na-aoti drtwrmu nqmq krmu mz nzyrbq-
lrpi-krmu mz nelvq nyzmu mz nrlckxbq.
☆
⁵ Zbz na-abtrtpzmu drtwrmu bade,
X nakabzmu bade blz, mz nzvz-nqblq-krqu
natq kc tqkapxmle bagu.

Gct Rnge

6 Yawe, leplz nemqng nzqqlung kx nzrpimlr
bange kx, “?Myx mzli kx namnc-zpwx-
ngrgu?”

Delc tqkrka'-ngrbo kx na-amrlzq nigr.

7 Murde mzli kc tqamrlz-ngrn ninge, abrtz-zlwzx
Myaszpxle nzabrtzkr leplz kx dakxnzng
nadr x waen mqdr kqlu.

8 Mzli kc tqyrbq-ngrne, mwi-angidrx mz nrck-
xbq,

Murde nim kx aclve-zpwxle ninge.

Sam Kranzlvqn (5)

Nivz Lrm O-ngalelvzle Nigr

Nabz ne Devet kx yrbzle mz kxrmailz ngr dzbe
kxnzngrng.

Nzkrka'ngr

1-2 Yawe, nim King x Gct rng. Rlxtibo bam kx
naxlrme natqng,

X na-aoti kz drtwrm, mz nzatutr-krm
nzkrka'-krnge.

3 Kxetu, mz nourla kang kqlu natqng sa navzbz
bam.

X nakrka'-zvzbo bam, mz nzaenzli-krbo
natqm kxmrlz.

Kxdrka'-ngrng

4 Yawe, trnginipqu Gct kx abrtzlvzle da kxtrka.

X trmnc-lxblrwamuu mz kxdrka'-ngrng.

5 Leplz kx nzglqpx-lzbqng trtxpnzngr nzmncr-
krbzlr bam,

Murde rblxbz mz leplz kx mrlz-zvzbz badr
nzale-krdr alwx nztutr-krbzlr mz mzpq.

- 6 Odatiq kxnpokiang,
X obqso-zvzq kxnznibqng x kxnzesabrting.

Kxntubqng

- 7 A' mz nzaodu-zvz-krm, delc navztr-ngrne
Mangr-nzangiongr nim,
X nayrngzobo mz nzamatqngr nim.
8 Yawe, mailz ninge mz nqm q krm kxtubq,
murde enqmi rnge nzkqlu-zlwzng.
X aelwa-zpwx-ngrm bange me pnz drtwrm.

Kxdrka'-ngrng

- 9 Da angidr trvzpxpuu mz nao enqmi rngeng.
Murde mz nabzdr la nzodatingr txpwz.
X mz nzymne-krdr nzmailzlr leplz
Mz nzbatr-krbzlr nzbz-krdr esz'-krdr. ☆
10 Gct, plzpx alwx ngrdr x ayrplapx nidr,
Mz nzprt看-mou-krdr mz trtxki scdr.
Mapulrpxngr nidr mz nzkqlukr alwx ngrdrng,
Murde nzpctxpx-zvz-ngdr nim.

Kxntubqng

- 11 A' leplz amrlx kcng tzabrtrpzlr drtwrdr bam
na-abrtzng.
X nangr-along mz nzalalz-krm drtwrdr.
Aclve-angidr kxnzmrlztilr nim
Murde nabilvzlr nim.
12 Yawe, amrlz-zvzq kxntubqng. X nivz lrm o-
ngalelvzle nidr
Mz nzapu-krde temz ngr lomrdr kc tqyrpu-
trngr nipna.

☆ **Sam Kranzlvqn (5):9** Rom 3:13

Sam Kraesz'mz (6)

Drle Mzke'

Nabz ne Devet kx yrbzle mz kxrmailz ngr dzbe kxnzngrng.

Nzkrka'ngr

- ¹ Yawe, kxmule-esz' drtwrm ngya,
A' bzkq pnanatiq x ayrplapxq ninge.
- ² Kxetu, nayc mz drtwrm ninge murde yangrn-gapex.
X axplr mou nrkrdrtnge murde yagox-zlwzx.
- ³ ?Rnrcti-lzbqtrpo bam mz zmwxlr,
X aenzli-alopex nzokatr-krm ninge?

Nzarlapxngr

- ⁴ Yawe, tekqtr drtwrm x arlapx ninge,
Mz nzaodu-krm kc tqyc tqyc.
- ⁵ Murde mz nzbzngr trpengr nzrglqlzngr nim.
X mz gq nzangiongr nim kc tqyrkrpxpebz.

Nzyrningr

- ⁶ Drtnge mewepe mz nzkrka'-zvz-krbo bam.
X mz nrlckxbq kang kqlu, nqni x pilo pnrnge
nzlrpr-ngrdr drle mzke'.
- ⁷ Mzke' vaotxtrpebz x tropxpeu,
Murde nzyrni-krnge lc nzngi-batrplr enqmi
rngeng.

Nzaovxiongr

- ⁸ Nimu leplz kxdrka'-ngrng amrlx, dwaszpeamu
ninge!
Murde Yawe sa tqlalztqpem mz nzyrni-krnge.
- ⁹ Xlrpemle nike rlxtibo,

X sa na-ayzlumle natqnge.

- ¹⁰ Krka'-ngrne kx drtq enqmi rngeng namya x
narnrcti-lzbq-kzng mz zmwxlr,
X naplc-aning mz nzaovxio-krnge nidr.

Sam Krarlimz (7)

Yawe Pipxle Nztubqkr Lepz O Nzvz-rbr-krdr

Nabz ne Devet, kx ngr-ngrbzle mz Yawe,
mzli kc Kus, ncblo ngr nqvi lr Benjamin,
tqatrkatl-ngrde nide.

Vz-rbrx O Trtingr

- ¹ Yawe, Gct rnge, arlapxbz ninge mz mq ncblo
kcng tzayotilr ninge.
Murde nim me rlakitr.
- ² Murde ma tzkivztibzlr nrkrdrtnge mz nzapu-
krdr laion,
X nzkilznedr ninge me trpnzngr kx naoka-
trle ninge.
- ³ ?Yawe, Gct rnge, nike ale-rbrx?
?Mqng alele dq da kxtrtubqu?
- ⁴ ?Myx kxmule, alebo dq da kxtrka mz kzten-
geng?
?O atrkatix dzbede negrng mz nzarlapx-
krnge enqmi rgrng?
- ⁵ Nzmu kx tqmule lcde, sa tqmrlz nzrlr-krbzme
ninge mz mq enqmi rngeng,
Mz nzmaneuti-krdr ninge mz nzapu-krdr
kuli x nzlolvz-krdr ninge.
X natabrtilr ninge x narnzbrtiolr ninge mz drtc',
X na-ayrbqtxdr namz rnge elr.

Aryrplapx Kxnzvvz-rbrng

- 6 Yawe, tumilzm zngya x aesaki leplz kcngr
tzngyati drtwrdr ninge.
Okatr ninge murde yrlqpeq mzli r nzpipx-
krm nztubqkr leplz amrlx o nzvz-rbr-krdr.
- 7 Ayrlwr leplz mz nrlc tulvzo murde natu-
ngalelvzlr nim,
Mz nzacive-krm nidr Heven.
- 8 Yawe, nim kx rpibz mz leplz kx nztubqng o
nzvz-rbrng.
Pipxbz mz leplz kx mnctr-zpwxpebo bam
murde nabzng opx x tubq.
- 9 Aesaki nqmz krdr kxdrka'-ngrng x tu-zvzbz mz
nibr kxnztubqng.
Murde nim kxtubq-esz'ngr x obqplxq nabz x
nzvzkr nardr.
- 10 Gct kxmyatxlz, nim temz ngr lomrngc kc
tqyrputrngr nipna.
X arlapxq krkcng nabzdr tqly.
- 11 Tubqq mz nzryrlq-krm drtwr.
X pipxq kx takitrde nzayrplapxngr kxnzvz-
rbrng.

Tekqtr Nqmz Nr Drtwrm

- 12-13 Nzmu kx trnztekqtrlu nqmz krdr kxtrka, sa
nayrlamzq toki r vea scm,
X nalalvzq popz' scm mz nzpnz-krm nidr mz
nipna kxngc.
- 14 Kxdrka'-ngrng nzpetilr rtq da kxtrka.
X lvclzm nc nzodatingr. X nrade yrlqzbze ngi
nzpokianger.
- 15 Trtxki kc tzamwiti-ngrdr leplz,
Sa naprtz-mou-ngrdr.

- 16 Drtwr ngr nzkxpungr kcng tzesabrti-ngrdr
leplz, sa nangq-moulr nidr.
X nzodangr kc tzalelr sa naetq-moungr
drtqdr.
- 17 Nangrx mz nzglqlz-krnge Yawe kc tqmyalz-
esz'ngr!
X na-awibo bade murde tubq-esz'ngr!

Sam Krartqmz (8)

Drtwr Kx Yrlq Kxrpalz

Nabz ne Devet kx yrbzle mz kxrmailz ngr dzbe
kxznzngng.

1 Yawe, nim Kxetu rgr.

Drtqm myalz-esz'ngr mz nrle tulvzo.

- X nzmyalz-krm myaszlzle bongavz.
- 2 Mz nzvz-nqblq-krde me pnz drtwrm, doa kxznz-
topwzng nzglqlzlr nim.
X natqdr ailvzole ngrpibqtikr enqmi rmqng
x awx-nabule nidr. ☆
- 3 Kxrpalz, mzli kc tqobqlz-ngrne mz bongavz,
Mclzx nzlulikr temz x vri kcng tqwz-
ngrnqng.
- 4 ?A' memule tqmatq-ngrgr mz drtwrm?
?X memule tqmrlzti-ngrn nigr leplz txneng?
- 5 Murde wz-ngrn leplz vzo kxpipz mz lr Heven,
X kabzme badr zmrlue x nzamatqngr.
- 6 Yrlqq nidr mz nzacive-krdr da kcng tqwz-ngrn,
X da amrlx nyzclzbzng mz zmatq ngrdr. ☆
- 7 Nzacivelr animol krbzq,
X animol kzipeto kz.

☆ **Sam Krartqmz (8):2** Matiu 21:16

☆ **Sam Krartqmz (8):6**

Hibru 2:6-8; 1 Korint 15:27

Sam Sam Krartqmz (8):8 xiv Sam Sam Krarpwxmz X Kranzpnu (9 x 10):8

⁸ X nidr kxnzetung r utc x nc,
X da amrlx kx nzwrneng prla.

⁹ **Yawe, nim Kxetu rgr,**
Drtqm myalz-esz'ngr mz nrlc tulvzo.

Sam Krarpwxmz X Kranzpnu (9 x 10)

Nztaokr Kxdrka'-ngrng

Nabz ne Devet kx yrbzle mz kxrmailz ngr dzbe
kxnzngrng.

Kzdq Nabz Ngr A, B, C

¹ Awi Yawe! Naglqpx-atwrnr-ngrne nim.
Ale-zvzq da kcng tzkctipxng, x napipxxng.

² Angrlvzx drtqm.
Bilvzx nim kc tqmyalz-esz'ngr.

³ Brngzvxitx nyzylukr enqmi rnge mz nzmc-krde
nim.
Bz x tao-ngrde nzulrm.

⁴ Clvetio-lzbqx x rpiq kx tubqx.
Clveq leplz amrlx mz nzwxbuo-krme mz
tron, x ayzlu-ngrbzme da badr.

⁵ Dalr nrlc nzmailzlr kxdrka'-ngrng.
Delc napnanati-ngrn nidr x
Drtqdr na-amrbctx-alobzme.

⁶ Doa ngr alwx lcng nzyrkrtrpeng.
Enqmi rngeng trpengr nzdcpx-krdr mz
drtwr leplz x mztea nyzdr amznrpe-ngrnq.

⁷ Eu, a' Yawe ngini-alom King.
Elalvzx nzwxbuo-krme mz tron nyzm murde
nzayzlu-krbzme da mz leplz tubq.

⁸ Eu, murde nzacive-krm nrlc tubq-esz'ngr,

*Esakrlrngr nzipx-krm nztubqkr leplz o trt-
ingr.*

⁹ *Gct, nim lrpalc nyz kxnzobqszong.*

*Glxx kx nim me nzrlakitrkr mzli kx prtzngr
da.*

¹⁰ *Gct, krkcng tzkrllr nim nzabrtprzlr drtwrdr
bam.*

*Itoto x doa amrlx kcng tzrtangrtlr nim,
trmrbrtru mz drtwrm.*

¹¹ *Itoto x nigu amrlx napipxbzku mz kxnzmnc-
mrbrng da kcng tqale Yawe.*

*Jerusalem ngi mzteadau nyzde mrkc tqmnc-
ngrde. Na-angrlvzku nide.*

¹² *Jzslc krkcng tzrnibqting leplz mz nzayzlu-kr-
mopwzle badr da kcng tqtrka tzalelr.*

*Kxnzmncng mz drtq kxetq sa na-ayzlu-
kzpzle badr natq ngr nzyrni-krbzlr bade.*

¹³ *Kxetu, nalc mz drtwrm ninge x mcom kxmu
nzaetq-krm enqmi rngeng drtqngc.*

Kxrpalc, bzkq rlrpx-ngrn nzbz-krngc.

¹⁴ *Kxarlapx, naelalc-ngrm drtwrngc nzarlapx-
krm ninge.*

*Leplz kxkqlu Jerusalem sa naxlr lr nzglqlz-
krngc nim.*

¹⁵⁻¹⁶ *Lalztqmamu! Yawe aelwapx-lzbqngc mz
nztubqkr nzayzlu-krbzle da mz leplz.*

*Murde lr mrkzbleng nztao-moung mz gq kx
nzekqtilr.*

Mz br kx nzatu-kapqlr, nzdwatr-moung elr.

*Mz trtxki kx nzamwlr, nzprtz mou kxdrka'-
ngrng elr.*

¹⁷ *Mz nzesablqti-krdr Gct,*

Nabz-ngdrdr leplz ngr nrlc.

- 18 Nzmu nakxpung, trtxpnzngr nzmrbtritrkr
drtwr Gct nidr.
Nzobqtipxngr kxtrnzrngiscung trtxpnzngr
nzbotxpx-krde.
- 19 Natulzme Yawe, mz nzaryplapx-krm lr
mrkzbleng amrlx.
Na-aelwapx-ngrn kx drtwr kxnzetung amrlx
ngi brmrda.
- 20 Namwxlrtilr x na-amrluelr nim.
Nakrlzlr kx nidr leplz txneng, x sa nabzng.

(10)

- 1 Opxm kx mncme rlru, Yawe.
Opxm kz kx mnc-kapqq mzli kc tqkxpu-
ngrgr.
- 2 Obqm! Kxdrka'ngr glqpx-lzbqmile nzayoti-krde
leplz kxnzkxpung.
Pnz drtwrnge kx sa namwati-lzbq mz br
scde.
- 3 Pipxle kx nzaotikr drtwrde da kxtrka zlwz ngi
da kxmrlz mz nzbilvz-zvz-krdele.
Pivxile Yawe x pxtxpx-ngrde nide, a' amrlzle
leplz kx nztrkibrng.
- 4 Rblx nzrtangrti-krde Gct murde glqpx-lzbq.
Rblx nzrmcti-krde Gct murde mz drtwrde
trtxpnzngr Gct.
- 5 Rlr! Xplrmi-zlwzle nzmncngr kxtrka, a' pxtxpx-
ngrde me pnz drtwrm.
Suti txpwz drtwrde nzyrpalelvz-krde enqmi
rdeng.
- 6 Sc tqrpipele kx, “Trpnzngr da kxtrka kx
naprtzm bange,
X trpnzngr nzodatingr ninge kalr.”

- 7 Sc tqgqlz-zvzle alwx x nzpokiagr.
 Natqdeng amrlx ngi dalr nzrpikitingr, nzr-
 pibqtingr, x nzrpilzng. ☆
- 8 Trmrlzu nzmnc-kapq-aepztr-krde mztea mz
 nznribq-krde kx nabzdr lq.
 Tu zvz mz nzaenzli-krde ncblo kxesz'nebz.
- 9 Tqtu-kapq apule laion kc
 Tqtcngzpxm mz gq nyzde mz nzkivzti-krde
 ncblo kx trxplru.
- 10 Vz zvz nzxplr-zlwz-krde.
 Vz zvz nzatrkatikrde nzmncr kxnzkxpung.
- 11 Vz-rbr kxdrka'ngr mz nzrpi-krde kx, "Gct
 trobqpepuu bange.
 Wzx a' trkrlzleu da kcng trka tqalex."
- 12 Wztxpxbz nzwzkr ncblo kxdrka'ngr, kx Yawe,
 mz nzayrplapx-krm nide.
 Wai-ngrn da lc murde bzkq mrbrtr mz
 drtwrm kxnzkxpung.
- 13 Wai-ngardele kxdrka'ngr pxtxpx-ngarde nim.
 X rpile kx, "Gct trtxpnzngr nzayrplapx-krde
 ninge."
- 14 Xlqkqamu nimu kxdrka'-ngrng, murde Gct
 mcle da kxtrka lcng amrlx tqaleamu.
 X oliqtile nzokatr-krde kxnzkxpung kcng
 tzrtangtilr nide.
 Xlrle nidr murde nide kc tqokatr zvz kxn-
 zobqszong.
- 15 Yawe, katxpxbz zmatq ngr kxdrka'-ngrng.
 Yrpalelvz nidr x ayrplapxng mz da kxtrka
 kcng tzalelr, navz x naesaki zpwx.
- 16 Yawe, nim King.
 Yc zvz nzacive-krm nrhc.

 ☆ (10):7 Rom 3:14

Yrlqtxpx mz drtc' nyzm krkcng trnzangiolru
nim.

- 17 Zmatq ngrm etu-esz'ngr, murde krlzpe-kaiq
nike narlxibz kxnztubqng.

Zbq kalvz axplrq nidr x kabzme badr nike
nzrlxtilr.

- 18 Zbo ngr leplz kxnzobqszong x kxnzkxpung, sa
na-arlapxbzmeng mz zmatq ngr leplz mz
nrlc ka.

Zmwlr amrlx sa na-aesaki-zvzq.

Sam Kranzpnu-esz'-nrade-esz' (11)

Yawe Nide Me Rlakitr

Nabz ne Devet kx yrbzle mz kxrmailz ngr dzbe
kxnzngrng.

- 1 Kztengeng, Yawe nide me rlakitr.

A' myx kxmule tqrpi-ngrnamu kx, "Ngrlrlz
mz newz mz nzrlapx-krm.

- 2 Murde leplz kxdrka'-ngrng nzmnc-kapqti-zvzlr
leplz kxnztubqng,

Mz nznz-krrdr nidr mz nipna.

- 3 Trpengr doa x da kx na-abrkitrku drtwrgu,
X nigu kxnabzdr lqngi, trpengr da kx na-
aleku."

- 4 Bzkq kxmu nzymne-krmamu lc bange, murde
Yawe kc tqmnche mz Mangr-nzangiongr
nide,

X sc tqwxubube mz tron nyzde Heven mz
nzobqplx-krde nabz leplz amrlx.

- 5 Yawe sc tqobqtr zvz mz nzmncr kxnztubqng x
kxdrka'-ngrng.

X pxtxpx-ngrde nzrmcng kxnzrnibqng.

- ⁶ X mz nzayrplapx-krde nidr, sa nartctio-ngrbze
badr muli rplz kxngc na-apule nzdckr
tewa.
X sa na-abxutile nidr mz nzulr nenq kxpq.
⁷ A' krkcng nabzdr tqqlngi sa namncng badr,
Murde Gct tubq-esz'ngr x mrlz bade da
kxtubq.

Sam Kranzpnu-esz'-nrade-li (12)

Da Kxtrka Mz Nrlc Tulvzo

Nabz ne Devet kx yrbze mz kxrmailz ngr dzbe
kxzngrng.

- ¹ Yawe, okatrp ninge murde trpengr mrlx kxtubq
kx mnc mzli ka.
Murde mz nrlc tulvzo leplz kxnmrlzng
nzayrkrxttrpeng.
² Leplz amrlx mz nrlc nzapokiati-lzbqng.
Nzalqngitilr nzymnengr mz drtwr kx xlva.
³ Rlxtibo bam nzaesaki-krm natq leplz
kxnpokiang,
X odati nidr mz nzglqpx-lzbq-krdr.
⁴ Murde nzrpilr kx, “Naogr nalctwz txpwz mz
nztwz-krgr da kx suti drtwrgr.
X trpnzng kx naetum bagr.”
⁵ A' Yawe rpile kx, “Mcpex nzaetq-ngrbz drtq
kxnzkxpung,
X nztangqgxr kxnmwati drtwrng.
Delc na-arlapxx nidr mzli ka.
Da kc tqwai nzsutikr drtwrdr le.”
⁶ Yawe, abrtprzkr drtwrgr mz natqm lcng, tqtubq
tqlq.

Murde nzopx-krdr apule silvz kc tzayrleni-
ebirngr mz nyr.

7-8 Kxmule-esz' leplz lcng trmya-ngru drtqdr
nzglqpx-lzbq-krdr,

X nzrglqlz-krdr da kxtrka mz nrlc tulvzo,

A' lxngitigr kx sa na-aclve-zpwxq nigr,

X sa na-arlapx-zvzbzme nigr mz mq leplz
lcng tzdrka'ngr.

Sam Kranzpnu-esz'-nrade-tq (13)

?Yawe, Na-aenzli-alopex Nim?

Nabz ne Devet kx yrbzle mz kxrmailz ngr dzbe
kxnzngrng.

¹ ?Yawe, myx kxmule, namrbrtitr-alope drtwrm
ninge?

?Namnc-rlru-alopeme bange?

² ?Nelznge navzdz-alopem?

?X drtwrnge navz-alope?

?X namnclz-alopebo mz zmatq ngr enqmi
rngeng?

³ Yawe, obqm bange x ayzlum natqnge.

Ka-mop bange nzxplr-krnge murde ma
tqbzx.

⁴ Bzkq rlr-ngrbzme mz enqmi rngeng nzpi-krdr
kx nzaovxiopelr ninge.

X bzkq rlr-ngrbzme nzabrtzlvz-krdr
nznrrcti-lzbq-krnge.

⁵ Murde abrtppo drtwrnge mz nzaodu-krm kc
tqyc tqyc.

X sa na-abrtz-zlwz-ngrne nzarlapx-krm
ninge.

- ⁶ Yawe, sa nangrbo bam murde amrlz-zlwzpeq ninge.
Mz da amrlx kx kame bange, Yawe, sa nangrbo bam.

Sam Kranzpnu-esz'-nrade-pwx (14)

Nzngqngukr Kxtrnzrlxngitiung

Nabz ne Devet kx yrbzle mz kxrmailz ngr dzbe kxnzngrng.

- ¹ Leplz kxnznngqngung mz drtwrdr nzrpilr kx,
“Trpnzngr Gct.”
Leplz lcng nzvz-rbrng x nzale-txpwzng da kxtrka zlwz.
Trpnzngr leplz lcng kxtubq.
- ² Yawe mncom Heven, x sc tqmcomle leplz amrlx,
Mz nzmckrde neke yrplapx mz nzrtangrti-krde nide.
- ³ A' nzesablqtilr Gct amrlx ngrdr
x drtwrdr esz'ti mz nzale-krdr da kxtrka.
Trpnzngr nidr kxes' kxtubq. ☆
- ⁴ Delc tqrpinger Yawe kx, “Leplz lcng tztrkang
nznibqtitxdr leplz nengeng
Nzapulr kx nznibqng da kx nangqdr.
X mrbrtr mz drtwrdr nzkrka'-krmlr bange.
?Myx kxmule, trnzkrzlzru da kxtubq?”
- ⁵ A' narngidrto-lzbqng x namwxlrlvzti-lzbqng,
Murde Gct tedr badr kxnztubqng.

☆ **Sam Kranzpnu-esz'-nrade-pwx (14):3** Rom 3:10-12

⁶ Vz zvz nzrpwa'-krbzlr me pnz drtwr kxnzrlxn-giting.

A' Yawe mnc-ngalelvzle leplz nedeng.

⁷ Sutitx zlwz drtwrnge kx Gct rgu kc Saeon na-arlapxle leplz nedeng.

Murde mzli kc nayzlu-mou-ngrmle, namnc-zpwxku badr.

X nigu lr Jekop drtwrgu sa naelalzm.

X nigu lr Israel sa na-abrtz-ngrgu da lc. ☆

Sam Kranzpnu-esz'-nrade-nzlvqn (15)

Doa Kx Tubq Mz Nzobqkr Gct

Nabz ne Devet.

¹ ?Yawe, neke navztrpz Mangr-nzangiongr nim?
?X neke takitrde nzangio-krde mz newz kxtr
nyzm?

² Doa kxmule lc nabzde nalqngi.
Nqmq krde natubq. X natqde nangi da
angidr.

³ A' bzkq rpibqti leplz. Bzkq atrkatile kztede.
X bzkq pikitile kxnzesotrpzng bade.

⁴ Napxtxpx-ngrde kxdrka'-ngrng.
A' na-amatqle kxnzamrluelr Yawe Gct.

Na-atutr-zvzle nzesalz-krdeng,
Kxmule-esz' rblxbz bade.

⁵ Narlxtile kxnzrbilqngr kx takitrde trau scde kc
tqrlrpx-ngrde.
Bzkq pokiatitrle mrlx kxtubq,

Kxmule-esz' leplz nzrpilr naxpelr nide.

Doa kx vz-nqblqle natq lcng sa natu-amqngi
zvz.

Sam Kranzpnu-esz'-nrade-esz'mz (16)

Drtwr Ngr Nzmnc-zpwxngr

Nabz ne Devet.

Nzkrka'-krnge

¹ Yawe, arlapx ninge,

Murde nim kx abrkitrx drtwrnge.

² Nim Kxetu rnge

X nou da kxmrlzting amrlx kcng tqngiscn-
geng.

³ Leplz nemqng kcng tztrng mrka mz nrhc,

Nzmyalz-zlwzng x mrlz bange nzmnc-krgr
badr.

⁴ Nzxpukr krkcng tzangiolr kxtrngiu Gct angidr
sa nartxlvlz zvz.

A' trna-angiwxu gct rdr kxnzmncng
mzlilxlr,

X trnakrka'pou badr.

X trtxpnzngr npulio-krnge mepyr ngr blz
mz olta nyzdr.

⁵ Yawe, apume bange drtc' kxmrlz nyznge x tzme
bange lrpzki kx nao-zlix.

X nzlu-krnge yctrpz bam.

⁶ X mrlzm bange me ngi bz ngr da kx katimeng
x da kx trkatipwe'u bange.

Murde mrlzm bange da amrlx kcng tqkati-
meng mz nznigini-krme bange trtenge.

Nzglqlz-krnge Yawe

⁷ Yawe, naglqlz-zvzx nim mz nzmailz-krm ninge.
Murde mz nrlckxbq aopxme nabznge mz
nzaongr drtwr kxmrlz.

⁸ Dcpx zvz mz drtwrnge kx mnc-zvzme bange.
X trpnzngr doa x da kx na-aycngrlrle ninge,
murde tu-zvzme mz nibrnge.

⁹ Delc nabznge tqabrtz-zlwz-ngrde x drtwrnge
tqelalz-ngrmle.
X tqmnc-zpwxpe-ngrne.

¹⁰ Murde tr-rlrpx-ngrwq zmatq ngr nzbzngr
nzaovxio-krde ninge, ncblo kxtr nem.
X trayrbqtxwq nrkrdrtnge mz gq mz
nzmibi-krde.

¹¹ A' aelwa-zvz-ngrm bange drtwr ngr nzmnc-
zpwxngr:

Nzabrtz-zlwzngr kxmyalz vzpxm mz nzxngi-
ngrbz nim.

X da kxmrlzting nzvzpx-zvzmqng mz mqm.

☆

Sam Kranzpnu-esz'-nrade-rlimz (17)

Sa Namcx Mzpq

Nabz ne Devet.

Trvz-rbrwxu

¹ Yawe, lalztqm mz nzrlxti-krbo nztubqngr.

☆ **Sam Kranzpnu-esz'-nrade-esz'mz (16):11** Aposol 2:25-28,
31; 13:35

Xlrm natqnge murde nzkrka'-krbo bam
trvzpxpuu mz naonge, a' vzdz-zpwxm mz
nabznge.

² Mzli kc napipx-ngrn neke vz-rbr, mnc mz
nrlarde nyznge,

Murde nim kx rkrlz nike tubq.

³ X krlz-zvzq nzao-krnge drtwrnge
X obqplxq nabznge mz nrlckxbq.

A' trpnzngr da kx vz-rbr kx rmctiq.

X pnzpe drtwrnge kx naonge trna-akawi-
ngrwxu alwx.

⁴ Tralewxu da kx nzrtulrtrngr, da kc tzwai
kzdung leplz.

Murde vz-nqblq-zvzx natqm.

⁵ Trtaowxu mz nzatalzngr,

Murde o-zli-zvzx lrpzki rm.

Nzkrka'ngr

⁶ Gct, krka'bo bam murde lalztq-zvzme bange.

Kxetu, xlrn natqnge.

⁷ Delc na-aelwa-ngrme bange nzaodu-krm kc
tqyc tqyc.

Murde mzli kc tzrlatr-ngrbz leplz bam, ar-
lapxbzme nidr mz mq enqmi rdrng.

⁸ Aclve angidr ninge na-apule dztum kx matq
zlwz mz drtwrm.

X amnc-kapqbz ninge da kc tqwai kio mz
nzwxbulvzo-krde neideng.

⁹ Murde ma kxdrka'-ngrng tzlolvzlr x tznibqlr
ninge,

Mz nztu-ngalelvz-krdr ninge.

¹⁰ Trpnzngr nzrycngz mz drtwr kx ycbz badr.

A' nzglqpx-lzbq-zvzng.

11 Trpengr nrlarde kx navzkix, murde nzmnc-ngalelvzpelr ninge.

X tzryrlqng drtwr kx nametxbo badr.

12 Nzapulr laion kcng tzaenzli-kapqlr

Mzli kx nadwa-ngrmlr mz nzpesaliti-krdr ninge.

Nzayrplapxngr

13-14 Yawe, otaamu badr enqmi rngeng x aovx-iong.

Kapxm ninge mz mq kxdrka'ngr lcng mz zmatq ngrm.

Arlapx ninge x ayrkrtxtr nidr.

Murde nzabrtz-krdr yc txpwz mz nrlc ka.

Ayrplapx leplz ngr nrlc mz zvetq kc tqoliqtipeq nakabzme badr,

Navz navz nakrlzbzle doa nedrng x doa ne doa nedrng.

15 A' krlzx kx sa namcx mzpq mz nzvz-nqblq-krde nztubq-krnge.

X mzli kc natulz-ngr-mopwc', sa na-abrtz-ngrne nzmnc-krbo bam.

Sam Kranzpnu-esz'-nrade-rtq mz (18)

*Yawe Nide Temz Ngr Lomr Kc Tqyrputrngr
Nipna*

Nabz ne Devet, ncblo ne Yawe, kx yrbzle mz kxrmailz ngr dzbe kxnzngrng,
mzli kc Yawe tqarlapx-ngrbzle nide mz zmatq
ngr enqmi rdeng x King Sol.

Nqmq Kr Yawe

- ¹ Yawe, mrlztix nim
Murde axplr q ninge.
² Nim Gct rnge, x butqbr kx rlakitr x.
Nim lrpalc nyznge peto,
X Mevalu rnge kx arlapxle ninge.
Nim nou zmatq rnge apule temz ngr lomrng
kc tqyrputr ngr nipna.
³ Kqle-zvzx nim kc tqtakitrde nzrglqlzng,
X vzme arlapx q ninge mz mq enqmi rngeng.

Nzkrka'-krnge

- ⁴⁻⁶ Yawe, mzli ka tqkxpu-ngrne kqlex nim mz
nzokatr-krm ninge.
Murde ycpe pipz nzbz-krnge.
Opxm kx zmatq ngr nzbzng sa na-aovxiole
ninge,
Mz nzpe-amqngi-krde ninge.
A' krlzx kx sa naxlrme ninge mz Mangr-
nzangiong nim,
Mz nzayzlu-krm natqng.

Zmatq Ngr Yawe

- ⁷ Mzli kc Yawe nakaputr-ngrmle, zmatq ngrde
myalz apule nengq.
Nrle ycngrlr-atwrnrngr x wai-kzle nou
newzng.
Murde Gct ngyati zlwz drtwrde enqmi rn-
geng.
⁸ X natqde apu-kzle trmami kc tqyrpupx.
X ncte vzpx-ngrm zsikapu. X naode rlxpx-
ngrm nyr x rplz kxpq.
⁹ Lvpxle bongavz,
X vzom tuom mz dcbz kx botapz'.

- 10 X kzdq enjrl lvcmio-animle nide.
Mz nzrtwz-krdr nenq.
- 11 Nzlo ngr zbo ngr tewa
Apule lrpz kx mnc-kapqpx-ngrmle.
- 12 X aelwapx-ngarde zmatq ngarde mz zyzlr kxluli.
Mz nabz zbo lc bzlrpc tqpctipx x muli-aes
tqrlxtiom vzmi rplz kxngc.
- 13 Yawe myatxlz-esz'ngr, ngi-batrpzle
nzyrpupxkr bzlrmei.
X natqde nzxlr mz nrlc tulvzo.
- 14 Rpna-ngrbzle nipna x aodalitile enqmi rngeng.
Vz-nqblqbz bzlrpc x nzvo-alo-ngdrdr.
- 15 Mzli kc Yawe tqpnanati-ngarde enqmi rngeng,
Natqde apzlmle me boo-ngrng,
X atu-lxlr-ngarde nou nrlc.

Nzarlapxkr Yawe Ninge

- 16 Yawe rtrngztiomle ninge mz nzokatr-krde
ninge
Apule kx veczlmle ninge me boongr prla.
- 17 Kxmule-esz' yangrngatrpz mz nzxplrkr enqmi
rngeng,
A' sc tqvz zvz nzarlapx-krde ninge.
- 18 Nzvzmqng mz nzota-krgr badr mzli kc tqprtilz-
ngarde ninge nzxpu-ngrng.
A' Yawe sc tqtum mz nibrng.
- 19 Mailzle ninge me nzmnc-zpwx-ngrne,
X arlapxle ninge, murde abrtzlvzle ninge.

Nzvz-nqblq-krnge Yawe

- 20 Yawe rka-zvzm bange da kxmrlzting mz nzvz-
nqblq-krde nztubq-krnge.
X ayzlu-ngrmle da bange murde nabzng
lqngi.

- 21 Vz-nqblq-zvzx nqm q kr Gct r nge,
X tresablqtiwxu nide.
- 22 Yrlq-angidrx Lou kxtr scdeng,
X aoti zvz drtwr nge natqdeng.
- 23 Trvz-rbrwxu mz nzmnc-krnge,
A' yrlqpx-lzbq nge mz nzalengr alwx.
- 24 Yawe ayzlu-ngrmle da bange mz nztubq-krnge,
Murde nabz nge lqngi mz nzobq-krde.

Yawe Badr Leplz

- 25 Yawe, yrlq-zvzbz natqm mz krkcng tzyrlqzbzlr
natqdr bam.
X amrlz q krkcng nqm q krdr tqmrlz.
- 26 Tubqzbme mz krkcng nabzdr tqtubq.
A' lolvz q mz br scm krkcng tzesabrng.
- 27 Avzdz q krkcng tzavzo-lzbq nge.
X avzo q krkcng tzglqlz-lzbq nge.
- 28 Yawe, nim nou nzlu-krnge, mz nzapu-krm
kxrtekatr lam pnrnge.
X ayrkrpx q da kxtrka amrlx mz nzmnc-
krnge, mz nzapu-krm zyzlr x nyr kxpq.
- 29 Gct, rka-zvzme bange zmat q ngr nzota-krgr
badr enqmi rngeng.
X axplr-zvz q ninge mz nzdwa-ngaletr-krbo
nabxbz ngr lrpalc nyzdr.

Nzmyapxkr Yawe

- 30 Nqm q kr Yawe tubq-esz'ngr, x natqde ngi da
angidr zvz.
X nginibzle lrpalc nyzdr krkcng tzrlatrpzng
bade.
- 31 Yawe nide txpwz Gct angidr,
X butqbr nyzgu.

Kxokatr

- 32 Nide Gct kc tqaxplr-zvzle ninge,
X tzbzle lrpzki rnge kxtubq kx nao-zlix.
- 33 Axplr-zvzbzle nanycnge
Mz nzvzne-krnge mz nartrkla ngr newz.
- 34 Alvztrple bange nznprnangr,
Murde nakrlzx nznrvengr nalr popz'.
- 35 Yawe, apume bange temz ngr lomrngc kc
tqyrputrngr nipna.
X zmatq ngrm ngi popz' ngr nibrnge. Vzome
murde namyalzx.
- 36 Okatr-zvzq ninge, x rblx enqmi rngeng nznlovlz-
krdr ninge.
X trnzta-pulro-ngrdru ninge mz drtc'.

Kxaovxio

- 37 Maneux enqmi rngeng,
Vz vz x lolvz-zpwxng mz nzodati-krnge
nidr.
- 38 Tzx nidr, vz vz x nztaong amrlx mz drtc'.
X trpnzngr kx tulzm.
- 39 Axplrq ninge mz nzotangr.
Delc tqaovxio-ngrne enqmi rngeng.
- 40 Nim kx rngi-batrp nznwaszkr enqmi rngeng
ninge,
Murde naodatix krkcng tzpxtpx-ngrdr
ninge.
- 41 Nzbztidr nzyrningr kx naokatrng. Nzkqler
Yawe.
A' trpnzngr kx arlapxe nidr.
- 42 Wibrtix nidr, vz vz nzapulr bq kc tqtwz nenq.
X rnzbrtix nidr, vz vz nzapulr dxlrbi ngr
lrpzki.

King Kxmcpx Yawe

- 43 Arlapxbzme ninge mz mq leplz kx nzmwati
drtwrdr ninge.
X yrlqq ninge mz nzacive-krnge drtc' nyz-
drng,
Murde lr mrkzbleng namnclzmqng mz
zmatq rnge.
- 44 Nzyrngzomqng bange
X nzvz-nqblqlr natqnge.
- 45 Nzrnrcitr-lzbqmqng bange.
Nzprpxmqng mz lrpalc nyzdr. X
nzmetxmqng bange.
- 46 Yawe, nim Gct kx lu. Glqpxx nim murde nim
butqbr nyznge.
Glqlz-zvz-ngrne nim murde arlapx-zvzq
ninge.
- 47 Ayrplapx-zvzq enqmi rngeng.
X okatrq ninge nzaovxio-krnge lr mrkzbleng,
- 48 Mz nzarlapx-krm ninge mz mqdr.
Yawe, ngi-batrpe' nzaovxio-krnge enqmi rngeng.
X tu-zvzme mz nibrng mzli kc ncblo nzrpilr
naota-ngrgr badr.
- 49 Gct, sa naglqlzx nim mz mzlr lr drtqbrng
amrlx,
Mz nzangrlvz-krnge nim. ☆
- 50 Yawe, ninge Devet, king nem, x okatr-zvzq
ninge mz nzaovxio-krngeng.
Aodu-zvzq ninge kc tqmcpqx x leplz ngr nqvi
lrnge, tqyc, tqyc.

Sam Kranzpnu-esz'-nrade-rpwxmz (19)

Zyzlr Ngr Bongavz X Zyzlr Ngr Natq Gct

Zyzlr Ngr Nepi, Temz, X Vri

- ¹ Nzmyalzkr Gct nzmc mz bongavz,
X dalr bongavz amrlx.
- ² Mz nrckxngrlx, nepi aelwa-ngrde zmatq rde,
Da kc tzwai temz x vri mz nrckxbq.
- ³ Kxmule-esz' bongavz trpnzngr naode x nepi
trycmneu,
X trpnzngr natq kxnztwz temz x vri,
- ⁴ A' nrpa scdr vzpx, krlzbzle leplz amrlx mz nrcl
tulvzo. ☆
Gct yrlqzbzle nrckxbq nangi ma nyz nepi kx
mwipx-ngrmle.
- ⁵ Mz nourla, nzvzpx-ani-krm nepi ma nyzde
apule nzabrtzkr ncblo kx yrlz ate.
X apu-kzle ncblo menrpa kc tqoliq mz nze-
sangr.
- ⁶ Nepi lc prtzm mz nzngrlr-krde mz bongavz.
Ngrlr, krlzbzle nrlarde kc tqtakiole.
X yzlr ngrde yzlro-ngrm mz da amrlx.
Da kc tqwai Natq Yawe mz nyzlro-krmle mz
leplz amrlx.

*Natq Yawe Apule Zyzlr Kx Pnamilxtile Nabz
Leplz*

- ⁷ Natq Yawe amrnale nzlukr nabz leplz mz
nzmrlzvxi-krde.

- Akrlztrle kxnznqngung murde trycngrlru.
8 Natq Gct aelalzmlle drtwr kxnzrvz-nqblqng mz
nztubq-krde.
Aelwapx-ngarde da kx yc-kapq mz nzobqplx-
krde nabz.
9 Nzamrluengr Yawe tqyc tqyc murde lq-esz'ngr.
Natq Yawe rsakrlrngr murde da angidr zvz.
10 Delc nzsutikr drtwrge natqde namyaszpxle
trau kxkqlu,
Murde vzpx-ngrm nzabrtzng kx myaszpxle
dakxnznq kcng tqbrngzvxi.
11 Mz nzvz-nqblq-krnge natqde, aelwapx-ngrmle
bange da kxmrlzting.
X mz nzlalztq-krnge mz natqde, atubqtimle
nzmnc-krnge.
12 Kxetu Yawe, ipq ninge mz alwx kznikeng yc-
kapqtrp bange,
Murde rblxm bange nzmc-krngeleng.
13 X lolvz-amqngi ninge,
Murde ma tqvz zvz nzale-krnge alwx
Kcng tqotr ngr drtwrge nzale-krngeleng.
Murde nabzng natr x natubqbo mz nzobq-
krm.
14 Yawe, nim butqbr kx rlakitr.
Krka'-ngrne kx natqngeng x nzaotikr
drtwrge navz-nqblq-zvzlr me pnz
drtwrm.

Sam Kranzpnu-li (20)

Nzkrka'ngr Mz Nzaovxiokr King

Nabz ne Devet kx yrbzle mz kxrmailz ngr dzbe
kxnzngrng.

Nzkrka'kr Pris Ne Gct Badr Leplz

¹ Yawe, nim Gct r melrmqgr Jekop.

X krka'-ngrgr kx na-ayzlume natq king rgr.

X mzli kc nakxpu-ngrde okatrpz nide.

² Mz nzmnc-krm Newz Saeon mz Mangr-nzangiongr,

Aclve x axplr nide.

³ Abrtzlvz da kx rlr-ngrbzle bam.

X suti drtwrgr nzalalz-krm drtwrm mz blz
kx angle mz olta nyzm.

⁴ Kabz bade da kcng tqsutu drtwrde,

X angidatibz nepu nr drtwrdeng amrlx.

⁵ X sa namalqlvzkr nzaovxio-krde.

X naglqlzkr nim, Gct rgr.

Yawe, ayzlum natqdeng amrlx. Eu, angida.

Nzkrka'kr King Devet

⁶ Yawe, ninge king kc tqmcpqx.

X mzli ka krlzpex kx okatrq ninge mz nza-ovxiongr.

X sa na-ayzluome natqng mrla tqmnc-ngrn
Heven kxtr,

X nakame bange zmatq ngr nzngini-krnge
Ngrlrvea.

⁷⁻⁸ Kzdung leplz nzabrtrpzlr drtwrdr mz ami
nedrng,

X kzdung mz dalr nzotangr.

Da lcdeng trnaokatrlru nidr x nztaong mz vea.

A' Yawe Gct rgr, tu-amqngi-zvzkr, murde
abrtxtrpwzkr drtwrgr bam.

Leplz Amrlx

⁹ Yawe, kabz zmatq ngr nzaovxiongr mz king
nem.

X mz nzkqle-krbzkr nim, ayzlum natqgr.

Sam Kranzpnu-li-nrade-esz' **(21)**

Nzglqlz-ngrbz Nzaovxiokr Yawe
Nabz ne Devet.

King Devet Glqlzle Gct

- ¹ Yawe, ninge king nem x abrtz-zlwzx murde
nizrka-krme bange zmatq.
Bilvzx nzaovxio-krbzme enqmi rngeng.
- ² Da amrlx kcnq tqsuti drtwrge, tqrlxtibo.
X sc tqkatimeng x alebzmeng amrlx.
- ³ Vzpe me bange mz nizrka-krme da kxmrlzting.
X alaome mz narng kraon kx ngi gol.
- ⁴ Rlxtibo nzlungr bam,
X kapeme bange nzlungr lc tqboi.
- ⁵ Leplz kxkqlu nzxlr lr nrpa ngr drtqng, murde
okatr-zvzq ninge.
X nzamatqlr ninge, murde armyalzq ninge
mz nznngini-krnge King.
- ⁶ Da kxmrlz kcnq tqkatimeng bange, sa nayc-
alomqng bange.
X abrtz-zvz-ngrne nzmnc-krme bange.
- ⁷ Yawe kc tqrninr, ninge king nem x abrtzpo
drtwrge bam,
Murde namnc-zpwxx mz nzaodu-krm kc
tqyc tqyc.

Leplz Nzglqlzlr Gct

- ⁸ Yawe, aovxio-zvzq enqmi rmqng,
X lolvztiq krkcng amrlx tzpxtpx-ngdr nim.

- ⁹ X mz nzlolvzti-krm lc nidr, odatiq nidr, apule
nyr kc tqangcle nrhc.
Yawe, miltxto-zvzq nidr x ayrkrtxtrq nidr
mz nyr.
- ¹⁰ Trpnzngr kx rlapx mz nqvi lrdr,
Murde nibqtiqng amrlx.
- ¹¹ Mz nzyrlq-krdr drtwr ngr nzota-krmu badr mz
vea,
Trna-angidalru drtwr lc tzyrlqlr.
- ¹² Murde nzdwaszlr nim
Mz nznzn-krm nidr mz nipna scmng.

Lepz Amrlx

- ¹³ Yawe, glqlz-ngrgr nim nzxplr-esz'ngr-krm.
X angrlvzkr nim mz zmatq ngrm.

Sam Kranzpnu-li-nrade-li (22)

Nzrlxtingr X Nzrlxngitingr

Nabz ne Devet kx yrbzle mz kxrmailz ngr dzbe
kxzngrng.

Nzrlxtingr

- ¹ Gct! Gct o! ?Memule tqvzszpe-ngrn ninge? ☆
? X memule tqpxtpx-ngrn nzokatr-krm
ninge x trlalztqpepqu mz nzkrka'-krnge?
- ² Yrniti-zvzbo bam ngrlx x nrckxbq,
A' trmnc-zpwxwxu murde trayzlumeu
natqng.

Nzrlxngitingr

- ³ Nim King rgr kxtr-esz'ngr kc tqaclvele nigr lr
Israel.
X angio-zvzkr nim.

4 Melrmqgrng nzabtrpzlr drtwrdr bam.

Nzlxngitilr nim x arlapxq nidr.

5 Nzmnc-xglelr nim x tu-zvzbzme mz nibrdr.

Nzrlxtibzlr nzokatr-krm nidr x angidatibzme
natqdr.

Nzrlxtingr

6 A' nzapusrngr ninge brmrda.

Nzngangr-ngrdr ninge mz nzobqso-krdr
ninge.

7 Nzycngrlrmlr nandr bange x nzmabqtimlr be-
naodr bange. ☆

X nzxtrnga-ngrdr ninge. ☆

8 Nzrpimlr kx, “Abrtrpzme drtwrm mz Yawe, a'
namckr ena nzarlapxkr Gct nim mzli ka.

Murde trokatrleu nim, kxmule-esz' rpiq kx
mrlzti-zlwzle nim.”

Nzrlxngitingr

9-10 Yawe, yzuo mz zbq kc tzmcngr mzke', krlzmle
mzli ka,

Abrtr-zvzbo drtwrnge bam mz nzngini-krm
Gct nge.

Murde aclve-angidr q ninge mz nzrmcngr mzke',
X mz nzyq-krnge neyr lxenge.

11 Bzkq rlaszq ninge, murde trpnz-moungr kx
naokatrle ninge,

Mz nzesotrpe-krm enqmi rngeng bange.

Nzrlxtingr

12 Yawe, enqmi lcng tztu-ngalelvzlr ninge.

☆ **Sam Kranzpnu-li-nrade-li (22):7** Matiu 27:39; Mak 15:29

☆ **Sam Kranzpnu-li-nrade-li (22):7** Luk 23:35

- X nzrpilr nanibqlr ninge mz nzapu-krdr poi
kz peto.
- 13 Naodr mznem mz nzvz-krmlr bange,
Mz nzmakx-krdr ninge mz nqngidr kxmalc.
- 14 Nzxplr-krnge yrkrpxpe apule lue kc tzpulio mz
drtc' kx mingr.
Mrkcng tzaxvctrngr nrvr rngeng nzb-
plctipeng, x nqmq nr nabzng baonepe.
- 15 Mzli trnaboipeu nzbatr-krme nzbz-krnge.
Murde mewe-zvzpex x drtwrnge brlxkz
apule nabr kxngibr mz nepi. ☆
- 16 Kxdrka'-ngrng nztu-ngalelvzlr ninge, nzapulr
kuli kx namaneutilr ninge,
X sc tzmaplxtitrpebzlr mqngeng x nanycn-
geng. ☆
- 17 Mcx kx ninge nrvr-nrbalqtxpe.
X nzobqszneopelr x nzyrpalelvzpelr ninge.
- 18 Nzakiti-lzbq-ngrdr nctq lrpz scnge,
X nzqk scnge kc boi nzayrleo-ngrdr daes, mz
nzkrlz-krdr doa kx narngisc. ☆
- 19 Yawe, bzkq mncme rlru.
A' vz-anim mz nzokatr-krm ninge.
- 20 X arlapxbz nzlu-krnge mz mq ncblo kxayo
lcng,
Tzmaneutilr ninge mz nzapu-krdr kuli kz
peto.
- 21 X mnc-ngalelvz ninge, murde ma tzluplxtilr
ninge mz toki r vea scdr
Tzapulr nqngi poi kz peto.

☆ **Sam Kranzpnu-li-nrade-li (22):15** Jon 19:28 ☆ **Sam Kranzpnu-li-nrade-li (22):16** Matiu 27:35; Jon 20:25 ☆ **Sam Kranzpnu-li-nrade-li (22):18** Matiu 27:35; Mak 15:24; Luk 23:34; Jon 19:24

Nzrlxngitingr

- 22 Mz nzyrlwr-lxblrkr leplz nemqng,
Sa nabilvzx nim, mz nzrpi-krbo mz mzlen-
geng da kx aleme bange. ☆
- 23 Murde sa napipxbo badr kx, “Nigu kxnzawz
neng Yawe, naglqlzku nide!
Eu. Nigu lr Israel na-amrlueku nide mz
nzamatq-zvz-krgr nide!
- 24 Kxmule-esz' nigu kxnbqszong, a' Gct trobqs-
zoleu nzxpxu-krgrgung,
Murde trpxtxpx-ngrdeu nzayzlu-krmle natq-
gung.”
- 25 Delc Yawe, narka-ngrbo blz ngr nzawingr kc
tqpiibo, mz nzyrlwr-lxblrkr leplz nemqng.
Murde nim nou nzrglqlz-krnge.
- 26 X mz nibrde, sa nakrlcng mz dakxnzng
kx vzpxm mz blz kc tqkabo bam.
X sa naglqlzlr nim mz nzbrtikr drtwrdr nim.
Amrlz-zvzbz nidr mz nzmnc-zpwx-krdr.
- 27 Yawe, lr mrkzbleng amrlx sa na-aoti drtwrdr
nim mz nzplzpx-krbzlr alwx ngrdr bam.
X neidu lcng amrlx sa na-angiolr nim,
- 28 Mz nzngini-krm King kx matq-esz'ngr
Kc tqaclve-zvzle nidr.
- 29 Delc kxnbqszong badr leplz nedrng sa nayrng-
zobzng bam,
Mz nzavzo-lzbq-krbzlr bam.
- 30 X doa negrng kz sa nawztrpzng bam,
Mzli kc naxlrtr-ngrmlr bagr nrpa ngrm,
- 31 Mz nzrpi-krbzkr badr kx,
“Yawe arlapx-zvzle leplz nedeng.”

☆ **Sam Kranzpnu-li-nrade-li (22):22** Hibru 2:12

Sam Kranzpnu-li-nrade-tq (23)

Kxacle Sip

Nabz ne Devet.

¹ Yawe, aclve-zvzq ninge apux sip nem.

X trtxpnzngr da kx mnctxpx-ngrne.

² Mailz-zvzq ninge me ycngr lue x dakxnzngr,

Murde na-amax mrkc tqycngr nrw.

³ Amrnaq nzlu-krnge.

X aelwa-zvz-ngrme lrpzki kxtubq, murde
drtqm tr zlwz.

⁴ Nctoko scm tzmle nzti bange.

X bz scm abrmle drtwrge mz da kx prtz.

Kxmule-esz' vztrx mz nzlo,

a' trtxpnzngr da

kx namwxlritx.

Murde nim Yawe, kc tqmncme bange.

⁵ Alebzme nange dakxnzngr,

Mz mzlr enqmi rngeng.

Aelubzme narng tolo,

X drtwrge elalzm.

⁶ Krlz-angidrx kx sa naka-zvzme bange zmlz

ngm x nivz lrm,

X sa namnc-zvzx ma nyzm.

Sam Kranzpnu-li-nrade-pwx (24)

*King Kc Tqmatq Vztr Mangr-nzangiongr Mz
Mzteadau Nyzde*

Nabz ne Devet.

Neke Takitrde Nzprtr-krde Mangr-nzangiongr

- 1 Nrlc atwrnrngr nyz Yawe,
X doa amrlx mz nrlc nedeng x da amrlx mz
nrlc scdeng. ✧
- 2 Murde nide Kxrpalz kc tqwz-ngrde nrlc,
X yrlqzbzle prla x drtc' mz zmatq ngrde.
- 3 ?Mz nzaotikr drtwrgu zmatq lc, neke tubqzb
bade nzvzdbz mz newz nyz Yawe?
? X neke takitrde nzprtr-krde Mangr-
nzangiong nide?
- 4 Leplz kx nabzdr lq x nzmnc-krdr tubq
Nztakitrdr nzodutr-lxblr-krbzlr mz Yawe.
Natqdr nzangidati-zvzlr.
X trnzangiolru mqngr da kx nzlz.
- 5 Leplz kxnmulr lcng nztubqzbzng mz nzobqkr
Yawe.
X Gct r Jekop lc sa na-amrlzle x na-arlapxle
nidr.
- 6 Leplz lcng nzrtangrtlr me pnz drtwrde,
X suti drtwrdr nzxngi-krbzlr nzulrde mz
Mangr-nzangiong nide.

King Kc Tqmatq

- 7 **Lvxpxbzm bade naonrx ngr Jerusalem,**
X naonrx ngr Mangr-nzangiong kcng
tqblzlongr,
Murde King kc Tqmatq navztrp.
- 8 **?King kznrlc tqmatq?**
Krlc Yawe, kc tqrnlnr, tqxplr.
Krkc tqaovxio zvz mz vea.
- 9 **Lvxpxbzm bade naonrx amrlx,**
X naonrx kcng tqblzlongr,
Murde King kc Tqmatq navztrp.

10 **?King kznilc tqmatq?**

Krlc Yawe, Ngrlrvea ngr ami nedeng.

Nide King kc Tqmatq.

Sam Kranzpnu-li-nrade-nzlvqn (25)

*Doa Kc Tqabrtr-zvzbzle Drtwrde Mz Yawe
Drtqde Trmyau*

Nabz ne Devet.

Kzdq Nabz Ngr A, B, C

Nzkrka'ngr

1-2 Awi Yawe mz nzngini-krm Gct rnge.

Abrtr-zvzbo drtwrnge bam mz nzkrka'-krbo
bam.

Bzkq rlr-ngrbzme mz enqmi rngeng nzaovxio-
krdr ninge.

Bzkq nzamyatimlr drtqnge.

3 Clvebz doa kc tqabrtr-zvzbzle drtwrde bam,
murde drtqde ma tzamyatibz.

Clveti-lzbq zvz doa lc, a' mrlx kx ani txpwz
nzota-krmu ncdz, mrlz nzmyakr drtqde.

4 Da kx sutitx-zlwzbz drtwrnge bam, nzalvztr-
krme bange nqmz krmqng amrlx.

Delc nakrlz-zpwx-ngrne lrpzki rm.

5 Elalvzx nzokatr-krme ninge mz nzvz-nqblq-
krnge natqm.

Eu. Murde nim Gct rnge kc tqarlapxle ninge,
x tqabrkitr-zvzx drtwrnge nim.

6 Gct, aelwapx-zvzm nzaodu-krm x nivz lrm
bange.

Gct, ale da lc, da kc tqwai-pnzq mzli kc bqnc.
 7 Ipq ninge mz alwx kcng tqalexng mzli kc
 tqngini-ngrne obla, murde nim mrlz-
 esz'ngr.

Ipqpx nzvz-rbr-krngeng amrlx
 mz nzdcpxkr mz drtwrm nzaodu-zvz-krm.

Nqmq Kr Yawe

8 Jzs-zvzq leplz mz nzmncngr kxmrlz x kxtubq.
 Jzsiq mz nzalvztr-krm kxnzaleng alwx,
 murde nao-zlilr nztir.

9 Kxrmailz, aelwapx-ngrbzme mz kxnzavzo-
 lzbqng da kxtubq.

Kxakrlz, alvztr-zvz-ngrn nidr me pnz
 drtwrm.

10 Lrpzki rmqng amrlx nzaelwapxbzlr mz leplz
 nemqng nzaodu-krm x nzangidati-krm
 natqm.

Leplz lcng nzyrlq-zvzlr nzalvztr-krm x
 nzesz'tikr drtwrmu badr.

11 Ma-nqblq natqm kc tqesalz-ngrn mz nzipqpx-
 krm alwx rngeng,

Murde nzqqlu-zlwzng.

12 Nekeng nzlxngiti-angidrlr natqm,
 Nzo-zlilr lrpzki angidr mz nzalvztr-krm nidr.

13 Olvz x ncblo lcng sa namnc-zpwxng.
 Oliqtibz drtc' kc tqpibzme, murde doa ne-
 drng namnc-kzng elr.

14 Pqtr mz drtwrm leplz kcng tzamrluelr nim.
 Pipx-zvzbzme da kx na-alelr mz nzvz-nqblq-
 krdr nzesz'tikr drtwrmu badr.

Nzkrka'ngr

15 Rtxtrpwo nibrnge bam mz nzmnc-xgle-krnge
 nim.

- Rlapx-zvzx mz nzokatr-krm ninge.
- 16 Suti drtwrnge kx naobqme bange x nayc mz drtwrm ninge.
Sutitx drtwrnge murde trpengr kztenge x trmnc-zpwxpewxu.
- 17 Trte, katxpxbz nztalvzokr nabznge.
Tekqtr drtwrm x arlapxbz ninge mz nzkxpu-krngeng.
- 18 Vz zvz nzaotikr drtwrm nzkxpu-krnge x nzetqkr drtqnge,
Vzm x ipqpxbz alwx rngeng.
- 19 Wx-nzlongr nabznge nzkqlu-zlwzkr enqmi rngeng.
Wzpx zlwz mz drtwrdr nzatrkatikrdr ninge.
- 20 Xplrlvzbz ninge mz enqmi rngeng mz nztukrme mz nibrnge.
X bzkq rlr-ngrbzme badr nzamyati-krmlr drtqnge, murde nim me rlakitrx.
- 21 Yawe, arlapx ninge murde tubqx x nabznge lqngi.
Yrlqtr-zvzbo nzlu-krnge bam.
- 22 Zmatq ngrm, navzm mz nzarlapx-krbzle nigr lr Israel mz
Ztrkang amrlx kcng tqrmctikr mzli ka.

Sam Kranzpnu-li-nrade-esz'mz (26)

O-zli-zvzx Nzti Kxtubq

Nabz ne Devet.

¹ Yawe, pipxbz kx ninge ncblo kx nabzde lq.

Murde o-zli-zvzx nzti kxtubq,

- X abtr-zvzbo drtwrge bam.
- ² Obqtr angidr mz nabznge,
X mc kxmu nzvzkr nqm q nr drtwrge.
- ³ Murde nivz lrm rtwayz-zvzm bange,
X nzaodu-krm mailz-zpwxle ninge.
- ⁴ Traodu-lzbqkru badr leplz kxnztrkang.
X trabrtzlvzwxu kxnzpokiang.
- ⁵ Pxtxpx-ngrne nzngi-te-krgr badr kxnzaleng
alwx.
X drtqnge sa nzmnc-krgr badr kxdrka'-
ngrng.
- ⁶ Yawe, ycpqx mqnge mz nzvz-nqblq-krnge
Loukxtr scm, murde natubqbo mz nzobq-
krm,
X naprtrpo mz leplz nemqng mz nzvz-ngale-
krgr olta nyzm.
- ⁷ X ngr-ngrgr nabz ngr nzawingr
Mz nzale-krm da kxmrlzvxiting.
- ⁸ Mrlzm bange Mangr-nzangiongr nim,
Mrkc tzmcngr nzmyalz-krm.
- ⁹⁻¹⁰ Mz nzmilxtxo-krm leplz kcng tztakitrd r nza-
yrplapxng,
Bzkq apusr-ngrn ninge kxnzaleng alwx, x
kxnzrnibqng,
X kxdrka'-ngrng kcng tzrtwz-zvzng dalr
nzamcti-rbrngr,
- ¹¹ **Murde o-zli-zvzx nzti kxtubq.**
Ycng r mz drtwrm x arlapx ninge.
- ¹² X sa naglqlz-ngrne nim mz mzlr leplz nemqng
Murde tu-zvzme mz nibnge x tubqbo mz
nzobq-krm.

Sam Kranzpnu-li-nrade-rlimz (27)

Nim Mevalu Rnge X Trpnzngr Kx Namwxlrtix
Nabz ne Devet kx yrbzle mz kxrmailz ngr dzbe
kxznzngng.

Lrpalvc Nyznge

- ¹ Yawe, nim Mevalu rnge kx arlapx-zvzle ninge.
X trpnzngr kx namwxlrtix.
Trnarnrcti-lzbq-ngrneu murde nim lrpalvc
nyznge.
- ² Mzli kc kxdrka'-ngrng natz-ngdrdr ninge mz
nznibq-krdr ninge,
Enqmi lcng sa nataong.
- ³ Kxmule-esz' ami kxetu navzm mz nzoti-krmlr
ninge, a' trpnzngr nzmwxlr-krnge.
X kxmule-esz' otakr badr, a' drtwrnge sc
tqabrtr-zvzbo bam.

Ma Nyzm

- ⁴ Yawe, da kx rlxtitxpwo bam nide sele: Sutitx
zlwz drtwrnge nzmnc-zvz-krnge mz ma
nyzm.
Murde naxngi-zvzbo nzulr nzmyalz-krm mz
nzaoti-zvzkr drtwrnge me pnz drtwrm.
- ⁵ Murde krlzx kx sa na-acive-angidr q ninge mz
mzli r nzxpu-krnge.
X na-amnc-kapqq ninge mz Mangr-
nzangiongr nim, mz nzngini-krm butqbr
kx rlakitr x.
- ⁶ Sa nabatrpe' nzaovxio-krnge enqmi lcng tztu-
ngalelvzlr ninge.

X sa namalq-zlwzx nzka-krbo bam blz mz
Mangr-nzangiongr nim.

X nangr-ngrbo bam nabz ngr nzawingr.

Nzkrka'-krnge

⁷ Yawe, xlrn nzkrka'-krnge mz nzkqle-krnge
nim.

X nayc mz drtwrm ninge mz nzayzlu-khme
natqng.

⁸ Mzli kc tqrp-igrme kx, “Vzm mz nzangio-krm
ninge.”

X ayzluo natqm kx, “Eu, ninge la navzbo.”

⁹ Delc, bzkq mnc-rlrume bange. Ninge kxnzawz
nem.

X bzkq esablqtiq ninge mz nzngyatikr
drtwrm ninge.

Murde okatr-zvzq ninge mzli kc.

Mevalu rnge, bzkq pxtpx-ngrn ninge mz
nzaxtx-krm ninge.

¹⁰ Kxmule-esz' trteng x lxenge nzaxtxtxdr ninge,
A' nim la tqacive-angidrq ninge.

Nzti Kx Tubq

¹¹ Alvztrp nqm q krmqng bange.

X mailz ninge mz nzo-zli-zvz-krnge nzti kx
tubq murde enqmi rngeng sa tzaukztilr
ninge.

¹² Bzkq rlr-ngrbzme nzlolvz-krdr ninge.

Nzpokiatitlr ninge x nzamwxlr-ngrdr ninge
mz nzymne-zngya-krdr.

¹³ Yawe, krlzpex kx nzmrlz-zlwz-krm

Sa nakrlzmle ninge mzli ka mz nrlc.

¹⁴ Mzlengeng, na-abrtr-ngrbzku drtwrgu mz
Yawe.

X naxplrku mz nxlngiti-krigule.
Bzkg matitr drtwrgu nide,
A' drtwrgu na-abrtr-zvzbzku bade.

Sam Kranzpnu-li-nrade-rtqmz (28)

Acive Alo Nigr

Nabz ne Devet.

¹ Yawe, kqlx nim murde nim butqbr kx rlakitr.
Bzkg apume bange kxnradrtqde ngq.

Murde ma tqbzx nzm napx-ngn nzxlrngr
nzyrni-krnge.

² Mzli kc tqobqtr-ngrbo Mrkc Tqtr mz nzmnc-
krnge Mangr-nzangiongr nim, x glalz
mqnge mz nzkrka'-krbo bam,
Xlrm natqnge x okatrp ninge.

³ Bzkg apusr-ngn ninge kxdrka'-ngrng keng
tztrngz-zvzbzng da kxtrka.

X nzrpilr kx nidr ncblo ngr nivz, a' trtingr.

⁴ Ayzlu-mopwz mz nzayrplapx-krm nidr mz da
kxtrka x nzrtrkalrgr keng tzalelr,
Kabz badr da kx takitrde nzvz-rbr-kdrng.

⁵ Murde matitrpe drtwrdr da keng tqwz-ngn x
da kxetuting tqaleqng.
Dekc namiltxo-ngn nidr x bzkg da kx na-
ale-moulr.

⁶ Yawe, glqlz-lxblrkr nim
Murde ayzlume natqnge mz nzokatr-krm
ninge.

⁷ Nim lrpalc nyznge x temz ngr lomrge kc
tqyrputrngr nipna.
Abrtrpo drtwrge bam x okatr-zvzq ninge.

Delc tqelalz-ngrm drtwrnge

X tqawi-zvz-ngrbo bam mz nzngrngr.

⁸ Yawe, nim lrpalvc nyzgr kx rlakitrkr.

X nim nzxplr-krnge, ninge king kc tqm-cpxbzme.

⁹ Amrlz nigr leplz nemqng mz nzarlapx-krm nigr,
Mz nzngini-krgr sip nemqng keng tqaclve-zvzq.

Sam Kranzpnu-li-nrade-rpwxmz (29)

Natq Yawe Mz Trlipu

Nabz ne Devet.

¹ Nimu enjrl ngr Heven nayrngzobzmu mz Yawe,
Mz nzmc-krmu nzmyalz-krde x zmatq ngrde.

² Napipxamu kx takitrde nzamrluengr drtqde,
Mz nzangio-krmu nztr-esz'ngr-krde.

³ Murde natq Yawe aelwapx-lzbqngr mz trlipu.
Nate kxmatq o-zlile dcpwe mz nzapu-krde
bzlrmei prla.

⁴ Natq Yawe matq-esz'ngr.
Eu. Natqde xplr zlwz.

⁵ Natq Yawe rpesaliti nc trpili,
Mz nzapu-krdr nounc kx nzlapizting.

⁶ Natq Yawe aycnglrle newz nyzgung,
Mz nzapu-krdr ncblo kx nzelang.

⁷⁻⁸ Natq Yawe batrpzle bzlrpc.
X bzlrmei ngrde aycnglrle peto.

⁹ Natq Yawe apule nenq kc tqrkqtuti nc yrni x
krlxpqtile leu rdr.

X kxnzangiong amrlx mz Mangr-nzangiongr
nzrpilr kx, “Gct, nzmyalz-esz'ngr-krm
glqlz-ngrgr nim!”

10 Nubla ngr tewa kxetu yclzbz mz zmatq ngr
Yawe,

Mz nzngini-krde King kc tqaclve alo.

11 X mz zmatq lc axplrle nigu leplz nedeng
Murde namnc-zpwxku.

Sam Kranzpnu-tq (30)

*Yawe Alrti-zvzle Nzyrnibungr Mz Nzalalz-krm
Drtwr*

Nabz ne Devet.

1 Yawe, glqpxx nim mz nzarlapx-krm ninge mz
mq enqmi rngeng.

Murde tr-rlr-ngrpwxmeu badr nzaovxio-
krdr ninge murde ma tzbilvzlr ninge.

2 Yrnibo bam mz nzokatr-krm ninge,
X amrlz-mowq nrkrdrtnge.

3 Mzli kc tqycpe pipz nzbz-krnge,
Arlapxq ninge x nrkrdrtnge trnavzopeu mz
gq.

4 Yawe, tr-esz'ngrn, x nigr leplz nemqng na-
angrlvzkr nim,
Mz nzawi-krbzk bam da kx aletiqng.

5 Zngya ngr drtwrm trboiu,
A' nzaodu-krm nigr tqyc tqyc.

Kxmule-esz' yrnibutikr nrckxbq,
A' nzyrni-krgr sa nalrtipxle nzabrtz-krgr mz
nzmc-krgr zyzlr mz nourla kxtopwz.

6 Yawe, mzli kc tqmnc-zpwx-ngrne, rpi-zvzx kx,
“Trpengr doa x da kx namwxlritix.”

⁷ Murde xngibo nzamrlz-krm ninge, mz nzapu-
krm rtabu kx xplr kx tu-ngalelvzle ninge.
A' mzli kc tqprt-ngrm da kxtrka bange,
opxm kx esablqtime ninge, sc tqmwxl-
zlwzpx.

⁸ Delc Yawe, tqkqle-ngrne nim.
X rlxibo nyzyluti-krm ninge.

⁹ Rpibo bam kx, "Bzkq rlrpx-ngrn nzvzo-krnge
mz gq,
Murde trpnzng da kx mrlz kx naprpxm mz
nzbz-krnge.

X rblxpe nzyapwxtipx-krbo mz leplz mz
nzangidati-krm,
Nzmu namibilzpemc mz drtc'.

¹⁰ Yawe, xlrn natqng mz nzyckr drtwrm ninge.
Kxetu rng, okatrp ninge."

¹¹ Alrtibzme nzyrnibu-krnge mz nzelalz-krm
drtwrnge,
Mz nztekqtr-krbzme nzvzkr drtwrng mz
nzabrtz-krnge.

¹² X rblxm bange nzmnc-lrpi-krnge.
A' navz zvz nzangrlvz-krnge nim. Awi kxetu,
Yawe!

Sam Kranzpnu-tq-nrade-esz' **(31)**

Nzbrkr Drtwr X Nztalvzokr Nabz

Nabz ne Devet kx yrbzle mz kxrmailz ngr dzbe
kxnzngrng.

Nzbrkr Drtwr

¹ Yawe, nim me rlakitr.

Bzkq rlrpx-ngrn nzaovxiokr enqmi rngeng ninge.

- A' arlapx ninge, murde ale-zvzq da kxtubq.
2 Ayzlu-anim nzyrni-krnge mz nzarlapx-krm
ninge.
Nanginim butqbr kx namnc-kapqpx-ngrmc.

Nztalvzokr Nabz

- 3 Mz nzngini-krm lrpalc ngr nzrlapxngr,
Aclve x mailz ninge mz nzvz-nqblq-krde
natqm.
4 Bzkq rlr-ngrme nzprt看-krnge mz trtxki kc
tzamwi-kapq enqmi rngeng,
Murde nim me rlakitr看.

Nzbrkr Drtwr

- 5 Yawe, aprcbo mqngrnge mz mqm. ☆
Murde nim Gct kc tqbrti drtwr mz nzxpepx-
krm ninge.
6 Kxetu, abrtxtrepo drtwrng看 bam,
A' ptxpx-ngrne krkcng tzangiolr mqngr da
txneng kx nzlz.
7 Drtwrng看 sa naelalzm x na-abrtzlvzx nzaodu-
zvz-krm,
Murde okatr-zvzq ninge mz mzlir nzetqkr
drtqng看 x nzkxpu-krngeng.
8 X tr-rlr-ngrpwzmeu ninge mz mq enqmi rn-
geng,
A' amnc-nrwx-ngrbzme nabzng看 mz nzvzne-
krnge.

Nztalvzokr Nabz

- 9 Yawe, nayc mz drtwrm ninge murde nabzng看
talvzo.
Mzke' vaotxpe-ngrde nzyrni-zlwz-krnge x
nrkrdrtrqng看 mewetxpengr.

- 10 Yangrngapex mz nzvzkr drtwrnge x drtqnge
satxpe murde bztipenge nzyrningr.
Drtqnge yayrpe-ngrde nzmnc-rbr-krnge x
nipenge nrvr-nrbalq.
- 11 Enqmi rngeng nznelvztilr ninge
X kxnmnc-aepztrpqng bange nzobqszopelr
ninge.
Kxkrlzti-lzbqkr badr nzapusr-ngrdr ninge da
kxtrka
X krkcng tzmclr ninge mz lrpzki nzdwa-
ngrdr ninge.
- 12 Leplz amrlx mrbrtinetrpe drtwrdr ninge,
opxm kx bzpex.
Apunepebo badr brmrda.
- 13 Mnc-zvzx mz zmwxlz mz nzxlz-krnge nzlc-
awakr enqmi rngeng,
Kcng tzyrlqlr drtwr kx nanibq-ngrdr ninge.

Nzbrkr Drtwr

- 14 A' Yawe, nim Gct rnge,
X abrtrpo drtwrnge bam.
- 15 Arlapx ninge mz enqmi rngeng kcng tzayotilr
ninge,
Mz nzaclve-angidr-krm ninge.
- 16 Amrlz ninge, kxnzawz nem,
Mz nzarlapx-krm ninge murde nzaodu-krm
tqyc tqyc.

Nztalvzokr Nabz

- 17 Yawe, bzkq rlrpx-ngrn nzkqle-krnge nim
nzamyati-ngrm drtqnge.
A' amyatibz drtq kxdrka'-ngrng murde
napwrkilvc-ngrdr nzbz-krdr.

- 18 X na-aesakile natq kxnzpokiang x kxnzqlqpx-lzbqng,
Kcng tzxtrnga-ngrdr kxnztubqng.

Nzbrkr Drtwr

- 19 Myatxpx zlwz da kxmrlzti kcng tqyrlqq nangi
sc krkcng tzamrluelr nim.
Murde aelwapxpe-ngrn kx aclve-zpwxq
krkcng tzrlatrpzng bam.
- 20 Leplz nemqng nzrlapxng mz drtwr kx nzyrlq
enqmi rdrng x nznelvztingr nidr,
Murde amnc-aepztrpzme nidr bam.
- 21 Yawe, qlqpx-ngrne nim nzaodu-krm ninge.
Murde mzli kc enqmi rngeng tztu-ngalelvz-
ngrdr lrpalc nyznge, mnc-zpwxm mz nze-
tukr nivz lrm.
- 22 Mwxlrz murde opxm kx maszlrpx-ngrn ninge.
A' xlrme nzqle-krnge nim kx naokatrq
ninge.
- 23 Nigu leplz neng Yawe naka-lzbqzbzku bade.
Murde aclvele kxnzvz-nqblq-zpwxlr nide, a'
ayrplatipxle kxnzqlqpx-lzbqng.
- 24 Bzkq nabzgu tzprlzm, a' natu-amqngiku
Mz nzbrtikr drtwrgu nide.

Sam Kranzpnu-tq-nrade-li (32)

Nzawingr Mz Nzipqpxngr

Kzdq nzaongr drtwr kx yr Devet.

Naplzpxbzku Alwx Rgung Mz Yawe

- 1 Doa kx nzipq mz alwx ngrde
Drtwrde elalz-zlwzm.

- 2 Murde mz nzobqkr Yawe trvz-rbrpeu.
A' plzpxle alwx rdeng murde ma tqyc-kapq
da kxtrka mz nabzde. ☆
- 3 Yawe, mzli kc tqpxtpx-ngrne nzplzpx-krbo
alwx rngeng bam,
Drtqnge satx zlwx mz nzetq-zvz-krde.
- 4 X drtqnge tropx-pnzu mz nzayrplapx-krm
ninge ngrlx x mz nrlckxbq.
X yangrngatxpex nzapu-krnge lxbi kcng tqn-
gibr mz nepi.
- 5 Pnzpe drtwrnga kx naplzpaxbo alwx rngeng
bam.
X mz nzplzpx-krboleng, trpnzngr kx yrlq-
kapqbo bam.
- Delc tqipqpe-ngrn ninge,
X katxpx-ngrbzme nzmrlpukr alwx rngeng
amrlx.
- 6 X nigr leplz nemqng nakrka'bzkr bam mzli ka.
Murde mzli kc nzxpungr na-apune-ngrmle
nrc kc tqoda,
Trtxpnzngr nzkrly-krmlr nigr.
- 7 Nim me rlakitr x ayrbqpxq ninge mz da
kxpztz.
Mzli lc tqxlrx nabz kxyrlvi kx nim nou
nzrlapxngr.

Navz-nqblqku Natq Yawe

- 8 Rpm Yawe kx, "Sa na-aelwa-ngrbo bam lrpzki
kc nao-zliq,
Mz nzmailz-krnge nim.
- 9 A' bzkq apuq hcsi kx narde mqngi,

Kx vz-nqblqle me pnz drtwr ncblo mz nqvi
kcng tzpetrpz bade.”

¹⁰ Kxdrka'-ngrng sa na-ayrplapxng mz alwx ngr-
drng.

A' nigu kcng tqbrti drtwrgu Yawe sa namcku
kx aodu-zvzle nigu.

¹¹ Nigu kxnztubqng na-angrlvz-ngrgu Yawe.
Na-abrtz-ngrgu nide.

Sam Kranzpnu-tq-nrade-tq (33)

Angrlvzku Yawe Mz Nabz Kxyrlvi

Nabz ne Devet.

Nabz KxmRNA

¹ Naelalvzku Yawe, nigu kx nztubqng.
Murde mrlzvxi nzglqpx-krngu nide.

² Na-angrlvzku nide mz nabz kx yrlvi mz nzaw-
ingr,

X mz nzayrni-krngu gita x ukzlele.

³ Nangr-ngrbzku bade nabz kxmRNA,
Mz nzmqlvz-krngu nide.

⁴ Murde natqdeng amrlx tubq-esz'ngr,
X da amrlx kcng tqaletileng takitrde nzbrtikr
drtwrgu.

⁵ Mrlz bade da kx mrlz x tubq.
X mz nrlc tulvzo nzaodukr Yawe tqvzpe
tqvzpe.

Kxrpaz

⁶ Yawe wz-ngrde bongavz mz natq kx kapxle,
X nepi, temz, x vri amrlx mz nzymne-krde.

⁷ Ata-lxbltrle dcpwe me esz',

- X yrlqzbze bz ngr prla amrlx.
8 Nigu leplz amrlx mz nrlc, ncblo, olvz, x doa
kxnztopwzng,
Na-amrlueku x na-amatqku Yawe, Kxrpalz.
9 Murde wz-ngrde nrlc mz nzycmne-krde,
X mz nzrkapx-krde natq dekc tqycngr.
10 Yawe atrkatile drtwr kx nzyrlq leplz,
X ngi-batrpzle trnzngidati-kru mrkc tqpnz
drtwrdr.
11 A' drtwr kx yrlqleng ngidati zvz,
X nqmq nr nabzde tqvzpe tqvzpe.
12 Sa namrlzbz mz lr drtqbr kcng tzangioldr Yawe
murde nide Gct rdr.
Murde leplz kcng tqmcpzle kx nangi nedeng
nzabrtz-zvzng.

Lr Nrlc

- 13-14 Yawe obqom mrkc tqwxbuo-ngrmle mz tron
nyzde Heven,
Mz nzmco-krmle leplz amrlx mz nrlc ka.
15 Ngi batrpzle nzao-krdr drtwrdr,
X krlzle da amrlx kcng tzalelrng.
16-17 King traovxiou mz nzxplrkr ami nede.
X ncblo ngr vea tr-rlapx-kzu mz nzxplr-krde
x hcsi nede.

Kxarlapx Kxokatr

- 18 A' Yawe kc tqaclvele krkcng tzamatqlr nide,
X nzbrti drtwrdr nzaodu-zvz-krde nidr.
19 Arlapzle nidr mz nzbzngr,
X axplrle nidr mz mzli r dzbi.
20 Mnc-xgleku Yawe nzokatr-krde nigu.
Murde nide temz ngr lomrgu kc tqyrputrngr
nipna.

- 21 Abrtzlvzku nide,
X drtwrgu abtrtpzku mz drtqde kxtr.
22 Krka'ku kx Yawe na-aodu-zvzle nigu
Mz nzbrtikr drtwrgu nide.

Sam Kranzpnu-tq-nrade-pwx (34)

Kxrka X Kxokatr

Nabz ne Devet,
mzli kc narpi-ngrbz nalukurnr-ngrde mz mz
Abimilek, kc tqmapulr-ngrde nide x sc tqvzpe.

Kz dq Nabz Ngr A, B, C

- 1 Awi-zvzbo mz Yawe,
X tramawxu nzglqpx-krnge nide.
2 Bilvz-zvzx Yawe mz nabznge,
Murde nimu kx nzaetqzbz drtqmu na-
abrtzlvzamu da kcng tqaleleng.
3 Clve Yawe doa x da amrlx. Naglqlzku drtqde.
X napipx-lxblr-ngrgu nzetu-krde.
4 Da kcng tqmwxlrtix, arlapxpebz Yawe ninge mz
da lcng amrlx.
Murde mzli kc tqkrka'-ngrbo bade, ayzlumle
natqnge.
5 Elr! Na-abtrtpzmu drtwrmu mz Yawe, murde
ma drtqmu tqmya,
X na-abrtzlvzamu nzokatr-krde nimu.
6 Gct, mzli kc nzmnc-krnge tqtrka-ngrde, arlapxq
ninge,
Mz nzatutr-krm nzkrka'-krnge.
7 Ili! Enjrl ne Yawe arlapxle leplz mzli kc drtqdr
tqetq-ngrde,
Murde aclvele krkcng tzmyatitrlr Yawe.

- 8 Jzsamu ena nzmrlzkr Yawe x na-abrtr-krbzmu
drtwrmu bade.
Murde krkcng tqaclveleng nzabrtz-zvzng.
- 9 Kxnzvvz-nqblqlr natq Yawe nznrgiscng da am-
rlx.
Delc nimu leplz nedeng na-amrlue-ngrnamu
nide.
- 10 Laion kx nzxplrng nzkrlzlr nzbrtalengr,
Leplz kx nvzv-nqblqlr Yawe, trpnzngr da kx
mrbrpxm badr.
- 11 Mrlxngeng x inyxngeng, lalztqmamu bange,
Murde na-alvztrpo bamu kxnamu nzamrlu-
engr Yawe.
- 12 ?Nike suti drtwrm?
?Nzlungr kxmrlz kxboi?
- 13 Obq zpwx, x bzkq pokiaq.
Bzkq ycmne-atrkatiq leplz,
- 14 Prszpx nqmq kxtrka. X ale zvz da kxmrlz.
X nasuti drtwrm nzmnc-zpwx-krmu badr
leplz mz nrw.
- 15 Rlxtibz ncblo kxtubq mz Yawe nzokatr-krde
nide.
X Yawe sa naxlrbzle nzkrka'-krde mz
nzacive-krde nide.
- 16 Sa napnanatile krkcng tzale-zvzng da kxtrka.
Trobqpwzu badr x mzli kc nabz-ngrdr, ani
txp wz nzmrbtrkr mz drtwr nidr. ☆
- 17 Takitrde nzxlr-krbz Yawe natq leplz kxnz-
tubqng mzli kc tzyrni-ngrbzlr bade,
Murde ngi nqmq krde nzokatr-krde leplz
nedeng.
- 18 Vz zvz nzesolvzti-krde krkcng drtwrdr tqvz,

- X nzamnc-lrpi-krde krkcng nabzdr tqyrnibu.
19 Wzpxtx zlwz nzxpukr ncblo kxtubq.
A' Yawe sa na-arlapxle nide mz da lcng
amrlx.
20 X mz nzacive-zpwx-krde nide,
Trpnzngr nrvr ngrdeng kx nztavxi. ☆
21 Yawe sa na-ayrplapxle kxdrka'-ngrng kcng
tztrkalr-ngrdr kxnztubqng.
X nqmq krdr lc tqtrka sa nanibq-moule nidr.
22 Zvz Yawe nztu-krbzle mz nibr kxnzawz ne-
deng.
X trpnzngr nzayrplapx-krde krkcng tzabrtr-
pzlr drtwrdr bade.

Sam Kranzpnu-tq-nrade-nzlvqn (35)

Yawe, Amyatibz Drtq Krkcng Nanibqlr Ninge
Nabz ne Devet.

Enqmi Rngeng

- 1 Yawe, tu-ngalelvz ninge, murde enqmi rngeng
nztu-ngalelvz-kzlr ninge,
X vecamu badr krkcng tqveckr badr.
2-3 Yrlqbz temz ngr lomrm kc tqyrputrngr nipna,
X twzm popz' x nipna scmng,
Mz nzarlapx-krm ninge mz ncblo kcng tzmaneu-
tilr ninge.
X apqtrp drtwrnge kx tume mz nibrng.
4 Aovxiong x amyatibz drtq leplz kcng tzipilr
nanibqlr ninge.

☆ **Sam Kranzpnu-tq-nrade-pwx (34):20** Jon 19:36

- X krkcng tzipilr na-atrkatilr ninge, nabzdr
nzmu natalvzo x nadwaszlr nim.
- 5 Atwzlr-ngrm enjrl nem mz nzmaneuti-krde
nidr.
Na-apusr-ngrde nidr leu kxglr kxyrklz kcng
tqvXu-pulrtine nenq.
- 6 Navoneng mz lrpzki kx miglq x tu r nzlo,
Murde nataong mz nzdwasz-krdr enjrl lc.
- 7 Kxmule-esz' trpnzngr da kxrka kx alebo badr,
A' se tzatu-kapqng br scdr x tzeqng gq mz
nzlolvz-krdr ninge.
- 8 Mz drtwrnge mrlz nzpwrkilvc-krdr nzodatingr
nidr,
Mz nztao-mou-krdr mz br x trtxki kcng
tzyrlqlr.

Nzayzlu-ngrmlr Nivz Lrng Mz Da Kxrka

- 9 Gct, mzli lcde sa na-abrtzlvzx nim,
X drtwrnge elalzm mz nzarlapx-krm ninge.
- 10 X mz nabznge atwrnrngr, sa narpix kx,
“Trpnzngr kx apule nim.
Murde arlapxq kxtrnzplung mz mq kxnzx-
plrng,
X kxtrpnzngr scdr zmatq mz kxnzrngiscng
zmatq.”
- 11 A' kxrka'-ngrng nzabetitrlr ninge mz da kx
tralewxu.
Nzrpilr kx ninge kc tqrwzng dalr nzkx-
pungr.
- 12 Alebo badr da kxmrlz, a' nzayzlu-ngrmlr mz
da kxrka,
Kx talvzongr nabznge.
- 13-14 Mz nzyagox-krdr, vzti drtwrngeng.
X axtx-zvzx dakxnzng,

X biox narngē mz nzkrka'-krngē nidr,
Da kc tqwaisr-ngrne mzlengeng x kztengeng.
Murde yc-zlwzngr drtwrngē nidr,
Apule kx vzngr drtwrngē x yrnitix lxenge
mzli kc tqbz-ngrde.

15 A' mzli kx mnc-ngrne mz nzkxpungr,
Nzyrlwr-lxblrng mz nzyrpalelvz-krdr ninge.
Leplz kxtrkrlzwxung delcng tzatrkatī-zvzlr
ninge.

16 Nzxtunga-ngrdr ninge mz da kx prtīlzlēng
ninge,
X nzmadvtimlr nqngidr bange.

Arlapx Ninge!

17 ?Yawe, nzatrkatīngr ninge lc, nakrlzbzle mzli
kznike?
Arlapx ninge mz leplz lcng tzapulr laion kx
nangqdr ninge.

18 X sa na-awibo bam mz mz leplz nemqng
Mzli kc nayrlwrngr mz nzangio-krgr nim.

19 Leplz lcng nzpctxpx-krdr ninge trpnzngr
noude. ☆

Bzkq rlr-ngrbzme badr nzabrtzlvz-krdr nzkxpu-
krngeng,

X nzyrpalelvz-krdr nzvzkr drtwrngē.

20 Trnzkrīlzlrū nzymnengr mz nrwx.

A' nzpikiti-zvzlr krkcng tzmnc-lrping mz ma
nyzdr.

21 X nzpībqti-kzlr ninge mz nzrpi-krdr kx,
“Eke! A' mcpekr da kxtrka kc tqaleq.”

Ayrplapx Nidr!

- 22 Yawe, krlzq nikeng nzalemlr bange.
Bzkq mnc-lrpiq x obqlvztx-ngrn nidr.
- 23 A' vzm, tum mz nibrnge,
X ota-ngrbz ninge.
- 24 Bzkq rlr-ngrbzme badr nzbilvz-krdr ninge.
A' pim bange trnzvz-rbr-krpwc'u murde
tubqq mz nzryrlq-krm drtwr.
- 25 Bzkq rlr-ngrbzme nizrpi-krdr kx sc tzaovx-
iopelr ninge,
X me pnz drtwrdr ngidape.
- 26 Amyatibz drtqdr krkcng tzabrtzlvzlr nzetqkr
drtqnge.
Krkncg tzobqszolr ninge drtqdr nzmu
namya-zlwzng mz mz leplz x
namanepeng.
- 27 A' kztengeng kcng tzsuti drtwrdr kx natubqbo
mz nzobq-krm, batrpz badr nzmqlvlz-
krdr nim,
Mz nizrpi-zvz-krdr kx, "Yawe, myalz-esz'-
ngrn! X abrtzlvzq nzmnc-zpwxkr kxn-
zawz nem."
- 28 X mz z bq lc sa naglqlz-zvzx nim,
Mz nzangrlvz-krnge nztubq-zlwz-krm.

Sam Kranzpnu-tq-nrade-esz'mz (36)

*Brti Drtwrnge Kx Sa Na-aovxioq Kxdrka'-
ngrng*

Nabz ne Devet, kxnzawz ne Yawe.

- ¹ Gct, nzmncngr kxtrka vdz-zvzm mz nabz
kxdrka'-ngrng,

- X sc tqrpipeline badr kx, “Bzkq amrlueamu Gct.” ☆
- ² X batrpzle nzglqpx-lzbq-krdr.
Murde nzzrpilr trmcwq alwx rdrng x trna-ayrplapxwq nidr.
- ³ Natqdr trka-esz'ngr x yctr-ngrpwz nzpokiagr.
Delc trtxpnzngr nzale-krdr da kxmrlz x tubq.
- ⁴ Mz nrlckxbq sc tzaoti drtwrdr nzryrlq-krdr drtwr kxtrka.
Nzpxtxpx-ngdrdr nztu kxtubq mz nzmrlzkr badr lrpzki kx vz-rbr.
- ⁵ Yawe, nzmyatxlzkr nzaodu-zvz-krm
X nzangidati-zvz-krm natqm nzkrllzlr bon-gavz. ☆
- ⁶ Nztubq-krm vzdz krlzbzle newz kxnmymalzg, x vzo kz la me boongr.
Murde aclve-zpwxq leplz x animol mz nzzsakilrgr.
- ⁷ Gct, nzaodu-krm leplz mrlz-zlwzm bagr,
Murde apusr-ngrm nigr nei kio kcng tzwxbulvzong lxedr.
- ⁸ Mz nzzrka-zvz-krm nagr dakxnmzg, dakxnmzg lcng yctxpxng zvz.
Murde avzo-zvzme zmrlz ngm bagr, apule lue kc tqyrletx alo.
- ⁹ X nim narlue r nzlu-krgr,
Kc tqapu-zvzmle bagr nzyrlelz-krm aulz.
- ¹⁰ Yawe, navz zvz nzaodu-krm nigr kcng tzvz-nqblqr nim,
Mz nzamrlz-krm kx nabzdr tubq.

☆ **Sam Kranzpnu-tq-nrade-esz'mz (36):1** Rom 3:18 ☆ **Sam Kranzpnu-tq-nrade-esz'mz (36):5** Sam 57:10; 71:19; 103:11; 108:4

- 11 Bzkq rlrpx-ngrn mq kxdrka'-ngrng nzlolvz-
krdr ninge,
X kxnzqlqpx-lzbqng bzkq nanycdr nznzlv-
zolzr ninge.
- 12 Murde brti drtwrge nzaovxio-krm kxdrka'-
ngrng.
X mz nztao-krdr, trpengr nztulz-mou-krmlr.

Sam Kranzpnu-tq-nrade-rlimz (37)

*Kxnzabrtrpzlr Drtwrdr Mz Yawe Sa Natwzlr
Drtc' Kc Tqpile Nakabzle Badr*
Nabz ne Devet.

*Kzdq Nabz Ngr A, B, C **
A, B (1-4)

- 1-4 Abrtzlvz nzwztr-krbzme mz Yawe,
X sa nakabzle da keng tqpq mz nabzm.
Ale da kxmrlz x abrtprz drtwrm bade,
Murde namnc-zpwxq mz drtc' kc tqpile kx
nakabzle bamu.
- Bzkq witibz nelzm nzmncr kxdrka'-ngrng,
Murde mzli trnaboiu x sc tzbzpeng.
- Bzkq kcmnz-ngrbzme nzalengr da keng tzalelr,
Murde nzlu-krdr sa namrbc nzapulr nabr
kxglr mz mzli r nepi.

C, D (5-7)

- 5-7 Clveti-lzbq, x aenzli-lrpi mz nzabrtr-krbzme
drtwrm mz Yawe.

* **Sam Kranzpnu-tq-nrade-rlimz (37):** Drtc' ngi kz kzdq
nzymne-ebzpxngr, drtwr ngrde da kx mrlzting amrlx keng
tqesalz Yawe navzpxmqng mz mqde.

Bzkg nabzm talvzo mz nzrmc-krm leplz
kxznzrngiscng nzvz-nqblq-krdr nqmq krdr
kxtrka.

Da kx na-aleq, mnc-xgle txpwz Yawe,
X abrtprz drtwrm bade, murde sa naokatrle
nim.

Delc sa na-aelwapx-ngrbzle nzopxkr nztubq-
krm,
Mz nzapu-krde nilz r nepi kc tqvz-esz'ngr
mzli kc bea.

E, G (8-11)

8-11 Eu, bzkg drtwrm ngya x nabzm talvzo
Murde da lcng li ma tzkatrpnzng bam drtwr
kxtrka.

Eu, murde kxznabrtprzlr drtwrdr mz Yawe sa
nangi nyzdr drtc' kc tqpile nakabzle badr,
A' kxdrka'-ngrng sa namaszlrtpx-ngrng.

Glqpx Yawe kx mzli trnaboipeu x kxdrka'-ngrng
sc tzmrbpeng.

Kxmule-esz' rtangrtiq nidr a' trpengr nzmc-
krmleng.

Gct rlr-ngrbzle drtc' nyzde mz kxznavzo-lzbqng.
X sa na-abrtzng mz nzmnc-zpwx-krdr elr.

I, J (12-15)

12-15 Ili! Kxnztubqng x kxtrnzrngiscung na-
aclvetio-lzbqng

Murde kxdrka'-ngrng nzglalzpelnr toki r vea
x popz' scdr.

Ili! A' kxdrka'-ngrng na-aclvetio-lzbq-kzng
murde toki r vea scdr sa nanibq-moule
nidr,

X Yawe sa naplameitibzle popz' scdr.

Jzs Yawe krkcng tzryrlqng drtwr kx na-atrkati-
ngrdr kxnztubqng

X nzmadviti-zvzbzlr nqngidr badr.
 Jzsle nidr mz nzodati-krde nidr,
 X yrpalelvz-zvzle nidr murde trpnzngr
 nzxplr-krdr.

K, L, M, N (16-22)

16-22 Kxetu Yawe aclve-zvzle kxnvz-nqblqlr nide,
 X nikeng kabzle badr nangisc-alopedr.
 Kabzle badr dakxznng kxkqlu mz mzli r dzbi,
 X okatrle nidr mzli kx prtnzgr da.
 Lalztqmamu! Murde kxdrka'-ngrng sa nabzng,
 mz nzapu-krdr nrpq da kc tqplclqom
 X enqmi r Yawe lcng sa nangiliang na-apulr
 zsikapu.
 Mclr ncblo kxtubq, kxmule-esz' kxpipzne,
 Myaszpxle da kxkqlu kxngisc ncblo kx-
 drka'ngr.
 Murde Yawe sa nakatxpxbzle zmatq ngrdr
 kxdrka'-ngrng,
 A' sa naokatrle kxntubqng.
 Ncblo kxdrka'-ngrng nzbi-tpwzlr nzrlxngr, x
 trnzkrllzru nvrka-niwzlrngr.
 A' kxnmrlzng yc mz drtwrdr nvrka-niwzlr-
 krdr vzmi kxnamnzo-mzleu.
 Ncblo kcng tqamrlzng Yawe sa nangi nyzdr drtc'
 kc tqpile nakabzle badr.
 A' leplz kcng tqpilzeng sa nabzng.

O, P (23-26)

23-26 Oblamzngeng, bztipex nzmncngr, x ninge ka
 tqnginipenge lrtzlvz.
 X mcx kx nqm q kr ncblo kxtubq nide sele.
 Okatr-zvzle leplz mz nzrlr-nrbalq-krde dztudeng,
 x doa nedeng ngi da kxmrlz kx kabz Gct
 bade.

Yawe okatr-zvzle nide x doa nedeng trnzyr-
nitrpwzung nadr dakxnzng.

Pq mz drtwr Yawe nzaelwa-krbzle mz leplz
lrpzki kx nao-zlilr,

X mailz-zvzle krkcng tzabrtz-ngrdr nqmq
krde.

Pipxle kx kxmule-esz' nanycdr miglqpx, a' trnz-
taoung,

Murde sc tqlolvz-amqngileng.

R, S (27-29)

27-29 Rtxtiamu nibrmu da kxtrka, x aleamu da
kxmrlz,

Murde neidu nemung namnc-along mz drtc'
kc tqpi Yawe nakabzle bamu.

Rpi Yawe kx mrlz bade da kxtubq,

X okatr-zvzle kxznabrtrpzlr drtwrdr bade.

Sa naokatr-zvzle nidr,

A' doa ne kxdrka'-ngrng sa nabzng.

Sa nangi nyz leplz kxznmrlzng drtc' kc tqpi Yawe
nakabzle badr,

X sa namnc-alopeng elr.

T, V (30-33)

30-33 Takitrde kx ncblo kxmrlz dekc tqvzkipxm
natq ngr nzyrplapxngr,

X nikeng pitileng tubq.

Takitr-kzde nzkrly-angidr-krde Lou amrlx sc Gct
rde,

X nzlolvz-amqngi-zvz-krdeleng.

Vz zvz kxdrka'-ngrng nzaukzti-krdr leplz kxzn-
mrlzng,

Murde nanibqlrng.

Vz zvz Yawe nzkapx-krmle ncblo kxmrlz mz mq
enqmi rdeng,

X mzli kc natwz-ngrdr nide mz kot, trnza-
ovxiolru nide.

W, X (34-36)

³⁴⁻³⁶ Wz zvz mz nzabrtr-krbzmu drtwrmu bade,
Murde sa nangi nyzmu drtc' kc tqpile nakab-
zle bamu mz nzamatq-krde nimu.

X sa namcamu nzmaneutipx-krde kxdrka'-ngrng.
Xlrnamu natqnge. Mcx kzdq ncblo kx-
drka'ngr kxtrka-esz'ngr, x atrkati-zvzle
leplz.

Xplr-esz'ngr x obqszo-ngrde leplz amrlx.
X kxmule-esz' rtangrtix nide, a' trmcpewxu,
murde mrbrpe.

Y, Z (37-40)

³⁷⁻⁴⁰ Yrlq angidr mz drtwrm ncblo kxmrlz kx-
tubq, murde mnc mz nrw, x
X doa kxnzmika mz neidu lrde nzqqlu-
zlwzng.

Yrpalelvzx kxdrka'-ngrng murde sa nabzting,
X doa lr neidu lrdr sa nayrkrtxong.

Zvz Yawe na-arlapxle kxnztubqng.
Murde nide me nzrlakitr lr mz mzli r nzxpu-
krdr.

Zvz Yawe na-arlapxbzle nidr mz mq kxdrka'-
ngrng,
Murde nzbtrti drtwrdr nide nzokatr-krde
nidr.

**Sam
Kranzpnu-tq-nrade-rtqgmz**

(38)

Zmrlepu R Alwx Rngeng X Nzatrkatikr Enqmi
Rngeng Ninge
Nabz ne Devet.

Alwx

- ¹ Yawe, kxmule-esz' ngyati drtwrm ninge,
A' bzkq ayrplapxq ninge.
- ² Murde nipna scmng tupe bange,
X pnzplrope-ngrn ninge.
- ³ Xngitxtr-zlwzpex nzngyatikr drtwrm ninge.
X yangrngazlwz-ngrne alwx rngeng.
- ⁴ Zmrlepu r alwx lcng sc tqayrngzpupele ninge,
X apupex ncblo kx boo mz alwx ngrdeng.
- ⁵ Nzngqngu-plxsr-krnge aetqpemle drtqnge,
Apule kxsqki kx mibi x brtu.
- ⁶ Alwx rngeng nzyrlamyro-ngrdr ninge.
Delc drle mzke' tqtao zvz mz zbq kang kqlu.
- ⁷ Nzyagox-krnge apule nyr kx ngcpxm mz nrkr-
drtqnge.
X nzxplr-krnge yrkrtpxpebz.
- ⁸ Nzetqkr drtqnge wibrti-zlwzpe-ngrde ninge.
X bztipenge nzyrningr murde drtqnge rkrkx-
zlwzpe.

Zyagox

- ⁹ Yawe, krlzpeq da amrlx kcng tqpq zlwz mz
drtwrnge murde namnc-zpwx.
- X xlrpe-kzpe' nzyrke-zlwz-krnge.
- ¹⁰ Mzli ka drtqnge mewepe x nzycmi-krnge vz-
ebirpengr,
X mzke' obqkipele mrkzble.

- 11 Kztengeng nzngangrpe-ngrdr ninge murde
kxsqki rngeng.
X kxnginingeng trnzesotrpepqngqu bange.
- 12 Krkcng tzipilr nanibqlr ninge,
Nzamwipelr trtxki rngeng.
X krkcng tzaetqmlr drtqng, sc tzipilr naodatilr
ninge.
X sc tzryrlq-zvzng drtwr mz nzatrkatikrdr
ninge.

Enqmi

- 13 A' opxm kx trxlrxu nzymnekr enqmi rn-
geng.
X trkrlzwxu nzymnengr.
- 14 Eu, apubo badr kx nradrtqde ngq,
X trayzlupwc'u natqdr.
- 15 Murde nim Yawe kx na-ayzclubzle nike nza-
lemlr bange,
Mz nzngini-krm Gct rngeng kc tqabrtrpo
drtwrngeng bade.
- 16 Bzkq rlr-ngrbzme nzabrtzlvz-kdrdr nzetqkr
drtqngeng.
X bzkq nzglqpx-lzbqng mz nzaovxio-kdrdr
ningeng.
- 17 Murde ycpe pipz nzodati-kdrdr ninge,
X nzetq-zvzkr drtqngeng tryrkrtpxpeu.
- 18 Naplztzpxx nzvz-rbr-krngeng,
Murde nzbatrplr nzkxnekr drtqngeng.
- 19 Enqmi rngeng nzxplrng x nzlu-zpwxng.
X nzkqlung kx nztrkati nivz ldrdr ninge.
- 20 Da kxmrlz kcng tqalebo badr, nzayzlumlr mz
da kxtrka.

Nzpxtxpx-ngrdr ninge murde vz-nqblqx
nzmncngr kxtubq.

²¹ Yawe, bzkq amnctxnq ninge esz'-krnge,
X bzkq mnc-zvzme rlr.

²² Kxetu, vz-anim mz nzokatr-krm ninge,
Murde nim Mevalu rnge.

Sam Kranzpnu-tq-nrade-rpwxmz (39)

*Nzlukr Leplz Mrbcnepwz Apule Nzyrplaokr
Nrc Kxesz'*
Nabz ne Devet.

Nzlu-krnge Mrbcnepwz

¹ Yawe, pnzpe drtwrge kx namnc-lrpitxpwo, a'
bzkq alex alwx mz nzlctr-krbz drtwrge
bam mz nzkxpu-krngeng.

Murde kxdrka'-ngrng lcng tzmnc-
aepztrpqng bange, ma tzxtrnga-ngrdr
nzlqngi-krm.

² X kxmule-esz' trycmnewxu,
A' nzkxpu-krngeng etunepx zvz, delc tqtalv-
zongr nabznge.

³ X mz nzaotikr drtwrge nzkxpu-krngeng, nz-
talvzokr nabznge mrilvzole ninge.

X mzli kc tqrbldm bange nzmnc-lrpi-krnge,
sc tqrpipebo bam kx,

⁴ “Yawe, nzlu-krnge mrbcnepwz. ? Memule
tqpxlavxpx-ngrbzme nzkxpu-krnge?
? Myx mzli kx naesakingr trnzmnc-zpwx-
krpwc'u lc?”

⁵ Murde nim kx amrbctrp nzlu-krnge. X mzli kx lutix ngi da txne mz nzobq-krm.

Nzlukr leplz mrbcnepwz apule nzyr-plaokr nrc kxesz'.

Bzqkq Ayrplatipx-zvzq Ninge

⁶ Nzwz-katongr ngi brmrda kr apule nounc kc trpnzngr nrade.

X mz nzbzkr leplz trpnzngr dztudrng kx natwzlr.

⁷ ?Kxetu nike naobqtipxx mz nzmnc-krnge lc tqngi brmrda?

Mwx namrlz nzbtri-zvzkr drtwrng nim.

⁸ Murde na-arlapxq ninge mz alwx rngeng amrlx, X kxnlzukurng ma tzyrpalelvzlr ninge.

⁹ Mzli ka, dcp xpe mz drtwrng kx vz-rbrx nzlctr-krbz drtwrng bam mz nzxpu-krngeng. Murde tubq nzayrplapx-krm ninge mz alwx rngeng.

¹⁰ A' bzqkq ayrplatipx-zvzq ninge,

Murde yce pipz nzbztr-krbo mz mqm.

¹¹ Mz nzayrplapx-krm leplz, odatibzme dztudrng kcng tqmrlzbz badr.

Apusr-ngrbzmeng da kx yrti ninr,

Murde nakrlzlr kx nzvz-rbrng mz nzobq-krm.

Nzlukr leplz mrbcnepwz apule nzyr-plaokr nrc kxesz'.

¹² Yawe, xlrn nzkrka'-krnge x nzyrni-krnge.

Murde nzmrbckr nzmncngr mz nrlc apunep-wzle nzwoukr betepu.

¹³ Ayrkrtpx nzetqkr drtqng x aotxpxbz drtqng,

Murde mwx na-abrtztz-kaix mzli kxpipz x
ninge kc tqbz ate.

Sam Kranzpnu-pwx (40)

Nim Lrpalvc Kx Mncpx-ngrmc

Nabz ne Devet kx yrbzle mz kxrmailz ngr dzbe
kxznzngng.

Xlrme Nzkrka'-krnge

¹ Yawe, sc tqaenzli-lrpipebo bam nzokatr-krm
ninge.

X mzli kc tqkqle-ngrne nim, xlrme nzkrka'-
krnge.

² Veczme ninge mz gq ngr nzbnzng x mz nabz
mu kxrluo.

Atuome ninge mz rplz kxetu, x trpengr doa
x da kx namwxlrx.

³ Alvztrpe' bange kc nabz kxmrna mz ngr-
glqlzng nim.

X mzli kc naxlrngr leplz nzng-kngele, sa
na-angiolr nim x na-abrtzpzlr drtwrdr
bam.

Abtrpo Drtwrge Bam

⁴ Namrlzbz mz leplz kcng tzabrtzpzlr drtwrdr
bam,

Krkng trnzprtrpwzung mz leplz kcng
tzglqpx-lzbq-ngdr x tzpokieng.

⁵ Yawe, nim Gct rgr x trpnzng x apule nim.

Aleme bagr da kxkqlu mz nzatutr-krm drtwr
kx yrlqq mz nzamrlz-krm nigr.

Drtwrnge yrpz'trpz nzrlwxng da lcng amrlx,
Murde nzkqlu-zlwzng.

Ka-lzbqbo Bam

⁶ Trsutiu drtwrm nyrka-ngrbz bam dalr nrlanc
ayrnrrngr x dalr nyrkatxngr alwx.

X tr-rlx-kzpe'u blz x animol kx na-angcom
mz olta nyzm.

A' da kx suti txpwz drtwrm nzxlr-krbo natqm,
Murde narlrpx-ngrbo nrkrdrdqnge bam.

⁷ Delc tqrpi-ngrbo bam kx, “Ninge kape.

Na-atutrx natq kcng tqyclzm mz Nzryrn-
grkxtr.

⁸ Gct rnge, abrtzlvzx nzale-krnge me pnz drtwrm,
Murde nabznge lolvz-amqngipele nzalvztr-
krmqng.” ☆

Nzyapwxtipx-krnge

⁹⁻¹⁰ Yawe, trnayrlq-kapqpou nzaodu-krm x
nzangidati-krm mz leplz nemqng.

A' sa napipx-zvzbo nrpa ngr nzarlapx-krm
nigr

Mz nzyrlwrpx-lxblr-krgr.

X krlzq kx vz zvz nzpipx-krngele.

Trmnc-zpwxwxu

¹¹ Yawe, krlzx kx yckqti zvz drtwrm ninge.

X nzaodu-krm x nzangidati-krm nzngini-
zvzmlr lrpalc kx mncpx-ngrmc.

¹² A' mzli ka, rblx nzrlwx-krnge nzxpungr amrlx
kx nzprtztimqng bange.

X alwx rngeng nzmrlvzolz ninge x nzayc-
kapqmlr bange da kxtubq.

Murde nzqqlu-zlvz-krdr nzmyaszpxlr nqngi-
narngē.

☆ **Sam Kranzpnu-pwx (40):8** Hibru 10:5-7

X nabznge tqtalvzo-zlwz-ngrde.

Krka'-mopwo Bam

- ¹³ Yawe, vz-anim mz nzarlapx-krm ninge.
Kxetu, rnekim mz nzokatr-krm ninge.
- ¹⁴ Okatrp ninge nzaovxio-krnge kxnzrpilr naodatilr ninge,
Murde drtqdr namya x naobqszong mzli kc nadwasz-ngrdr ninge.
- ¹⁵ X leplz lcng tzxtrnga-ngrdr ninge nelzdr navzdm
Mzli kc nametx-ngrmlr bange.
- ¹⁶ A' amrlz krkcng tzbtri drtwrdr nim
Mz rka-krbzme badr nzabrtz-zlwzngr,
Murde na-awi-zvz-ngrbzlr bam nzarlapx-krm nidr
Mz nzrpi-krbzlr kx, “Gct, nim kx myatxlz-esz'ngr.”
- ¹⁷ Kxetu, trxpplrwxu x trpnzngr scnge zmatq.
Bzkq mrbtr mz drtwrm ninge.
Murde nim txpwz Mevalu nge.
Bzkq asaq nzokatr-krm ninge. ☆

**Sam
Kranzpnu-pwx-nrade-esz'
(41)**

Yawe, Krka'-ngrne Kx Nayc Mz Drtwrm Ninge
Nabz ne Devet kx yrbzle mz kxrmalx ngr dzbe kxnzngrng.

Kxnzokatrng

- ¹ Namrlzbz mz doa kcng tzmrlztilr leplz kxnzma-
neng,
Murde Yawe sa naokatrle nidr mzli kc
nakxpu-ngrdr.
- ² Sa na-aclvebzle nzlu-krdr.
X trtxpnzngr nzrlr-krbzle nidr mz mq enqmi
rdng.
Delc tzipi-ngrbz kx Yawe amrlzpele lr
mrnyzdr Israel.
- ³ Sa naokatrng Yawe mz nzamrlz-mou-krde nrkr-
drtqdr
Mzli kc nayagox-ngrdr.

Enqmi Rngeng

- ⁴ **Yawe, krka'-ngrne kx nayc mz drtwrm
ninge**
X na-amrlz mou ninge.
Zyagox kc tqycpxm mz nabzng
Vzpxm mz alwx rngeng kcng tzatrkatilr nim.
- ⁵ Enqmi rngeng nzpibqtilr ninge,
Nzrpilr kx, “? Myx mzli kx nabz-ngrde,
murde namrbtxtr mz drtwr nide?”
- ⁶ Kzdung leplz lcng tzoklatimlr ninge, nzpokiati-
lr kx nzyc mz drtwrdr ninge.
A' nzrpilr nakrlzlr kxmu nzkxpu-krnge,
murde nayapwxtinedr mz mztea amrlx.
- ⁷ Nztrkati nivz lrdr ninge nzpikiti-lrpi-zvzlr
ninge.
X nzaoti txpwz drtwrdr da kxtrka kx nadwa-
timle ninge.
- ⁸ Nzrpi-awalr kx, “Mrlztxpe! Mzli ka prtilz-
zlwzpe zyagox kxtrka,
X mzli trnaboiu x sc tqbzpe.”

- 9 Mzli ka, kztenge kc tqabrtr-zlwzbo drtwrnge
bade,
X tqmukr ncdrr, nipe-kzde enqmi rnge. ☆

Nzokatrkr Gct

- 10 **Yawe, krka'-ngrne kx nayc mz drtwrm
ninge.**

Amrlz-mopwz nrkrdrtnge murde na-ayzlu-
mopwc' da kcng tqtrka tzalemlr bange.

- 11 X mzli kc trna-aovxio-ngrdru ninge,
Sa nakrlz-angidrpex kx abrtzlvzq ninge.

- 12 Sa naokatrq ninge nzale-krnge da kxtubq,
X namnc-alotrpebo bam.

Nabz Kx Yrkrpxngr Buk Kc Kai

- 13 *Naglqpxku Yawe, Gct r lr Israel.*

Mzli ka x tqyc tqyc, naglqpxku Yawe.

Buk Krali

Sam 42—72

**Sam Kranzpnu-pwx-nrade-li
x Kranzpnu-pwx-nrade-tq (42
x 43)**

Kxmule-esz' Nabznge Talvzo

Nabz ne nqvi lr Kora.

- 1 Gct, nzmingrti-zlwzkr drtwrnge nim
Apule animol kc drtwrde tqbrlxkz mqde lue.

- 2 Nim Gct kc tqllu x nzsutikr drtwrnge nim apule
nzbrlxkztikr drtwrnge lue kxbao.

?Myx mzli kx naxngi-ngrbo nzmnc-krme
bange?

☆ **Sam Kranzpnu-pwx-nrade-esz' (41):9** Matiu 26:23; Luk
22:21; Jon 13:18

3 Mz zbq kang kqlu yrni-zvzx x mnqtxpwo drlemzke' kx piz.

A' enqmi rngeng nzyrpalelvzlr ninge, nzyr-pimlr kx, “?Memule Gct rm trokatrpe-ngrdeu nim? ?Bzpe?”

4 Gct, mzli ka drtwrnge yrnibutx zlwz. A' dcpx mou mz drtwrnge mzli kc ena tqmailztr-ngrne leplz Mangr-nzangiongr nim.

Mzli lcde abrtz-zlwzkr x ngr-katokr mz nzglqlz-krgr nim.

5 **Kxmule-esz' nabznge talvzo x nelznge vzdzm,**

A' sa na-abrtxtrpwo drtwrnge bam.

Murde naglqlz-mou-ngrne nim kalr,

Mzli kc na-arlapxq ninge.

6-7 Gct rng, mzli boipe trnzkrlyze-krpou Israel.

?Memule tqpulio-zvz-ngrme bange nzxpungr mz nzapu-krde lue kxvo?

Nzvzdz-krm nelznge vz-ebirnpe-ngrm bange apule nrc kcng tzyrplalvzlr ninge.

X nztalvzokr nabznge xplr-zlwzpe apule nzyr-pukr lue kxtalio mz nabzde.

X ebio ngr srkau amrlx kcng tqatwzlr-ngrme nzalxlvrtine-zvzlr ninge.

A' nadcpx mz drtwrnge da kcng tqmyalz tqaleq Israel,

Mrkc tqyrlengr LueJodzn x tqycngr Newz Hemon x Newz Misa.

8 Murde vz zvz nzpulio-krme nivz lrm mz zbq kang kqlu.

X ngrbo bam mz nrckxbq vzmi nzkrka'-krnge murde nim Gct kx rkam nzlungr bange.

⁹ Gct, nim butqbr nyznge. ?Memule tqmrbrtitr-
pengr drtwrm ninge?

?X memule tqkxpu-zvz-ngrne

Mz nzaetqti-krm enqmi rngeng drtqnge?

¹⁰ Nzrpi-zvzmlr bange kx, “?Memule Gct rm
trokatrpe-ngrdeu nim? ?Bzpe?”

X sc tqvz zvz nzngzlilvzti-krdr ninge natq
kxtrka.

¹¹ **Kxmule-esz' nabznge talvzo x nelznge
vzdzm,**

A' sa na-abrtxtrpwo drtwrnge bam.

Murde naglqlz-mou-ngrne nim kalr,

Mzli kc na-arlapxq ninge.

(43)

¹ Gct, pipxbz mz krkcng trnzangiolru nim kx trvz-
rbrwxu.

Arlapx ninge mz mq krkcng tztrkating x
tzpokieng.

² Nim me rlakitr. ?Memule tqrlasz-ngrn ninge?

?X memule tqkxpu-zvz-ngrne

Mz nzaetqti-krm enqmi rngeng drtqnge?

³ Atwzlr-ngrm bange zyzlr ngrm x nzalvztrngr
angidrng,

Mz nzmailz-mou-krdr ninge Saeon, mz newz
kxtr nyzm.

Murde nakrlzlbz Mangr-nzangiongr kc
tqmnc-ngrn,

⁴ X na-angiox nim mz olta nyzm,

Mz nzngini-krm nou nzabrtz-krnge.

X na-angrlvzx nim mz nzayrni-krbo gita
bam.

- 5 **Kxmule-esz' nabznge talvzo x nelznge
vzdzm,
A' sa na-abrtxttrpwo drtwrnge bam.
Murde naglqlz-mou-ngrne nim kalr,
Mzli kc na-arlapxq ninge.**

Sam Kranzpnu-pwx-nrade-pwx (44)

Drtwrgr Esz'tipe Kx Sa Nabzpekr

Nabz ne nqvi lr Kora kx nzyrbzlr mz kxrmailz
ngr dzbe kxnzngrng.

Be Ngr Melrmqung

- 1 Gct, xlrpekr nrpa ngr da kxetuting kcng tqale-
bzme mz melrmqgrng mzli kc bqnc,
Mz nzpi-krmlrle bagr mzli kc.
- 2 Nzayrplapx-krm lr mrkzbleng apule lxbi kc
tzbolvzti mz nrlanc nyzm.
X petio-alzuq leplz nemqng mz drtc' nyzdr
mz nzamnc-zpwx-krm nidr.
- 3 Melrmqgr lcng trnzaovxiolru enqmi rdrng mz
toki r vea scdr x mz zmatq ngrdr esz'-krdr.
A' leplz nemqng nzaovxiong mz zmatq ngrm,
mz nzxplr-krm, x mz nzmnc-krbzme badr
mz nzaodu-krm nidr.
- 4 Gct, nim King rnge.
Nim kx rngi-batrp nzaovxio-krgr, nigr neidu
lr Jekop.
- 5 Milxtxopekr enqmi rgrng mz nzxplr-krm.
X rnzlvzokr kxnzatrkatilr nigr mz zmatq ngr
drtqm.

- ⁶ Murde trbrtiu drtwrnge popz' x toki r vea scnge
Nzarlapx-krdr ninge mz nzotangr.
⁷ A' ni-tpwzme kx arlapxle nigr mz enqmi rgrng,
Mz nzamyati-krbzme drtqdr.
⁸ Sa naglqlz-zvzkr nim.
X nzawi-krbzkr bam tqvzpe tqvzpe.

Enqmi Rgung

- ⁹ ? A' memule drtqm tqsatrpe-ngrmle bagr,
trokatrpe-ngrnqu ncblo ngr vea negrng?
Mzli ka rlrtx-ngrpwzme mz enqmi rgrng
nzamyati-krmlr drtqgr.
¹⁰ X ngi-batrpeme nzdwasz-krgr nidr,
X nztwz-krdr dztugrng amrlx.
¹¹ X rlr-ngrbzme badr nznibq-krdr nigr mz
nzapu-krgr sip,
X nzvzmilr nigr mz drtc' nyzdrng mz nzwz-
nrbaqltr-krbzkr badr.
¹² Apule kx amwabzme nigr badr mz narnabr kx
topwzne,
Mz nzapusr-krm nigr brmrda.
¹³ Lr mrkzbleng kcng tzmnc-aepztrpqng bagr
nznelvzlr nigr mz nzamyati-krmlr drtqgr,
X nzxtrnga-ngrdr nigr.
¹⁴ X neidu mz nrlc tulvzo nzobqszo-ngrdr nigr
Mz nzyrpalelvz-krdr nigr.
¹⁵ Aputr-zvzbo da kxtrka mz nzobqkr leplz lcng,
X drtqnge mya zvz.
¹⁶ Murde xlrn natq kxtrka kcng tzpimlr bange,
X mcx nzmnc-krm enqmi rngeng.

Vz-nqblq-zvzku Gct

- ¹⁷ Kxmule-esz' nzprtmqng bagr da lcng

A' trmrbrtru mz drtwrgr nim x Nzesz'tikr
Drtwrgu.

18 Kxmule-esz' traxtxpekru nim,
X o-zli-zvzkr nzti rm,

19 A' katrpzme nigr mz mq enqmi rgrng mz
nznzbrti-krdr nigr, mz nzapu-krdr kuli
kzpetong.
X nzaovxiolr nigr x kzdung nigr
nzyrtzmqpeng mz gq.

Nzkrka'-krgu

20 Gct rgr, nzmu navecp-x-lzbqmgr bam,
Mz nzangio-krgr gct kzble,

21 Tryc-kapqp-wzu bam,
Murde obqpl-xq nabzgr.

22 A' mz nzngini-krgr doa nemqng, vz zvz
nznibqti-krdr nigr,
Mz nzapusr-krdr nigr sip kcng tzmnc-
nabung mz nznibqngr nidr. ☆

23 Kxetu rgr, bz-kq esabl-qme. ?Memule tro-lxlvr-
ngrpwe'u bagr?
Vz-anim, x bz-kq pxt-xp-x-ngrn nigr.

24 Lxlvr-m bagr,
Mz nzdcpxkr mz drtwrm nzetqkr drtqgr x
nzkxpu-krgr.

25 Drtwrgr esz'tipe kx sa nabzpekr,
Mz nztangqgx-lz-krmgr mz drtc'.

26 Gct, vz-anim x okatrp nigr.
Arlap-x nigr murde aodu-zvz-q nigr.

Sam Kranzpnu-pwx-nrade-nzlvqn (45)

Nabz Ngr Nzyrlzkr King Kc Tqmyalz-esz'ngr
Nabz ngr nivz kx nzyr nqvi lr Kora.

Natqngeng

¹ King nge, krlc nabz nenge kx nangr-ngrbo
bam.

Nabznge esz'ngr natq kxmrlzting.

X nzngqpx-krm natq mz naonge

Apule nzyrlepx-krm lue mz butqbr.

² Nzobq-krm lqngipx-esz'ngr.

X natq ngr nzamrlzngr ngqpx-zvzm mz naom.

Delc tqamrlz-zvz-kzngr Gct nim.

Nim King Kx Xplr

³ Nim ncblo kxmyalz-esz'ngr x xplr zlwz mz
nzotangr.

Alvco toki r vea scm mz bxli rde kc mz
nrkalom.

⁴ Murde kalr mz nzvo-krm mz vea na-aovxioq
enqmi rmqng mz nzxplr-krm.

X nalolvz-amqngiq da kxtubq x leplz
kxnzavzo-lzbqng mz zmatq ngrm.

⁵ X nipna scmng natu x nalvctrng mz lomr
enqmi rmqng,

X lr mrkzbleng amrlx namnclzbzng bam.

X Kxnmcpx

⁶ Nzyrlqkr Gct lc nzngini-krm King tqyc tqyc,

Mz nzaclve-krm leplz nemqng mz nzmncngr
kx tubq-esz'ngr.

⁷ Mrlzbz bam da kxtubq, a' px-ngrn da kxtrka.

- Dekc Yawe, Gct rm, tqmcpxpe-ngarde nim mz
nzmyaszlz-krm kztemqng.
X tqglqlz-ngarde nim,
Murde na-aelule nim tolo ngr nzabrtzng. ☆
8 Lrpzmqng nzaeluti zvz mz tolo kx mnrtē
mrlzvxi.
X ncblo sc tzayrnibzng gita bam
Murde na-aelalzmle drtwrm,
Mz nabz ma nyzm kx mzte luli-esz'ngr.
9 X olvi kc nangi kwin ngrm tutrpz mz nrlarm
kxrtc, nzangrlopliti da kx nzwzng m z gol
kxpnapr.
Olvi lc nide kzdq inyx king kcng tzmncng ma
nyzm.

Olvz Rm

- 10-11 Nim la nangingim Kwin. Lalztqm bange x
aclvetio-lzbq.
Mzli kznike ncblo ngrm suti-zlwzng
drtwrde nim mz nzlqngivxikr mzpq,
Mnclzbz bade mz nzngini-krde King x Kxetu rm.
X bzkq matq-zlwzpe mz drtwrm trtem x
kxnginimqng.
12 Kxmule-esz' lr Taea nzrkabzng da kxlqlwx
bam,
A' bzkq nzbatrplzr nznzlvzo-krm me pnz
drtwr ncblo ngrm, kc tqngi king.
13 Mzpq lxngipx-esz'ngr m z n zprtr-krm ma nyz
king.
X lrpzmqng nzksilvztitr gol.
14 Nim kc tqkq lrpz kxluli nzvzmibzlr nim m z
king.

☆ **Sam Kranzpnu-pwx-nrade-nzlvqn (45):7** Hibu 1:8-9

- X kztemqng kx nzmnc-kamelrng nzvz-nqblqlr nim, mz nztutr-krbzmu mz mzte.
15 Mz nzprtr-krmu lc ma nyzde,
Drtwrmu elalzm x abrtz-zlwzamu.

Mrlxmqng

- 16 King rnge, doa ncblo kcng mztr namc mz nqvi lrm sa nangini-kzdr king, da kc tzwai melrmqdrng mzli kc.
X nangi-batrpzme nzacive-atwrnr-krdr drtc' nyzm.
17 Nabz nenge sa narkatrpz nabztq mz leplz nzamatq-zvz-krdr drtqm,
X nzglqlz-krdr nim tqvzpe tqvzpe.

**Sam
Kranzpnu-pwx-nrade-esz'mz
(46)**

Yawe Nide Lrpalc Nyzgu
Nabz ne nqvi lr Kora.

Me Rlakitru

- 1 Gct kc tqmyatxlz, nide me rlakitru x axplrle nigu,
X mz nzkqle-krqu nide mz mzli kx nzkx-pungr, okatrlle nigu.
2-3 Kxmule-esz' nengq aycngrlrle nrlc, x newz nzbrkaong prla,
X kxmule-esz' dxvo votrp x nrc oda,
X newz nzyngnrlr-ngdrdr kz nzyrpukr nrc kxetut-ing,
A' trmwxlrkuu murde abrtzpzku drtwrgu mz Gct.

Ngrlrvea Ngrgu

- ⁴ Gct kc tqmyatxlz mnc mz mztea kxtr nyzde,
Jerusalem,
Mrkc tqpulio-ngrmle nzabrtzngr bagu,
Mz nznigini-krgr lr mrnyzde.
Nzvzo-krmle bagu apule lue kx yrle-kato.
- ⁵ X rblx nzodatingr Jerusalem murde Gct mncm
bagu,
X naokatrle nigu mz z bq kxmrna.
- ⁶ A' mz nzxlrkr lr nrlc natqde nzmwxlr-zlwzng.
X ngyati drtwrdr nide murde aovxio-zvzle
ami ngr kandre amlrx.
- ⁷ **Yawe nide ngrlrvea ngrgu,
X nide lrpalc nyzgu.**

Lrpalc Nyzgu

- ⁸ Obqmmamu! Mcamu da kc tqale Yawe.
Murde aletile da kx nzodating mz nrlc ka.
- ⁹ Aesakile vea amlrx mz nrlc tulvzo.
Plameitile popz' x nipna x dalr vea amlrx x
rtclz-ngrdeng mz nyr.
- ¹⁰ X rpile kx, “Bzkq ota-zvzamu. A' metxpemamu
bange murde ninge txpwz Gct.
X ninge txpwz kx myatxlz bz mz neidu amlrx
mz nrlc tulvzo.”
- ¹¹ **Yawe kc tqrnir mncpem bagu,
X nide lrpalc nyzgu.**

Sam Kranzpnu-pwx-nrade-rlimz (47)

Yawe Kc Tqmyatxlz-esz'ngr
Nabz ne nqvi lr Kora.

Naglpqxku Yawe

- ¹ Nigu leplz amrlx na-ayrlewzku da
Mz nzngr-abrtz-kato-krbzku mz Yawe, Gct
rgu.
- ² Murde na-amrlueku nide kc tqmyatxlz-esz'ngr,
Mz nzngini-krde King kxmatq kc tqaclvele
nrlc.
- ³ Batrpzle nzaovxio-krqu lr mrkzbleng,
Mz nzmnczlz-krmlr bagu.
- ⁴ Nigu leplz ngr nqvi lr Jekop kcng tqmrlzting
Yawe,
Bilvzpeku drtc' kc tqmcpxbzle nangi nyzgu.

King Rgu

- ⁵ Mzli kc Yawe tqwxbuo-ngrmle mz tron nyzde
Mangr-nzangiongr,
Sc tqrvxupeku trpu x tqmalq-katopeku mz
nzabrtzlzvz-krqu nide.
- ⁶ Nangr-katobzku mz Yawe Gct rgu.
Murde nide King rgu, nangr-katobzku bade.
- ⁷ Naglqlzku nide mz nabz kxyrlvi,
Murde nide King r nrlc tulvzo.
- ⁸ X wxbu mz tron kxtr nyzde,
Mz nzaclve-krde neidu amrlx.
- ⁹ Kxnmzmailzlr lr mrkzbleng nzaxvctr-lzbqmqng
bagu, nigu leplz neng Gct r Ebraam.

Murde Gct kc tqmyatxlz-esz'ngr myaszpxle
king amrlx mz nrlc.

Sam Kranzpnu-pwx-nrade-rtqmz (48)

Nzmyalzkr Jerusalem, Mzteadau Nyz Gct
Nabz ne nqvi lr Kora.

Mzteadau Nyz Gct

- ¹ Yawe myatxlz-esz'ngr. X takitrde nzglqlz-krqu
nide
Mz mzteadau nyzde kc tqycom Saeon, newz
kxtr nyzde.
- ² Nide king kx rngisc zmatq. X Newz Saeon
myatxlz x mzte opx.
X Mzteadau nyzde rkatrpz nzabrtzkr leplz
mz nrlc tqlvzo.
- ³ Gct aelwapxpe-ngarde kx trpnzngr da kx nakx
mz drtqgu,
Mz nzmncpx-krmggu badr mz lrpalc nyz-
deng mz mzteadau lc.
- ⁴ Kzdung king nzvzmqng nztung me esz'.
Nzrpilr naotang badr lr mzteadau lc.
- ⁵ A' kx nzmclr nzmatq-zlwzkr mzteadau
Jerusalem,
Nzkctipx-ngdrdr x sc tzdwapeng mz zmwxlz,
- ⁶⁻⁷ Kc tqprtilzle nidr
Apule zvetq ngr drtq olvz kx narmika.
X nznrcti-lzbqng
Apule lcsu kxrtcnengr srkau ngr nounenq.

⁸ X mzli lcpwz, tqmnc-ngrgu mzteadau nyz Gct
rgu,
Sc tqmcpe-kzku kx Yawe nide Gct kc tqrninr.
X atu-amqngi-zvzle mzteadau lc,
Da kc tzwai nzyapwxtipxkr melrmqgung le
mzli kc.

Mangr-nzangiongr Gct

- ⁹ Gct, aoti zvz drtwrgr nzaodu-krm
Mz nzvztr-krgr Mangr-nzangiongr nim.
- ¹⁰ Leplz amrlx mz nrlc tulvzo sa naglqlzlr nim
mz nzxlr-krdr nzmyalz-krm.
Murde nzacive-angidr-krm tubq.
- ¹¹ X nigr lr Israel amrlx nzabrtz-ngrgr kz
Nztubqkr da kx pipxq.
- ¹² Nigu leplz neng Gct, naolvxtiku Jerusalem,
X nabrti mzku mrkcng tztu-ngrdr kxnzaukz
nedeng.
- ¹³ Naobqlvzti-zpwxku drkq ngrdeng x
nzmqngikr lrpalc ngrdeng,
Murde nayapwxtipx-zvzbz mz doa ne doa
negung.
- ¹⁴ Nzmyalzkr Gct rgu sc tqaelwapx-lzbqngr mz
mzteadau lc.
X sc tqmailzle nigu tqyc tqyc.

Sam Kranzpnu-pwx-nrade- rpwxmz (49)

Leplz Amrlx Sa Nabzng

Nabz ne nqvi lr Kora.

Narnabr Ngr Nzlu-alongr

- 1-2 Lalztqmamu x xlrmmamu natqnge, nimu neidung mz nrhc tulvzo,
Kxmule-esz' nimu kxnetung, leplz txneng,
bcnyrng, x kxtrnzrngiscung.
- 3 Murde natqnge otxpx,
X alvztr-ngrne nzyrplapxngr,
- 4 Mz nzpipx-krnge natq lrtzlvz ngrgung.
Murde nayokaetipxx drtwr ngrdr mz nabz
nenge.
- 5 Kxmule-esz' kxpux mz nztu-ngalelvzkr enqmi
rngeng ninge,
A' trmwxlrxu.
- 6 Murde kxdrka'ngr lcng nzabrtrpzlr drtwrdr mz
trau,
X nzglqpx-lzbqng mz nzngini-krdr bcnyrng.
- 7-9 A' trpnzngr kxrkrly nzxpepx-krde nzlu-krde
esz'-krde.
Murde ncblo trtakitrdeu nzkapx-krde
narnabr ngr nzlu-alongr kx yrlq Gct,
Kxmule-esz' ka-atwrnr-ngrde trau x dztudeng
amrlx.
Murde rblx nzxpe-krde da kx na-arlapxle
nide mz gq.

Leplz Amrlx Sa Nabzng

- 10 Leplz amrlx sa nabzng, kxmule-esz' kxnzyr-
plapxng o kxnznqngung.
X dztudrng amrlx sa nabzszbzlr mz kzdung
kz leplz.
- 11 X kxmule-esz' mzli ka nzrnginyzng drtc',
A' gq lrd drla nangipe ma nyzdr mz nzmnc-
alope-krdr elr.
- 12 **Da amrlx kcng tqmatq mz drtwrdr sa
nayrkrpx-kzng.**

**Leplz sa nabzng da kc tzwai animol
amrlx.**

- ¹³ Lrpzki r kxnznngqngung kcng tzabrtrlr drtwrdr
mz nidr esz'-krdr x mz dztudrng,
Yrkrtxpxpwz mz nzbzngr.

Kxmule-esz' Bcnyrng

- ¹⁴ Apule kx nzbzngr nide kxetu rdr kc tqmailzle
nidr mz gq lrdr,
Mz nzapu-krdr sip.

X kxnztubqng sa navzneng wq mrkc
tzyrtzmqngr namz ngrdr.
X mz nzmibi-krdr, nzyc-rlrubzng mz ma
nyzdr.

- ¹⁵ A' Gct sa naxpetrle ninge mz zmatq ngr
nzbzngr,
Mz nzarlapx-krde ninge mz gq.

- ¹⁶ Bzkq nabzmu talvzo mz nzmc-krmu bcnyrng,
X nzqqlunepxkr dztudrng.

- ¹⁷ Murde rblx nzrtwzmingr dztung mz nzbzngr.
Dztung la tqyc, a' nrkrdrdq la namibi.

- ¹⁸ Kxmule-esz' bcnyrng nzabrtz-zvzng mzli kc
tzlube-ngrdr,
X nzamatq leplz nidr murde sc tzakqlunepx-
zvzlr dztudrng,

- ¹⁹ A' sa navzo-kzng mz gq, da kc tzwai melrmq-
drng,
Mz nzmnc-alo-krdr mz nzlo.

- ²⁰ **Da amrlx kcng tqmatq mz drtwrdr mane x
nadr tryrplatrpwzu.
Leplz sa nabzng da kc tzwai animol
amrlx.**

Sam Kranzpnu-nzlvqn (50)

Blz Angidr Nangi Nzawi-ngrbz Mz Gct
Nabz ne Asaf.

Nzyrlwrkr Leplz Neng Yawe

¹⁻³ Yawe, nide Gct kc tqxplr esz'ngr.

X zluli rde pnamilxtile mzteadau Jerusalem
kc tqqlngi.

A' nrlc ycngrlrlzm mz nzvz-krmle,

Murde nyr wounepx kai mz nzangc-krde da
amrlx,

X nounenq o-ngalelvzle nide.

X kqlele lr Heven mz nzayrlwr-lxblr-krdr
leplz amrlx mz nrlc.

⁴ Navzmqng mz nzmc-krdr nztubqkr natqde,
Mz nzpipx-krde nzvz-rbrkr leplz nedeng.

⁵ X rpibzle mz lr Heven kx, "Vzmimamu krkcng
tzlxngitilr ninge,

X drtwrgr badr tqesz'ti mz nzangc-krmrlr
bange blz krdr, murde nayrlwr-ngalelvzlr
ninge."

⁶ X lr Heven nzrpilr kx, "Gct, nzacive-krm rsakrl-
rngr.

Murde tubqq mz nzryrlq-krm drtwr."

Gct Atubqtile Leplz Nedeng

⁷ Rpi Gct kx, "Leplz nengeng, xlrnamu natqnge.

Murde ninge Gct rmu x na-aelwa-ngrbo
mrkc tqvz-rbrtiamu.

⁸ Animol kc tqngi blz tqkamamu bange, trngiu da
kx myapxbz,

Mz nzangco-zvz-krmamuleng mz olta.

- 9 X trngi-kzu da kx myapxbz nzangc-krmamu
bange
Gout x kzu kxncblongr dalr nardzng nyzmu.
- 10 Murde dalr peto amrlx nyzngeng,
X wai-kzle kzu amrlx kcng tzmncng mz siu r
newz.
- 11 Utc ngr peto amrlx nengeng,
Nidr badr animol ngr nardzng.
- 12 Nzmu nabrtalex x drtwrnge brlxkz tr-rlxpcw'u
bamu da.
Murde nrlc nyznge x dalrdeng amrlx.
- 13 X trmuwxu ncvr kzu.
X tr-rmnqwxu mepyr ngr gout.
- 14 **A' blz angidr nangi nzawi-krmamu bange,**
X nzangidati-krmu da kx esalz-ngrmamu
bange.
- 15 X mrlz nzkrka'-krmamu bange mzli kc tqkxpu-
ngrnamu,
Murde naglqlzamu ninge kalr mz nzarlapx-
krnge nimu."

Alwx Ngr Kxdrka'-ngrng

- 16 A' rpibz Gct mz leplz kxdrka'-ngrng kx, "Trtak-
itrdeu nzyapwxti-zvz-krmu Loukxtr scnge,
Mz nzymnetr-krmu Nzryrngrkxtrng.
- 17 Murde pxtxpx-ngrnamu nzatubqti-krnge
nimu,
X rtctx-ngrnamu natqnge.
- 18 Alwx ngrmung nidr seleng:
Mrlzbz bamu nzngi-kzte-krmu ncblo kx pna da,
X nzprtr-ngrbz mz leplz kcng tzmwimi-
abeangeng leplz kx trngiu krnalzdr.
- 19 Ycmnetrpwzmu mz da kxtrka,

X naomu tresakiau nzrpi-twzti-krdr da kx
nzesabrtingr.

20 Pikiti-zvzamu kztemung,
X pibqti-kzamu mzlemung.

21 Mz nzale-krmu da lcng sc tqmnc-lrpinebo.
X rpiamu mz drtwrmu, mrlzm bange nzale-
krmuleng.

A' trtingr! Murde da kcng tqvz-rbrtiamu
delcng tqaplxtipx-atebo bamu.

Yawe Sa Na-ayrplapxle Leplz Kalr

22 “Mzli ka natekqtramu nqm q krmu,
Murde ma tqodatitxne nimu

X sc trpengr kx na-arlapxle nimu.

X bzkq mrbrtr mz drtwrmu nzamatq-krmu
ninge.

23 **Blz angidr nangi nzawi-krmamu bange.**

Murde narmctiamu nzarlapx-krnge nimu,
mz nzvz-nqblq-krmu ninge.”

Sam Kranzpnu-nzlvqn-nrade-esz' (51)

Nabz Leplz Kx Avzo-lzbq

Nabz ne King Devet,
kx yrle mz nibr nzymne-plztitr-krbz Profet
Neitzn mz nzmwimi-krde Batsibz.

Wztibz nabznge

¹ Gct, nayc mz drtwrm ninge,

X atubqtim nzvz-rbr-krngeng, murde aodu-
zvzq ninge.

² Wztibz nabznge mz alwx rngeng amrlx

Kcng tzatrkatilr ninge.

³ Murde opxpe mz mzke' nzvz-rbr-krngeng.

X plzpxbo nzesablqti-zvz-krnge nim,

⁴ X myapxbz nim kc tqxpqbrlr-ngrne

Mz nznrlvzo-krnge Loukxtr scm.

Delc, tubqq mz nzrpi-krme bange kx vz-rbrx,

X mz nzyrlq-krm nzayrplapxngr ninge. ☆

Ipq Ninge

⁵ Mrlzm bange nzale-krnge alwx

Murde mzli kc tqmncbe-ngrne mz nelz lx-enge, alwx rnge ycpebz.

⁶ A' suti drtwrm kx nabznge navz-nqblqle nzm-ncng r angidr.

Delc, na-alvztr-ngrn ninge murde nayr-plapxx.

⁷ Wzti-angidrbz nabznge,

Murde nzprki-krnge namyaszpxle nqbya r nrc.

⁸ Ipq ninge murde na-abrtzx,

X drtwrnga kc tqavzbzme naelalz-mop.

⁹ Bzkq obqtrpeq nzmyakr drtqnga mz alwx r ngeng,

A' ipqpxbz alwx rngeng amrlx.

Tekqtrpz Nabznge

¹⁰ Gct, tekqtrpz nabznge murde natubqx,

X amrnale mqngrnge murde navz-nqblqx nim.

¹¹ Bzkq maszlrpx-ngrn ninge mz nzmncr-krbo bam.

X bzkq katxpxq nzokatrkr Mqngm ninge.

- 12 Okatrp ninge murde na-abrtz-mou-ngrne
nzarlapx-krm ninge,
X drtqnge navq mz nzvz-nqblqngr natqm.
- 13 Zbz sa na-alvztrpo nqm q krmqng mz kxdrka'-
ngrng,
Murde nayzlu-mopwzlr bam.

Nawztrpo Bam

- 14 Gct, bzkq ayzlu-mope' bange nznibq-krnge
ncblo,
Murde na-angrlvzx nim mz nzarlapx-krm lc
ninge.
- 15 Kxetu, okatrp ninge
Murde naglqlz-ngrne nim nivz lrm.
- 16-17 Trabrtz-ngrwq nzangco-ngrm blz mz olta
nym.
A' blz kx mrlzbz bam nabz leplz kx avzo-lzbq
x plzpxle alwx ngrdeng.
- Delc trna-angco-ngrpwc'u blz mz olta nym,
A' avzo-lzbq-zvztxpwo bam.

Blz Kxtubq

- 18 Krka'-ngrbo bam kx naokatrpe' nigr leplz
nemqng
Mz nzamqngi-mou-krgr drkq ngr Jerusalem.
- 19 Murde nzangco-krmgr blz mz olta nym
navzpxm mz nzka-lzbq-krbzk bam.
X krlc blz kxtubq mz nzobq-krm.

Sam Kranzpnu-nzlvqn-nrade-li (52)

Kxetu Kx Atrkati Leplz Mz Zmatq Ngrde

Nabz ne Devet kx yrbzle mz kxrmailz ngr dzbe kxnzngrng, mzli kc Doek kc Edom tqvz-ngrbzle mz Sol mz nzrpi-krbzle kx, “Devēt mncpe ma nyz Ahimelek.”

¹ Kxmule-esz' nim ncblo kxetu kxmatq,
a' bzkq glqpx-lzbqq mz da kxtrka kcng
tqaleq,

Murde Gct vz zvz nzangidati-krde natqde.

² A' ryrlq-zvzq drtwr kx na-atrkati-ngrn leplz.
X mzli kc tqycmne-ngrn, natqm apule toki kx
malc, mz nzpibqti-krm nidr.

³ Nzmlrz-zlwz-krbz da kxtrka bam myaszpxle da
kxmrlz.
X mz drtwrm, nzpokia-krm myaszpxle nzrpi-
krm da angidr.

⁴ Nim Mepokia,
X abrtz-zvz-ngrn nzaetq-krbzme drtq leplz
mz natqmqng.

⁵ Delc sa nakilzpx-ngrm Gct nim ma nyzm mz
nzodati-alope-krde nim.
X sa na-ayrkrpxbzle nzlu-krm mz nrlc ka.

⁶ X kxnztubqng sa na-amrlue-ngldr Gct
nzayrplapx-krde nim.
X sa nayrpalelvzlr nim mz nzrpi-krdr kx,

⁷ “Mcamu ena ncblo kc trmnc-xgleleu Gct.
A' axplr-lzbq mz nzatrkatikrde leplz x
nztwz-krde trau kxkqlu mz zmatq ngrde.”

- 8 A' ninge sa na-apux nc olivi kc dzbrde
tqtu-amqngi mz nzmncpx-krmc Mangr-
nzangiongr,
Murde vz zvz nzbrtikr drtwrnge nzaodu-
alokr Gct.
- 9 Delc Yawe, sa na-awi-zvz-ngrbo bam da kcng
tqaletiqng.
X sa napipxbo mz leplz nemqng nzmrlz-
zlwz-krm.

Sam Kranzpnu-nzlvqn-nrade-tq (53)

Nzngqngukr Kxtrnzrlxngitiung

Nabz ne Devet kx yrbzle mz kxrmailz ngr dzbe
kxnzngrng.

- 1 Leplz kx nzngqngung mz drtwrdr nzrpilr kx,
“Trpnzngr Gct.”
Leplz lcng nzvz-rbrng x nzale-txpwzng da
kxtrka zlwz.
Trpnzngr leplz lcng kxtubq.
- 2 Gct mncom Heven, x sc tqmcomle leplz amrlx,
Mz nzmc-krde neke yrplapx mz nzrtangrti-
krde nide.
- 3 A' nzesablqtilr Gct amrlx ngrdr
x drtwrdr esz'ti mz nzale-krdr da kxtrka.
Trpnzngr nidr kxes' kxtubq. ☆
- 4 Delc tqrpinger Gct kx, “Leplz lcng tztrkang
tznibqtitxdr leplz nengeng
Nzapulr kx nznribqng da kx nangqdr.
X mrbrtr mz drtwrdr nzkrka'-krmlr bange.

?Myx kxmule, trnzkrzlru da kxtubq?”

⁵ A' mzli ka nzmwxlr-zlwz-krdr myaszipxpele
mzli kc.

Murde Gct sa napxtpx-ngrde enqmi rgung.
X drtqdr sa namya mz nzaovxio-alo-krqu nidr.

X namz ngrdr sa narlxbuliane-ngrbz Gct mz
nrlc.

⁶ Sutitx zlwz drtwrge kx Gct rgu kc Saeon na-
arlapxle leplz nedeng.

Murde mzli kc nayzlu-mou-ngrmle, namnc-
zpwsku badr.

X nigu lr Jekop drtwrgu sa naelalzm.

X nigu lr Israel sa na-abrtz-ngrgu da lc. ☆

Sam Kranzpnu-nzlvqn-nrade-pwx (54)

*Nzbrtikr Drtwrgu Gct Nzaovxio-krde Enqmi
Rgung*

Nabz ne Devet kx yrbzle mz kxrmailz ngr dzbe
kxzngrng,

mzli kc lr Sifz tzvz-ngrbzlr mz Sol mz nzrpi-
krbzlr kx, “?Krlzq kx Devet sc tqmnc-kapq mztea
nyzgr?”

¹ Gct, arlapx ninge mz zmatq ngr drtqm,

X aelwzpx-ngrbz nztubq-krnge mz nztu-
krbzme mz nibrge.

² Xlrm natqnge

Mz nzkrka'-krbo bam.

³ Kxnzaetqng drtq nzglqpx-lzbqng nzrpilr natzlr
ninge,

- X krkcng tzxpqbrlr-ngrdr nim, nzrpilr
nanibqlr ninge.
- ⁴ A' nim Gct kx okatr-zvzle ninge,
Mz nzngini-krm Kxetu rngc kc tqmnc-xgle-
zvzx.
- ⁵ Yawe Gct, ayzlu-mopwz badr da kxtrka kcng
tzwaisr-ngrdr ninge.
X nibq nidr murde nim kx brti drtwr.
- ⁶ Zbz sa na-abrtzlvzx nizrka-krbo bam blz mz olta
nyzm.
X na-awi-ngrbo bam nzmrlz-zlwz-krm.
- ⁷ Murde arlapxq ninge mz nzxpu-krngeng am-
rlx,
X okatrq ninge mz nzaovxio-krnge enqmi
rngeng.

Sam Kranzpnu-nzlvqn-nrade- nzlvqn (55)

Kxdrka'-ngrng X Kxamwale Kztede

Nabz ne Devet kx yrbzle mz kxrmalz ngr dzbe
kxzngrng, mz nzayrningr gita.

Nzkrka'ngr

- ¹ Gct, xlrn nzkrka'-krbo bam.
X bzkq drtqm satrp nzycmne-krbo bam.
- ² Lalztqm bange x ayzlum natqngc,
Murde nabzngc tropxpeu mz nztalvzo-krde.

Nzetqkr Drtq

- ³ Enqmi rngeng nzrkatrpgng bange nzxpungr,
Mz nzxngitr-krnge nzycmne-kato-krdr,
Mz nznzlvzo-krdr ninge,
X nzobq-krmlr bange mz zngya.

- ⁴ Nelznge vzdz-zlwzm,
Murde ycpe pipz nzbz-krnge.
⁵ Rnrcti-lzbqpenge mz zmwxl,
X nrkrdrtnge esz'pe-ngrde.
⁶ X rpix mz drtwrnge kx, "Nzmu nabxnge naycb-
zle, da kc tqwai bona,
Nalvcx x nartangrx me namnc-zpwx-ngrne.
⁷ Nalvctr-rlrux lzke,
X namnc-lrpix esz'-krnge mrlcde.
⁸ Na-anitxpwo nzrtangrti-krnge me narlakitrx
Mz tewa x nounenq."

Nzkrka'ngr

- ⁹ Kxetu, akipx kxdrka'-ngrng mz nzarlxlvr-
krbzme natqdr.
Murde nzota-zvzng x nznani-lzbq-zvzng mz
mzte.
¹⁰ Mz nrckxngrlx x nrckxbq
Mzte esz'tx-ngrpwx nzxpqbrrngr lou x
nzxpung.
¹¹ Nzodangr prt-zvzm mrlcng kqlu mz mzte.
X me nzamwangr da tresakipxp-
nzkxpung x nzangqngutingr leplz.

Kxamwa Kztete

- ¹²⁻¹⁴ Kztenge, mzli kc ryapwx-angidrki mz nzodu-
krgi,
X vztr-lxblrki mz Mangr-nzangiongr Gct.
A' mzli ka trngiu enqmi rnge kc tqxtrnga-ngrde
ninge,
A' krlc nim, kc tqmuki me esz' x line-zvzki.
X trngiu kxpptpx-ngrde ninge kc tqyrpalelvzle
ninge,
A' krlc nim, mrlxkztenge.

Mz nzatrkatigr enqmi rnge ninge
Nabznge trtalvzou x krlzx nzmnc-kapqngr,
A' nzamwa-krm lc ninge, kx mzlenge,
Delc tqvztx-zlwzngr drtwrnge.

Nzkrka'ngr

- ¹⁵ Gct, ayrkrpx-anibz enqmi lcng nabzdr x nzaokrdr drtwrdr tqdrka'ngr,
Murde napwrkilvc-ngdrdr nzbz-krdr.
- ¹⁶ Yawe, mzli kc nayrni-ngrbo bam,
Krlzx kx sa na-arlapxq ninge.
- ¹⁷ Murde sa naxlrme natqnge mz nourla, bea, x
mz nrlckxbq,
Mz nzkalz-zvz-krbo bam nzlckr drtwrnge x
nztalvzokr nabznge.
- ¹⁸ Kxmule-esz' enqmi rngeng nzkqlung, a' mzli
kcpe naota-ngrgr badr,
Sa na-amnc-zpwxq ninge mz mzlirdr.
- ¹⁹ Murde nim Gct kc nzacive-krde tqyc tqyc.
X sa na-ayzlume natqnge lcng mz nzaovxio-
krm nidr mz nzotangr.
- Murde nzpxtxpx-ngdrdr nztekqtr-krdr nqmq krdr,
X trnzamrlue-kzlru nim.

Kxamwa Kztede

- ²⁰ Mrlxkztenge lc, mzli kc nigr badr dzbede
kxes', a' mzli ka yrlqpx-lzbq mz nzesz'tigr
drtwrgr badr.
A' se tqrtwztipele nigr zngya tqotapekr badr.
- ²¹ Nzprlxpx-krde nivz narpi-ngrbz nide ncblo
ngrde,
A' mz nabzde la poi kx mu ncblo.
Mz nzymne-krde nide pakrle,
A' natqdeng malc apule toki r vea.

Nzkrka'ngr

²² Yawe, napipxbzkr nzkxpu-krgrng bam, murde
nalolvz-amqngiq nigr.

X tr-rlrpx-ngrwq leplz kxnztubqng nzaxtx-
krbzlr nzlxngiti-krdr nim.

²³ Murde sa nartco-ngrn mz gq lrdr

Krkeng tznibqng x tzpokiang,

Mzli lc tznginibe-ngdrdr obla.

A' sa na-abrtr-zvzbo drtwrnga bam.

Sam Kranzpnu-nzlvqn-nrade-esz'mz (56)

Mzli Kznike Mwxmlr-ngrne, Abrtrpo Drtwrnga

Bam

Nabz ne Devet kx yrbzle mz kxrmailz ngr dzbe
kxnzngrng,

mzli kc tzlolvzngr lr Filistia nide mrkc mztea Gat.

Okatrp Ninge

¹⁻² Yawe, nayc mz drtwrm ninge.

Murde enqmi rngeng nzkqlu-zlwzng.

X vz zvz nzmaneuti-krdr ninge x nzatrkti-krdr
ninge,

Murde nzipilr na-aovxiolr ninge mz
nznzlvzo-krdr ninge.

³ A' mzli kznike mwxmlr-ngrne,

Abrtrpo drtwrnga bam.

⁴ **Trmwxlrtiwxu zmatq ngrdr murde abrtrpo
drtwrnga mz natqm,**

Nim Gct kc tqglqlz-zvzx.

⁵ Yawe, enqmi rngeng vz zvz nzrtangr-krdr drtwr
kx na-atrkati-ngdrdr ninge,

Mz nzrkatr-zvz-krmlr nzxpungr bange.

⁶ X nzyrlwr-lxblrng me nzmnc-kapq-ngrdr,
Mz nzaukzti-krdr ninge, murde nanibqlr
ninge.

⁷ Bzkq rlr-ngrbzme nzdwa-krdr,
A' ayrplapxng mz zngya ngr drtwrm.

Abrtrpo Drtwrnge Bam

⁸ Krlz-angidrq nzrkrkxkr drtqnge.
Murde aplxtipxpeq nztaliokr drlemzke' am-
rlx, mz nzyrtio-krmlr mz buk scm.

⁹ X krlz-zpwxx kx mz nzqle-krnge nim, sa
navzme x enqmi rngeng nadwaszlr ninge.
Murde tu-zvzme mz nibrng.

¹⁰⁻¹¹ **Trmwxlrtiwxu zmatq ngrdr murde
abrtrpo drtwrnge mz natqm,**
Yawe, **nim Gct kc tqglqlz-zvzx,** x brti
drtwrnge natqm amrlx.

¹² X sa na-alebo bam da kcng tqpibo,
Mz nzrka-krbo blz ngr nzawingr.

¹³ Awi mz nzarlapx-krme ninge mz mq enqmi
rngeng.
Murde trpnzngr nznibq-krdr ninge,

X trmetxpou badr.
Gct nawztr-zvzbo bam, nzmnc-krnge mz
nrlc.

Sam Kranzpnu-nzlvqn-nrade-rlimz (57)

*Batrpz Mz Lr Nrlc Tulvzo Nzmc-krdr
Nzaovxio-krm*

Nabz ne Devet kx yrbzle mz kxrmailz ngr dzbe
kxzngrng,
mzli kc tqrlatr-ngarde mz butqbr mz nzdwasz-
krde King Sol.

Nayc Mz Drtwrm Ninge

¹ Gct, nayc mz drtwrm ninge mz nzaelwa-khme
bange nzmrlz-esz'ngr-krm,

Murde mnc-xglex nim mz nzmnc-zpwx-
krnge mz mzli nzkxpungr kxtrka.

X na-apux nei bona kc tqmnczbz mz nabx lxede,
Mz nztu-khme mz nibrnge, navz navz mzli
kx ayrkrpx-ngrn nzodangr.

² Gct, myalz-esz'ngn, x sa nakqlex nim,
Murde angidati-zvzq me pnz drtwrm mz
nzmnc-krnge.

³ Sa na-ayzlume natqnge Heven mz nzarlapx-
krm ninge.

X na-amyatibzme drtq krkcng tznzlvzolz
ninge.

Murde aodu-zvzq ninge,
X angidati-zvzq natqm.

Nzrtxtiolr Ninge Br

⁴ Nztu-ngalelvzlr ninge ncblo ngr nzodangr.

Spiz x nipna scdr nzapulr nqngi kx malc,

X natqdr nzaetq-krdr drtq apule nzrluplxtikr
toki r vea.

5 Lr Heven namclr nzmyalz-esz'ngr-krm.

X lr nrle namclr nzaovxio-krm.

6 Kxmule-esz' nabznge talvzo zlvz murde enqmi
rngeng nzrtxtiolr ninge br,
A' awi Gct, kx naprtz-moung mz trtxki kx
nzamwiti-ngdr ninge.

Sa Na-angrlvzx Nim

7-8 Sa na-angrlvzx nim mz nabznge atwrnrngr mz
nzayrni-krbo gita bam.

Murde abrtr-zvzbo drtwrnga bam.

Nilz r nepi adwalzmle ninge mz zbq kang kqlu.

A' mz nzdwalz-krmc mz nourla kx topwz,

Na-apule nabz nenge adwalzmle nepi,

Mzli lc naglqlzpex nim.

9 Kxetu, sa na-awibo bam mz mzlr lr mrkzbleng,
X na-angrlvzx nim mz mzlr neidung.

10 Murde nzaodu-zvz-krm myalz krlzle bon-
gavz,

X nzangidati-zvz-krm natqm. ☆

11 Lr Heven namclr nzmyalz-esz'ngr-krm,

X lr nrle namclr nzaovxio-krm. ☆

Sam Kranzpnu-nzlvqn-nrade- rtqmz (58)

*Kxdrka'-ngrng Nzapulr Ningidoe Kcng Tzr-
makxng*

Nabz ne Devet kx yrbzle mz kxrmailz ngr dzbe
kxzngrng.

☆ **Sam Kranzpnu-nzlvqn-nrade-rlimz (57):10** Sam 36:5; 57:10;
71:19; 103:11 ☆ **Sam Kranzpnu-nzlvqn-nrade-rlimz (57):11**
Sam 108:1-5

Kxnzetung Kxdrka'-ngrng

- ¹ ?Kxnzetung, myx kxmule, nzacive-krmu tubq,
X rsakrlrngr angidr?
² Trtingr! Murde yrlqamu drtwr kx atrkatile
leplz nemung,
Mz nzaetq-krbzm drtqdr mz nrlc ka.
³ Nimu kxdrka'-ngrng. X ale-zvzamu da kxtrka,
Yzuo pnz mzli kc tzmcngr mzpu.
⁴ Apuamu ningidoe kcng tzrmakxng
Mz nzatrkatik-krmu leplz.
⁵ X apu-kzamu kxnradrtqdr ngq murde pxtpx-
zvz-ngrnamu nzxlr-krmu nzyrni-krdr,
X nzayzlu-krbzm natqdr.

Nzayrplapxkr Gct Kxdrka'-ngrng

- ⁶ Yawe, ayrplapx leplz lcng tzapulr ningidoe, mz
nzyrvilz-krme nipna scdr.
X mz nzapu-krdr poi kz peto, taglctr-kzpz
nqngidr.
⁷ Mrlzvxitx nzbatr-krbzme nzmyakr nipna scdr,
X nzmrbkrdr na-apule lue kc tqmrbrlqo mz
drtc'.
⁸ X mrlzvxix kz nzapu-krdr zwqwwq r wagq kc tql-
rprnebz mq mz nzngrla-krde x mz nibrde
sc tqmrbrpe mou mz nztioqr nepi le.
X na-apu-kzlr itoto kx bz murde nzmika mzli
kc tqpoobe-ngrde.
⁹ Gct, mzli kc tzlube-ngrdr, apusrngr nidr nabr kc
tzikzti,
Mz nzodati-krm nidr mz zngya ngr drtwrm.

Nzabrtzkr Leplz Neng Gct

- ¹⁰ Zbz nigr kxnztubq nemqng sa na-abrtz-zlwz-
ngrgr nznibqti-krm kxdrka'-ngr lcng.

X sa naelalvzkr nzyrlekr mepyr ngrdr.

- ¹¹ X sa napibzkr bam kx, “Gct, da zpwxtx! Sa nakabzme da kxmrlzting mz leplz kxnz-tubqng, Murde nzacive-krm lr nrlc tubq-esz'ngr.”

Sam Kranzpnu-nzlvqn-nrade-rpwxmz (59)

Kxdrka'-ngrng Nzapulr Kuli Kzpeto

Nabz ne Devet kx yrbzle mz kxrmailz ngr dzbe kxnzngrng, mzli kc King Sol tqatwzlr-ngrde ncblo mz nzaukzti-krdr ma nyz Devet, murde nanibqlr nide.

Kuli Kzpeto

- ¹ Gct rng, arlapxbz ninge mz enqmi rngeng, X tum mz nibrng mzli kc naoti-ngrmlr ninge.
- ² Arlapx ninge mz kxdrka'ngr lcng, Tzkrzlzlr nznribqngr leplz.
- ³ Yawe, obqm! Ncblo lcng tzyrlwr-lxblrng nanibqlr ninge. A' trpnzngr da kxtrka kx alebo badr.
- ⁴ Kxmule-esz', a' se tzoliqtilr nztz-krdr ninge. Tulzm x vzm mz nzokatr-krm ninge.
- ⁵ Yawe, nim Gct kc tqrninr, Gct r lr Israel. Dwalzm mz nzayrplapx-krm lr mrkzbleng. X bzkq ycngr drtwrm krkcng tzyrlqng drtwr kxtrka.
- ⁶ **Nyzyluti-zvzmlr mztea mzli kc milzpq,**

**Nzapulr kuli kzipeto kcng tzkclwzng mz
nzvzne-krdr mztea.**

⁷ Drtwrdr nizamqmqlr x natqdr nzapulr toki r vea
kxmalc.

Mz drtwrdr nzrpilr trpnzngr kx rkrlztrpz x
trpnzngr nzayrplapxngr nidr.

⁸ A' nim Yawe, yrpalelvzq kxnmnc-mrbr lcng,
X xtrnga-ngrn nidr.

Temz Ngr Lomgr

⁹ Gct rngc, abtrtr-zvzbo drtwrngc mz nzxplr-krm,
Murde nim lrpalc nyzngc.

¹⁰ X krlzx kx sa na-aovxiox enqmi rngeng,
Murde naokatrq ninge mz nzaodu-zvz-krm.

¹¹ Yawe, nim temz ngr lomgr kc tqyrputrngr
nipna.

Nibqti nidr, murde leplz nengeng nadcpz mz
drtwrdr

Kx nim Gct kc tqayrplapxle kxnaleng alwx.

Aodaliti nidr mz zmatq ngrm, murde
nataong mz drtc'.

¹² Batrpz mz nzglqpx-lzbq-krdr nzatao-mou-krde
nidr.

Murde mz nzymne-krdr natqdrng ngi dalr
alwx, mz nzrpibqtingr x nzpokianger.

¹³ Odati nidr mz nzmilxtxo-krm nidr mz zngya
ngr drtwrm.

Murde leplz nakrlzlr kx nim Gct kc tqaclvele
lr Israel x lr nrhc tulvzo.

¹⁴ **Nyzluti-zvzmlr mztea mzli kc milzpq,
Nzapulr kuli kzipeto kcng tzkclwzng mz
nzvzne-krdr mztea.**

¹⁵ Nzrtangrng nadr dakxnzng me yctxpqng,

X drtwrdr nzamqmqrlr mz trnzkrllc-kru
nelzdr.

Lrpalvc Nyznge

¹⁶ A' sa nangr-kato-zvzx mz nourla kang kqlu,
Mz nzpipx-krnge zmatq ngrm x nzaodu-zvz-
krm.

Murde apu-zvzme bange lrpalvc nyznge
Kxrlakitrz mz mzli r nzxpungr.

¹⁷ Sa na-angrlvz-zvzx nim, Gct kc tqaodu-zvzle
ninge.

Murde nim lrpalvc nyznge kx xplr-esz'ngr.

Sam Kranzpnu-esz'mz (60)

Glalzm Nc Nqngq Bagr

Nabz ne Devet kx yrbzle mz kxrmailz ngr dzbe
kxzngrng,
mzli kc ami nzling nzrpilr narnzlvzo-ngrdr Israel
nzprtrpqng mz kzdq nrlar Israel. X ami ngr
lr Edom nzprtrpqng mz kzdq nrlarde, Nabzlwa
ngr Dcpwe, mrkc Joab kc tqmailzle ami ngr
Israel, tzabz-ngrdr ncblo siu-nzpnu-esz'-nrade-li
(12,000).

Ngrlrvea Ngrgr

¹⁻³ Gct, mz nzngyatikr drtwrm nigr, drtqm satr-
pem bagr.

X batrpeme mz enqmi rgrng nzprtr-krmllr
mz nzawxo-krdr bz ngr nrlc nyzgr.

Nzatrkatikrdr nigr apule nengq mz nzaglwiti-
krde drtc'.

X da amrlx trnzaxvctrpeung.

Dea-ngrgr vznepe mz nzvzne-krgr apukr ncblo
kxznrmnqng,

Mz nzaetqtitx-zlwz-krbzme drtqgr, nigr leplz
nemqng.

A' suti drtwrgr nayzlu-mopwe' bagr

Mz nzamrlz-mou-krm drtc' nyzgr, murde
namnc-zpwx-moukr.

⁴ Nim Ngrlrvea ngrgr. Glalzm nc nqngq bagr, nigr
kcng tzamrluelr nim,
Murde navzmgr bam mz nztu-mou-krgr me
esz'.

Gct Ayzlu-ngrmle Natqgu

⁵ Mz zmatq ngrm, arlapx nigr kcng tqaodu-zvzq,
X ayzlu-ngrm natqgr.

Da Kc Tqpi Gct

⁶ Gct, natqmqng nzvzpxmqng mz Mangr-
nzangionggr, mz nzrpi-krdr kx,
“Mzli kc na-aovxio-ngrne, sa na-akipxbo mz leplz
nengeng

Drtc' kcng mz nrlar LueJodzn rlilr.

⁷ Murde neidu lr Gilead nengeng.

X nqvi lr Manase nenge-kzng.

X neidu lr Efrem tum mz nibrng.

X nqvi lr Judz kx na-aclve-zvzng mz zmatq
rng.

⁸ A' enqmi rmung trna-aovxiolru nimu.

Murde lr Moab sa nawztrpqng bange

X lr Edom sa nametxmng bange.

X sa namalqlvzx nzmilxtxo-krnge lr Filistia.”

Natq King

⁹ ? Myx kxmule, sa na-atutrq natqm lc mz
nzokatr-krm ninge

Nzprtr-krnge mz lrpalc ngr mzteadai
nyzdr lr Edom?

- ¹⁰ Murde mzli kc pxtpxpe-ngrn nigr,
X trokatrwq ami negr mz nzotangr.
- ¹¹ Gct, okatrp nigr mz nzota-krgr badr enqmi
rgrng mzli ka.
Murde mane nzmnc-xgle-krgr ncblo
nzarlapx-krdr nigr.
- ¹² X krlzkr kx mz nzmnc-khme bagr,
Sa narnzlvzokr enqmi rgrng mz nzokatr-
krm. ☆

Sam Kranzpnu-esz'mz-nrade-esz' (61)

Vzmibz Ninge Mz Butqbr Kxmngi

Nabz ne Devet kx yrbzle mz kxrmalnz ngr dzbe
kxznznggrng.

- ¹ Gct, xlrn nzyrni-krnge,
X lalztqm mz nzkrka'-krnge.
- ² Kqlx nim murde mncx esz'-krnge, x nabznge
talvzo zlvz.
Vzmibz ninge mz butqbr kxmngi.
- ³ Murde nim lrpalc nyznge,
Me rlakitrz mz mq enqmi rngeng.
- ⁴ Rlr-ngrm bange nzmncpx-alo-krmc mz ma
nyzm.
Murde na-apux nei kio kx mnc-kapqlzbz mz
nabx lxede.
- ⁵ **Gct, abrtzlvzq nzesalz-krnge nzangrlvz-zvz-
krnge nim.**
Murde krlc takitrde leplz kcng tzamrluelr
nim.

- ⁶ Kam bange nzlungr kxboi, ninge king nem,
Murde nzmnc-krnge navz zvz.
- ⁷ Okatrp ninge mz nzacive-angidr-krnge leplz
nengeng mz nzmnc-lz-krbo mz zmatq
ngrm.
Ayrbqpx ninge mz nzaodu-zvz-krm ninge x
nzangidati-krm natqm.
- ⁸ **Delc na-angrlvz-zvzx nim,**
Mz nzale-krnge da kc tqesalz-ngrbo bam.

Sam Kranzpnu-esz'mz-nrade-li (62)

Mnc-xgle-zvzku Gct Txpwz

Nabz ne Devet kx yrbzle mz kxrmailz ngr dzbe
kxzngrng.

Mnc-xgleamu Gct

- ¹ **Gct txpwz kx mnc-xgle-zvzx mz nabznge,**
Murde nzmnc-zpwx-krnge vzpxm bade.
- ² **Nide butqbr nyznge x mevalu rnge.**
Nide lrpalc nyznge kx tu-amqngio-
ngrne.
- ³ Delc nimu kxdrka'-ngrng bzkq tz-zvzpeamu
ninge mzli ka trxpwpewxu.
X bzkq apusr-ngrnamu ninge nzawxo-krmu
ma kx blzlongr.
- ⁴ Ryrllqamu drtwr ngr nzapotxo-krmamu ninge
me matq kc tqmnc-ngrmc.
X abrtzlvzamu nzpokiatitr-krmu ninge.
Murde nivz lr naomu prlxmamu bange,
A' mz nabzmu la, ngyati drtwrmu ninge.

Na-abrtxtrpwzmu Drtwrmu Mz Gct

- ⁵ **Gct txpwz kx mnc-xgle-zvzx mz nabznge,
Murde nzmnc-zpwx-krnge vzpxm bade.**
- ⁶ **Nide butqbr nyznge kx abrkitr x drtwrnge.
Nide lrpalc nyznge kx tu-amqngio-zvz-
ngrne.**
- ⁷ Nzarlapx-krnge x nzmrlue-krnge yctr txpwz
bade,
Mz nzngini-krde butqbr nyznge kxmngi kx
rlakitr x.
- ⁸ Lepz nengeng, mz nzangidati-krbzle da kx yc
mz drtwrmu, na-abrtxtrpwzmu drtwrmu
bade.
Murde nide txpwz me rlakitrku.

Bzkq Brti Drtwrmu Doa O Da Kzbleng

- ⁹ A' bzkq brti drtwrmu leplz, murde nigu amrlx
apu-tpwzku zikapu,
Kxmule-esz' nigu kxnzetung o leplz txneng.
Murde nzmu na-arsakrlrku nzmlekr Gct x nigu,
Nide kx mrle txpwz, a' nginigu da-nrbalq.
- ¹⁰ X mz nzrtwz-krmu da kx suti drtwrmu,
bzkq brti drtwrmu nzamwxlr-krmu leplz
x nzpna-krmu dztudrng.
X kxmule-esz' nimu bcnyrng, bzkq abrtr-
pzm drtwrmu mz trau scmu.
- ¹¹ A' na-amqtrku drtwrgu mz nzxlr-krngu natq
lcng.
Murde Gct txpwz kc tqmatq.
- ¹² X da kx myapxbz, nzaodu-krde nigu tresakiu.
Rpimle kx, "Mzli lcde, nzayzlu-krbo da mz
doa navz-nqblqle da kx aleleng mz nrlc
ka."

Sam Kranzpnu-esz'mz-nrade-tq (63)

Sutitx Zlwz Drtwrnge Nzxpkr-krm

Nabz ne Devet mzli kc tqmnc-ngrde lzke ngr Judz.

¹ Gct rnge, rtangrtix nim.

Murde nim kc tqbatrple nzesatpxp-zpwxkr drtwrnge.

Apux ncblo kx drtwrde brlxkz x mzte tclvr mrkc lzke,

Mz nzsutitx-zlwzkr drtwrnge nzmnc-tr-krbo bam.

² Suti drtwrnge nznxi-krbo nzulrm Mangr-nzangiongr

Mz nmnc-krnge zmatq x zluli rm.

³ Nzkr-lz-krnge nivz lrm myaspx-zlwzle nzlu-krnge mz nrlc.

X glqlz-zvzx nim mz nzaodu-zvz-krm ninge.

⁴ X sa na-awi-zvzbo bam

Mz nzglal-zkrbo mqnge mz nzkrka'-krbo bam.

⁵ Drtwrnge sa naesatpxp-zpwx nzmnc-tr-krbo bam.

X sa na-angrlvzx nim mz nabz kxyr-lvi.

⁶ Mz nrlckxbq kang kqlu aoti zvz drtwrnge nim, Vz vz nrlc ngrltxpx.

⁷ X angrlvzx nim mz nzabrtzngr

Murde okatr-zvzq ninge x tu-zvzme mz ni-brnge.

⁸ Mnc-amqngitrpo bam,

X lolvz-amqngiq ninge mz mqm kx xplr.

- ⁹ A' ayrkrtxong mz drtc'
Krkeng tzipilr nanibqlr ninge.
- ¹⁰ Nibqting nidr mz vea,
Murde kuli kzipeto nangqtilr namz ngrdr.
- ¹¹ X ninge, king nem, sa na-abrtzlvzx nim,
Murde ngi-batrpe' nzaovxio-krnge.
- X krkeng tzabrtpzlr drtwrdr bam, sa nabilvzlr
nim.
Murde sa nangi-batrpxme mz kxnpokiang
nzmnc-lrpi-krdr.

Sam Kranzpnu-esz'mz-nrade-pwx (64)

Drtwr Kxtrka Trngida-pnzu

Nabz ne Devet kx yrbzle mz kxrmailz ngr dzbe
kxzngrng.

Enqmi Rngeng

- ¹ Gct, kxputxpex. Xlrm nzkrka'-krnge.
Mwxlrtilr-zlvzx enqmi rngeng. Arlapx ninge.
- ² Tum mz nibnge murde kxdrka'-ngrng nzyr-
lqng drtwr
Mz nzesabrti-krdr ninge.
- ³ Nzxngitrkr leplz nzymne-krdr apule nzrlakikr
toki r vea kx malc.
X nzipnz-krdr leplz mz natq kxtrka apule
nipna.
- ⁴ Nzmnc-kapqng mz nzipnz-krdr kxntubqng mz
natq ngr npokianger.
X trnzmwxlrung nzaniti-krdr nzatrkatikr-krdr
nidr.

5-6 Nzapqtrlr drtwrdr mz drtwr kxtrka kx nzyr-lqlr.

X nzamyatxlpwzlr nzkrlzkr leplz,
Mz nzrpi-lxblr-krdr kx, "Na-amwiku trtxki mz nzesabrti-kgu leplz.

X nzbrngztio-kgu lc da kxvz-rbr trpnzngr kx narmc x kx narkrlzti."

Gct Rnge

7 A' Gct sa na-ayrplapx-anile nidr, na-apule kx pnzle nidr mz nipna scde.

X napwrkilvc-ngdrdr nztupekr nipna ngrdr.

8 Sa na-atrkatile nidr murde nzrpiting natq kxtrka.

X sa nayrpalelvzng krkcng tzrmcng nidr.

9 X leplz amrlx sa namwxlrtilr Gct.

X sa na-aoti drtwrdr da kxmatq kc tqaleleng x nayapwxtipxlr.

10 Leplz kxnztubqng sa na-abrtzlvzlr Yawe x sa na-abrtrpzlr drtwrdr bade.

Leplz kx nabzdr lq sa na-awibzng bade.

Sam Kranzpnu-esz'mz-nrade-nzlvqn (65)

Kxaodu, Kxrpalz, Kxrka

Nabz ne Devet kx yrbzle mz kxrmailz ngr dzbe kxnzngrng.

Kxaodu

1 Gct, nzglqlz-krgr nim Jerusalem tubq-esz'ngr,

X rpikr na-atutr-zpwxkr nzesalz-krbzkrng bam.

2 Murde xlrme nzkrka'-krgr,

Mz nzmnc-xgle-krgr nim.

³ X kxmule-esz' nzvz-rbr-krgrng nzmrlvzlr nigr,
A' ipqpx zvz alwx rgrng amrlx.

⁴ Namrlz-ngrmle bagr, nigr kcng tqmcpqxng
X tqvzmitrqng Mangr-nzangiongr nim.

Murde sa namnc-zpwxkr

Mz nzrtwzng da kxmrlzting mz ma nyzm.

Kxrpalz

⁵ Mevalu rgr, mzli kc tqyrni-ngrbzk bam, ay-
zlume natqgr

Mz nzbatr-krme nzaovxio-krgr.

Lr mrkzbleng nzmncng drtc' x trmctu mz nrlc
tulvzo.

X sc tzabrtr-kzpplr drtwrdr bam.

⁶ Murde mz nzxpplr-krm atulzq newz kxetuting,
Mz nzaelwapx-krm nzmyalzkr zmatq ngrm.

⁷ Aoq nrwz mz nzyclwzkr srkau x aesakiq nzyr-
pukr natq nrc. ☆

X amnc-nabuq leplz kcng tzxpqbrrl-ngrdr
nim.

⁸ Nzamrluengr nim mz nzetukr zmatq ngrm.

X mz nrlc tulvzo nzmalqlvzlr da kcng tqale-
qng.

Kxrka

⁹ Gct, aclve-angidrq nrlc mz nzadc-krm tewa,
Murde dakxnzng nalvc angidr mz drtc'.

¹⁰ Tewa lc tqayayrtile drtc' nyzgr,

Murde da kx petikr mz nrlanc nyzgr
nalvcpulzmqng.

¹¹ Ycng da kxnzng kxkqlu mrkcng amrlx tqvzkiq.

☆ **Sam Kranzpnu-esz'mz-nrade-nzlvqn (65):7** Sam 89:9;
107:29; Matiu 8:26; Mak 4:39; Luk 8:24

- X bxli scgrng yrbuti zvv mz da kxmrlzting.
12 X abrtz-zlwz-ngrgr
Nzmc-krgr nzplckr nra nounc nyzgrng.
13 Angrlvzkr nzyrlvzbqtikr animol negrng,
X malqkr murde nrlanc nyzgrng brtipeng x
ycpe pipz nzrkqlzng.

Sam Kranzpnu-esz'mz-nrade-esz'mz (66)

Nzayzlu-zvv-krbz Gct Natq Kxnztubqng
Nabz kx nzyrbz mz kxrmalz ngr dzbe kxnzn-grng.

- Lr Nrle*
1 Lr nrle amrlx
Namalqlvzlr Gct,
2 Mz nzangrlvz-krdr nzmyalzkr drtqde,
X mz nzglqlz-krdr nide mz nabz kxyrlvi.
3 X narpibzku bade kx, "Da amrlx kcng tqaleqng
nzktitpxng.
X enqmi rmqng nzmetxpebzng bam mz
nzetu-zlwzkr zmatq ngrm.
4 X lr nrle amrlx nzangiolr nim,
Mz nzglqlz-krdr nim x nzarmyalz-krdr
drtqm."

- Lr Israel*
5 Nadcpv mz drtwrgu da kx nzktitpxng,
Kcng tqalemqng Gct bagu, nigu leplz nedeng.
6 Akipxle Prla Bla x aesakile nzyrlekr LueJodzn
Mz nzyrlq-krbzle me mingrng kx navzki
melrmqung.
X mzli ka na-awi-ngr-kzpzkz bade da lcng.

⁷ Murde aclve-alole mz zmatq ngrde.

X yrlq zvz mzte lr mrkzbleng murde ma
tzglqpx-lzbqng mz nzxpqbrlr-krdr nide.

Nigu Amrlx

⁸ A' nimu lr mrkzbleng naglqlz-kzamu Gct rgr,
Mz nzangrlvz-kato-krmu nide.

⁹ Murde nide kc tqaclve-zvzbzle nzlu-krgr,
X tr-rlrpx-ngardeu nzaovxiokr enqmi nigr.

¹⁰ Gct, kxmule-esz' atubqtipeq nigr, kx nabzgr
nalqngi,
Mz nzapu-krgr silvz kc tqyrleri, x zblqki rde
navztx.

¹¹ X kxmule-esz' rlrpx-ngrn nzesabrtingr nigr,
X batrpzme nzrglq-krgr da kx mrlepu.

¹² X kxmule-esz' rlr-ngrbzme mz enqmi rgrng
nznzbrti-krdr nigr,
X vztrkr mz nabz nzkxpungr

Kx apule nyr x nrc kxoda,
A' mzli ka sc tqyzlumipe-mope' nigr me na-
arlapx-ngrr.

¹³⁻¹⁵ X ayzlu-kzpe' natqnge mz mzlr nzkxpu-
krngeng,
X delc naka-ngrbo bam da kcng tqpibo.

Rtwzmc animol kxncblongr kx oliqtix mz olta
nyzm,

Mz nzangc-krbzlr bam mz Mangr-
nzangiongrr.

Murde zikapu ngrdr navzdzbz,
Nangi dalr nzawi-krbo bam.

Okatrle ninge

¹⁶ Nimu amrlx kcng tzangiolr Gct, lalztqmamu
bange,

- Mz nzpi-krbo bamu da kcng tqalemleng
bange.
- 17 Mz nzbrtikr drtwrnge nide, krka'bo bade,
Mz nzoliqti-krnge nzawi-krbo bade mz
nzayzlu-krmle natqnge.
- 18-19 X ayzlu-zpwxmle natqnge murde plztipxbo
alwx rngeng.
A' rblx nzxlr-krde nzkrka'kr doa kx nabzde
blqki.
- 20 Awitx-zlwzbo mz Gct murde trpx-ngrdeu
nzkrka'-krnge,
X trpx-kz-ngrdeu nzaodu-krde ninge.

Sam Kranzpnu-esz'mz-nrade-rlimz (67)

Lr Nrlc Naglqpxlr Gct

- 1 Gct, nayc mz drtwrm nigr,
Mz nzamrlz-krm x nzokatr-krm nigr.
- 2 Murde lr nrlc nakrlz-zpwxlr nqmq krm
Mz nzarlapx-krm nigr.
- 3 **Mrlz neidung amrlx nzglqpx-krdr nim,
X na-awi-ngrbzlr bam!**
- 4 Mrlz lr mrkzbleng amrlx nzangrlvz-krdr nim,
Murde nzacive-krm nidr tubq mz nzmailz-
krm.
- 5 **Mrlz neidung amrlx nzglqpx-krdr nim,
X na-awi-ngrbzlr bam!**
- 6 Gct rgu amrlzle nigu,
Mz nzrkqlzngr dakxnzng.
- 7 X sa na-amrlz-zvzle nigu,
Murde leplz amrlx na-amrluelr nide.

Sam Kranzpnu-esz'mz-nrade-rtqmz (68)

Zmatq Ngr Gct Mz Nzacive-krde Lr Israel

Nabz ne Devet kx yrbzle mz kxrmailz ngr dzbe kxzngrng.

Nzmyalzkr Gct

- ¹ Mz nzvz-krm Gct, enqmi rdeng nzodalitipeng.
X kxnpxtxpx-ngrdr nide nzdwaszlr nide.
- ² Milxtxole nidr mz nzapu-krdr zsikapu kc tqwq-plx nenq.
X nibqtile kxdrka'-ngrng mz nzapu-krdr kadol kc tqyrle mz nzngc-krde.
- ³ A' nigu kxntubqng abrtzlvzku nzmnc-aepztr-krbzku bade,
Mz nzbilvz-krgru x nzmalqlvz-krgru nide mz nzelangr.
- ⁴ Naglqlzku Gct mz nzangrlvz-krgru drtqde.
Na-amyalzku nide kc tqvooom mz dcbz.
Drtqde Yawe x na-abrtz-ngrgu nzmnc-tr-krbzku mz mzte.
- ⁵ Gct mnc Mangr-nzangiong.
Apubzle trte mz doa kxnbzszng x acive-kzle olvz kx nzbzszng ncblo ngrdr.
- ⁶ Kxnmncng esz'-krdr amnc-tr-lxblr-kzle ng mz neidung,
X kx drtqdr tropxu vzmi-kzle ng
Murde namnc-zpwxng.
A' krkcng tzesablqtilr nide, avzpx-nrbalqleng.

Mzli Kc Lr Jiu Tzrlasz-ngrdr Ijipt X Tzprtr-ngrdr Lzke ☆

⁷ Mz nzrlaszkr leplz ne Gct Ijipt, vzmitrleng lzke.
X mz nzmailz-krde nidr, mncpxm mz nyr x dcbz.

⁸ Nide Gct r lr Israel kc tqaelwapxle zmatq ngrde mz Newz Saenae.
Murde mz nzvz-krmlle, nengq x tewa kxnze-tung nzvz-kzpqng.

Mzli Kc Lr Jiu Naptr-ngrdr Mz Drtc' Kc Tqpibz Yawe Badr ☆

⁹ Gct avzo-ngrmle tewa,
Murde na-alu-moule drtc' nyzde kc tqmin-grpe.

¹⁰ Neidu lrde kxtrnzrngiscung amncle ng mz drtc' lc,
Mz nvrka-krbzle badr da kx nzmncxpx-ngrdr.

Mzli Nyz Kxnrzryrlqng Drtwr ☆

¹¹ Kxetu rgv Gct kapxle natq
Kx olvz kxnrzryrlqng napipxlr nrpa lcde seng,

¹² “King x ami nedrng nzdwang.
X nigr olvz akitikr dztu enqmi kcng tztwz ncblo ngr vea ngrng.

¹³ Akitikr da kxlqngi kxlqlwx kx nzwzngz mz silvz x gol.
?Myx kxmule, kzdung nimu ncblo trnzprtr-ngrdru mz vea?

☆ **Sam Kranzpnu-esz'mz-nrade-rtqmz (68):6** Nzrlaszngz 13:17—19:19 ☆ **Sam Kranzpnu-esz'mz-nrade-rtqmz (68):8** Josua 6:1—11:23 ☆ **Sam Kranzpnu-esz'mz-nrade-rtqmz (68):10** Kxnrzryrlqng Drtwr 5:16, 24, 30-31

- 14 Murde Gct kc tqrninr miltxtole king kcng,
X namz ngrdr nztwzbene-krdr apule lrdz kx
lvxlz nrc mepz.”

*Mzli Kc King Devet Tqyrlq-ngrde Jerusalem Mz
Nzngini-krde Mzteadau Nyzde* ☆

- 15 Mzli kc King Devet tqyrlq-ngrde Mzteadau
nyzde mz Newz Saeon,
Newz Basan apule ncblo kx angya drtwrde
nzyckr Mzteadau mrlc.

A' Devet ayzclubzle natqde mz nzrpi-krbzle kx,
“Newz Basan, kxmule-esz' matq-esz'ngrn x
myatxlzq,
X nra nyzmqng ngi rtrngr,

- 16 A' bzkq obqszq newz kc tqmcpq Yawe kx
namnc-ngrde,
Murde sa namnc alo elr.”

*Yawe Aovxiole Enqmi Rdeng X Vzdz Mangr-
nzangiongr Jerusalem*

- 17 Gct vom mz siu ngr sariot scdeng,
Mz nzprpx-krmle mz Newz Saenae x nzprtr-
krde Mangr-nzangiongr.

- 18 Kxetu vdz-ngrde wq,
X aovxiole enqmi kxkqlu.

X nzkabzlr da bade, mz nzmetx-krbzlr bade,
Kxmule-esz' kxnzxpqbrlr-ngrdr nide mzli kc.

☆

- 19 Naglqlzku Kxetu kc tqatu-amqngile nigu mz
zbq kang kqlu.
Murde nide Mevalu rgu.

☆ **Sam Kranzpnu-esz'mz-nrade-rtqmqz (68):14** 2 Samwel 6

☆ **Sam Kranzpnu-esz'mz-nrade-rtqmqz (68):18** Efisz 4:8

*Mzli Kc Gct Tqnibqti-ngrde King Nede Ehab X
Nqvi Lrde Mz Nzayrplapx-krde Nidr* ☆

²⁰ Gct rgu nide Gct kc tqarlapxle leplz.

Yawe nide Kxetu kc tqkapxmle nigu mz mq
enqmi rgung.

²¹ X sc tqtaputibzle nardr,

Murde nzvz-rbr-zvzng.

²² Rpimle bagu kx, “Kxmule-esz' enqmi rmung
nzdwalzng mz newz

O drlve keng mz nzakitikr nrlc nidr, a' sa
nayzlutibong.

²³ Murde navznenamu mz nznznlvzo-krmu
mepyr ngrdrng,

X kuli nemqng drtwrdr naesatxpx zpwx mz
nzmng-krdre.”

*Nzakaputr-ngrm Nzamyangr Mz Mzli Nyz
King Hesekaea* ☆

²⁴ Leplz amrlx nzmclr nzvztr-krmqng leplz neng
Gct Mrkc Tqtr,

Mz nzangrlvz-krdr Gct x King rdr.

²⁵ Dzbe kxnzngrng nzrtwayzbzng, vz-nqblqzbz
olvi kx nzelang x nzayrlewzng nrasrpwale.

X kxnzayrning gita nzmnr-ngrmqng.

²⁶ Kxmu nzngr-krdr nide sele,

“Naglqlzku Yawe, nigu leplz nedeng, mz nzyrlwr-
lxblr-rgu.

Naglqlzku Yawe, nigu kcng tqngi nqvi lr
Jekop.”

☆ **Sam Kranzpnu-esz'mz-nrade-rtqmz (68):19** 1 King 21:19; 2
King 9:24, 36 ☆ **Sam Kranzpnu-esz'mz-nrade-rtqmz (68):23**
2 Be Ngrdr 30

27 Neidu lcng tzvz-kzpqng, Benjamin, Judz, Sebyulon, x Naftzli.

Neidu ne Benjamin krkc tqtopwz rtwayzbz badr,

X mz nibrdr kxnzetung r Judz x leplz nedrng.

X rmnr-ngrbz neidu kx nzmncmqng mz nort, kxnzetu r Sebyulon x Naftzli.

Lr Jiu Nzkrka'-ngrdr Lr Mrkzbleng

28 Gct, aelwapx-moungr zmatq ngrm,

Kc tqaelwapx-ngrn tqokatr-ngrn nigr mzli kc.

29 Kapxbz natq kx king kcng tqaovxiopeq nartwzmng da bam,

Mz nzmnc-krm Mangr-nzangiongr.

30 Ayrplapx Ijipt kc tqapule trmwzlogo kc tqmnc-kapqpxm mz nabr kc tqlvcpulzm mz nqlvi lr Lue Nael,

Ayrplapx nidr badr kztedeng murde mrlz-zvzbz badr nzotangr.

Aodali lr mrkzble lcng,

Navz navz nakrlzbzle mzli kc tzyrngzo-ngrbzlr bam.

31 Murde kxnzetung ngr Ijipt navzmngng bam,

Nidr badr lr narnrlc amrlx kcng tzaxvctrng badr,

X naxpeng trau, silvz, x da kxlqlwx

Mz nzaovxio-krm nidr mz vea.

Nzmyalzkr Gct

32 Nimu lr nrlc amrlx,

Nangrlvzamu Kxetu Gct.

33 Murde sc tqvzne mz bongavz, kc tqwz-ngrde mzli kc bqnc.

X nzxplrkr natqde apule natq bzlrmei.

³⁴ Napipxku zmatq ngr Gct, kc tqaewapx-ngarde
mz dcbz,

X mz nzacive-krde nigu lr Israel.

³⁵ Kctitxpx-zlwzku Gct rgu Mrkc Tqtr.

X nide kc tqrkam bagu nzxplrngr x zmatq.
Takitrde nzrglqlz-zvzngr nide.

Sam Kranzpnu-esz'mz-nrade- rpwxmz (69)

Nzxpukr Ncblo Kxwztr-zvzbz Mz Yawe

Nabz ne Devet kx yrbzle mz kxrmailz ngr dzbe
kxzngrng.

Nabzpex

¹ Gct, pi-zvzbo bam kx, "Arlapx ninge!"

Murde nzkxpu-krngeng nzaetunepxpeng.

X apupex rplz kc namrbropebz mz nrlr.

² X apu-kzx kx twznede ninge drlr ngr nrc.

X mz nzboo-krnge, nabzpex, murde trpnzngr
me nakcblztr-ngrne.

³ Gct, drtqnge satxpe x drtwrnge kaatxpe mz
nzkqle-zvz-krnge nim.

Mzke' ngqbqtxtrpebz mz nzaenzli-zvz-krnge
nzvz-krme.

⁴ Enqmi rngeng nzrpilr nanibqlr ninge murde
nzxplr-zlwzng.

X nzpxtxpx-krdr lc ninge trpnzngr noude.

X nzkqlu-krdr nzmyaszpxlr nqnginarnge.

Nzpokiatitrlr ninge mz nzrpi-krdr kx nakabo
trau rde. ?A' myx kxnamu nzka-krbo trau
r da kx tralewxu?! ☆

Nzxtrnga-ngrdr Ninge

⁵ A' Gct, nim txpwz kx rkrlz alwx rngeng,
Murde trnzyc-kapqpwxung bam.

⁶⁻⁷ Yawe, nim Ngrlrvea r ami nem,
X nim Gct r lr Israel.

Nzatrkatilr ninge murde lxngitix nim,
X nzamyati-zvz-ngrm drtqng.

A' bzkq rlr-ngrme bange nzamyati-krbo drtq
leplz nemqng,
Kcng tzlxngitilr x tzangiolr nim.

⁸ Murde apubo lr mrkzble mz lr mrnyznge,
X mzlengeng nzmapulrtr-ngrdr ninge peto.

⁹⁻¹⁰ Kxmule-esz' nzxtrnga-ngrdr ninge
Nzaxtx-krnge dakxznzng mz nzavzo-lzbq-
krnge,

A' mz nzpqq-zlwzkr nzaotikr drtwrng Mangr-
nzangiongr nim,
Apusr-ngrde ninge da kx nzangc mz nyr x
yrkrtxo. ☆

X natq kcng tzpikiti-ngrdr nim,
Yrplatr-kzpqqng bange. ☆

¹¹ Nzypalelvzlr ninge
Mz nzpxi-krnge lrpz ngr nzvzkr drtwr.

¹² Lr mztea nzpikitinedr ninge.
X ncblo kxnzrmnqng nzngr-xtrnga-ngrdr
ninge.

☆ **Sam Kranzpnu-esz'mz-nrade-rpwxmz (69):4** Jon 15:25

☆ **Sam Kranzpnu-esz'mz-nrade-rpwxmz (69):9-10** Jon 2:17

☆ **Sam Kranzpnu-esz'mz-nrade-rpwxmz (69):9-10** Rom 15:3

Arlapx Ninge

- 13 Yawe, arlapx ninge mzli kznike mrlzbz bam
Mz nzmyalzkr zmrlz ngrm. ☆
- 14 A' veczm ninge mz mu ngr nzxpu-krngeng.
X arlapxbz ninge mz nzngyatikr drtwr en-
qmi rngeng ninge.
- 15 Bzkq rlrpx-ngrn nzyrlemikr drlr ngr nrc ninge,
X bzkq botxo-alox mz nzbzlz-krmc mz gqpr.
- 16-17 Yawe, ninge kxnzawz nem. Ayzlum natqnge
murde aodu-zvzq ninge.
X amrlz ninge murde yc mz drtwrm ninge.
Bzkq mnc-rlrume bange.
A' okatr ninge, murde nabznge talvzo.
- 18 Vzm bange
X xpepxbz ninge mz mq enqmi rngeng.

Ayrplapx Enqmi Rngeng

- 19 Murde krlzq enqmi rngeng amrlx,
Kxmu nzpibqti-krdr ninge x nzamyati-krmrlr
drtqnge.
- 20 Nzobqszo-krdr ninge yrnibungr nabznge.
Yrni-ngrne nzvzkr drtwrnge,
A' trpnzngr kxnaokatrle x na-amqtrple
drtwrnge.
- 21 A' nzrkamqng nange dakxnzng kxpiz,
X mz nzbrlxkzkr drtwrnge, nzrkamqng
mqnge waen kxrxx. ☆
- 22 Yawe, kxmu nzmukr leplz lcng badr kztedrng
Mangr-nzangiongr trtubqu mz nzobq-krm.

☆ **Sam Kranzpnu-esz'mz-nrade-rpwxmz (69):13** Asaea 49:8;
2 Korint 6:2 ☆ **Sam Kranzpnu-esz'mz-nrade-rpwxmz (69):21**
Matu 27:34, 48; Mak 15:23, 36; Luk 23:36; Jon 19:28-30

- Delc, tzrtxlvzlvz-mou-ngrdr alwx ngrdrng x
takitrde nzodati-krm nidr.
- 23 Akcbz mztr,
X ayangrnga-zvzbz nrkrdrtdr. ☆
- 24 Ayrplapx nidr mz zngya ngr drtwrm,
Kc tqapule nyr kx nangc-ngrdr.
- 25 X batrpz nzbz-krdr,
Murde ma nyzdr namznrtx-alongr. ☆
- 26 Rlxtibo bam da lcng murde ayrplapxpeq ninge,
A' nzrtxlvzlvz-moplr nzetqkr drtqng.
- 27 Delc alwx ngrdrng nartxlvzlvz-kz-ngrdeng,
Murde ma tzprtrng mz nzripqpx-krm alwx.
- 28 Bzkq yroq drtqdr mz Buk ngr Nzlungr,
Mrkc tqyclz-ngrm drtq kxntubq nemqng. ☆

Nzrglqlzng Gct

- 29 Gct, tangigx-zvzx mz nzetqkr drtqng,
Mzli ka tqaenzlix nzmnc-zpwxngr kc navzm
mz nzarlapx-krm ninge.
- 30 Murde na-angrlvzx nim,
X naglqlzx nim mz nzawingr.
- 31 Murde sa na-abrtz-ngrm nzangio-krnge nim
Namyaszlvzle nzangc-krbo blz bam.
- 32 X leplz txneng na-abrtzng mz nzokatr-krm
nidr,
Murde apqtr-mopwzme nabzdr.
- 33 Murde lalztqbzme mz kxtrnzrngiscung,
X trmrbrtru mz drtwrm leplz nemqng kcng
tzkxpung.

☆ **Sam Kranzpnu-esz'mz-nrade-rpwxmz (69):23** Rom
11:9-10 ☆ **Sam Kranzpnu-esz'mz-nrade-rpwxmz**
(69):25 Matiu 23:38; Luk 13:35; Aposol 1:20 ☆ **Sam**
Kranzpnu-esz'mz-nrade-rpwxmz (69):28 Luk 10:20

- ³⁴ Nimu bongavz x drtc' naglqpxamu Kxrpalz.
Nimu prla x dalr prla amrlx naglqlz-kzamu
nide.
- ³⁵ Murde sa na-arlapxle Mzteadau nyzde x sa na-
atulz-moule mztea ngr Judz amrlx.
X kxnzwwztrpzng bade namncng elr x nangi
nyzdr drtc'.
- ³⁶ X sa na-aprcbzle drtc' mz doa ne leplz nedeng,
Murde leplz kcng tzmrlztilr nide namnc-
zvzng elr.

Sam Kranzpnu-rlimz (70)

Vz-anim Mz Nzarlax-krm Ninge

Nabz ne Devet kx yrbzle mz kxrmailz ngr dzbe
kxnzngrng.

- ¹ Gct, vz-anim mz nzarlax-krm ninge.
Kxetu, rnekim mz nzokatr-krm ninge.
- ² Okatrp ninge mz nzaovxio-krnge kxnzrpilr na-
abzlr ninge,
Murde drtqdr namya mzli kc nadwasz-ngdrdr
ninge.
- ³ X leplz lcng tzxtrnga-ngdrdr ninge drtqdr namya
Mzli kc nametx-ngrmlr bange.
- ⁴ A' amrlz krkcng tzbrti drtwrdr nim
Mz nzrka-krbzme badr nzabrtz-zlwzng,
Murde na-awi-zvz-ngrbzlr bam nzarlax-krm
nidr
Mz nzrpi-krbzlr kx, "Gct, nim kx myatxlz-
esz'ngr."
- ⁵ Yawe Gct, trxplr-zvzwxu, x trpnzngr scnge
zmatq.
Vz-anim, kx Gct.
Murde nim txpwz Mevalu rnge.

Bzkq asaq nzokatr-krm ninge. ☆

Sam Kranzpnu-rlimz-nrade-esz' (71)

Nzkrka'kr Kzdq Lrtzlvz

Brti Drtwrnge Nim

- ¹ Yawe, mnc-xglex nim nztu-krm mz nibrnge.
X bzkq rlrpx-ngn nzaovxiokr enqmi rngeng
ninge.
- ² Lalztqm bange mz nzokatr-krm ninge.
X arlapx ninge murde tubq-esz'ngn.
- ³ Nangini-kzp me rlakitrz mz nzmnc-kapqtr-krbo
bam.
Murde nim butqbr x lrpalc nyznge.
- ⁴ Gct rnge, arlapx ninge mz mq leplz kxdrka'-
ngrng,
Kcng tzipilr naodatilr ninge.
- ⁵ Murde nim, Kxetu Yawe, kx brti drtwrnge,
yzutr pnz mzli kc tqngi-oblabengr.
X sc tqvzbe nzabrtr-krbo drtwrnge bam.
- ⁶ Abzo mzli kc tzmcngr mzke', krlzmle mzli ka,
mnc-xgletxpwo nim,
Mz nzaclve-zvz-krm ninge. Delc naglqlz-zvz-
ngrne nim.

Okatr-mop Ninge

- ⁷ Nzrpi leplz kx ninge rkx ngr da kxtrka,
A' nim lrpalc kxmngi kx rlakitrz.
- ⁸ X glqlz-zvzx nim mz zbq kang kqlu,

- Mz nzyapwxtipx-krnge nzmyalz-esz'ngr-krm.
- ⁹ Delc kxmule-esz' nipenge lrtzlvz, a' bzkq drtqm satrp bange,
X bzkq rlaszq ninge mzli ka tqyangrngape-ngrne.
- ¹⁰ Murde enqmi rngeng nzymnetr-ngrdr ninge X nzryrlqpeng drtwr,
- ¹¹ Mz nzrpi-krdr kx, "Gct sc tqrlaszpele nide. Vzmamu, nalolvzpeku murde trpengr kx narlapxle nide."

Arlapx Ninge

- ¹² Gct rnge, bzkq mnc-rlrume bange, A' vz-anim mz nzarlapx-krm ninge.
- ¹³ Aovxio x odati krkcng tzipilr natzlr x nartrkatilr ninge,
Mz nzamyati-krbzme drtqdr x nzbatr-krbzme nzobqszokr leplz nidr.
- ¹⁴ Sa na-abrtr-zvzbo drtwrnge bam, X naglqlz-ebir-ngrne nim.
- ¹⁵ Kxmule-esz' da kcng tqaleq nzqqlu-zlwzng, A' mz zbq kang kqlu sa nayapwxtipxx nztubq-krm, x zmatq ngrm mz nzarlapx-krm leplz.
- ¹⁶ X sa navzbo bam mz nzglqlz-krnge zmatq ngrm,
Murde nim txpwz kx tubq-esz'ngr.

Vz Vz Nzpipx-krnge Nzmyalz-krm

- ¹⁷ Gct, alvztrq ninge, abzo mzli kc tqngi-oblaben-grne.
X sc tqyapwxtipxbex da kx nzktitxpx kcng tqwz-ngrn.

- 18 Mzli ka nipenge lrtzlvz x nqnginarnge prkipe,
bzkq rlaszq ninge.
A' mncm bange mz nzyapwxtipx-krbo zmatq
ngrm mz nrpr ngr leplz amrlx.
- 19 Gct, nzetukr nztubq-krm krlzlezle bongavz. ☆
X trpnz-moungr kx apule nim kc tqaleti da
kxetuting.
- 20 X kxmule-esz' batrpe' nzetukr nzxpu-
krngeng, a' krlzx kx sa na-amrna-mowq
nzlu-krnge,
Mz nzarlax-krm ninge mz gq.
- 21 Sa na-aetunepxbzme nzamatqkr leplz ninge,
Mz nzaelalz-mou-krme drtwrnge.

Nabz Ngr Nzawingr

- 22 Gct rnge, nim Gct rgr, nigr lr Israel, x sa nan-
grbo bam mz nzayrni-krbo gita x ukzlele.
Tr-esz'ngrn x sa naglqlzx nim murde ngida
angidrme bagr.
- 23 Sa namalq-katox mz nzabrtz-krnge,
X mz nabznge atwrnrngr sa nangrbo bam
murde arlapxpeq ninge.
- 24 Mz zbq kang kqlu sa napipxbo nztubq-krm mz
nzokatr-krm ninge.
Murde krlcng tzipilr na-atrkatilr ninge aovx-
iopeqng x drtqdr myape.

☆ **Sam Kranzpnu-rlimz-nrade-esz' (71):19** Sam 36:5; 57:10;
103:11; 108:4

Sam Kranzpnu-rlimz-nrade-li (72)

Nzaclevekr King Kxnmcp

Nabz ne Solomon. *

Nztubq-krde

- ¹ Gct, batrpz nzaxvctr-krbz king rgr mz zmrlz
ngrm,
X katrpz nide mz nzvz-nqblq-krde nztubq-
krm.
- ² Murde nzacleve-krde nigr leplz nemqng namrlz,
X na-atubqtbzle da mz kxnzobqszong.
- ³ X nigr amrlx sa namnc-zpwxkr,
Mz nzmnc-lz-krbzkr mz nztubqkr nzaclevekr
king rgr.
- ⁴ Sa natubz mz nibr kxnzobqszong,
X sa na-arlapxle kx trpnzngr scdr zmatq mz
nzaovxio-krde kxnzakxputilr nidr.

Nzamrlz-krde Leplz Nedeng

- ⁵ Nzamrluekr leplz nim sa navz zvz,
Da kc tqwai nyzl-zvzkr nepi x temz.
- ⁶ X King nem sa na-amrlzle nigr leplz nedeng,
Mz nzapu-krde tewa kc tqdcom mz nrlanc.
- ⁷ Mzli kc tqngini-ngrde king nztubqngr nae-
tunepx mz nrlc,
X nzmnc-zpwxkr leplz navz zvz da kc tqwai
nyzl-zvzkr temz.

Mrkc Tqacve

- ⁸ Nzacleve-krde yzutrle mz Lue Yufretis,

* **Sam Kranzpnu-rlimz-nrade-li (72):** Jiszs sa na-angidati-zp-
wxle drtwr ngr Sam lc mz nzvz-krmle krali.

- Nakrlzbzle mz nrlc tulvzo.
9 Enqmi rdeng sa na-aovxioleng,
X nayrngzobzng bade.
10 King mz nrlc tulvzo sa nartwzmqng bade dalr
nizrle-kangr,
Myapxbz king r trmctung, x Arabia, x Afrika,
murde namnc-lxblrng badr mz nrw.
11 King amrlx sa nayrngzobzng bade,
X leplz amrlx sa na-angiolr nide.

Nivz Lrde

- 12 King lc sa natubz mz nibr kx trpnzng scdr da,
mz nzkqle-krdr nide.
X naokatrle kxnbqszong kcng tzmncng
esz'-krdr.
13 Sa naycng drtwrde kxtrnzxplung x kx
trpnzng scdr zmatq.
X na-arlapxle nra-nzlung ngr leplz.
14 Sa naxpepxle nidr mz mq kxnbakxputing x
kxnbatrkatilr nidr,
Murde matq mz drtwrde nzlu-krdr.

Da Kxmrlzting Kx Navzpxmqng Mz Nzacve-krde

- 15 Leplz amrlx sa nakrka'-ngrdr nide
Murde Gct na-amrlz-zvzle nide,
Mz nwrpi-krdr kx, "Gct, king lc nalu angidr zvz.
X lr Arabia narkabzng gol kxpnapr bade."
16 Krka'-ngrgr kx nrlanc nyzgrng nalvc-angidrngr
dakxznzng.
X nounc nyzgrng nadobeting na-apule nounc
ngr drtc' kc Lebanon.
X taon nyzgrng nayrbu mz leplz
Na-apule nzyrukr nabr ngr nardzng.

- 17 King lc nadcpv zvz mz drtwr.
X drtqde naye zvz mz nzapu-krde nzti-zvzkr
nepi.
Murde sa nangingide nou nzamrlzkr Gct leplz
amrlx mz nrlc,
Mz nzkrly-krdr kx matq-esz'ngr mz nzobqkr
Gct.

Nabz Kx Yrkrpxngr Buk Krali

- 18 Naglqlzku Yawe, Gct r melrmqung.
**Nide txpwz kxnzktipx. Naglqlzku
Yawe.**
19 Navz navz zvz nzangiongr drtqde.
Nzrglqlzng nide navz navz zvz.
20 Krlc me yrkrpxngr nabz x nzkrka'-ngrng kx yr
King Devet, mrlx Jesi.

Buk Kratt

Sam 73—89

Sam Kranzpnu-rlimz-nrade-tq (73)

Nzmnc-zpwx-krnge Yc-zvzbz Bam
Nabz ne Asaf.

Nzxplrkr Kxdrka'-ngrng

- 1 Kxmule-esz' rpiku kx, “Gct mrlzti nivz lrde nigu
lr Israel,
X amrlzle kx nabzdr lq.”
2 A' nabzng nrgo.
X nzrlxngiti-krnge ycpwz pipz nzaxtx-
krbole.
3 Murde mcx nzrngisc-zlwzkr kxdrka'-ngrng,
X kcmnztx-ngrne dztu kxnzglqpx-lzbq lng.

- 4 Mz nzaotikr drtwrnge, trpnzngr nzetqkr drtq
 kx nznxitrlr,
 A' nzyrlvz-angidrng x nzxplrng.
- 5 Leplz lcng trpnzngr zyagox kx prtzbz badr,
 X trnzrmctilru nzxpungr.
- 6 Delc tzbi-zlwz-ngrdr mz nzglqpx-lzbq-krdr,
 X drtqdr trmyau nzrtulrtr-krbzlr me pnz
 drtwrdr.
- 7 Da kxtrka nzvzpxmqng mz nabzdr x drtwrdr,
 Apule lue kc tqyrlepxm mz nzwxplikr kx-
 pqbu.
- 8 Nzryrpalelvzng leplz kxnztubqng x nzymnetx-
 trpwzng mz da kxtrka.
 X nabzdr nzbilvzlr zmatq ngrdr mz natq ngr
 nzamwxlr-krdr leplz.
- 9 Nzycmne-atrkatilr Gct kc Heven,
 X nzrpilr kx nidr kxnzetu r leplz mz nrlc mz
 nzrka-krbzlr natq badr.

Nzvz-rbrkr Leplz Neng Gct

- 10 Mzli ka kzdung leplz neng Gct nzlalztqpe-
 kzpzngr badr,
 Mz nzlxngiti-krbzlr natqdr.
- 11 Nzrpibzlr badr kx, “Vz-nqblqmamu nigr,
 Murde Gct kc Heven trtxpnzngr nzmc-krde
 nimu.”
- 12 Krlc nqm q kr leplz kxdrka'-ngrng.
 X kxmule-esz' nznrgiscpeng da kxkqlu, a'
 drtwrdr trpnzngr nzesapx-krdr.
- 13 Gct, mz nzmc-krnge nidr, rpix esz'-krnge kx,
 “Mane nzaqti-lzbq-krnge.
 X mane nzyrlqpx-lzbq-krnge mz alwx.

14-15 Murde drtqnge etq zvz mz zbq kalvz, mz
nzxpxu-zlwz-krnge.”

A' trvz-nqblqwxu natq kxdrka'-ngrng,
Mz nwrpi-krdr kx trmcwq alwx ngrgrng,
Murde ma tqmailzx leplz nemqng mz nzvz-
rbr-krdr.

Kxdrka'ngrng Sa Naodating

16 Rblxm bange nzkrly-krnge drtwr ngr nzrlr-
krbzme mz kxntubqng nzxpxu-krdr,
A' trayrplapxwq kxdrka'-ngrng.

17 Zbz kx vztrx Mangr-nzangiongr nim mz
nzmnc-lrpi-krnge,
Sc tqkrlz-atex kx kxdrka'-ngrng lcng
trpnzngr nzmnc-trkrbzlr bam Heven.

18 Murde rlr-ngrbzme badr nzvz-nqblq-krdr me
pnz drtwrdr, kc tqbatrpzle nzodatingr nidr.
Nzapulr kx nzvzneng mz drtc' kxmiglq kc
tqrbatrpz nztaw-krdr.

19 X nzodatingr lc nidr na-ani txpwz,
X nzvzdz-krm nelzdr mz zmwylr sa naprtrpz
badr mzli kc nabz-ngrdr.

20 Mz nzbz-ani-krdr lc, nzapulr nzrmwiblengr
Kc tqmrbrtr mou mz nzdwaly-ngrm.

Nabznge Ngrgo

21 Mzli kc tqxngitr-ngrne mz nabznge nzaetq-
krme drtqnge,

X zngya ngr drtwrnge lolvztxne,

22 Apux poi kzpeto
Mz nzpqbrtxnekr narng x nzngqngu-krnge.

23 Kxmule-esz', a' mnc-zvzme bange,
Mz nzlolvz-amqngi-krm mqnge.

24 X vz zvz nzmailz-krm ninge mz nzalvztr-krm ninge.

Murde naprtrx mz nzarmyalz-krm ninge kalr.

Brti Drtwrnge Gct

25 Trpnzngr da kx wz-ngrn Heven x nrlc
Kx suti drtwrnge, a' nim txpwz, Trte.

26 Kxmule-esz' nabznge ngrgo, a' nim nzxplr-krnge,
X namncme bange, tqvzpe tqvzpe.

27 Gct, krkcng tzpx-ngdrd nim, trnamnctrpzu
bam mz nibr nzbz-krdr,
Murde sa naodatiq kxtrnzabrtrpzlr
drtwrdr bam.

28 Kxetu Yawe, mrlzvxitxm bange nzmnc-aepztr-krbo bam
Mz nzrlatr-krbo bam, murde napipx-zvzbo
nqmq krm mz leplz.

**Sam
Kranzpnu-rlimz-nrade-pwx
(74)**

*Bzkq Mrbrtr Mz Drtwrm Nigr Kxznakxpu
Nemqng*

Nabz ne Asaf.

Nzangctitx Enqmi Makxtr Nyzmqng Amrlx

1 ?Gct, memule tqrtctx-alope-ngrn nigr,
Mz nzngyatikr drtwrm nigr sip nemqng?

2 Nadcpz mz drtwrm nigr kcng tqmcpzqng mzli
kc bqnc, mz nzarlapx-krbzm nigr mz mq
kxznakxputilr nigr,

- X mz nzmnc-krme bagr mz Newz Saeon.
- ³ Vztr ena mrlcde mz Mangr-nzangiongr nim
Jerusalem,
Murde namcq nzodati-atwrnrkr enqmi
rgrng da amrlx mrka.
- ⁴ Enqmi lcng nzmalqlvzlr Mangr-nzangiongr
nim,
Nzpetr-krdr nc nqngq ngr nibr kxrmailz
ngrdr mz nounc kx nzatulr mrlcde mz
nzaelwapx-krdr nzaovxio-krdr nigr.
- ⁵⁻⁶ Nztaglctilr mz xks x hama scdrng da kcng
tzlztng amrlx mrlcde,
Mz nzapu-krdr ncblo kx narlaking nounc.
- ⁷ Nzkatrpzlr nyr ngr Mangr-nzangiongr nim,
Mz nzmatinetrkr drtwrdr nztr-esz'ngr-krm.
- ⁸ X nzangctitxdr mrkcng amrlx tqangio-ngrgr
nim mz drtc' nyzm,
Murde narnzlvzo-atwrnr-ngrdr nigr.
- ⁹ Dalr nzangio-krgr nim lcng amrlx nzmrb-
tipeng,
X trpengr profet kx narpim bagr mzli kx
naesakingr nzxpungr lc.
- ¹⁰ ? Gct, myx mzli kx nakrlzbz enqmi rgrng
nzxtrnga-krdr nim?
? Myx kxmule, narlrx-alope-ngrbzm
nzymne-atrkati-krdr drtqm?
- ¹¹ Bzkq mnc-lrpitxn,
A' odati nidr mz nzokatr-krm nigr.

Nim Kxrpalz Kx Xplr

- ¹² Gct, kxmule-esz' nzmusrnepegr lc, a' nim King
rgr yzutr pnz mzli kc bqnc.
X nzwrde kqlu kx arlapx-ngrn nigr.

- 13 Sc tqakipxq Prla Bla mz zmatq ngrm.
 X tqtamyrnr-ngrn nardr mepwz kc tqngi
 Ijpt.
- 14 Murde aovxioq kxnzetu rdrng,
 X kabzme nrkrdrtdr nangq animol ngr lzke.
- 15 Sc tqaglwqiw mrkc tqrpnakilzm aulz x narlue.
 X apz-kzq me nakawicngr LueJodzn.
- 16 Nim kxrpalz kc tqwz-ngrde ngrlx x nrlckxbq,
 X nim kc tqryrlq nepi x temz mrnyzdr.
- 17 X nim kc tqryrlqbz me nangi bz ngr prla x drtc',
 X yrlq-kzpze mzli r zbao x zpq.

Arlapx Nigr!

- 18 A' Yawe, nadcpz mz drtwrm kx enqmi rgrng
 nzxtrnga-ngrdr nim,
 X nzatrkatilr drtqm mz nzymne-krdr mz
 nzobqszo-krdr nim.
- 19 Bzkq mrbrtr mz drtwrm kxnzakxpu nemqng,
 Mz nzapusr-krm nigr bona kx nalolvzti kuli
 kzpeto.
- 20 Nadcpz mz drtwrm Nzesz'tikr Drtwrgu mz
 nzarlapx-krm nigr,
 Murde mzli ka ncblo kxayo nzqqlupeng
 kxnmnc-kapqneng mz nzlo.
- 21 Bzkq rlr-ngrbzme badr nzaovxio-krdr nigr
 kxnzakxpung,
 Murde nigr leplz txneng kx trpnzngr scdr
 zmatq naglqlzkr nim.
- 22 Gct, vzm mz nzatubqti-krm drtwr kxnzobqs-
 zolr nim,
 Mz nzdcpxkr mz drtwrm kx nzxtrnga-zvz-
 ngrdr nim.

- ²³ Bzkgq mrbrtr mz drtwrm enqmi rmqng
kx nznemi-zvzlr zngya mz nzatrkatikrdr
nim.
A' vzm mz nzawx-nabu-krm nidr mz natqdr.

Sam Kranzpnu-rlimz-nrade-nzlvqn (75)

Waen Kx Xplr Ngr Nzayrplapxngr

Nabz ne Asaf.

- ¹ Gct, awitx-ngrbzkr bam mz nzmnc-aepztr-khme
bagr.

Aleq da kxmrlzting. Gct, awitx-zlwzbzkr
bam.

- ² Gct rpile kx, "Yrlqpex mzli kx napipx-ngrne doa
kx tubq x kx vz-rbr.

X nzayzlu-krbo da badr narsakrlrng.

- ³ Kxmule-esz' nrlc badr leplz ngrdeng nznrcng,
A' sa nalolvz-amqngix nou nrlc.

- ⁴⁻⁵ Pibo mz kxnzqlqpx-lzbqng kx bzkgq nzqlqpx-
lzbqng

Mz nzbilvz-krdr zmatq ngrdr.

X pi-kzpo mz kxdrka'-ngrng kx bzkgpe
nzarmyalz-lzbqng,
Mz nzailvzo-krdr kztedrng."

- ⁶ Murde trpnzngr me vzkpxm nzarmyalzngr
Mrka mz nrlc.

- ⁷ A' Gct txpwz kx na-ayzlu-ngrbzle da mz leplz
amrlx,

Mz nzayrplapx-krde kxdrka'-ngrng x mz
nzarmyalz-krde kxnztubqng.

- ⁸ Yawe ngyati zlwz drtwrde kxdrka'-ngrng.

- X mz nzayrplapx-krde nidr
Na-apule kx rkabz badr kap ngr waen kx xplr.
X mz nzmng-krdrl trpnzngr kxpipz kx nayc-
txo, a' nayrkrtxlm.
- ⁹ A' trtxpnzngr nzesakikr nzyapwxtine-krnge Gct
r Jekop,
X sa na-angrlvz-zvzx nide.
- ¹⁰ Murde rpile kx, "Sa naodatix zmatq ngr
kxdrka'-ngrng,
A' zmatq ngr kxntubqng sa na-aetunepxbo."

Sam Kranzpnu-rlimz-nrade-esz'mz (76)

Gct Kx Aovxio Zvz

Nabz ne Asaf.

Kxaovxio

- ¹ Lr Israel nzangiolr Gct.
X drtqde nzkrly-zlwzlr.
- ² Ma nyzde tuom Jerusalem,
Mz newz Saeon.
- ³ Mrlc dekc tqtwz-ngrde temz ngr lomr, toki r vea,
x nipna scdr enqmi rdeng,
Mz nzodati-krde dalr nzotangr amrlx.

Ngrlrvea

- ⁴ Gct, nim Ngrlrvea kxmyatxly zlwz.
X myaszlyq newz kcng bqnc tzmyatxlyng.
- ⁵⁻⁶ Gct ngr Jekop, mzli kc tqpnanati-ngrn enqmi
rmqng,
Odatipeq zmatq ngr ncblo ngr vea nedrng x
rblxbz badr nzotangr.

Ncblo amrlx kcng tzvoneng mz hcsi x hcsi nedrng
nztatio-lxblrng x nzbzng.

Nibqtiq nidr amrlx x twzq dztudrng.

⁷ Delc leplz amrlx tzmyatitr-zlwz-ngrdr nim,
Murde nzngyakr drtwrm trpnzng kx naya-
trpz.

⁸⁻⁹ Gct, mzli kc tqpio-ngrme Heven nzvz-rbrkr lr
nrhc,
Mz nzarlapx-krm kxnzobqszong,

Lr nrhc lcng amrlx nzmwxlr-zlwzng
X nzmnc-lrpitxng.

Ncblo Ngr Vea Nzmetxbzng Bade

¹⁰ Leplz amrlx sa naglqlz-ngrdr nim
Mz nzaovxio-krm enqmi rmqng kcng tzngy-
ati drtwrdr nim.

Murde ncblo ngr vea kcng trnibqtiwqng
tzmexbzng bam,
Nzpipxbzlr kx nanginipedr ncblo nemqng.

¹¹ Delc na-angidati-ngrgu da kx esalz-ngrbzku mz
Yawe, Gct rgu.
X lr mrkzbleng kcng tzesotrpzng
nartwzmqng dztudrng kxmrlzvxing mz
Gct kc tzmyatitr zlwz, murde aovxiole
nidr.

¹² Murde nide kc tqavzole kxnzetung.
X king amrlx mz nrhc tzmwxlrtri-zlwz-ngrdr
nide.

Sam Kranzpnu-rlimz-nrade-rlimz (77)

*?Nzngya-zlwzkr Drtwr Gct Mrilvzole Nivz
Lrde?*

Nabz ne Asaf.

Nzkrka'ngr

¹ Yrnibo mz Gct.

Yrni-katobo bade murde naxlrmle natqnge.

² Mzli ka tqkxpu-ngrne, glalzbo mqnge mz Kxetu.

Kxmule-esz' krka'tix nzwr nrckxbq, a'
trxngipwc'u nzamqtr-ngrm drtwrnge.

³ Gct, kx aoti drtwrnge nim, nabznge ngrgo.

X sc tqyrni-katopex mz nzetqkr drtqnge.

Nzrlxtngr

⁴ Nzxpku-krngeng aobqtx-zvzle ninge mz nrck-
xbq,

X rblx-kzp bange nzycmnengr mz nztalvzokr
nabznge.

⁵ Aoti drtwrnge zbq kcng pnz

X yiz kcng bqnc.

⁶ X drtwrnge ao-zlwzx mz nrckxbq.

A' drtwrnge kc tqveabe kx,

⁷ ?Myx kxmule, Kxetu sa napxtpx-alope-ngrde
nigr?

?X trpengr nzmrlzti-mou-krde nigr?

⁸ ?Nzaodu-krde nigr sa nayrkpx-alope?

?X nzesz'tikr drtwrgr badr naesakipe?

⁹ ?Myx kxmule, Gct trnaycpeu mz drtwrde nigr?

?X nzngya-zlwzkr drtwrde mrilvzole nivz
lrde?

- 10 Xngitxtr-zlwzx
Gct kc tqmyalz-esz'ngr traelwapxpe-ngrpneu
zmatq ngrde bagr.

Nqmq Kr Gct

- 11 Yawe, sa tqdcpz mz drtwrnga nqmq krmqng,
X da kxznkctipz kcng tqaletiqng mzli kc
bqnc.
12 X sa na-aoti zlwz drtwrnga da kxmrlz kxetut-
ing
Kcng tqwz-ngrn mz zmatq ngrm.
13 Gct, nqmq krmqng amrlz tr-esz'ngr,
X trpnz-moungr gct kx myaszpxle nim.
14 Nim txpwz Gct kc tqaleti da kxznkctipxng,
Mz nzbatr-krbzme mz lr mrkzbleng nzmc-
krdr nzxplr-krm.
15 Arlapxpeq nqvi lr Jekop x Josip, murde nidr
leplz nemqng,
Mz nzaovxio-krm enqmi rdrng mz zmatq
ngrm.

Zmatq Ngr Gct Mzli Kc

- 16 Gct, mzli kc tqvz-ngrme, prla rnrciti-lzbq,
X wai-kzle meboo-ngrng.
17-18 X drtc' ycngrlrlzm mz trlipu.
X zbo nzadclr tewa kxetu.
X bzlrpc rpnakile nrlc apule nipna
Mz nzpnamilxti-krde nrlc.
X bzlrmei yrpu-zlile bongavz
Mz nzpro-krm nounenq.
19 Kxmule-esz' trpnzng kxrnc nabzlvz r nanycm
x lrpzki rm,
A' sc tqkawicpeq meboongr ngr Prla Bla.
20 X mailzq leplz nemqng mz nzapu-krdr sip,

Mz mq Mosis x Eron.

Sam Kranzpnu-rlimz-nrade-rtqmz (78)

*Bzkq Apuku Melrmqgung Kcng Tzvecpx-
lzbqmqng Mz Gct*

Nabz ne Asaf.

Nzalvztrkr Sam Ka

¹ Leplz nengeng, lalztqmamu mz nzalvztr-krnge,
Mz nzxlr-angidr-krmamu natqngeng.

² Sa naryapwxbo bamu mz nzymne-ebzpxngr.
X sa nayokaetipxbo dalr mzli kc bqnc kx
trgalr kxrklz. ☆

³ Da lcng tqxlrpeku x tqkrlzpeku
Murde nzpipem melrmqgung bagu.

⁴ Bzkq yrlq-kapqbzkung mz doa negung,
A' nayapwxtibzku badr.

⁵ Yawe yrlqbzle loukxtr scde mz lr Israel,
Mz nzka-krbzle natqde mz nqvi lr Jekop.

X rngidrlvz-ngrbzle mz melrmqgu lcng
Kx na-alvztr-ngdrdr doa nedrng mz lou lcng.

⁶ Murde nayrlqlr lou lcng,
X na-alvztr-kzpzlr mz doa nedrng.

⁷ Mz nzmu-krde lcde, nrpr ngr doa amrlx na-
abrtrpzlr drtwrdr mz Gct,

X na-aoti drtwrdr da kxnzketipxng kcng
tqalele mz nzvz-nqblq-krdr natqdeng.

⁸ X bzkq na-apulr melrmqdrng kcng nardr
tqmngi x tzxpqbrlr-ngdrdr Gct.

Trtegu lcng nabzdr bao x nzvecpx-lzbqmqng
bade.

Trnzbrtiu Drtwrdr Gct ☆

⁹ Mzli kc bqnc kzdung lr Israel, ncblo ngr
vea nedrng nzoliq-angidrpeng mz popz' x
nipna scdrng,

A' mz zbq kc navecpengr, sc tzdwapeng.

¹⁰ Murde trnzatutrlru Nzesz'tikr Drtwrdr badr
Gct,

X nzpptxpx-ngrdr lou scdeng.

¹¹⁻¹² **Kxmule-esz' nzmcpelr zmatq ngr Gct,
A' trmatqu mz drtwrdr da kxnzkctipxng
kcng tqaleleng mrkc Ijpt.**

¹³ Akipxle Prla Bla x mz nrlarde rlilr atule apule
nztukr drkq,

Mz nzmailzo-krde leplz nedeng elr.

¹⁴ X mz nzvz-krdr ngrlx, mailzle nidr mz dcbz,
X nyr rtwayzbz badr mz nrlckxbq.

¹⁵⁻¹⁶ Mzli kc tzmnc-ngrdr lzke, amrplxtrpzle rplz
Kx yrlepx-ngrm lue x ningali.

Murde narmnqng x drtwrdr naesatxpx zpwx
Mz lue lc tqkabzle badr, tqxplrm nzyrle-krde.

¹⁷ Kxmule-esz', a' vz zvz nzatrkatikrdr Gct kc
tqmyalz-esz'ngr,

Mz nzale-krdr alwx x nzxpqbrlr-ngrdr nide.

¹⁸ Mz nzmqngikr nabzdr nzabzlr nzatalzngr Gct,
Mz nzka-krbzle dakxnzng kx naesapxngr
drtwrdr.

¹⁹⁻²⁰ Nzpibqtilr Gct, nzipilr kx,
“Kxmule-esz' luplxtrle rplz x lue yrlepx-
katom elr,

A' rblxbz bade nzrka-krmle nagu dakxnzng,
Mz nzacive-krde nigu leplz nedeng.”

Dakxnzng Kxvzom Heven ☆

21 Yawe kx xlrle kc nzymne-krdr, drtwrde trmr-
lzlzpuu.

X zngya ngr drtwrde kc tzapqtr-zlwzbzlr.

22 Murde trnzlxngitilru nide,
X drtwrdr trnzabrtrpwzlr bade mz nzacive-
krde nidr.

23-24 Kxmule-esz', a' lvxpxbzle bongavz,
Mz nzatwzlr-krmle badr dakxnzng ngr
Heven. ☆

25 X mzli lcde, leplz txneng nzmung dakxnzng
nan enjrl,
Mz nzangidati-krbz Gct zbrtale ngr nelzdr.

26 X mz zmatq ngrde kz
Sc tqawqpele nenq tonga x trlaki.

27 X nenq lcng li nzrtwzmqng blzmr kio,
X nzyrlwrne-krdr apule drta' ngr prla.

28 Kio lcng nztatiomqng mz drtc'
O-ngalele ma nyzdrng.

29 Gct kabzle badr nikeng nzsuti zlwz drtwrdr.
Nzngqdr x nelzdr krlc.

30 Kxmule-esz', a' drtwrdr tresapxu.
X mzli lc tzmube-ngdr,

31 Gct sc tqnibqtipebzle obla nedr kcng tzxplrng,
Mz nzngyatikr drtwrde nidr.

Vz Zvz Nzale-krdr Alwx ☆

☆ **Sam Kranzpnu-rlimz-nrade-rtqmz (78):19-20** Nzrlaszng
16:13; Nzqqlu-krdr 11:1-34 ☆ **Sam Kranzpnu-rlimz-n-
rade-rtqmz (78):23-24** Jon 6:31 ☆ **Sam Kranzpnu-rlimz-n-
rade-rtqmz (78):31** Nzqqlu-krdr 14; 16; 17; 21

- 32 Kxmule-esz' Gct ayrplapx-katole nidr mz alwx
ngrdrng, a' sc tzale-zvzng alwx.
X kxmule-esz' nzmcpelr nzale-krde da
kxznzctipxng, a' trnzlxngitilru nide.
- 33 Zbz sc tqnibq-anipele nidr
Mz nzapusr-krdeleng lue kc tqmilqpx mz leu
r nya x tqmrbrro mz drtc'.
- 34 Kx nibqle kcng, opxm kx drtwr kxznzclubeng sc
tqyzlu-mopwz bade,
Mz nzplzpx-krbzlr alwx ngrdr x nzkrka'-
krbzlr bade.
- 35 X opxm kz kx dctipx mou drtwrdr kx Gct kc
tqrninr nide butqbr nyzdr,
Kc tqarlapx-zvzle nidr.
- 36 Kxmule-esz', a' nzpokiatilr nide
Mz nizrpi-krbzlr bade kx nzmrlztilr nide.
- 37 Kxmule-esz' nabzdr bao,
X trnzatutrlru Nzesz'tikr Drtwrdr badr,
- 38 A' trodatileu nidr, murde yckqti mou drtwrde
nidr x ipqpxbzle alwx ngrdrng.
X nzwrde kqlu kx ngyatingr drtwrde nidr, a'
lolvztxde zngya ngr drtwrde.
- 39 Murde krlzle kx nidr leplz x nzkrzlzlr nzbzngr,
Mz nzapu-krdr nenq kc tqwq x sc tqama-
neope.

Mzli Kc Lzke ☆

- 40 Nzwrde kqlu lzke nzxpqbrlr-ngrdr nide,
Mz nzavzti-krbzlr drtwrde.
- 41 Zvz nzale-ebir-krdr da kx nzangyati-ngrbzlr
drtwrde,

Mz drtwrdr kx lctr-zvzbz mz Gct kc Tqtr-
esz'ngr.

42 Mrbrtr mz drtwrdr zmatq ngrde
Mz nzarlapx-krde nidr mz mq enqmi rdrng.

43 **Mzli kc tqale-ngrde da kxznkctipxng**
Mz nzvzmipx-krde nidr Ijipt.

Mzli Kc Tzmnc-ngrdr Ijipt ☆

44 X mzli kc tzmnc-ngrdr Ijipt, ngi-batrpzle lue
kxetung nzlrtpx-krdr mepyr,
Murde lr Ijipt ma tzmngng lue.

45 Atwzlr-ngrmle frck kxkqlu kx na-atrkatilr
mrnyzdr,
X mc kxkqlu kx namakxtilr nidr.

46-48 Nibqtibzle kzu, sip, x gout nedrng
Mz kzdq zyagox kxtrka.

X mz nibrde atwzlr-ngrmle trlipu kxetu,
Mz nzamzti-krbzle nounc x dalr nrlanc nyz-
drng mz nzatatio-krmleleng muli-aes.

Zbz sc tqatwzlrpe-ngrmle kionabr
Mz nzngqti-krdr dakxznzng amrlx kx nzlu-
tinepwzng mz nrlanc.

49 X mz nzngyati-zlwzkr drtwrde lr Ijipt kcng
tzakxputilr leplz nedeng,
Atwzlr-ngrmle enjrl kxznkqlung mz nzpulio-
krmlr nyr mz nzayrplapx-krdeleng.

50 Trlolvzleu zngya ngr drtwrde,
A' xplr-esz'ngr apule nubla ngr lue mz
nznibqti-krde nidr.

51 Nibqtibzle doa ncblo kx ayrrngr nedrng,

Nidr kcng tzvzpxmqng mz nqvi lr Ham, doa
ne Noa.

Nzrlasz-krdr Ijpt ☆

52 Mz nibrde sc tqrtwayzpebz mz leplz nedeng
mz nzrlasz-krdr Ijpt.

X mailztrle nidr lzke mz nzapu-krdr sip
nedeng.

53 Aclve-angidrle nidr, x trnzmwxlr.

A' aboobzle enqmi rdrng amrlx prla.

54 X mz nibrde sc tqvzmitr-atele nidr mz drtc'
kxtr nyzde, Kenan,

Mrkc tqtungr Newz Saeon, kx nztwz mz
zmatq ngr nzaovxio-krde.

55 Maneutipxle leplz kxnmnc-mrbrng mrlcde,
mz nzvztrkr leplz nedeng mz drtc' lc.

X sc tqakipxpebzle drtc' lc mz neidu lr Is-
rael kcng nzpnu-esz'-nrade-li, x nzmncpx-
alzupq'ng mz ma nyzdr.

Mzli Kc Tzmnc-ngrdr Kenan ☆

56 Kxmule-esz' nzmncpeng mz drtc' kxtr, a' sc
tzymne-plztitr

x nzxpqbrlr-ngrdr Gct kc tqrninr mz
nzpxtpx-krdr natqdeng.

57 Leplz lcng nzapulr melrmqdr kcng bqnc mz
nzesablqti-krdr nide x nzvecpx-lzbq-krmlr
bade.

Mz nzm-krde lcde, trpengr kx brti drtwrde
nidr.

☆ **Sam Kranzpnu-rlimz-nrade-rtqmz (78):51** Nzrlaszngr
14—15; Josua 11:6-23 ☆ **Sam Kranzpnu-rlimz-nrade-rtqmz**
(78):55 Josua; Kxnzryrlqng Drtwr; 1 Samwel; 2 Samwel

- 58 Nzangyatibzlr drtwrde mz nzangio-krdr kx
trngiu Yawe Gct angidr,
X mz nzyrngzo-krbzlr mz mqngr da kxnlz.
- 59 Kx mcle da lcng tzaletilr, ngyati zlwz drtwrde
leplz nedeng,
X sc tqpxtxpxpe-ngrde nidr.
- 60 Rlasz-pnzle Tentkxtr nyzde kc mztea Saelc, mz
drtc' nyz Efrem.
Mrkc tzmnc-kai-ngrdr badr leplz nedeng.
- 61 X rlr-ngrbzle mz enqmi nztwz-krdr Bokis kc
tqyclz-ngrm Nzesz'tikr Drtwrdr Badr,
Kc tqngi rkx ngr zmatq x nzmyapx-esz'ngr-
krde.
- 62 X mz nzngyati-zlwzkr drtwrde leplz nedeng,
Rlr-ngrbzle mz enqmi rdrng nznibqti-krdr
nidr.
- 63 X obla nedrng amrlx nzbzting mz vea,
X olvi nedrng trpengr obla kx naryrlzting.
- 64 Pris nedrng nzbzti-kzng mz vea,
X olvz ngrdr nzmwxlr-zlwzng x trpnzngr
mzli kx nayrnimi-ngrdr namz ngrdr.
- 65 Mz nibrde, mz drtwrdr opxm kx Kxetu apule
ncblo kx melz-atem
Mz nzmwingr mz nzrmnq-krde waen.
- 66 X mzli lcpwz aovxiole enqmi rdeng,
Mz nzamyati-alo-krbzle drtqdr.

Gct Mcpxle Neidu Lr Judz, Newz Saeon, X Devet

☆

- 67 Gct trsutiu drtwrde doa neng Josip,
X sc tqrlaszpele drtc' nyz Efrem, kzdq mr-
lxde.

- 68 A' mcpx-alzule neidu lr Judz,
Mz nzmnc-krde Newz Saeon, kc tqmrlz-
zlwzbz bade.
- 69 Mrlc dekc tqwztio-ngrde Mrkc Tqtr murde
nayc alo elr,
Da kc tqwai nzyc-alokr Heven x nrlc.
- 70-71 X mcpx-kzle Devet kx nawztrpz bade.
X kapxmle nide mz nzacive-krde sip neng
trtede,
- Murde nangingide king r lr Israel,
Mz nzacive-krde leplz neng Gct.
- 72 X nzacivekr Devet nidr tubq,
Mz nzmailz-zpwx-krde nidr.

Sam Kranzpnu-rlimz-nrade-rpwxmz (79)

Kxetu, Ayzlu-ebir-ngr-mopwz Badr
Nabz ne Asaf.

Enqmi Rgrng

- 1 Gct, leplz kxnmnc-mrbrng nzvztrpqng x
nztztilr nigr,
Murde natwzlr drtc' lc tqkame bagr.
Nzatrkatipelr Mangr-nzangiongr nim,
X nzodati-atwrnrpe-ngrdr Jerusalem.
- 2 Namz ngr leplz nemqng nzayrlwrtxnedr
Ngi dakxnzng nanq utc x animol kzpetong.
- 3 Enqmi lcng tzlakitilr leplz amrlx Jerusalem,
X mepyr ngrdr yrlenepe apule lue.
Mz nzm-krde lcde, trpnzngr nigr kx rlapx,
Kx nayrtzmqlr namz ngr kztedrng.

⁴ Lr mrkzbleng kcng tzmnc-aepztrpqng bagr
nznelvzlr nigr mz nzamyati-ngrm drtqgr,
X nzxtrnga-ngdrdr nigr.

⁵ ?Yawe, ngyati-alope drtwrm nigr?
?Myx kxmule, zngya ngr drtwrm lc tqapule
nyr, kx na-angc-alopele nigr?

⁶ Bzkq, a' kx nangyati drtwrm kxtrnzrlxngitiung
ngr mrkzbleng,

Kcng trnzamatqlru x trnzangiolru nim.

⁷ Murde sc tznibqtipelr nigr leplz ngr nqvi lr
Jekop,

X tzatrkatiplr drtc' kc tqkame bagr.

Arlapx Nigr!

⁸ Gct, bzkq ayrkrpx-ngrn nigr alwx ngr melrmq-
grng,

A' nayc mz drtwrm nigr murde nqmq nr
nabzgr bao-zlwzpe.

⁹ Mevalu rgr, okatrp x arlapx nigr, x ipqpxbz alwx
ngrgrng,

Murde leplz ma tzobqszolr nim,

¹⁰ Mz nzrpi-krmlr bagr kx,

“?Myxpe Gct rmu?” ☆

A' rlr-ngrm nzmc-krgr nzayrplapx-krm leplz
lcng,

Mz nzayzlu-krbzme badr nznibqti-krbzlr
leplz nemqng.

¹¹⁻¹² Kxetu, ayzlu-ebir-ngm-mopwz badr

Nikeng nzalelr mz nzobqszo-krdr nim.

X arlapx kz nigr leplz nemqng kcng tzlolvztilr,
murde ma tqbzkr,

Mz nzayzlu-krme nzyrni-krbzk bam.

- ¹³ Murde apukr sip nemqng,
X sa na-awi-zvzpebzk bam mz nzglqlz-alo-
krgr nim.

Sam Kranzpnu-rtqmz (80)

Ka-mop Bagr Nzexplr-krgr Kc Pnz

Nabz ne Asaf.

Nigr Sip Nemqng

- ¹ Gct, myaszlqz enjrl kxnzetung.
X aclve-zvzq nigr doa neng Josip,
Mz nzapu-krgr sip nemqng.
Lalztqm bagr, nigr doa neng Israel.
² X aelwa-ngrm zmatq ngrm bagr,
Nigr nqvi lr Efrem, Benjamin, x Manase.
Vzm mz nzexplr-krm mzli ka
X arlapxbz nigr mz mq enqmi rgrng.
³ **Gct, mz nzaodu-zvz-krm nigr, arlapx nigr,
X ka-mop bagr nzexplr-krgr kc pnz.**
- Nabzgr Talvzo*
- ⁴ Yawe Gct kc tqrninr, bzkq drtwrm ngya-zvzm
bagr,
A' ayzlum nzkrka'-krgr.
⁵ Tekqtrpebzme dakxnzng nagr mz nzavz-
krbzme drtwrgr.
X mz lue amnqtr-zvzpeq nigr mz drlemzkr.
⁶ Rlrtx-ngrpwzme mz lr mrkzbleng kcng tzmnc-
ngalelr nigr nzyrpalelvz-krdr nigr
X nzotalvz-krdr drtc' nyzgr kx neke nartwz.
⁷ **Gct kc tqrninr, mz nzaodu-zvz-krm nigr,
arlapx nigr,**

X ka-mop bagr nzxplr-krgr kc pnz.

Nigr Nqvi Lr Grep Nyzm

8-9 Apusr-ngrn nigr nqvi lr grep ngr nrlanc nyzm.

Murde mz nzvzmipx-krme nigr Ijipt,
Apule kx bolvztipeq leplz kxnmnc-mrbrng mrkc
Kenan,

Murde nqvi lr grep nyzm natu-amqngi mz
drtc' lc.

10-11 X bz ngr nrlanc kc tqoliqtime bagr yzutr mz
drtc' ngr Lebanon,

Vz krlzbzle Lue Yufretis.

X vzki-kzple mz newz kxnzetung,

Vz x krlzbzle Prla Meditrenia.

12 A' mzli ka opxm kx awxliq nabxbz ngr nrlanc
nyzgr,

Mz nzrlr-krbzme mz enqmi rgrng nzrtwz-
abeane-krdr dalr nrlanc.

13 Lr mrkzbleng nzapulr poi kzpeto kcng tzaya-
betilr nrlanc,

Mz nzapusr-krdr nigr dakxnzng nadr.

14 Gct kc tqrnir, obgom bagr Heven.

X okatr-mop nigr mz nzapu-krgr nqvi lr grep
nyzm,

15 Kc tqpetiq

Murde naxplrkr mz nzmnc-krgr mz drtc'.

16-17 Ngaprbz ncpa'bu ngrgr kx nao-zlilzkr,

Mz nztu-zvz-krme mz nibrgr, nigr leplz
nemqng.

Murde enqmi rgrng nzapusr-ngdr nigr nounc kc
tzlakitxo x nzangc mz nyr.

Delc naodati-ngrbzme nidr mz zngya ngr
drtwrm.

18 Zbz trnaesablqtikru nim,

A' naglqlz-zvzpekr nim mz nzalu-krm nigr.

- 19 **Yawe Gct kc tqrninr, mz nzaodu-zvz-krm
nigr, arlapx nigr,
X ka-mop bagr nzxplr-krgr kc pnz.**

Sam Kranzpnu-rtqmz-nrade-esz' (81)

*Krkeng Naglqlzlr Ninge, Navz-nqblq-kzlr
Natqnge*

Nabz ne Asaf kx yrbzle mz kxrmailz ngr dzbe
kxzngrng.

Naglpqxku Gct

- 1 Namalqlvzku Gct murde nide lrpalc nyzgu.
Nangr-katobzku mz Gct ngr Jekop.
- 2 Na-ayrnitiku gita x ukzlele x na-ayrlewzku
nrasrpwale
Mz nzngr-krbzku bade nabz kxyrlvi.
- 3 Trpu navxutr mz nzrkqlengr leplz mz zbq
kxznzetuting,
Mz zbq ngr nzpokr temz x zbq ngr nzy-
atwrnr-krde.
- 4 Murde krkc natq kx kam Gct bagu, nigu lr Israel,
Mz nzka-krbzle loukxtr scde mz nqvi lr
Jekop.
- 5 Pipxbzle mz melrmqgung, nidr neidu lr Josip,
Mzli kc tqatrkat-ngrde lr Ijpt.
- X ninge Asaf, mzli kc nzryr-krnge tqkrlzpe-
ngrbzle me tavau,
Xlrx kc natq kx trglwxu, a' mz nibrde sc
tqglx-atex.

⁶ Rpmle kx, “Sc tqrkatoxobo da kxmrlepu kcng
tqglqamu.

X aopxbo drtqmu mz nzwz-kato-krmu Ijpt.

⁷ Mzli lc tqkxpu-ngnamu, kqleamu ninge, x sc
tqarlapxpex nimu.

X sc tqokatrpele nimu tqvzmc mz bzlrmei.

X ni-kznge kc tqabzle nimu mrkc lzke

Mz aulz ngr Meriba.”

Navz-nqblqku Natqde

⁸ “Naxlrnamu da kx narngidrlvz-ngrbo bamu, kx
leplz nengeng.

X nalalztqmamu mz natqnge.

⁹ Bzkq angioamu kx trngiu Yawe Gct angidr,
Mz nzyrngzo-krbzmu badr.

¹⁰ Murde ninge Yawe, Gct rmu, ☆

Kc tqvzmile nimu mz nzrlasz-krmu Ijpt.

X sa na-amrlzx nimu mzli kx abtrrmamu
drtwrmu bange.

¹¹ Kxmule-esz', a' tryrlq-angidrwamuu natqnge,
kx leplz nengeng,

Mz nzpctxpx-krmu ninge.

¹² Mz nzmu-krde lcde, rlrpx-ngrbo bamu nzvz-
nqblq-krmu narmu,

X nzale-krmu nike suti drtwrmu.

¹³ A' sutitx zlwz drtwrge kx nalalztqmamu
bange, kx leplz nengeng,

Mz nzlolvz-amqngi-krmu nqm q krnge.

¹⁴ Murde na-aovxiobo enqmi rmung

Mz nzota-krgr badr.

☆ **Sam Kranzpnu-rtqmqz-nrade-esz' (81):10** Nzrlaszngr 20:2;
Lou Kcpwz 5:6

- 15 X Krkcng tzphtpx-ngrdr ninge, sa narnrcng
mz nzyrngzo-krmr bange,
X na-ayrplapx-alox nidr.
16 A' na-amrlzx nimu leplz nengeng,
Murde na-abrtz-zlwzamu mz nzmnc-zpwx-
krmu.”

Sam Kranzpnu-rtqmqz-nrade-li (82)

Gct Pipxle Kx Kxnzetung Nzvz-rbrng

Nabz ne Asaf.

- 1 Gct wxbuom me matq nyzde,
Murde napipxle kx kxnzetung nzvz-rbrng.
2 Rpibzle badr kx, “Nzactve-krmu leplz narsakrl-
rng.
A' bzkq okatramu kxdrka'-ngrng nzmyaszpx-
krdr kxnztubqng.
3 Murde mz nzvz-krmu natubzmu mz nibr kx
trpnzng scdr da x doa kxnzbzszng,
X naokatramu kxnzkxpung x kxtrnzxpung.
4 Murde na-arlapxbzmu krkcng trpnzng scdr
zmatq
Mz mq kxdrka'-ngrng.
5 Ngqngu-plxsramu x trpnzng da kx krlzamu,
murde nqm q krmung amrlx trka-zlwzng.
X trpnzng da kx opxm mzli ka mz nrlc.
6 Nimu kxnzetung murde kapebo bamu zmatq
ngr nzrmailz-krmu.
X nimu amrlx apuamu mrlxng Gct kc
tqmyalz-esz'ngr. ☆
7 Kxmule-esz', a' mrbrtr mz drtwrmu

Kx zmatq kc tqwz-xgleamu nzkrzl
nzkatzpx-ngrbz,
Da kc tzwai nzkatzpxpe-ngrbz zmatq mz kz-
dung kxnzetung.
X nabz-kzamu da kc tzwai leplz amrlx mz
nzbz-krdr.”
⁸ Gct, vzm mz nzacive-krm leplz mz nrlic tulvzo,
Murde lr drtc' amrlx nzmnczbzng mz zmatq
ngrm.

Sam Kranzpnu-rtqmz-nrade-tq (83)

Enqmi R Israel Mzli Kc Pnz X Mzli Ka
Nabz ne Asaf.

Enqmi Rmqng
¹⁻² Gct, bzkq mnc-lrpitxn,
Murde enqmi rmqng nzxpqbrlr-ngrdr nim.
³ Sa tzryrlqng drtwr kxyc-kapq kx na-atrkati-
ngrdr nigr.
X nigr leplz nemqng kcng tqmrlzti-zlwzq.
⁴ Nzrpilr kx, “Naodatitxbzku mrnyzdr,
Murde drtq Israel namrbtxtr alo mz drtwr.”
⁵⁻⁸ Enqmi kcng tzmnc-ngalelr Israel drtwrdr esz'ti
Mz nzprtr-krbzlr mz lr Amcn x lr Mcab,
neidu lcng li nzvzpxmqng mz nqvi lr Lot.
Kxntupeng badr me esz' nidr seleng:
Nqvi lr Isc, nqvi lr Ismael, neidu lr Haga, x
neidu lr Amalek,
Lr mztea Taea, lr Gebal, x lr Filistia.
X lr Asiria kxnxplrng nzngi tedr kz badr.

Ayrplapx Nidr

9-11 Gct, aovxio kz enqmi lcng mzli ka, da
kc tqwai pnz nzaovxio-zvz-krm enqmi r
melrmqgrng.

Ayrplapx nidr, da kc tqwai nzayrplapx-krm
ami ne Jabin, King r lr Kenan x Ngrlrvea
nede Sisera,

Mzli kc tqmilxtxo-ngrn nidr mz Lue Kison kc
tqyc-aepztr mztea Endo,

X namz ngrdr mibio mrlcde mz mzli nyz
Profet Debra.

X rlxti-kzpzkr nanibqti-kzq enqmi rgrng, da kc
tqwaistr-ngrn mz lr Midizn mz nznibq-krm
Oreb x Seeb, ngrlrvea ngrdrng.

X maneuti nidr da kc tqwai nzmaneuti-krm
king rdr, Sebz x Salmuna, mz nznibq-krm
nidr mz mq profet Gidion.

12 Murde leplz lcng pnz nzrpilr kx,
“Natwzku Israel, drtc' nyz Gct, nangi nyzgu.”

☆

13 Gct, mz nzmu-krde lcde, apusrngr nidr bq r
drtc',

X leu kxglr kx wqplr nenq.

14 Odati-atwrnrngr nidr, apubz badr nyr kxetu
Kc tqyrkrtxongr dalr peto x nardzng mz mzli
r nepi.

15 Maneuting x amwxlrng
Mz nzapu-krbzme badr nounenq.

16 Yawe, amyatitx-zlwzbz drtqdr,
Murde nakrlz-ngdrdr zmatq ngm.

17 Aovxio alo x amwxlr alo nidr

- Murde nzmya-zlwzkr drtqdr nanibqle nidr.
18 X mzli lc, sc tzkrlz-atepelr kx nim txpwz Gct kc
tqmyatxlz-esz'ngr x drtqm Yawe.
X nim King kc tqaclvele nrhc tulvzo.

Sam Kranzpnu-rtqgmz-nrade-pwx (84)

*Kxnmncpxmqng Mangr-nzangiongr Yawe Gct
kc Tqrninr Nzmc-zpwxng*

Nabz ne nqvi lr Kora kx nzyrbzlr mz kxrmailz
ngr dzbe kxnzngrng.

Yawe Kc Tqrninr

- 1-2 **Yawe kc tqrninr, nim Gct kc tqlu.**

X mrlz-zlwzm bange Mangr-nzangiongr nim.
Murde sutitx zlwz drtwrnga nzmncpx-krmc
makoa ngrde,
Mrkc tqngr-abrtz-ngrbo bam mz nabznge
atwrnrngr.

- 3 **Yawe kc tqrninr, nim Gct x King rnge.**

Kxnvzdzng Jerusalem mz nzangio-krdr nim
nzrlatrng mz olta nyzmqng.
Murde olta nyzm apule ma nyz doa nemqng.
Da kc tqwai utc tzwz-ngrdr ma nyz neidr, mz
nztapirpx-krdr neimrdr.

- 4 X doa lcng tzmncpxmqng Mangr-nzangiongr
nim nzmnc-zpwxng
Mz nzangrlvz-zvz-krdr nim.

Newz Saeon

- 5 Namrlzbz mz leplz kcng tzvzdzng mz Newz
Saeon mz nzangio-krdr nim,

Murde sa na-axplr-mowq nidr.

⁶ Mz nzkawi-krdr nabzlwa kxmingr narmctilr
nabzde kx lrting

Mz nibr nzdckr tewa.

⁷ X mz nzesotr-krdr Jerusalem nzxplr-krdr sa
naetunepx,

Murde ycpz pipz nzkrlz-krbzlr Newz Saeon
mz nzangio-krdr nim.

X nim Gct rgr kxmyaszlze krkcng tzmncng
mzlilxlr amrlx

Tzangiölr lr mrkzbleng.

⁸ **Yawe Gct kc tqrninr, nim Gct r melrmqgr
Jekop.**

Xlrm nzkrka'-krnge mz nzvztr-krnge ma
nyzm.

Nzmnc-zpwxngr

⁹ Rlxtibo bam

Kx amrlz-zvzbz king rgr kc tqmcpqx.

¹⁰ Murde nzmnc-tr-ngrbz bam mz Mangr-
nzangiongr nim mz zbq kxes',

Myaszpxle nzmncngr drlve keng mz nrlc mz
zbq kang kqlu.

X nzprtr-ate-krbo mz naonrx ngr ma nyzm,

Myaszpxle nzmnc-zvz-krnge mz ma kxnze-
tung nyz kxdrka'-ngrng.

¹¹ Murde Yawe, nim King rgr kc tqbatrple nza-
matqngr nigr.

X nim temz ngr lomrgr kc tqyrputrngr nipna.

X aclveq nigr mz zmrlz ngrm,

Mz nzrlrpx-zvz-krbzme da kxmrlzting mz
kxntubqng.

¹² **Yawe kc tqrninr,**

Krkeng tzabrtrpzlr drtwrdr bam nzmnc-zpwxng.

Sam Kranzpnu-rtqmz-nrade-nzlvqn (85)

Nzamrlzkr Yawe Mzli Kc Pnz, Mzli Ka, X Mzli Kc Navzm

Nabz ne nqvi lr Kora kx nzyrbzlr mz kxrmailz ngr dzbe kxnzngrng.

Mzli Kc Pnz

- ¹ Yawe, yc ngr drtwrm lr Israel mzli kc pnz,
Mz nzamnc-zpwx-mou-krm nidr mz drtc'
nyzm.
- ² Sc tqipqpeq nidr, leplz nemqng, mz nzvz-rbr-
krdr,
X katxpxbzme alwx ngrdrng.
- ³ Mzli lcde, lolvzo-mowq zngya ngr drtwrm,
X nrw x kc tqprlxpebzme badr.

Mzli Ka

- ⁴ Mevalu rgr, mzli ka, amnc zpwx mou kz nigr,
X nikitx nzngyatikr drtwrm nigr.
- ⁵ ?Myx kxmule, nangyati-alope drtwrm nigr,
X trpengr nyzlukr drtwrm?
- ⁶ Trtingr! Axplr-mop nzlu-krgr,
Murde na-abrtz-ngrgr nim.
- ⁷ Yawe, aelwa-ngrm bagr nzaodu-krm kc tqyc
tqyc,
Mz nzarlapx-krm nigr.

Mzli Kc Navzm

- ⁸ Nabrti drtwrgu natq Yawe,

- Murde esalz-ngrmle nrwz bagu mz
nzyrlqpx-lzbq-krgru mz dalr nzngqngungr.
- ⁹ X oliq zvz nzarlax-krde kxnzamrluelr nide,
Murde nzulrde naxngi-alope mz drtc' nyzgu.
- ¹⁰ Yawe aodu-zvzle nigu, murde nangida-
zpwxbzku bade.
X nzacive-krde tubq, murde namnc-zpwzku.
- ¹¹ Mz nzavzo-krmle nztubqngr lc bagu,
Ayzlubzku mz nznigida-zpwx-krbzku bade.
- ¹²⁻¹³ Apule kx nztubqngr lc rtwayzbz bade mz
nzatubqti-krde nabz leplz,
Murde naoliqti-ngrdr nzvz-krmle.
- Mz nzoliqngr lc, Yawe sa narkatim bagu da
kxmrlzting,
X drtc' nyzgu sa nalvcngr dakxznzng kxkqlu.

Sam Kranzpnu-rtqmz-nrade- esz'mz (86)

Okatrp Ninge Mz Nzaodu-krm

Nabz ne Devet.

Abtrpo Drtwrnge Bam

- ¹ Yawe, xlrn nzkrka'-krnge,
Murde trxprrwxu x ninge ncblo txne.
- ² Nim Gct rnge. Arlapx ninge mz nzbzngr murde
tenge nim,
X ninge kxnzawz nem kc tqmnc-xgle-zvzle
nim.
- ³ Nayc mz drtwrm ninge,
Murde vz zvz nzkrka'-krbo bam.
- ⁴ Kxetu rnge, aelalzm drtwrnge,
Murde abtrpo drtwrnge bam.
- ⁵ Murde mrlz-esz'ngrn nzripq-zvzngr.

- X aodu-zvzq krkcng tzkrka'bzng bam.
- ⁶ Yawe, lalztqm mz nzyrni-krnge,
X ayzlum natqnge.
- ⁷ Mzli ka kqlex nim mz nzkxpu-krnge,
Murde angidati-zvzme nzrlx-krbo da bam.
- ⁸ Kxetu, trpnz-moungr gct kx apule nim,
Murde trpnzngr nidr kx rkrlz nzalengr da
kxznkctipxng kcng tqale-zvzq.
- ⁹ Kxrpalz, lr drtc' amrlx kcng tqwz-ngrn
Sa nayrngzobzng bam mz nzarmyalz-krdr
nim.
- ¹⁰ Murde nim txpwz Gct,
Kc tqmatq-esz'ngr mz nzale-krm rkx kxetut-
ing.

Angio-zvzx Nim

- ¹¹ Yawe, aelwa-ngrm bange me pnz drtwrm,
murde navz-nqblqx natqm.
X alvztrp bange nzamrlue-zvz-krnge nim.
- ¹² Murde nabznge atwrnrngr na-awibz bam mz
nzngini-krm Gct x Kxetu rnge,
X na-angio-zvzx drtqm.
- ¹³ Murde nzaodu-zvz-krm ninge etu-esz'ngr,
Mz nzarlapx-krm ninge mz nzbzng.

Okatrp Ninge Mz Nivz Lrm

- ¹⁴ Gct, kxznzglqpx-lzbqng nztutitr nardr ninge.
Zbo ngr ncblo kxayo lc nzrpilr nanibqlr
ninge, murde nzpctxpx-ngdrdr nim.
- ¹⁵ A' yc zvz mz drtwrm leplz, x zmrlz ngm
myalz-esz'ngr.
X drtwrm trngya-anu, a' nzaodu-krm x
nzangidati-krm tqvzpe tqvzpe.

¹⁶ Mz nzmu-krde lcde, yzlum x nayc mz drtwrm ninge.

Axplr x arlapx ninge, murde wztrpo bam da kc tqwai lxenge mz nzwztr-krbzle bam.

¹⁷ Yawe, okatrp ninge mz nivz lrm, murde drtq enqmi rngeng namyatx-zlwzng
Mzli kc namc-ngrdr nzaxplr-krm ninge x nzapqtr-krme drtwrnge.

Sam Kranzpnu-rtqmz-nrade-rlimz (87)

Jerusalem Apule Lxe Neidu Amrlx

Nabz ne nqvi lr Kora.

¹ Yawe wz-ngrde mzteadau Jerusalem
Mz newz kxtr nyzde.

² X mzteadau lc nzmrlzba-krdele
Myaszpxle mztea kc-kzng ngr Israel.

³ Delc nimu lr mztea nyzde,
Naxlr-ngrnamu natq kxmrlz kcng
tzymnetr-ngrdr Jerusalem.

⁴ Gct rpile kx, "Mzli kc na-aplxtipx-ngrbo leplz
nengeng, lr mrkzble kcng tzmnc-ngalelr
Israel sa naprtr-kzng mz dzbede nenge,
Krlcng Ijipt, Bxbilon, Filistia, Taea, x Itiopia.

⁵ X sa narpibzlr kx Jerusalem lxe neidu amrlx
murde nzrmctitrpzlr nzlungr bade.
X ninge, Yawe kc tqmyatxlz-esz'ngr, sa na-
atu-amqngix nide.

⁶ X sa nayrox drtq leplz amrlx kcng tzbrti
drtwrdr ninge,
Mz nzprtr-krdr mz neidu lr Israel.

- ⁷ X mzli lcde, leplz nengeng lcng amrlx sa
naelang x narpilr mz nzngr-krdr kx,
‘Mztea nyzgu, Jerusalem, ngi narlue ngr me
vzkipxm da kxmrlzting amrlx.’ ”

Sam Kranzpnu-rtqmqz-nrade-rtqmqz (88)

Mz Nabz Nzlo
Nabz ne nqvi lr Kora.

- Ycpe Pipz Nzbz-krnge*
- ¹ Yawe, nim Gct kx arlapxle ninge,
X yrni-katobo bam ngrlx x nrlckxbq.
- ² Xlrm natqnge
X lalztqm mz nzkrka'-krnge.
- ³ Murde prtizpele ninge nzcxpungr kxkqlu,
X ycpe pipz nzbz-krnge.
- ⁴ Mzli ka mewepex,
X trpengr da kx nawaitrpem bange.
- ⁵ Nzapusr-ngrdr ninge namz kx nzyrtzmqng mz
gq.
Murde krlcng tzbzpeng nzmrbtrtipe drtwr
nidr x trpengr nzrmcti-krdr nzokatr-krm.
- ⁶ Rtcope-ngrn ninge mz gq kx vzo la,
X tutx-ngrpwz nzlo.
- ⁷ Nzngyatikr drtwrm ninge batrpzle nzetq-
zlwzkr drtqnge,
Mz nzmrlvzo-krde nabznge apule nrc kc
tqyrplalvzo-ebir-ngrde ninge.

Rblx Nzglqlz-krnge Nim Mz Gq

⁸ Ngi-batrpē' nzngrkr kztengeng ninge mz
nzmwxlr̥ti-krdr zyagox lc tqdwatimle
ninge.

X trpengr me nayrbqkipxx.

⁹ Yawe, mzke' vaotxtrpebz mz nzyrningr mz
nzvzkr drtwr̥nge.

Kxmule-esz', a' mz zbq kang kqlu glalz-zvzbo
mqnge mz nzkrka'-krbo bam.

¹⁰ Bzkq rlr-ngrme nzbz-kr̥nge

Murde ma tqr̥blxpem bange nzyapwxtipx-
krbo nim mz leplz.

Murde kxnzlu-txpwn̥g kcng tqalebzme badr da
kxnzktip̥xng.

X namz ngr leplz tr̥nztul̥zpeung mz nzgl̥qlz-
krdr nim.

¹¹ Tr̥nzym̥netrpē-ngr̥dru nzaodu-zvz-krm mz
nabz gq kc tq̥ngi me nzodatingr nidr.

A' n̥zangidati-krm n̥zip̥xbz mz kr̥kcng
t̥zlubeng mz nr̥lc ka.

¹² X r̥bl̥xpebz mz kxn̥zyrt̥zm̥q̥ng n̥zrmc-krdr
n̥zmyalz-esz' n̥gr-krm murde n̥zm̥nc̥ng mz
nabz nz̥lo,

X nivz lrm mr̥br̥tr̥-alope kz mz dr̥twr̥, mz gq
lr̥ kxn̥zb̥ng.

Nabznge Talvzo Zlwz

¹³ A' kr̥ka'-zvzbo bam mz zbq kang kqlu, kx Yawe,
Murde nayc mz dr̥twrm ninge.

¹⁴ A' op̥xm kx dr̥t̥qm̥ satrpem bange,
X sc t̥q̥esabl̥qt̥ipeq ninge.

¹⁵ Murde ayr̥plat̥xp̥x-zlw̥zq ninge, yzutr pnz mz̥li
kc tq̥ngi-ob̥labe-n̥gr̥ne.

- X mzli ka nzetq-zvzkr drtqnge ycpē pipz
nzayrkrpx-krde ninge.
- 16 Nzngyati-zlwzkr drtwrm ninge apule nubla kc
tqtwzle ninge,
Mz nzbatr-krbzle nzmrbkr nzlu-krnge.
- 17 X nzxpxu-krnge lcng nzngrelvzlr ninge,
X trpengr me nayrbqkipxx.
- 18 Ngi-batrpe' kztengeng kxnmrlzng nzngangr-
krdr ninge.
X mzli ka nabznge talvzo zlwz mz nzmnc-
krnge esz'-krnge mz nabz nzlo.

Sam Kranzpnu-rtqmqz-nrade- rpwxmz (89)

*Angidati-mopwz Nzesz'tikr Drtwr Kx Yrlqbzme
Mz Devet*
Nabz ne Etan.

- Nzaodu-zvzkr Gct*
- 1-2 Yawe, sa nangr-zvz-ngrne nzaodu-krm,
Kc tqyc tqyc.
- X sa nayapwxtipx-alox nzangidati-krm natqm,
Kc tqyctx alo, da kc tqwai bongavz.
- 3 X sa nayrlq-zvzq natqm kc tqpi bzme mz kxn-
zawz nem, Devet,
Kc tqmcpqx, mz Nzesz'tikr Drtwrmu ncd.
- 4 Rpi bzme bade kx, "Ncblo kcng tzvzpxmqng mz
neidu lrm, sa nangingpwzlr king,
Murde nqvi lrm na-aclve alo."

- Nabz Ngr Nzrglqpxngr*
- 5-7 Yawe, lr Heven nzglqpxlr nzangidati-krm,

- Mz nzangrlvz-krdr da kxnzktipx kcong
tqaleq.
Enjrl amrlx nzamrlue-zlwzlr nim,
Murde trpnzngr lr Heven kx apule nim, kc
tqmyaszlze nidr amrlx.
- ⁸ Yawe Gct kc tqrninr, nim txpwz kx xplr-esz'ngr,
Mz nzangidati-krm me pnz drtwrm.
- ⁹ Kxmule-esz' srkau xplr, a' sc tqlolvzq,
X mz nzprtz-krm nrc kxoda, lclvzbzme
murde nrw navo. ☆
- ¹⁰ X aovxio-zvzq enqmi rmqng mz nzxplr-
esz'ngr-krm,
Da kc tqwai nztabrti-krm Mepwz ngr prla kc
bqnc.
- ¹¹ Kxrpalz, bongavz x drtc' nyzmqng,
Murde nim kx rwzngr nrhc x dalrdeng amrlx.
- ¹² X doa x da amrlx mz nrhc tulvzo
Nzaxvctr-lxblrng mz nzangrlvz-krdr drtqm,
- ¹³ Mz nwrpi-krdr kx, “Nim kc tqmatq-esz'ngr,
X nzxplr-krm etu-esz'ngr.
- ¹⁴ Nou nzacive-krm nrhc nidr seleng:
Nztubqngr, nzrsakrlngr, nzaodu-zvzngr, x
nzangidatingr.”
- ¹⁵ Yawe, ngi da kxmrlz nzmqlq-abrtzlvz-krgr
nim,
Murde xngibzkr nzulrm.
- ¹⁶ X ngi da kxmrlz nzbilvz-krgr drtqm,
X nzglqlz-krgr nztubq-esz'ngr-krm mz zbq
kang kqlu.
- ¹⁷ Murde axplr q nigr,
X aovxiokr enqmi rgrng mz nzokatr-krm.

☆ **Sam Kranzpnu-rtqmz-nrade-rpwxmz (89):9** Sam 65:7;
107:29; Matiu 8:26; Mak 4:39; Luk 8:24

- 18 Yawe, nim Gct kc tqtr-esz'ngr x angio-tpwzkr
nim.
Murde mcpxbzme king rgr lc tqacive-zpwxle
nigr.

Nzesz'tikr Drtwr Gct Ncdr Devet

- 19 Mzli kc bqnc, mz nzyrlq-krm Devet nzngini-
krde king, vzme mz profet nemqng,
X rpibzme mz nzrmwiblengr kx,
“Aprcho zmatq mz kzdq ngrlrvea kx xplr,
Mz nzarmyalz-krnge nide mz leplz txneng,
murde nangingide king.
20 Ncblo kxnzawz nenge lc tqmcpxx, Devet,
X aelux nide mz tolo kxtr. ☆
21 Sa namailzx nide mz mqnge.
X sa na-axplrx nide mz zmatq rnge.
22 Kxdrka'-ngrng kcng tzngi enqmi rdeng, trtx-
pnzngr nzyatr-krbzlr bade
Mz nzamyati-krbzlr drtqde.
23 Murde sa natamyr-ngrobo nidr
Mz nznibqti-krbo kxnzpctxpx-ngrobo nide.
24 Sa na-aodu-zvzx nide x nangingide kztenge.
X sa nabatrpo bade nzaovxio-krde mz
drtqnge.
25 Sa nakabo bade zmatq ngr nzacive-krde Prla
Meditrenia,
Navz nakrlzbzle Lue Yufretis.
26 Sa namcle kx ninge trtede,
Kc tqngi Gct rde x butqbr nyzde kc tqrlak-
itrle.
27 X sa na-apusr-ngrobo nide mrlxngc krdau,

- Mz nzarmyalz-zlwz-krbo nide mz king amrlx
mz nrlc.
- 28 Drtwr kxeszt'i kc tqyrlqbo bade, trtxpnzngr
nzyzpr-krde,
Mz nzangidati-krnge nzaodu-zvz-krnge nide.
- 29 X nzyrlq-krbo nzaclvekr nqvi lrde tqyc tqyc,
Da kc tqwai nzyz-alokr bongavz.”
- 30 X rpi-mopwz Gct kx, “A' nzmua doa nedeng
naesablqtilr loukxtr scnge,
Mz trnzlolvz-amqngi-krdr nzaolvztr-krnge
- 31 X nzmua trnavz-nqblqlru me pnz drtwrge
Mz nzpctxpx-krdr natqnge,
- 32 Sa na-ayrplapxxng mz alwx ngrdr,
Mz nzaetq-krbo drtqdr mz nikeng nzvz-
rbartilr.
- 33 A' trpnzngr nzatao-krnge da kc tqesalz-ngrbo
mz Devet,
A' sa na-aodu-zvzx nide.
- 34 X trpnzngr nztekqtr-krnge natqnge,
A' sa na-atutr-zvzx nzeszt'ikr drtwr kc tqyr-
lqbo bade.
- 35 Esalzpex mz drtqnge kxtr
X amqngipex kx trtxpnzngr nzesabrti-krnge
nide.
- 36-37 X nzaclvekr nqvi lrde tqyc tqyc,
Da kc tqwai nzti-alokr nepi x nzprtz-krm
temz x nztao-krde.”

*King Kc Tqvzpxm Mz Nqvi Lr Devet, Drtwrde
Lctrpz Mz Gct*

- 38 Yawe, rpiq da lc, a' mzli ka drtqm satrpem
bange x rlaszpeq ninge,
Mz nzngyati-moukr drtwrm ninge, king kc
tqmcpqxq.

- 39 Nikipeq Nzesz'tikr Drtwr kx yrlqzbzme mz mel-
rmqgr Devet, kx natu-zvzbzme mz nibr
nqvi lrde,
Mz nzapusr-krbzme kraon ngr narng brm-
rda.
- 40 Awxlikitxopebzme drkq ngr mzteadau nyznge.
X odati-atwrnr-ngrbzme lrpalc nyzgrng am-
rlx.
- 41 Enqmi rgrng amrlx nzatrkatl-zlwzlr nigr.
X lr mrkzbleng kcng tzmnc-aepztrpqng bagr
nzyrpalelvzlr ninge, king nem.
- 42 Murde ngi-batrpzme nzxplrkr ncblo ngr vea
nedrng.
X mzli ka sc tzbilvzpelr.
- 43 Amyatibzme nipna scngeng mz nzrpna-krnge,
X rlr-ngrbzme nzaovxio-krdr nigr.
- 44 Odatipeq tron nyznge,
Mz nzkatxpx-krbzme zmatq ngr nzngini-
krnge king.
- 45 Amyatibzme drtqng mz mz leplz.
X ngi-batrppe' nzngini-ani-krnge lrtzlvz.

Nzkrka'ngr

- 46 Yawe, bzkq mnc-rlrume bagr.
X bzkq apqtipeq nigr mz nzngya-zlwzkr
drtwrm.
- 47 A' na-aoti drtwrm nzmrbcnekr nzlu-krgr nigr
leplz
Mz nzmnc-krgr mz nrlc.
- 48 Trpnzngr leplz kx na-arlapx-lzbq,
Murde nigr amrlx mnclzbzkr mz zmatq ngr
nzbzngr.
- 49 Kxetu, opxm kx trangidatipewq natqm kc
tqpibzme mz Devet,

Murde trxngipepwzkru nzaodu-zvz-krm kc
bqnc.

⁵⁰ Bzkg mrbrtr mz drtwrm nzobqszokr leplz
ninge, kxnzawz nem,
Murde kxnmnc-mrbr lcng sc tzbilvztipelr
ninge.

⁵¹ Yawe, enqmi rmqng nznelvztilr ninge, king kc
tqmcpxq,
Mz nzxtrnga-krdr ninge.

Nabz Kx Yrkrpxngr Buk Kratz

⁵² Na-armyalzku Yawe, kc tqngi Kxetu rgu.
Tqvzpe, tqvzpe. Eu. Na-armyalzku Yawe.

Buk Krapwx

Sam 90—106

Sam Kranzpnu-rpwxmz (90)

Nzmrbcckr Nzluqr Lepz

Nabz ne Mosis, ncblo ne Gct.

Kxrpalz Kc Tqmnc-alo

¹ Kxetu, yzutr pnz mzli kc, krlzmle mzbq ka
Nzngini-krm me rlakitrkr.

² Mzli kc trwzka-ngrn nrlc x newz ngrdeng,
mncpe-kaiq.
Murde nim Gct, x nzmnc-krm la tqyc tqyc.

³ Rprime bagr kx, “Yzlu-mouamu,”
X mz nzbz-krgr yzlu-moukr mz drtc' kc tqwz-
ngrn nigr.

⁴ Mz drtwrgr, yiz kx siu mz nrlc ngi mzli kxboi,
a' mz drtwrm mzli mrbcnepwz,
Apunede zbq kx esz' kx yrkrpxpe.

⁵⁻⁶ Mz nzmiltxo-krm nigr rblx nzrlolvzngr,

Apunede nzrmwiblengr kc tqmrbrtr ani mz drtwr.

X nzmnc-krgr mrbcne apunekr nabr kx yru mz nourla x nrpqdr mztr luli.

A' kx krlzbzle milzpq sc tzblopeng x tzta-tiopeng murde nzpqkr nzulr nepi.

Nzmrbcnekr Nzlungr Mz Nrlc Ka

⁷ Da kc tqwai nzodati-krm nigr

Mz nzpqkr zngya ngr drtwrm.

⁸ Murde zyzlr ngrm pnamilxtile alwx rgrng

Kcng tqyrlq-kapqkrng.

⁹ X zngya ngr drtwrm amrbctrple nzlu-krgr.

X mz nzbz-ani-krgr apukr zycmini kx esz'.

¹⁰ Nzmnc-krgr krlz-tpwzle yiz kxnpnu-rlimz (70),

A' nzmu nrkrdrdqgr kx tqxplrle krlzbzkr yiz kxnpnu-rtqmz (80).

Yiz lcng tqyctrngr nzwz-katongr x nzetqkr drtq,

Nzyrkrpx-aning x sc tqbzpekr.

¹¹ Nzmu namckr nzxplrkr nzngyatikr drtwrm alwx

Nzamrlue-krgr nim naetunepx kz mz nabzgr.

¹² Okatrp nigr mz nzkrly-krgr drtwr ngr nzmrbc-nekr nzlu-krgr,

Murde nzmnc-krgr mz nrlc navz-nqblqle nzyrplapx-krm.

Yawe, Aelwa-mou-ngrm Zmrlz Ngarm

¹³ Yawe, bzkq ngyati-alo drtwrm nigr, kxnzawz nemqng,

A' tekqtr drtwrm x nayc mz drtwrm nigr.

¹⁴ Namc-zvzkr nzaodu-krm nigr mz nourla kang kqlu,

Murde navz zvz nzangrlvz-krgr nim mz
nzabrtzngr.

- ¹⁵ Kxmule-esz' yiz kqlu avz-ngrbzme drtwrgr mz
nzxpu-krgr mzli kc,
A' tekqtrpz yiz lcng mz nzaelalz-krme
drtwrgr mzli ka.

- ¹⁶ X aelwa-mou-ngrm bagr rkx kcng tzkctipxng
mz zmatq ngrm,
Murde doa negrng namc-kzlr nzmyalz-krm.

- ¹⁷ Gct, Kxetu rgr, okatrp nigr mz zmrlz ngrm.
Murde nra nzwz-krgr naye-zvzbz.

Sam Kranzpnu-rpwxmz-nrade-esz' (91)

Doa Kx Mnc-xglele Yawe

Lrpalvc Kx Rlakitrq

- ¹ Mz nzmnc-xgle-krm Yawe kc tqmyalz-esz'ngr
Sa natubz mz nibrm.
- ² X narpibzme mz Gct kc tqrninr kx, “Nim Gct
rnge kc tqabrkitrx drtwrnge,
Mz nzapu-krme bange lrpalvc kx rlakitr.”
- ³ Murde sa na-arlapxle nim mz nzatrkangr kx yc
kapq,
X mz nzrpibqtingr.
- ⁴ Sa na-acive-zpwxle nim,
Na-apule kio kc tqwxbulvzole neideng.
X sa na-angidatibzle natqdeng
Mz nzapu-krbzle bam temz ngr lomrm kc
tqyrputrngr nipna.

Bzkq Mwxlrq

5-6 Bzkq mwxlrq mz nrckxbq x nrckxngrlx,
Mz nzmwxlrtri-krm drka', ncblo kxayo, x
zyagox kxnabzng.

7-8 Murde kxmule-esz' siu ngr leplz nzbz-
aepztrpzng bam,
Mzli kc Gct na-ayrplapx-ngarde kxdrka'-
ngrng,

X mcq mz mzpq nzbz-krdr,
A' trtxpnzng nzatrkatikrdr nim.

9 Murde mz nzrpi-krbzme mz Yawe kx nide me
rlakitrq,
X mz nzmnc-xgle-krm nide kc tqmyalz,

10 Trpnzng doa x da kx na-atrkale nim,
X trpnzng kz zyagox kx navztrpq ma nyzm.

Yawe Acive-zpwxle Nim

11 Murde pipebz Yawe mz enjrl nedeng nztu-
krbzlr mz nibrm,
X nzacive-zpwx-krdr nim drlvekeng vzkiq.

12 Naglqlr nim mz mqdr,
Murde nanycm ma tqtcprtr mz rplz. ☆

13 Mz nzmcti-krm ningidoe kc bqnc, sa na-
aovxioq nide.
Kxmule-esz' nide drka' kxmatq, a' sa narn-
zlvzoq nide.

Yawe Ycmnebzle Bam

14 Murde Yawe Gct rpile kx, "Sa na-arlapxx doa
kx mrlztile ninge,
X sa na-aclvex nide mz nzmnc-xgle-krde
ninge.

15 Mz nzkqle-krde ninge, sa na-ayzlubo natqde.

☆ **Sam Kranzpnu-rpwxmz-nrade-esz' (91):12** Matiu 4:6; Luk
4:10-11

Kxmule-esz' da kx prtz, a' sa namnc-aepztrpo
bade,
X sa nakatpxxx nide mz nzkxpu-krdeng,
X sa na-armyalzx nide.
¹⁶ X doa lc sa namcle nzarlapx-krnge nide,
X nakabo bade nzlungr kxboi kx na-abrtz-
ngrde.”

Sam Kranzpnu-rpwxmz-nrade-li (92)

Da Kx Mrlzvxitxm Bange
Nabz ngr Sabat, z bqkxnzamati.

Mrlzvxitxm Bange Nzangio-krnge Nim
¹⁻³ Yawe myatxlz-esz'ngrn.
X mrlzvxitxm bange nzawi-krbo bam
X nzglqlz-krnge nim,
Mz nzayrningr gita x ukzlele,
Mzli kznike angrlvz-ngrne nivz lrm mz nourla,
X nzyrlq-angidr-krm natqmqng mz milzpq.
⁴ Murde aelalz-ngrme drtwrnga da kxetuting
kcng tqwz-ngrn.
X nangrbo mz nzabrtzngr mz da lcng tqaleq.

Murde matq-esz'ngrn
⁵ Yawe, nzwz-krmqng matq-esz'ngr,
X nqm q nr drtwrm vzo zlwz la.
⁶ Kxnzglqpx-lzbqng nzngqngung
X nardr mqngi mz nztatrkr nzalvztr-krmqng
mz nardr. ☆

⁷ Leplz kxdrka'-ngrng nzetu-krdr
Nzapulr nabztqkr betepu kc tqwou mzli kx
mrbcnepwz.

X da kxtrka kcng tzalelr nradr trnayc-zvzu,
A' nzodati-krdr tqvzpe tqvzpe.

⁸ Krlc tqmu-ngrde lc,
Murde nim kx rmyalz zvz.

⁹ Yawe, obq ena! Murde enqmi rmqng sa nabzng
Mz nzaovxio-krm kxdrka'-ngrng amrlx.

Apux Nounc Kc Tqpa Zvz

¹⁰ A' ninge kx xplr zlwz,
Mz nzrka-khme bange zmatq ngrm.

¹¹ Mcpex nzaovxio-krm kxnmnc-kapqng mz
nznibq-krdr ninge.
X xlrpex nzyrnikr kxdrka'-ngrng lcng mz
nzaetq-ngrbz drtqdr.

¹²⁻¹³ Leplz kxntubqng kcng tztung ma nyz Yawe,
X nzyrlwr-lxblrng mz makoa nyzde nzapulr
nounc kxetung.

X nzmnc-zpwxng x nzxplrng
Murde dzbrdr nzvzong mz drtc' kc tqngi
natqde.

¹⁴ X kxmule-esz' nznginipedr lrtzlvz,
A' sa navz zvz nzvz-nqblq-krdr me pnz
drtwrde,

X nradr naye-zvzbz,
Mz nzapu-krdr nounc kc tqpa zvz.

¹⁵ Krlc aelwapx-ngrde nzmrlzkr Yawe,
X nztubq-krde mz nzngini-krde butqbr kc
tqrlakitr.

Sam Kranzpnu-rpwxmz-nrade-tq (93)

King Kc Tqmyatxlz-esz'ngr

- ¹ Yawe, nim King kc tqmyatxlz-esz'ngr, x rngiscm
zmatq.
Wz-ngrn nrlc x tu-amqngio me yc-ngrde x
trycnglrur.
- ² Nzmnc-krm tqyc tqyc.
X nzngini-krm King yc pnz kai, x sc tqwz-ate-
ngrn dalr nrlc ka.
- ³ Yawe, srkau ngr prla, nzalxlvrti-ebir-ngdr da.
X natq nrc ngrde aycnglrle nrlc, mz zmatq
kx xplr.
- ⁴ A' nzmyalz-krm myaszipxle srkau.
X zmatq ngrm myaszipxle nzmatqkr natq
nrc, murde nim kc tqmnctxlz tqmatq-
esz'ngrn.
- ⁵ Yawe, Louxtr scmng tqvzpe, tqvzpe.
X Mangr-nzangiongr nim nztr-zlwz-krde
tqyc, tqyc.

Sam Kranzpnu-rpwxmz- nrade-pwx (94)

Gct Sa Na-ayrplapxle Kxdrka'-ngrng

Yawe, Ayrplapx Kxdrka'-ngrng!

- ¹ Yawe, nim Gct kc tqayzlubz mz leplz kxnzvv-
rbrng da kxnzalelr.
Aelwapxngr zmatq ngrm.
- ² Nim kx na-ayzlubz da mz lr nrlc.

Ayrplapx kxznzqlz-lzbqng navz-nqblqle
nike nzalelrng.

³ Yawe, bzkq rlr-ngrbzme mz kxdrka'-ngrng
Nzabrtz-krdr mz da kxtrka kcng tzalelr.

⁴ Nzpivxitilr da kxtubq,
X nzbilvzlr nzale-krdr alwx.

⁵ Nzatrkatilr nigr, leplz nemqng,
Mz nzaetqti-krbzlr drtqgr.

⁶ Kxnzetung nznibqtilr olvz kxnzabzong, x doa
kxnbzszng,

X lr mrkzbleng kx mnckrng badr.

⁷ Nzrpilr kx, "Trtxpnzngr nzmckr Yawe nigu.
X trycneu mz drtwr Gct rdr da lcng
tqaletikung."

Yawe Obqplxle Nzaokr Drtwr Leplz

⁸ A' nimu kx nardr mqngi, nalalztqmamu bange.
?Myx mzli kx nayrplapx-krlzu-rnamu?

⁹ ?Mz drtwrmu rpianu kx Gct kc tqwz-ngrde
nradrtqgu x mzku,

Nradrtqde ngq x mzte mwi?

¹⁰ X sc tqayrplapxpele lr mrkzbleng.

?Myx kxmule, trtxpnzngr nzayrplapx-kz-
krde nimu?

X alvztrle leplz amrlx.

?Mz drtwrmu trpnzngr da kx krlzle?

¹¹ Yawe obqplxle nzaokr drtwr leplz,

X krlzle kx drtwr kx nzyrlqlr mane. ☆

Mrlz Nzpnanatikr Yawe Leplz Nedeng

¹² Yawe, namrlzbz mz krkcng tqpnanatqng,

Mz nzalvztr-krm nidr mz loukxtr scm.

- 13 X trnarlrpx-ngrnqu nzxpu-krdr, a' amnc-
zpxq nidr,
Vz vz mzli kx ayrkro-ngrn kxdrka'-ngrng mz
gq.
- 14 Yawe, trpxtpx-ngrnqu leplz nemqng,
X tr-rlasz-ngrnqu nigr kcng tqmcpqx.
- 15 Mzli kc navzm, nzaclvekr kxnmzmailng sa
natubq,
X krkcng nabzdr tqmqngi sc tzabrtz-ateng.
- 16 Yawe, nim txpwz kx tum mz nibrng,
X nim kzteng mz nzarlapx-krbzme ninge
mz kxdrka'-ngrng.

Yawe Tu-zvzbzle Mz Nibr Kxnztubqng

- 17 Nzmu trnaokatrww ninge,
Mzli trnaboiu x ninge kc tqbzpx.
- 18 A' mzli kc tqkqle-ngrne nim mz nzxpu-krng,
Lolvz-amqngiq ninge mz nivz lrm.
- 19 X mzli kc tqtalvzongr drtwrng,
Zvz amqtrpe' drtwrng x abrtz-moux.
- 20 Px-ngrn nzngi-te-krmu badr kxnztung
kxdrka'-ngrng
Mz nznrlvzo-krdr loukxtr scm.
- 21 Murde nzyrlwpx-lxblr-ngdr mz nznzrpa'-
krdr kxnztubqng,
X nzaprc-krdr kxnzmrlzng mz nznribqng.
- 22 A' Yawe, Gct rng, nide lrpalc nyzng,
X butqbr kc tqrlakitr.
- 23 Yawe, Gct rgr, sa naodatile nidr mz nqmz krdr
kc tqtrka,
Mz nzrtxlvlz-krdr alwx ngrdrng amrlx.

Sam Kranzpnu-rpwxmz-nrade-nzlvqn (95)

Namnclzbzku Mz Yawe, King Kc Tqngi Kxrpalz

Nangrbzku Mz Yawe

- ¹ Nangrbzku mz Yawe mz nzabrtzngr.
Murde nide butqbr kc tqrlakitrku.
- ² Na-awibzku bade
Mz nzngr-kato-krbzku bade mz nabz kxyr-lvi!
- ³ Murde Yawe nide Gct kc tqmyalz-esz'ngr,
X King kc tqmyaszlze kxnmncng mzlilxlr
amrlx.
- ⁴ Me boongr yc mz mqde.
X nyz-kzde newz kxmyalzng.
- ⁵ Prla x drtc' nyzdeng
Murde wz-ngrde mz nzngini-krde Kxrpalz.
- ⁶ Na-angioku Yawe kc tqwz-ngrde nigu
Mz nzyrngzlvzo-krqu nide.
- ⁷ Murde nide Gct rgu, x nigu leplz nedeng,
Apuku sip kx aclveleng.

Naxlrku Natqde

- X naxlramu natqde mzbq ka,
Mz nzrpi-krbzle bamu kx,
- ⁸⁻⁹ “Bzkq nabzmu mqngipe, da kc tzwailr melr-mqung.
Murde kxmule-esz' nzmc-zvzlr nzrkati-krbo
da kxmrlzting badr,
Mz nzmnc-krdr mrkc lzke, a' otablrkr badr mrkc
Meriba,
X nzatalzlr ninge mrkc Masa, mz nzxpqbrlr-krdr ninge.

- 10 Mz yiz lcng nzpnu-pwx ngyati zvv ngr
drtwrnge nidr.
Murde nidr leplz kx nzvz-rbrng mz nabzdr
x trnzvz-nqblqlru nqm q kringeng.
- 11 X mz nzangya-krmlr drtwrnge, sc tgesalzpe
kx,
Trtxpnzng nprtr-krdr mz nzmnc-zpwxngr
kc nakabo badr.” ☆

Sam Kranzpnu-rpwxmz-nrade-esz'mz (96)

Nagqlzku Yawe, King Kc Tqtubq

Takitrde Nzrglqlzng

- 1 Nigu lr nrlc amrlx
Nangr-ngrbzku mz Yawe nabz kxrna!
- 2 Na-angrlvzku nide
Mz nzyapwxtipx-krng kx arlapxle nigu.
- 3 Napipxbzku mz leplz amrlx
Da kxmatq x da kxmyapxbz kcng tqaletileng.
- 4 Takitrde nzrglqlzng Yawe kc tqmyalz-esz'ng,
Murde nzmrlue-krde namyaszlzle kxnm-
ncng mzlilxlr amrlx.
- 5 Lr mrkzbleng nzangio-tpwzlr mqngr da kxn-
zlvz,
A' Yawe tpxwz kx rwzng bongavz x nrlc
atwrnng.
- 6 Mz nzmncpx-krm Yawe Mangr-nzangiongr,
Xngibzku zmrlue, zyzlr, zmatq x zluli rdeng.

Lr Nrlc Nagqlzlr Yawe

☆ **Sam Kranzpnu-rpwxmz-nrade-nzlvqn (95):11** Hibru 3:7-11,
15; 4:3, 5, 7

7-8 Napibzku mz lr mrkzbleng kx naglqlz-kzlr
nide

Mz zmatq, zluli, x zmrlue lcnq.
Murde takitrde nzale-krqu da lcnq,
Mz nzrtwz-krmq da bade mz makoa nyzde.

⁹ Na-angioku Yawe murde tr-esz'ngr.
Na-amrlueku nide x narnrctrpzku bade.

¹⁰ Eu, napipxbzku mz neidung amrlx kx Yawe
nide King r nrll, x atu-amqngile nrll mz
trnzycngrlr-krdeu.
X sa na-aelvele lr nrll amrlx mz nzrsakrl-
ngr.

Nzaelve-krde Tubq

¹¹ Nimu bongavz x drtc' naelalvzamu nide!
X nim prla x dalrmqng amrlx drtwrmu
naelalzm!

¹² Nimu nardzng x dalrmqng amrlx na-abrtz-
kzamu!
Nimu nounc ngr peto amrlx na-angrlvz-
kzamu Yawe.

¹³ Murde sa tqvzm mz nzaelve-krde lr nrll.
X nzayzlu-krbzle da mz leplz amrlx sa nam-
rlz x tubq.

Sam Kranzpnu-rpwxmz- nrade-rllmz (97)

*Na-abrtzlvzku Yawe, King Kc Tqmyatxlz-
esz'ngr*

Zmatq Ngrde

¹ Mrlz lr nrll amrlx nazabrtz-krdr murde Yawe
nide King kc tqmyatxlz-esz'ngr.
X lr trmctu naelalz-ngrm drtwrdr kz nide.

- ² Zbo kxve x nzlo nzngrlelvzlr nide.
X nzaclve-krde leplz mrlz x tubq.
- ³ Nyr rtwayznepx kai mz nzvz-krde,
Nyr kx nangcngr enqmi kcng tztulvz-ngrdr
nzti rde.
- ⁴ Bzlrpc ngrde kx pcpxle pnamilxtile nrlc,
X drtc' ycngrlrlzm.
- ⁵ Yawe nide Kxetu r nrlc tulvzo.
X mz nzmckrdr nide newzng nzwzong nza-
puls nzwzokr gq.
- ⁶ Lr Heven amrlx nzipxlr nztubq-esz'ngr-krde,
X lr nrlc amrlx nzmclr nzmyatxlz-zlwz-krde.

Myaszpxle Kxnmncng Mzlilxlr

- ⁷ Krcng amrlx tzangiolr kx trngiu Yawe Gct
angidr, drtqdr la namya zlwz.
X kxnmncng mzlilxlr amrlx nzmu na-
angiolr nide. ☆
- ⁸ Yawe Gct rgr, nigr lr Jerusalem x lr mztea amrlx
ngr nqvi lr Judz abrtz-zlwz-ngrgr nim
Nzayrplapx-krm enqmi rgrng.
- ⁹ Murde lr nrlc amrlx nzmnczbzng mz zmatq
ngrm,
X nzmyalz-zlwz-krm myaszpxle kxnmncng
mzlilxlr amrlx.

Namnczbzku Bade

- ¹⁰ Nigu kcng tzmrlztilr Yawe napxtxpx-ngrgu da
kxtrka.
Murde tu-zvzbz mz nibr kxnztubqng mz
nzarlapx-krbzle nidr mz mq kxdrka'-
ngrng.
- ¹¹ Yawe amrlzle kxnztubqng, kx nabzdr lqngi.

- Murde na-abrtzlvzlr nzngini-krde Gct kxtr.
¹² Delc, nigu kcng tztubqng na-abrtzlvzku Yawe,
Mz nzawi-krbzku bade.

Sam Kranzpnu-rpwxmz-nrade-rtqmz (98)

Na-angrlvzku Yawe, King Kc Tqmatq-esz'ngr

Na-angrlvzku Yawe

- ¹ Nangr-ngrbzku mz Yawe nabz kxmrna mz
nzale-krde da kcng tqmyapxbzng.
Murde aovxiole enqmi rdeng mz nzetukr
zmatq ngrde.
² X sc tqaelwapxpe-ngrbzle nztubq-krde mz lr
mrkzbleng amrlx,
Mz nzarlapx-krbzle leplz nedeng mz mq
enqmi rdrng.
³ X aodule nigu lr Israel mz nzatutr-zvz-krde
natqde.
Murde leplz mz nrhc tulvzo nakrlzlr kx
arlapxle nigu.

Naglqpxku Nide

- ⁴ Nigu leplz amrlx mz nrhc na-angrlvzku Yawe
Mz nabz kx yrlvi.
⁵ Naglqpxku nide
Mz nzayrni-krbzku bade gita,
⁶ X mz nzvxu-krbzku trpu.
Na-angrlvzku Yawe, kc tqngi King!

Nangrbzku Bade

- ⁷ Nimu prla x drtc' x dalrmung amrlx
Drtwrmu naelalzm!

⁸ Nimu lue na-amqmq-lzbqamu mz nztalio-krmu
mz nabzde.

X nimu newz na-angrlvzamu Yawe!

⁹ Nigu amrlx nangrbzku bade.

Murde sa tqvzm mz nzacive-krde lr nrlc,

X nzayzlu-krbzle da mz leplz sa natubq x
narsakrlrngr.

Sam Kranzpnu-rpwxmz- nrade-rpwxmz (99)

Na-angioku Yawe, King Kc Tqtr-esz'ngr

Naglqlzku Drtqde

¹ Yawe nide King, kx myaszlze enjrl kcng tz-
matqng tztu-ngalelvzlr tron nyzde.

X leplz amrlx mz nrlc tulvzo narnrcti-lzbqtr-
ngrbzlr bade.

² Yawe matq-esz'ngr Jerusalem.

X nzmyalz-esz'ngr-krde myaszpxle lr
mrkzbleng amrlx.

³ Leplz amrlx naglqlzlr drtqde,

Murde nide kc tqtr-esz'ngr.

Naglqlzku Gct Rgu

⁴ King kc tqrninr, mrlz-zvzbz bam da kxmrlz.

Delc nzacive-zvz-krm nigr tqtubq-zvz-ngrde
x rsakrlrngr.

⁵ Nayrngzobzku mz nanyc Yawe,

Mrkc tqwxbu-ngrde mz tron nyzde.

Na-angioku x naglqlzku Gct rgu,

Murde nide kc tqtr-esz'ngr.

Naglqlzku Yawe

- ⁶ Mosis x Eron nidr pris neng Yawe, x profet
Samwel krka'bz bade.
Nzyrnitrpzng bade x ayzclubzle natqdr.
- ⁷ Ycmnepxm badr mz nabz dcbz,
X nzvz-nqblqlr natqde x lou scdeng amrlx.
- ⁸ Yawe, nim Gct rgr,
X ayzlume natqgr, nigr leplz nemqng.
Kxmule-esz' ayrplapx-kaiq nigr mz alwx ngr-
grng,
A' sc tqaelwapxpe-ngrn kx nim Gct kx krlzle
nzipq-krde leplz.
- ⁹ Naglqlzku Yawe, Gct rgu, mz nzangio-krgru nide
mz newz kxtr nyzde,
Murde nide kc tqtr-esz'ngr.

Sam Kratrtqki-esz' (100)

Na-awi-ngrbzku Mz Yawe Nzaodu-krde Nigu

Na-angioku Nide

- ¹ Nigu leplz amrlx mz nrlc
Na-angrlvzku Yawe!
- ² Na-angioku x naglqpxku nide
Mz nzelalz-krm drtwrgu!
- ³ Nalxngitiku kx Yawe nide Gct, x nigu leplz
nedeng murde wz-ngrde nigu.
X apuku sip ngr nardzng nyzde.

Na-awibzku Bade

- ⁴ Mz nzvztr-krgru mz naonrx x makoa ngr Mangr-
nzangiongr Yawe,
Navz zvz nzawi-krbzku bade x nzangio-kz-
krgru nide.
- ⁵ Murde Yawe mrlz-esz'ngr.

X aodule nigu mz nzatutr-zvz-krde natqde.

Sam Kratrtqki-esz'-nrade-esz' (101)

Nztubqkr King R Israel

Nabz ne Devet.

¹ Yawe, nangr-ngrbo bam

Nabz ngr da kxtubq x nzangidatingr.

² X namnc-nqblqx nztubqkr nqmq krm mz
nzokatr-krm ninge.

X nabznge nalqngi zvz mz nzmnc-krgr badr
lr ma nyznge.

³ Tr-rlr-ngrpwc'u nzprtr-krm da kxtrka brma.

X pxtpx-ngrne krkcng tzesablqtilr nim.

⁴ Delc, nartctx-ngrne nqmq kr kxdrka'-ngrng,

X nayrlqpx-lzbqng mz da kvz-rbr.

⁵ Sa narpwa'-ngrbo krkcng tzipikiti-awalr
kxnmnc-aepztrpzng badr.

X kxnglqpx-lzbqng trmrlzu mz nzobq-
krnge.

⁶ A' kxnglxngiti-zpwxlr nim nangingidr kztengeng,

X kx nabzdr lqngi sa nawztrpqng bange.

⁷ A' krkcng tzesabrng x tzipokia-zvzng,

Trtxpnzng nzmnc-trkrmlr bange.

⁸ Murde mz zbq kang kqlu sa nalolvztix kxdrka'-
ngrng

X namaszlrpx-ngrne nidr mz mzteadau
nyzm.

Sam Kratrtqki-esz'-nrade-li (102)

Apux Zsikapu Kc Tqmrbr Ani

Nzmnc-krnge Esz'-krnge

- ¹ Yawe, lalztqm mz nzkrka'-krbo bam.
X xlrn nzyrni-krnge mz nzokatr-krm.
- ² Mzli ka tqprtzngrm nzxpung bange,
Bzq mnc-rlrume bange.
A' ayzlu-anim natqnge
Mz nzqle-krnge nim.
- ³ Nrkrdrtnge nzpqrde apule nyr.
X mzli trnaboiu ninge kc tqbzpex, tqapupex
zsikapu kc tqmrbr ani.
- ⁴ Nabznge talvzo apupele nabr kxglr,
X trmupewxu.
- ⁵ Bztipenge nzyrningr mz nzetqkr drtnge.
X nginitxpenge nrvr-nrbalq.
- ⁶ Apux nc kx nzrtclzng mepz, x sc tqtaligxpe,
Mz nzmnc-krnge esz'-krnge.
- ⁷ Mnzx, a' trkrlzpewxu nzmwingr.
Apux ncblo kx trpnzngr kxnginide kx naok-
latile nide.

Apux Brmrda

- ⁸ Enqmi rngeng nzatrkatizvzlr ninge mz
nzycmne-krdr.
Nzpitrpzlr drtnge mz nzrpibqti-krdr leplz.
- ⁹ Yawe, nzvzkr drtwrge dekc tqkrlcng nelznge
tqngi dakxnzng nange,
X drle mzke' dekc tqngi lue pqnge.
- ¹⁰ Murde ngyati zlwz drtwrm ninge.
X apux brmrda kc tqrtcxpe-ngn.

- 11 Nzmnc-krnge apule zmyo ngr milzpq
Kc tqmrbr mz nzyrkrpxkr ngrlx.

A' Nzngini-krm King Tqyc Tqyc

- 12 Kxmule-esz', a' nzngini-krm King tqyc tqyc.
Nrpr ngr ncblo amrlx sa nadcpv zvz mz
drtwrdr nim.
- 13 Murde sa nayc mz drtwrm Jerusalem.
X mzli ka mzli r nzokatrpe-krmle.
- 14 Kxmule-esz' enqmi rm nzodatipelr mztea lc, x
trkape,
A' sc tqsutibe drtwrgr x tqvztibe drtwrgr.
- 15 Yawe, lr mrkzbleng amrlx sa na-amrluelr
drtqm.
X king amrlx mz nrly sa na-amatqlr nim.
- 16 Murde mzli kc na-aelwapx-ngrn nzluligr
zmatq ngrm,
Mz nzwz-mou-krm Jerusalem,
- 17 Drtwr ngrde kx ayzlu-ngrme nzkrka'-krgr,
Nigr kcng trpnzngr scgr da.

Krkcng Mztr Trnzmcka

- 18 Nayroku da kcng tqaleting Yawe,
Murde krkcng mztr trnzmcka naglqpx-kzlr
nide.
- 19 Kxnamu nzyr-kgule sele: Yawe mnc Heven,
Mz ma nyzde kc tqtr tqmyalz, x sc tqobqom
mz nrly.
- 20 Xlrle nzyrni-kgu mz presin,
X aopxbzle drtqgu, nigu kcng tzpipx kx
nanibqng.
- 21-22 X xlrpe-kzle nzngkrkr leplz ngr mrkcng amrlx
Mzli kc tzyrlwr-lxblr-ngrdr Jerusalem,
Mz nzangio-krdr nide,

X nzglqpx-krdr drtqde.

Trtxpnzngr Nzrtekqtrngr Nim

- ²³ Yawe, ngi-batrpe' nzyangrng-a-krnge,
Mz nzamrbctr-krme nzlu-krnge, mzli ka
tqngi-oblabengr.
- ²⁴ A' rpibo bam kx, “Gct rng, nzlu-krm tqyc tqyc.
Suti drtwrng nakrlz-zpwxbo nzngi-lrtzlvz-
krnge, x ninge kc tqbz-atex.
- ²⁵ Mzli kc mz noude wz-ngrn nrlc,
Bongavz x dalrdeng amrlx.
- ²⁶ Nrlc x bongavz sa nayrkrpxng kalr.
A' nim txpwz kx namnctx alo.
Mzli trnaboiu x sc tztrkapeng, tzapupelr lrpz
kxblzlongr,
Kx nzrtctxngr x nztekqtr zvz mz kxmrna. ☆
- ²⁷ A' trtxpnzngr nzrtekqtrngr nim.
X trtxpnzngr nzbz-krm mz kzdq mzli. ☆
- ²⁸ Delc doa negrng sa namnc-zpwxng mz nrlc,
Murde sa na-aclve-angidrq nidr.”

Sam Kratrtqki-esz'-nrade-tq (103)

Nivz Lrde Tqyc Tqyc

Aodu-zvzle Ninge

- ¹ **Naglqpxx Yawe mz nabznge atwrnrngr!**
Naglqpx-zvzx drtqde kxtr.
- ² Na-aoti zvz drtwrng nivz lrde,

☆ **Sam Kratrtqki-esz'-nrade-li (102):26** Matiu 24:35; 2 Pita 3:10; Nzaelwapxng 20:11 ☆ **Sam Kratrtqki-esz'-nrade-li (102):27** Hibru 1:10-12; Jemes 1:17

- X da kxmrlz kcng tqalemle bange.
3 Murde katxpxbzle alwx rngeng amrlx.
X amrlzle ninge mz zyagox amrlx.
4 Arlapxle ninge mz nzbzng.
Aodu-zvzle ninge.
5 Okatrlle ninge mz da kxmrlz
Murde nzlu-krnge naboi x nrkrdrtnge nax-
plr, mz nzapu-krnge lr.

Ipqpxle Alwx Rgung

- 6 Yawe okatrlle kxnzobqszong murde ale-zvzle da
kxtubq
Mzli kc tqayzlu-ngrbzle da mz leplz.
7 Aelwa-ngrbzle me pnz drtwrde mz Mosis,
X zmatq ngrde mz lr Israel.
8 Yawe mrlz-esz'ngr x aodu-zvzle nigu.
Drtwrde trngya-aniu, a' okatr-zvzle nigu.
9 Trkrlzleu nzaboitr-krmle zngya ngr drtwrde
bagu,
A' ani txpwz nzipq-mou-krde nigu.
10 Kxmule-esz' takitrde nzayrplapx-zlwz-krde
nigu,
A' ycngdrtwrde nigu, x trayzlupleu bagu mz
nzvz-nqblq-krde nzvz-rbr-krngung.
11 Murde sc tqaodu-zvzpele nigu kcng tzamrluelr
nide,
Murde nzetu-krm nivz lrde bagu myaszpxle
bongavz. ☆
12 X mz nzipqpx-krbzle alwx rgung,
Apule kx rtctx-ngrbzle rlru, me trpengr
nzmrc-moungr.

☆ **Sam Kratrtqki-esz'-nrade-tq (103):11** Sam 36:5; 57:10; 71:19;
108:4

- 13 X Yawe amqtrple drtwrgu,
Da kc tqwai trte nzamqtr-krbzle drtwr doa
nedeng.
- 14 Dcpx mz drtwrde kx nigu leplz kxtrnzxp lung,
Murde wztx-ngrpwzle nigu mz drtc'.

Aodu-zvzle Nigu

- 15-16 X nzlu-krqu mrbcnepwz,
Apule nepi kc tqprtm mz nourla, x tqxplr
mzli kc bea.
- A' sc tqtaope mou milzpq.
Murde mzli kc nabzngr leplz trpengr nzmcmoungr nidr.
- 17-18 A' Yawe aodu-zvzle x amrlz-zvzle nigu,
Kcng tzaamrluelr nide,
- Mz nzyrlq-angidr-krqu natqde,
X mz nzlolvz-amqngi-krqu Nzesz'tikr
Drtwrgu badr.

Naglqpx-zvzku Nide

- 19 King Yawe wxbu mz tron nyzde Heven,
Mrkc tqaclve-ngarde nrlc atwrnrngr.
- 20 Nimu enjrl kxnzmatq kcng tzvz-nqblqlr
natqde,
Naglqpxamu nide!
- 21 X nimu ami ngr Heven kcng twwztrpzng bade
mz nzatutr-krbzmu me pnz drtwrde,
Naglqpx-kzamu nide.
- 22 X nigu amrlx mz nrlc tulvzo naglqpx-kzku
nide.
Naglqpxx Yawe mz nabznge atwrnrngr!

Sam Kratrtqki-esz'-nrade-pwx (104)

Nabz Ngr Nzrglqlzngr Kxrpalz

Kxrpalz

- 1-3 **Yawe Kxrpalz, naglqpxx nim mz nabznge.**
Murde nim Gct kc tqluli, tqmyalz-esz'ngr.

Bongavz

- Nzmyalz-krm x zmatq ngrm nzngrlelvzlr nim
nzapulr lrpz kx kq-ngrn.
X zyzlr ngrm apule lrpzu scm.
Bongavz apule nqni kxetu kc tqprlxpxq.
X atuome elr nctrpou ngr ma nyzm.
Dcbz apule lika kx lvc-ngrn,
Mz nztwz-krde nim nenq kxwq.
4 Zmatq ngrm batrpzle mz enjrl nemqng nzlvc-
ani-krdr mz nzapu-krdr nenq.
X menrpa lcng twztrpzng bam nzapu-kzlr
bzlrpc kc tqpctipx. ☆

Drtc'

- 5 Wztioq nrlc mz nou rplz kxmngi,
Murde trpnzngr nzyngnrlr-krde.
6 Mzli kc ayrrngr, drtc' mrbrobz prla,
X newz amrlx akq-atwrnr-ngrde.
7 Zbz mzli kc tqpnanati-ngrn prla sc tqpzneope,
Mz nzxlr-krde natqm kc tqapule bzlrmei.
8 Prla pzneom mz nar-newzng, vzo krlzobzle
nabzlwang,
Vzo mrkc tqyrlqbzme kx nalrlz-ngrmle.

- 9 X yrlqzbzme bz ngr me naesakingr prla,
Murde ma tqakq-atwrnr-mou-ngarde drtc'.

Lue, Dakxnzng, X Ma

- 10 Wz-ngrn aulz, nzaulzmqng mz nabzlwa amrlx,
Lue lcng nzvzong x lue kxetung nzyrleng mz
mzlir newz amrlx.
- 11 Animol amrlx nzmnmqng lue lcng,
Mz nzbrlxkzkr drtwrdr.
- 12 Utc nzwzpe-ngrng ma nyzdr x nzng-rzvzng
Mz nounc mz nqlvi r lue lcng.
- 13 Adcme tewa mz ma nyzm bongavz. Dcom mz
newz amrlx.
X amrlzle drtc' murde kxnlung kcng tqwz-
ngrn namnc-zpwxng.
- 14 Wz-ngrn nabr x dakxnzng nztuting mz drtc'
Nangi nan animol x leplz.
- 15 Rkame waen kx na-aelalz-ngrm drtwrgr,
X tolo kx na-qlngr nrkrdrdqgr,
X dakxnzng kx naxplrngr nigr.
- 16 Yawe, nounc nyzm kc tqpetiq
Nzdo-zlwz-krdr vzpxm mz nzadco-krme
tewa badr.
- 17 X utc kang kqlu nzmncpxng mz nounc lcng.
X nzwzpx-ngdr ma nyzdr elr.
- 18 Gout nzmncmqng mz newz,
X animol kxntopwzng nzmnc-kapqneng me
rplzng.

Mzli Kcng Tqyrlqq

- 19 Yawe, wz-ngrn temz nangi noabx ngr mzli,
X nepi noabx ngr zbq.
- 20 Nim kx rwzng ngr nrckxbq,

Mzli r nzprpx-krm animol kzpeto me nzmnc-ngrdrng.

21 Laion nzyrni-katong mz nzrtangr-krdr dakxznzng

Kx nakabzme badr.

22 A' mzli kc tqprtzngrm nepi,
Sc tzyzlupeng ma nyzdr, tzmwipeng.

23 X mz nrhc kxngrlx, leplz nzvzng mz nzale-krdr
nzwz-krdr,
Nzwzng vz vz krlzbzle milzpq.

Animol

24 Yawe, animol kcng tqwz-ngrn kqlu-esz'ngr.
Nrhc ka yrbulzm mz da lcng amrlx tqwz-ngrn
mz nzyrplapx-krm.

25 Dcpwe yrlwrlz-ngrm nc kxkqlu x rblx nzrlwx-
krgleng.
Kzdu nc lcng nzetuting x kzdu nztopwzneng.

26 Lcsu kxnzkqlung nzvoneng prla.
X nc kxbe kc tqwz-ngrn drtqde besilr ayone
kz elr.

Mevalu

27 Animol lcng nzmnc-xglelr nim,
X rka-zvzbzme nadr dakxznzng.

28 X mz nyrka-krbzme da kxmrlz badr
Amrlz-zvzq nidr.

29-30 Mzli kc tqrka-ngrbzme zycmini sc tzlupeng,
Murde nim Kxrpalz.

X ngi-batr-zvzbzme nzlukr animol amrlx mz
nrhc.

A' mzli kc tqpxtxpx-ngrn nidr, nelzdr vzdzm.
Murde mz nyrkatxpx-krbzme zycmini lc, nzbzng.
X nzyzlu-moung mz drtc' kc tqwz-ngrn nidr.

Zluli X Zmatq

- ³¹ Nzmyalzkr Yawe navz zvz,
X nzabrtzlvz-krde nikeng wz-ngrdeng amrlx.
- ³² Mz nzobqo-krmle, drtc' ycngrlrilm apule
nengq kx vzm,
X ngi-batrpzle nzsikapukr trmami mz
nzmaetr-krde newzng.
- ³³ Na-angrlvz-zvzx Yawe Gct rnge,
Navz nakrlzbzle nzesakikr nzycmi-nkrnge.
- ³⁴ Mrlzvxitx Yawe nzabrtzlvz-krde natqngeng mz
nzngr-krbo bade,
Murde nide kc tqrngi-batr-zvzm nzabrtz-
krnge.
- ³⁵ Mrlzvxitx nznibqti-krde kxdrka'-ngrng
Murde nzatrkatilr nrlc kc tqwz-ngarde mz
nzpxtpx-krdr nzglqlz-krdr nide.
- Yawe naglqpxx nim mz nabznge.**
Eu. Naglqlz-zvzkr nim.

**Sam
Kratrtqki-esz'-nrade-nzlvqn
(105)**

*Gct Angidati-zvzle Nzesz'tikr Drtwrdr Badr
Leplz Nedeng, Kxmule-esz' Nzvz-rbrng*

Nqm q Kr Gct

- ¹ **Naglqpxku Yawe,**
Na-awibzku mz Yawe mz nzmyalz-esz'-ngr-krde.
X napipxbzku mz lr mrkzbleng da kcng
tqaletileng.
- ² Na-angrlvzku mz nzangio-krngu nide.

X napipxku da kxnzkcipxng kcng tqwz-
ngrdeng.

³ Nabilvzku drtqde kxtr.

X nigu kcng tzamrluelr nide drtwrgu nae-
lalm.

⁴ Namnc-xgleku Yawe x nzxplr-krde.

X nasuti drtwrgu nzxngi-krbzku nzulrde.

⁵⁻⁶ Vzpxmgu mz nqvi lr Ebraam, kxnzawz ne
Yawe,

X nqvi lr Jekop kc tqmcpdle.

Delc nadcpd zvz mz drtwrgu rkx kcng tqmatq
tqaleleng,

X nztubqkr nqm q krde.

Nzesz'tikr Drtwrgu Badr Gct

⁷ Yawe nide Gct rg.

X kapxbzle natqdeng mz leplz amrlx mz nrlc.

⁸ Nzesz'tikr Drtwrgu badr tqyc tqyc.

X trmrbrtru mz drtwrde nzesalz-krde.

⁹ Nzesz'tikr Drtwr lc tzyrlq-kailr mz Ebraam.

X pipx-kzpzle nzesalz-krde lc mz Aesak.

¹⁰ Amqngi-mopwzle mz Jekop x doa nedeng,

Murde navz alo.

¹¹ Rpibzle badr kx, "Sa nakabo bamu drtc' kc
Kenan

Murde nangi drtc' nyzmu."

Leplz Neng Gct

¹² A' nqvi lr ncblo lc tqngi nyz Gct nzpipzbeng
mzli lcde,

Mz nzngini-krdr lr mrkzbleng kx trpnzngr
me nzmqngio-ngdrdr.

¹³ X nzayo-tpwzng

Mz nzrlasz-krdr kc mrkzble x nzvzki-mou-
krdr mrkzble.

- 14 A' Yawe tr-rlrpx-ngrdeu nzaovxiongr nidr,
Murde aclvele nidr mz nzlc-amq-krbzle mz
king kxznzkqlung,
15 Mz nzrpi-krbzle badr kx, "Bzkq atrkatibzmu
leplz nengeng kx mcpxx.
X bzkq aetqbmzmu drtq menrpa nenge lcng."

Drtwr Kx Yrlq Gct

- 16 Mz nibr kzdung mzli, Yawe atwzlr-ngrmle dzbi
mz drtc' nyz leplz nedeng,
X katxpx-kzle dakxznzng nadr amrlx.
17 A' atwzlr-kai-ngrde kzdq ncblo Ijipt kx nangibz
lrpzki badr.
Krlcde Josip, mrlx Jekop, kc tzamwalr murde
nanginide kxznzawz-nrbalq.
18 X mz nibrde sc tqmncpxpem mz presin,
X nzatolva-ngrdr nide mz nqvi.
19 Vz vz x natqde sc tqyokaetipxpele
nzmwiblekr king r Ijipt,
Mz nzipx-krde natq angidr kc tqkabz Yawe
bade.
20 Zbz king r Ijipt kc tqaclvele mrkcng kqlu,
Aopxbzle drtq Josip mz nzkapx-krmlele mz
presin.
21 X sc tqyrlqpele Josip nzngini-krde kxetu elr,
Murde na-aclvele dalr Ijipt amrlx.
22 Zbz Josip rngisc zmatq mz nzrkapx-krbzle natq
mz kxznzetung amrlx,
X mz nzalvztr-krde ncblo kcng tzyrplapxng.
23 Mz nibrde Jekop badr doa nedeng sc tzvzpeng
Ijipt,
Mz nzmnc-krdr elr, murde dzbi lc tqtaope mz
drtc' nyzdr.

Nzayrplapxkr Gct Lr Ijpt

- 24 Ngvi lr Jekop nzmncing Ijpt trtqki r yiz, x
Yawe batrpzle nzqqlunepx-krdr.
X nzxplr-krdr myaspxle lr Ijpt, enqmi
rdng.
- 25 Delc lr Ijpt tzngyatingr drtwrdr leplz nedeng
kcng tzangiolr nide.
X sc tzatratipelr nidr mz nzawz-nrbalq-
krdrle ng x sc tznibqtipe-kzpzlr doa ncblo
nedrng mzli kc mztr tzm-ngrdr.
- 26 Delc Yawe tqatwzlr-ngrbzle Mosis kxnzawz
nede,
Nidr mz Eron kc tqmcpdle, murde naokatrle
leplz nedeng Ijpt.
- 27 X sc tzale-ngrdr rdx ngr Gct kxmatq kxkqlu elr,
Mz nzngi-batr-krbzle nzwzng da kxnzkc-
tipxng mz mqdr x mz natqde.
- 28 Awx-nzlo-ngrbz Yawe mrnyzdr,
A' natqde trnzvz-nqblqpwlru lr Ijpt.
- 29 Ngi-batrpzle nzlrtpxkr lue nyzdrng mepyr
X nzbztingr nc nedrng.
- 30 Drtc' atwrnrngr yrbuti mz frck,
X nznulvzpx-kzplr ma nyz king.
- 31 Yawe kapxle natqde
X mc badr mclrla nzyrkrpx-pnz-ngrng nr-
larnrlc nyzdr.
- 32 Atwzlr-ngrmle muli-aes apule tewa kxdc,
X bzlrpc tqptipx zlwz mrnyzdr.
- 33 Odatile ngvi lr dakxnzng mz nrlanc nyzdr
X plameitio-kzle nounc nyzdr amrlx.
- 34 Yawe kapxle natqde

X blzmr kionabr kx rblx nzrlwxngr
nzlvcmqng.

³⁵ Nzngqtilr dakxnzng kxnzpeting
Mz nrlanc nyzdr amrlx.

³⁶ Zbz Yawe sc tqnibqtipe-kzle doa ncblo kx
ayrnrng
Mz ma nyz lr Ijipt amrlx.

Nzokatrkr Gct Lr Israel

³⁷ Mz nibrde sc tqmailzpele lr Israel mz nzrlasz-
krdr Ijipt, nzrtwzng silvz x gol.

X trpnzng nidr kxnzyagoxng, a' nzxplrng.

³⁸ X lr Ijipt nzabrtzlvzlr nzrlasz-krdr nidr.
Murde nzmwxltilr da kx naprtzbz badr mz
nzlolvz-mou-krdrleng.

³⁹ Yawe yrlqzbzle dcbz ngrlx murde navz-nqblq
leplz nedeng,
X mz nrlckxbq yrlq-kzpzle nyr nayzlrzbz
badr.

⁴⁰ Nzrlxbzng bade dakxnzng x atwzlo-ngrmle
kio kxkqlu
X dakxnzng kxkqlu kx nakrlcngr nelzdr.

⁴¹ Ayrlepzmle lue mz kzdq rplz kxetu,
X lue lc yrle lzke apule lue kxvo.

Me Pnz Drtwr Gct

⁴² Delc Yawe sc tqyc-zvzng mzdrtwrde natqde
kxtr

Kc tqpibzle mz kxnzawz nede, Ebraam.

⁴³ Zbz sc tqmailzpxpele leplz nedeng kcng tqm-
cpxle,

X nzngz-vvzng x nzmaliq-zvz-kzng mz
nzabrtz-krdr.

⁴⁴ Kabzle drtc' ngr lr mrkzbleng mz leplz nedeng,

- X nztwz-kzlr nrlanc nyzdrng x da amrlx kx
nzvzpxmqng mz nzwz-krdrng.
45 Murde leplz nedeng navz-nqblqlr loukxtr sc-
deng
X nayrlq-angidrlr natqdeng.
Naglpqxku Yawe.

Sam Kratrtqki-esz'-nrade-esz'mz (106)

*Gct Arlapx-zvzle Leplz Nedeng, Kxmule-esz'
Nzvz-rbrng*

Nzawingr

- 1 **Naglpqxku Yawe!**
Murde aodu-zvzle nigu.
Awi-ngrbzku bade nzmrlz-esz'ngr-krde.
2 Trpnzngr leplz kx rkrlz nzrpipx-angidrngr r kx
amrlx kcng tqwz-ngarde,
X nzrglqlzngr amrlx trkrlzpxpwzleu
nzmyalz-esz'ngr-krde.
3 Yawe, natqm rpile kx sa namrlzbz mz leplz kcng
tzaleng da kxtubq,
X trpnzngr da kxtrka mz nzao-krdr drtwrdr.
4 Nadcpxngr mz drtwrm ninge, mzli kc naokatr-
ngrn leplz nemqng,
X aprtr-kzpz ninge badr, mzli kc na-arlapx-
ngrn nidr.
5 Murde na-axvctr-kzpo badr mz nzamnc-zpwx-
krm nidr,
X mz nzabrtz-krdr x nzbilvz-krdr nzngini-
krdr leplz nemqng.

Mrkc Ijipt

- ⁶ A' axvctr-lzbq-kzpzkr mz melrmqgrng mz alwx
ngrdrng.
X vz-nqblq-kzkr nzvz-rbr-krdr mz da kxtrka.
⁷ Mzli kc tzmncngr melrmqgrng Ijipt,
Trnzkr lz-zpwxlr r kx kcng tqaletiqng,
X trnzaotiu drtwrdr nzwrde kcng kqlu tqaelwa-
ngrbzme nivz lrm badr.
X mrkc Prla Bla nznzlvzolzr nim kc tqmyalz-
esz'ngr.

Mrkc Prla Bla

- ⁸ Kxmule-esz', a' arlapxq nidr mz nzvz-nqblq-
krde nzesalz-krm.
Murde na-aelwapx-ngrn nzmyapxkr zmatq
ngrm.
⁹ Lclvzq Prla Bla x sc tqakipx-lzbqpe x noude
pzlz-kzp.
X sc tqmailzpeq leplz nemqng elr.
¹⁰ Arlapxq nidr mz nzaopx-krbzme drtqdr mz
mq lr Ijipt,
Enqmi rdr kcng tzpctxpx-ngdrdr nidr.
¹¹ A' prla yrle-etr mou x akq-pnzle enqmi rdrng,
X trpnzngr nidr kx rlapx.
¹² Mzli lcpe sc tzlxngiti ate leplz nemqng
natqmng,
X sc tzngrpeng mz nzglqlz-krdr nim.

Mrkc Lzke

- ¹³ A' mzli trboiu sc tqmrbrtrpe mz drtwrdr
nikeng aletiq,
Mz nzvz-nqblq-kai-krdr me pnz drtwrdr x
nim kc ate.
¹⁴ Mzli kc tzmnc-ngdrdr lzke nzabzlr nim,

Mz nzrlx-krbzlr ncvr animol, murde drtwrdr
rbxl nzesapx-krdr.

- 15 X kabzme badr da kc tzsuti drtwrdr,
Vzmi zyagox kxtrka mz nzayrplapx-krm
nidr.

Kxnzrnzlvzolz Mosis

- 16 Mzli lcng li kzdung ncblo tznzlvzolz Mosis,
Ncdr Eron kc tqngi kxnzawz kxtr nem.
- 17 Zbz drtc' glqwi x lvxpx-lzbq mz nzyrtzmq-
amrna-krde kxnzrmailz lcng,
Datan ncdr Abiram, nidr badr lr ma nyzdr x
kztedrng amrlx.
- 18 X atwzlr-kz-ngrpe' nyr mz kzdq ncblo x kx-
drka'ngr kc-kzng tzvz-nqblqlr nide,
X nznngcting amrlx ngrdr.

Mz Nou Newz Saenae

- 19 X mz nou Newz Saenae nzwz-ngdrdr mz gol kc
mqngr kzu.
X sc tzangiopelr nide.
- 20 Nztekqtrlr nzangio-krdr Kxrpalz kc tqmyalz,
tqrwzngz kzu amrlx,
Mz nzangio-alzu-krdr mqngr kzu kc twwz-
ngrdr esz'-krdr. ☆
- 21-22 Trycneu mz drtwrdr nim kc tqarlapxle nidr.
Tqrtrngzbx rkx kxmatq mrkc Ijpt,
Tqwwz-ngrde da kcng tqmrlzvxing elr,
X tqalele da kcng tzkctipxng mrkc Prla Bla.
- 23 Delc tqrpipe-ngrn kx naodatipeq leplz
nemqng.
A' Mosis kc tqmcpqxq, awxobzle zngya ngr
drtwrm, x trodatiwq nidr.

Nzpptxpx-krdr Drtc' Kxmrlz

- 24 A' mz nibrde nzpptxpx-ngrdr nzprtrngr mz
drtc' kxmrlz kc tqkabzme badr,
Murde nzmwxlr-zlwzng x trnzlxngitilru
nzesalz-krm.
- 25 Nzmnc-tpwzng lzke x drtwrdr lctrpz mz
kztedrng mz nzlitr-krbz drtwrdr bam.
X trnzvz-nqblqlru nim.
- 26 Zbz sc tqesalzpebzme badr
Kx sa nanibqtiq nidr lzke.
- 27 X sa nangi-batrpzme mz doa nedrng nzakitikr
nrlc nidr,
Mz nzmnc-krdr badr kxtrnzrlxngitiung x
nabztineng mrkzbleng.

Nzangio-krdr Baal

- 28 Zbz mz Newz Peo, leplz nemqng nzprtr-kzpzng
mz nzangio-krdr gct kc drtqde Baal.
X nзму-kzng blz krde, kxmule-esz' nide gct
kxbz kxnzlw.
- 29 Delc tqngyatingr drtwrm nidr
X sc tqdwatipebz zyagox kx nabz-ngrdr.
- 30 A' Finizs twzpele zmatq x nibqle doa kcng li
tqvzkipxm nzxpung,
X zyagox kc sc tqayrkrpxpeq.
- 31 Nzwzkr Finizs lc tubq mz nzobq-krm.
X nzryapwxtipxng nide trpnzng nzmrb-
krde.

Mz Aulz Ngr Meriba

- 32-33 Mz aulz ngr Meriba, nzangyati-kzpzlr
drtwrm.
X da kcng tzalelrng atalvzobzle drtwr Mosis,
X sc tqvz-rbrpe mz nzymne-ani-krde.

Delc tr-rlr-ngrpwzmeu nzprtr-krde mz drtc'
 nyzm,
 X nzxpxu-krde lc vzpxm mz natq kc tqpibzle
 Mz leplz lcng nardr tqmqngi.

Nzprtr-krdr Mz Drtc' Nyz Gct

- ³⁴ Mz nzprtrkr leplz nemqng mz drtc' nyzm
 Pibzme badr kx nanibqtilr lr Kenan kcng
 tzmncng elr.
 A' nzpxtxpx-ngrdr nzvz-nqblq-krdr natqm,
 Mz nzrlr-krbzlr nzrlapx-krdr.
³⁵ X nzyrlz-etrng badr kxnmnc-mrbrng,
 X nztwzlr nqm qkrdrng.
³⁶ Nzangioler mqngr drka' rdr.
 X krlc lrpzki r nzodatingr nidr.
³⁷⁻³⁸ Nzrlr-ngrbzlr doa ncblo x doa olvz nedrng
 Nzngini-krdr blz kx nzkabz mz mqngr drka'
 kxnlz lr Kenan.
 X mz nzpulio-krdr mepyr ngr doa nedrng kxnm-
 rlng,
 Nzatrkatizlwz-ngrdr drtc' kc tqkabzme badr.
³⁹ X nzatrkatilzbq-kzng mz da lc tzalelr,
 Mz nzapusrlzbq-krdr olvz kc tqrlaszle kr-
 nalzde.

Nzakitkr Nrlc Nidr

- ⁴⁰ Mz nzmukrde lcde, sc tqngyatipe drtwrm leplz
 nemqng,
 X pxtxpx-ngrn nidr.
⁴¹ Rlrpx-ngrn nzaovxiokr kxnmnc-mrbrng nidr,
 Murde na-acivepeng enqmi rdrng.
⁴² X enqmi lcng nzayrplatipxlr nidr,
 Mz nzmnciz-krbzlr badr.
⁴³ Nzwrde kqlu kx arlapx-ngrn nidr,

A' sc tq̄suti zvz drtwrdr nzmncngr kx na-
atrkatingr nim.

*Nyzylu-mou-krmlr Mz Drtc' Kc Tqkabz Gct
Badr*

⁴⁴ A' mzli kc tzyrni-ngrbzlr bam, xlrbzme natqdr.
X vztitx drtwrm nidr murde nzxpu-krdr.

⁴⁵ Leplz lcng nemqng, dekc tq̄ycngr mz drtwrm
Nzesz'tikr Drtwrmu Badr,
X trayrplapx-zvzwq nidr, murde aodu-zvz-
kzq nidr.

⁴⁶ X ngi-batrpzme nzyckr mz drtwr enqmi rdr
Kcng tzaovxiolr nidr.

Nzkrka'-krgr

⁴⁷ Yawe, Gct rgr, arlapx nigr mz mq̄ kxtrnzrlxn-
gitiung,

Mz nzvzmi-kr-mope' nigr mz drtc' nyzgr.
Murde na-awibzkr bam
X naglqlzkr drtqm kxtr.

Nabz Kx Yrkrpxngr Buk Krapwx

⁴⁸ Naglqlzku Yawe, Gct rgu, nigu lr Israel,
Tq̄vzpe, tq̄vzpe. Naglqlzku Yawe.

Leplz narpilr kx, “Eu, angida!”

Naglqp̄xku Yawe.

Buk Kranzlvqn

Sam 107—150

Sam Kratrtqki-esz'-nrade-rlimz (107)

Gct Ayzlu-zvz-ngrbzle Natq Leplz Nedeng

Nzawingr

- ¹ Na-awi-ngrbzku mz Yawe nzmrlz-esz'ngr-krde.
Murde aodu-zvzle nigu.
² Naglqlz-zvzku nide,
Murde arlapxbzle nigu mz mq enqmi rgung,
³ Mz nzkapx-krmle nigu mrkzbleng mz nrlc
tulvzo.
Murde nayrlwr-lxblrku mz drtc' nyzde.

Kxnzayoneng Lzke

- ⁴ Kzdung nigu nzayoneng lzke,
Me trpnzngr lrpzki kx narmcti-ngrdr mztea
kx namnc-ngrdr.
⁵ Kztegu lcng nzbrtale-zlwzng, nzbrlxkz-zlwzng,
X mztr telvrting.
⁶ **Zbz sc tzkqlepelr Yawe,**
Kc tqkatxppebzle nzxpu-krdr.
⁷ Mailzle nidr mz lrpzki kxtubq,
Vz, vz nzkrlybzlr mztea kx namnc-zpwx-
ngrdr.
⁸⁻⁹ Rkabz lue mz kxnbzrlxkzng,
X dakxnzng kxmrlzting mz kxnbzrtaleng.
“Awi Yawe, mz nivz lrm kc tqyc tqyc, eu.
Okatr-zvzq nigr. Awi Yawe, mz nivz lrm.”

Kxnmncng Mz Presin

- ¹⁰ Kzdung nigu nzatolva-ngrng mz presin,
Mz nzmncpx-krmle me tungr nzlo.
¹¹ Murde nznrlvzolzr lou sc Gct kc tqmyatxlz-
esz'ngr,
X drtqdr sa kz nzrlolvzngr nzalvztr-krdeng.
¹² Delc tqngi-batr-ngrbzle nzetqkr drtqdr mz
nzwz-kato-krdr.

X nzyangrngapeng, a' trpnzngr kx naokatrle
nidr.

13 **Zbz sc tzkqlepelr Yawe,**

Kc tqkatxpxpebze nzxpxu-krdr.

14 Aopxbze drtqdr mz da kc tzatolva-ngrdr,

X vzmipxmleng mz nabz nzlo mz zyzlr.

15-16 Zmatq ngrde myaszpxle naonrx ngr presin,

Mz nzodati-atwrnr-krdele.

“Awi Yawe, mz nivz lrm kc tqyc tqyc, eu.

Okatr-zvzq nigr. Awi Yawe, mz nivz lrm.”

Kxnzyagoxng

17 Kzdung nigu nzpxtxpx-ngrdr Yawe mz
nzngqngu-krdr,

X ayrplapxe nidr mz alwx ngrdrng mz
nzbatr-krbze nzyagox-zlwz-krdr.

18 Mzli lc npxpe-ngrdr nzmungr,

X nabzpeng.

19 **Zbz sc tzkqlepelr Yawe,**

Kc tqkatxpxpebze nzxpxu-krdr.

20 Yawe amrlze nrkrdrtdr mz zyagox lcng mz
nzymnetx-krpwze.

Delc tzrlapx-ngrdr mz nzbzngr.

21 **“Awi Yawe, mz nivz lrm kc tqyc tqyc, eu.**

Okatr-zvzq nigr. Awi Yawe, mz nivz lrm.

22 Abrtz-zlwz-ngrgr nim nzkatxpx-krbzme

Nzxpxu-krgrngq. Abrtz-zlwz-ngrgr nim.

Naglqpx-zvzkr nim mz nzngr-krgr nabz,

X mz nzale-krgr blz. Naglqpx-zvzkr nim.”

Kxnzalilvcneng Mz Lcsu

23 Kzdung nigu nzalilvcneng mz lcsu prla,

Murde nztrngztibzlr nzmabz-krdr elr.

24 Kztegu lcng nzmclr zmatq ngr Yawe,

Mz da kx aleting dcpwe.

25 Mzli kc tqycmneti-ngrdr nenq, x trlipu r nenq
kc tqwqpe.

X batrpzle nzvzdz-krm ebio wq.

26 Ebio lc glqtxlzle lcsu scdr wq.

X twzo-moule mrbrobz mz mzlirdr mz kztedeng.
Trlipu lc avzdzmle nelzdr x alibzle drtwrdr.

27 Dea-ngrdr tqvzne x nztaneng nzapulr ncblo
kxnmnqng.

X trpengr da kx nakrlzlr kx nartrngztibzlr.

28 **Zbz sc tzkqlepelr Yawe,
Kc tqkatxppebzle nzkxpu-krdr.**

29 Ycmnebz mz nenq x sc tqamaope,
Mz ebio x nrw x kc tqvope. ☆

30 Kztegu lcng nzabrtztx-zlwz-ngrdr nzvopekr
nrwx,
X sc tqmailztrpeng Gct mz nabzn kc naok-
itrlr.

31 **“Awi Yawe, mz nivz lrm kc tqyc tqyc, eu.
Okatr-zvzq nigr. Awi Yawe, mz nivz lrm.**

32 Napipxbzkr nimq mz mz lrtzlvzng,
X mz leplz amrlx. Napipxbzkr nimq.”

?Nzayrplapxngr O Nzamrlzngr?

33 Yawe apztx-atwrnr-ngrde lue kxnezetuting,
X aesakile nzyrlelz-krm aulzng,

34 X apiz-kzle drtc' murde trpnzngr da kx nalvcpu
mrlcde,
Mz nzayrplapx-krde kxdrka'-ngrng kcong
tzmncng elr.

35 A' me ngi drta'ngr ngi nabzdeng kx lngr lue,

☆ **Sam Kratrtqki-esz'-nrade-rlimz (107):29** Sam 65:7; 89:9;
Matu 8:26; Mak 4:39; Luk 8:24

X drtc' kx mingrting yrlelz-ngrm aulzng.

³⁶ Murde navzmimle melrmqgung kxnbzrtaleng
namncng mrlcde,
Mz nzwz-krdr mztea nyzdr kx namnc-ngdrdr.

³⁷ Nzrwz-ngrng nrlanc x nzpetilr nounc,
X nzrnginanqng dakxnzng x nranc kxkqlu.

³⁸ Amrlz-zvzle nidr x ngi-batrpzle nzmika-krdr
doa kxkqlu,
X nzqqlunepxkr animol nedrng.

?Kxnzyrplapxng O Kxdrka'-ngrng?

³⁹ Mzli kznike leplz nzobqszo-ngdrdr nigu
Mz nzatalvzo-krbzlr drtwrgu x nzaetq-zlwz-
krbzlr drtqgu,

⁴⁰ Gct kc tqobqszo-ngrde kxnzetung kxnzqlppx-
lzbqng,
X batrpzle nzayone-krdr nzapulr kx
trpnzngr me tutrngr nzvzne-krdr.

⁴¹ A' katxpxbzle nzxpu-krngu, nigu leplz txneng,
X aclvele nigu mz nzapu-krngu sip nedeng.

⁴² Kxnztubqng nzmclr nqm q krde x nzabrtz-
zlwz-ngdrdr.
A' kxdrka'-ngrng nzw-x-nabu-txpwnzng.

⁴³ Krkcng tzyrplapxng nakrlzlr da lcng
Mz nzaotikr drtwrdr nzetukr nzaodukr
Yawe nigu.

Sam Kratrtqki-esz'-nrade-rtqmz (108)

*Mnc-xgle-tpwzkr Nim Mz Na-aovxio-krm En-
qmi Rgrng*

Nabz ne Devet.

Sa Na-angrlvzx Nim

¹⁻² Sa na-angrlvzx nim mz nabznge atwrnrngr mz
nzayrni-krbo gita bam,

Murde abrtr-zvzbo drtwrnge bam.

Nilz r nepi adwalzmle ninge mz zbq kang kqlu.

A' mz nzdwalz-krmc mz nourla kx topwz,

Na-apule nabz nenge adwalzmle nepi,

Mzli lc tqglqlzpex nim.

³ Yawe, sa na-awibo bam mz mzlr lr mrkzbleng,
X na-angrlvzx nim mz mzlr neidung.

⁴ Murde nzaodu-zvz-krm myalz krlzlezle bongavz,
X nzangidati-zvz-krm natqm. ☆

⁵ Lr Heven namclr nzmyalz-esz'ngr-krm,
X lr nrle namclr nzaovxio-krm. ☆

Gct Ayzlu-ngrmle Natqgu

⁶ Mz zmatq ngrm, arlapx nigr kcng tqaodu-zvzq,
X ayzlu-ngrme natqgr.

Da Kc Tqpi Gct

⁷ Gct, natqmqng nzvzpxmqng mz Mangr-
nzangiong, mz nvrpi-krdr kx,
“Mzli kc na-aovxio-ngrne, sa na-akipxbo mz leplz
nengeng

☆ Sam Kratrtqki-esz'-nrade-rtqmz (108):4 Sam 36:5; 71:19;
103:11 ☆ Sam Kratrtqki-esz'-nrade-rtqmz (108):5 Sam
57:7-11

- Drtc' kcng mz nrlar LueJodzn rlilr.
8 Murde neidu lr Gilead nengeng.
X nqvi lr Manase nenge-kzng.
X neidu lr Efrem tum mz nibrng.
X nqvi lr Judz kx na-aclve-zvzng mz zmatq
rnge.
9 A' enqmi rmung trna-aovxiolru nimu.
Murde lr Moab sa nawztrpqng bange
X lr Edom sa nametxmng bange.
X sa namalqlvzx nzmiltxo-krnge lr Filistia.”

Natq King

- 10 ?Gct, sa na-atutrq natqm lc mz nzokatr-krm
ninge,
Nzprtr-krnge mz lrpalvc ngr mzteadau
nyzdr lr Edom?
11 Murde mzli kc axtxpeq nigr,
X trokatrwq ami negr mz nzotangr.
12 Gct, okatrp nigr mz nzota-krgr badr enqmi
rgrng mzli ka.
Murde mane nzmnc-xgle-krgr ncblo
nzarlapx-krdr nigr.
13 X krlzkr kx mz nzmnc-khme bagr,
Sa narnzlvzokr enqmi rgrng mz nzokatr-
krm. ☆

Sam Kratrtqki-esz'-nrade-rpwxmz (109)

Kxnzpibqtilr Doa Ne Gct
Nabz ne Devet.

Kxnzatrkatilr Ninge

- ¹ Gct, glqlz-zvzx nim.
Bzkq anabume bange x obqlvz-tpwzme
ninge.
- ² Murde kxdrka'-ngrng kxnzesaabrng nzycmnetr-
ngrdr ninge
Mz npokiatitr-krdr ninge.
- ³ Nzatrkatilr-krdr ninge trpnzngr noude,
A' nzipiting natq kx trmrlzu.
- ⁴ Kxmule-esz' aodux x krka'-ngrneng nidr,
A' nzayzlu-alzuplr mz natq ngr npokianger.
- ⁵ Kxmule-esz' alebo badr da kxmrlzting mz
nzngini-krnge kztedr,
A' nzale-alzupqng bange da kxtrka mz
nzapu-krdr enqmi rngeng.

Bzkq Amrlzq Enqmi Rnge

- ⁶ Yawe, suti drtwrnga kx na-ayrplapxq ncblo kc
tqycmne-atrkatile ninge
Mz nzvz-nqblq-krde natqngc kcnng napibo
bam mz nzngini-krnge kxnzawz nem.
Mzli kc navz-ngrde mz kot, kzdq kxdrka'ngr
natubz mz nibrde,
X mrlz kzdq enqmi rde nangingide majzstret.
- ⁷ Bzkq rlr-ngrbzme nzaovxio-krde,
A' nzkrka'-krde na-aelwapx-ngrde nzvz-rbr-
krde.
- ⁸ Bzkq amrlzq nide, a' nabz ani,
X natekqtr ncblo kzble mz nzngini-krde
kxrmailz. ☆
- ⁹ Nabzsz-kzle doa nedeng x olvz rde,
Murde trpengr kx na-aclve-angidrle nidr.

- 10 Naodatitxde ma nyz doa nedeng,
Murde navztxneng mz nzrlx-krdr dakxnzng.
- 11 Mz nizrka-niwzlr-krdr trau kx rlxti trtedr,
nayrkrtxpxngr dztudrng amrlx.
X lr mrkzbleng napnatibzlr da kx atatrple
mz nzwz-krde.
- 12 Bzkq kx nivz lrde mrlzbz bade,
X bzkq kx ycng drtwrde doa nedeng.
- 13 Nabzng badr lr ma nyzdeng amrlx,
Murde bzkq kx nardctipx mou drtwr nqvi
lrde.
- 14 Nadcpx mz drtwrm nqmq kr melrmqdeng kc
tqtrka,
X bzkq ipqpxq alwx ngr lxed.
- 15 Mrkc Heven nadcpx zvz mz drtwrm alwx
ngrdrng,
A' mz nrlc enqmi lcng namrbtrtr alo mz
drtwr.

Alwx Rdeng

- 16 Rlxtibo bam da lcng murde mrlx lc trpnzng
kx mrlzti nivz lrde,
A' armzkiti x rnibqti leplz txneng kx-
trnzrngiscung x kx drtwrdr talvzo zlwz.
- 17 Mrlzbz bade npilz-zvz-krde leplz.
Delc mrlzvxitx na-ayzlu-mou-ngrbz bade
npilz-krdeng.
- X pxtxpx-ngrde nzale-krbzle da kxmrlz mz leplz.
Delc tqpxtxpx-ngrne nizrka-ngrbz da kxmrlz
bade.
- 18 Tresakiu npilz-krde leplz.
Delc nzayzlu-krbzmeleng bade naxngitx-
pnzbzle.

Mrlz nzpilz-krm nide na-apule lue kx mingrtr mz
nrkrdrtdqe,
X tolo kx na-alqtipwzle me xvcngr nrvr
ngrde.

¹⁹ X na-apu-kzle lrpz kc tqkq-ngrde
X amqngitr nrkalo.

Yangrngga-zlwzx

²⁰⁻²¹ Yawe, Kxetu rnge, kxmule-esz' rlxtibo bam
nzayrplapx-krm enqmi rngeng

Kcng tzpibqtilr ninge,
A' rlxti-kzpo bam nzamrlz-krm ninge x nzokatr-
krm ninge mz nzvz-nqblq-krde Natqm.

X arlapx ninge mz nzvz-nqblq-krde nzmrlz-
lzkr nzaodu-krm ninge.

²² Murde ninge ncblo txne kx tr-rngiscu,
X drtwrnga vztz zlwz.

²³⁻²⁴ Nrkrdrtdqngge ngi nrvr-nrbalqpe mz
trnzmupe-krpwc'u,
Mz nzapu-krnge zmyo ngr milzpq kc
namrbr-anipe.

X apunepe-kzx br kc tqlvne tqwqplxne nenq,
Mz nzyangrngga-zlwz-krnge.

²⁵ Kx nzm ninge nzyrpalelvzlr ninge,
X nzmcpxmlr nctqdr bange.

²⁶ Yawe, Gct rnge, okatrp ninge, kxnxawz nem!
Arlapx ninge mz nzvz-nqblq-krde nzaodu-
krm ninge.

²⁷ Murde enqmi rngeng nakrlz-zpwxlr kx ar-
lapxq ninge

Mz zmatq ngrm kx xplr-esz'ngr.

²⁸ Yawe, kxmule-esz' enqmi rngeng nzpibqtilr
ninge, a' amrlz ninge,

- X aovxio nidr murde nabilvzx nim.
29 Batrpz nzavzo-lzbq-krdr,
Murde nzamyati-krbzme drtqdr naopx mz
mz leplz.
30 Yawe, sa na-awi-zlwzbo bam,
Mz nzglqlz-krnge nim mz mzlir leplz
nemqng.
31 Murde nim kc tqtubz mz nibr ncblo txne,
Mz nzarlaxp-krm nide mz mq kxznabetitrlr
nide, murde nabz-ngrde.

Sam Kratrtqki-esz'-nzpnu-esz' (110)

King Kxetu Kc Tqngi Nardr Pris Ne Yawe
Nabz ne Devet.

King Kxetu

- 1 Yawe rpibzle mz King kc tqngi Kxetu rnge kx,
“Wxbu mrlc tqmatq-esz'ngr mz nrlarnge
kxrtc,
Navz nakrlz-zpwxzbzle mzli kc nangi-batr-
ngrbo mz enqmi rmqng nzmetx-krbzlr
bam.” ☆
2 Murde Yawe sa nangi-batr-kzpzle nzetunepxkr
zmatq ngrm mz nzvzpx-krm Jerusalem,
Mz nzaovxio-krm enqmi lcnq.
3 X mzli lcde, drtq leplz nemqng sa navq zlwz
nzprtr-krbzlr mz ami nem,

☆ **Sam Kratrtqki-esz'-nzpnu-esz' (110):1** Matiu 22:44; 26:64;
Mak 12:36; 14:62; Luk 20:42-43; 22:69; Aposol 2:34-35; 1 Korint
15:25; Efisz 1:20, 22; Kolosia 3:1; Hibru 1:3, 13; 8:1; 10:12; 12:2

Murde namailzq nidr mz zmatq ngrm kc
tqluli, tqtr.

X obla nemqng sa navzmqng naprtr-kzpzng bam
mz nzaxplr-mou-krdr ami nem.

Na-apubzlr badr mi kc tqvzom mz nzrka-
krbzle nzlungr kxmRNA mz nabr.

Nardr Pris

⁴ X Yawe esalz-ngrde drtqde x trnatekqtrleu
drtwrde.

Rpile kx, “Nim King nenge, nangini-alo-
kzp pris mz nzvz-nqblq-krde nzwzkr
Melkesidek.” ☆

⁵ X Yawe sa natubz mz nibrm,
Mz nzmiltxo-krde king kxnzkqlung mz
zngya ngr drtwrde.

⁶ X sa na-ayrplapxle lr mrkzbleng mz nznibqti-
krde nidr amrlx.
X sa na-aovxio-atwrnr-ngrde king rdrng mz
nrle tulvzo.

⁷ X nim, King rnge, mz nzvz-krm lc, nzxplr-kato-
krm sa namatqnepx kz.
X sa na-aovxio-atwrnr-ngrn nrle.

Sam Kratrtqki-esz'-nzpnu- esz'-nrade-esz' (111)

Nqmq Kr Gct

Kzdq Nabz Ngr A, B, C

¹ Awi Yawe! Glqpxku Yawe!
Bilvzx nide mz nabznge atwrnrngr, mz
nzyrlwr-lxblr-krgr badr leplz nedeng.

☆ **Sam Kratrtqki-esz'-nzpnu-esz' (110):4** Hibru 5:6; 7:17, 21

² Clvele nrlc x da kcnq tqwz-ngrde, tqaletileng
nzmyalzng.

Delc, leplz amrlx na-aotingr drtwrdr da lcnq
mz nzabrtzlvz-krdrleng.

³ Eu, da lcnq amrlx nzaelwapx-ngrdr zmrlue x
zmatq rde.

Glqpxku nztubq-krde kc tqvzpe tqvzpe.

⁴ Ipqlc nigu mz zmrlz ngrde kxmyalz x ycngr
drtwrde nigu.

Jzsle nigu x nalc zvz mz drtwrgu rkx ngr-
deng.

⁵ Kabzle dakxnzng mz leplz kcnq tzamrluelr nide.

Lolvz-amqngile mz drtwrde da kx esalz-
ngrbzle badr.

⁶ Mz nzaprc-krbzle drtc' ngr lr mrkzbleng mz doa
nedeng,

Nide kc tqaelwapx-ngrbzle zmatq rde badr.

⁷ Okatrle nidr mz nzaclve-krdeng kxtubq.

Prlxpx-zvzle da angidr x nzrsakrlrngr.

⁸ Rkapx zvz natq kx rsakrlrngr.

Sa na-atutrleng murde nqmz krde mrlz x
tubq.

⁹⁻¹⁰ Takitrde nzangio-krqu drtqde kxtr mz nzam-
rluengr murde

Vz-nqblq-zvzle nzesalz-krde x

Witi nelzde nzarlax-krde leplz nedeng.

X aelwapx-ngrqu nzyrplax-krqu mz
nzamrlue-krqu nide.

Yawe kabzle nzrklz-angidrngr mz krkcnq
tzyrlq-angidrlr natqde.

Zbq kalvz nzrglqpxngr nide navz zvz x
tqvzpe, tqvzpe.

Sam Kratrtqki-esz'-nzpnu-esz'-nrade-li (112)

Nqmq Kr Ncblo Ne Gct

Kzdz Nabz Ngr A, B, C

- ¹ Awibzku mz Yawe! Murde amrlzle ncblo kx
Bilvzle natqde x amrluele nide.
 - ² Clvele mrnyzde kcng naxplrng mz nzacive-krdr.
Doa nedeng kxntubqng, sa na-amrlz Gct.
 - ³ Esalz-ngrbz Gct bade da kxmrlzting kxkqlu.
Gct okatrle nide murde natubq.
 - ⁴ Ipq ncblo lc kztedeng mz nzvz-nqblq-krde
zmrlz ngrde, nzryckr drtwrde, x nztubq-
krde.
Jzsle da kx naokatrle leplz kc-kzng, mz
nznngini-krbzle lrpzki badr.
 - ⁵ Kabzle da kxkqlu mz krkcng trnzrngiscung.
Lalztqgbzle mz Gct x alele da kx rsakrlrngr
mz nzwz-krde.
 - ⁶ Murde ncblo kxtubq kxtr-rnrcti-lzbqu
Nadcpv zvz mz drtwr leplz.
 - ⁷ Obqtipx-zvzle Yawe x
Prlpxle kx nabzde trtaprlzpau mz nrpa
kxtrka.
 - ⁸ ?Rnrcti-lzbq-ngrde? Trtingr, a' tu-amqngile.
Sa namcle nzaovxiokr Yawe enqmi rdeng.
 - ⁹ Tresakiu nvrka-krbzle da mz kxrsuti drtwr.
Vz zvz nzayzlu-krbz Gct bade mz nqmq krde
lc tqtubq.
- Wxbu me matq mz mzlr leplz.
- ¹⁰ X angva drtwr kxdrka'-ngrng mzli kc
namc-ngdr nide.

Ycpwz pipz kxdrka'-ngrng lcng sa namrbr, x
mane nzmadtqi-krdr nqngidr mz zngya.
Zbz da amrlx kcng tqmrlzbz badr sa nangitx
brmrda x sa na-apulr zsikapu kx ngilia.

Sam Kratrtqki-esz'-nzpnu-esz'-nrade-tq (113)

Naglqlzku Yawe Mz Nzarmyalz-krqu Drtqde

1 Naglqlzku Yawe!

Nigu kxnzawz nedeng na-armyalzku drtqde.

2 Nayzuo mzli ka nzrglqpxngr drtqde
Tqvzpe, tqvzpe.

3 Mz z bq kang kqlu nigu leplz mz nrlc tulvzo
Na-awi-ngrbzku bade nqm q krde.

4 Murde aclve-atwrnr-ngrde lr mrkzbleng amrlx.
X nzetukr zmatq ngrde krlzlbzle bongavz.

5 Trpnzngr kx apule Yawe kc tqngi Gct rgu,
Mz nzwxbutxlz-krde mz tron nyzde Heven.

6 Sc tqobqlvztile bongavz x drtc',
Mz nzacive-angidr-krdeleng.

7 Murde naokatrle leplz kx trnzrngiscung,
Mz nzkapx-krmle nidr mz nzkxpu-krdr.

8 X armyalzle nidr murde nangingidr nradrtq
kxnzetung
Kcng tzmailzlr leplz nedeng.

9 Ngi-batrpzle mz olvz kxvz-nrbalq nznrgine-
krde doa kxnztopwzng,
Murde na-abrtz-ngrde doa nede lcng.

Naglqlzku Yawe!

Sam Kratrtqki-esz'-nzpnu-esz'-nrade-pwx (114)

Naglqlzku Yawe Mz Zmatq Ngrde

- ¹ Mzli kc lr Israel nzrlasz-ngrdr Ijipt,
Mz nzngini-krdr lr mrkzbleng elr,
- ² Lr Judz lcng tznginipedr leplz kxnztrng ne
Yawe,
Mz nzaclve-krde drtc' nyzdr, Israel.
- ³ Prla Bla akipx-lzbq x pzlzm.
X LueJodzn lvxpxbzle lrpzki badr.
- ⁴ X mzli lc newz x nra nzyameng,
Nzapulr nzblc-abrtznekr nei sip.
- ⁵ ?Myx kxmule, Prla Bla tqakipx-lzbq-ngrde,
X LueJodzn tqlvxpx-ngrde lrpzki?
- ⁶ ?X nike nzyamengr newz x nra amrlx
Mz nzapu-krdr nzabrtzkr nei sip?
- ⁷ Da kcng tqwzngr Yawe nzvz-nqblqlr natqde.
Nzelalvzlr nzaelwapx-krde zmatq ngrde, mz
nzngini-krde Gct r lr Israel.
- ⁸ Murde batrpzle nzyrlepx-krm lue mz rplz,
Lue lc tqngi aulz mz rplz.

Sam Kratrtqki-esz'-nzpnu-esz'-nrade-nzlvqn (115)

Naglqlzku Yawe Mz Nzngini-krde Gct Angidr

Bzkq Angioku Mqngr Drka'

- ¹ Yawe, nim txpwz kx takitrde nzarmyalzngr, a'
trngiu nigr.
Murde nim txpwz kx aodu zvz x trataowq
natqm kcng tqyrlqq.

² Delc trtakitrdeu lr mrkzbleng nizrpi-zvz-krmlr
bagu kx,
“?Myxpe Gct rmu?”

³ Murde Gct rgu mncom Heven,
X rngisc zmatq ngr nzale-krde nikeng suti
drtwrde.

⁴ A' kxnmnc-mrbrng nzangiolr mqngr da kxnlz
Kcng twwzng leplz mz mqdr.

⁵⁻⁷ A' mqngr da kxnlz lcng trnzycmneung x
trnzobqung.

Trnzxlrunq, trnzycminiung,
X trnzrtcngiung da.

Trnzrmaleung x trnzvzneung.

⁸ Leplz kcng twwz-ngrng mqngr drka' lcng tzlz
X krkcng tzangiolr nidr nzapu-kzlr nidr mz
trnzrngisc-krdr zmatq.

Nznabung, mztr mwi, nradrtqdr ngq, trnzycngl-
rung,

Trnzrtcngiung da, trnzxngitrung, x
trnzvzneung.

A' Na-angio-tpwzku Yawe Gct Rgu

⁹⁻¹¹ Nimu kcng tzaxvctr-lzbq-kzpqng bagr mz
nzangio-krgr Yawe,

X nimu pris nedeng mz nqvi lr Eron,
X nigu lr Israel amrlx na-abtrtpzku drtwrgu
bade.

Murde nide temz ngr lomrgu kc tqyrputrngr
nipna.

¹²⁻¹³ Yc zvz mz drtwrde nigu x sa na-amrlz-zvzle
nigu.

A' sa na-amrlzle nimu kcng tzaxvctr-lzbqmqng
mz nzangiongr nide,

X nimu nqvi lr Eron, x nigu lr Israel amrlx.

- Kxmule-esz' nigu leplz txneng o kxnzetung,
14-15 Krka'-ngrne kx Yawe kc tqwz-ngrde Heven x
nrlc
Na-amrlz-ebir-ngrde nimu badr doa ne-
mung.
16 Heven mztea nyz Yawe,
A' kamle bagu, nrlc ka.
17-18 X nigu kxnzung mz nrlc ka na-awibzku
bade,
Murde kxnzbzpeng kcng tzyrtzmqpeng mz
gq, rblx nzglqlz-krdr nide.
Naglqlzku Yawe na-abzo mzli ka x tqvzpe tqvzpe.
Naglqlzku Yawe!

Sam Kratrtqki-esz'-nzpnu- esz'-nrade-esz'mz (116)

Naglqlzku Yawe Mz Nzxlr-krmle Natqgr

Nabz Ngr Nzaovxiongr

- 1-2 Yawe xlrmlle natqnge. Mrlzti-zlwzx nide.
Kqle-zvzx nide. Yawe xlrmlle natqnge.
3 Ycpwz pipz nzbz-krnge, x sc tqmwxlr-ngrne.
Nabznge talvzo-ngrde ycpwz pipz nzbz-
krnge.
4 Sc tqkqlepex nide mz nizrpi-krbo bade kx,
“Yawe, arlapx ninge!” Sc tqkqlepex nide.
5 Zmrlz ngr Yawe myalz-esz'ngr mz nzokatr-krde
leplz.
Ycnggr drtwrde nigu. Zmrlz ngr Yawe myalz-
esz'ngr.
6 Okatrle kxtrnzxplrung, murde arlapxbzle ninge
Mz nzkxpu-krngeng. Okatrle kxtrnzxplrung.

7-8 Amnc-zpwx-moule ninge. Trmetx-ngrpwc'u
mz enqmi.

Trbz-ngrneu, tryrni-ngrneu. Amnc-zpwx-
moule ninge.

9 Navz-nqblq-zvzx nide x me pnz drtwrde.
Mz nzmnc-krnge mz nrlc navz-nqblq-zvzx
nide.

Nzawingr

10-11 Kxmule-esz' ycpe pipz nzmwxlrli-lzbq-
krnge,

A' mzli kc tqkxpu-zlwz-ngrne,

Pipxx murde abtrpo drtwrng mZ Yawe,

X krlzx kx mane nzbtrtkr drtwrng leplz. ☆

12 Kxmule-esz' rblx nzayzlu-krbo mZ Yawe

Da kxmrlzting kcng tqaletimleng bange,

13 A' sa natwzmc bade waen,

Nangi dalr nzawi-krbo bade mZ nzarlapx-
krde ninge.

14 X sa nakabo bade nike esalz-ngrbo bade,

Mz nzangiopx-lxblrkr leplz nedeng.

15 X napipxbo badr kx, "Drtwr Yawe vztz zlwz

Mz nzmnc-krde nzbzkr kzdq doa nedeng.

Delc tqmrlz-ngrbzle bade nzarlapx-krde nigu,

Tqmyaszpx-ngrde nzlrpx-krde nzbz-krqu."

16 Yawe, ninge kxnzawz nem, da kc tqwai lxenge
mzli kc.

Awi mZ nzarlapx-krm ninge mZ nzbzngr.

17 Kabo bam blz kx na-awi-ngrbo bam,

Mz nzkrka'-krbo bam.

18 Delc tqka-ngrbo bam da kc tqesalz-ngrbo bam,

Mz mzlr leplz nemqng,

☆ Sam Kratrtqki-esz'-nzpnu-esz'-nrade-esz'mz (116):10-11 2

- 19 Mz nzamrlue-lxblr-krgr nim Mangr-
nzangiongr Jerusalem.
Naglqlzku Yawe!

Sam Kratrtqki-esz'-nzpnu-esz'-nrade-rlimz (117)

Naglqlzku Yawe Mz Nzaodu-zvz-krde Nigu

- ¹ Glqpxamu Yawe nimu lr mrkzbleng amrlx.
X nimu leplz mz nrle tulvzo naglqlz-kzamu
nide. ☆
² Murde nzaodu-zvz-krde nigu etu-esz'ngr.
X nzngida-angidr-krmle bagu tqyc tqyc.
Naglqlzku Yawe!

Sam Kratrtqki-esz'-nzpnu-esz'-nrade-rtqmz (118)

Naglqlzku Yawe Mz Nzaovxio-zvz-krde

Aodu-zvzle Nigu

- ¹ **Aodu-zvzle nigu. Awi-ngrbzku bade
Nzmrlz-esz'ngr-krde. Aodu-zvzle nigu.**
² Aodu-zvzle nigu. Lr Israel amrlx
Napipxku kx, “Aodu-zvzle nigu.”
³ Aodu-zvzle nigu. X nimu pris nedeng
Napipxamu kx, “Aodu-zvzle nigu.”
⁴ Aodu-zvzle nigu. X nimu kcng tzaxvctrmqng,
Napipx-kzamu kx, “Aodu-zvzle nigu.”

Nabrti Drtwrgu Yawe

- 5 Mzli kc tqmnc-ngrne mz nzkxpungr, kqlex
Yawe,
Ayzlumle natqnge x aopxbzle drtqnge.
6 Trtxpnzngr nzmwxlr-krnge, murde Yawe tu-
zvzm mz nibrnge.
X trtxpnzngr leplz kx krlzle nzatrkti-krde
ninge. ☆
7 X sa namcx nzaovxio-krbzle enqmi rngeng,
Murde mnc mz nrlarde nyznge.
8 Mrlzvxitx nzmnc-xgle-krgru nzokatrkr Yawe
Murde myaspxle nzokatrkr leplz nigu.
9 X mrlzvxitx nzabrtr-krbzku drtwrgu bade mz
nzrlapx-krgru,
Murde myaspxle nzrmctitr-krbzku mz
kxnmzmailzng.

Aovxiox Mz Zmatq Ngrde

- 10 Aovxiox mz zmatq ngrde mzli kc enqmi rngeng
Tztu-ngalelvz-ngdr ninge. Aovxiox mz
zmatq ngrde.
11 Aovxiox mz zmatq ngrde mzli kc tzavztio-
ngrdr
Ninge mz trtxki. Aovxiox mz zmatq ngrde.
12 Aovxiox mz zmatq ngrde dzbe meningilo lc.
Nzapulr nabr kx ngc. Aovxiox mz zmatq
ngrde.
13 Kxnzyrkrtilzlr ninge mz nzotangr, ycpwz pipz
na-aovxio-krdr ninge.
A' Yawe kx okatrle ninge.
14 Nide oa kx xplr kc tqmailzle ninge mz vea,
X tqarlapxle ninge.

Yawe, Oa Ngr Vea

- 15-16 Mz nzmnc-krdr matelq ngr vea nyzdr,
Ncblo ngr vea nedeng nzngr-abrtz-ngdrdr
nzaovxio-krde, nzrpi-krdr kx,
“Yawe, oa ngr vea, kc tqaovxio zvz
Mz zmatq ngrde. Yawe, oa ngr vea.”
- 17 Delc trbz-ngrneu, a' lubex
Murde napipxbo da kcng tqmatq tqaleting
Yawe.
- 18 Kxmule-esz' rlrpx-ngrde nzakxpu-zlwz-krdr
ninge,
A' trngiu dalr nzbz-krnge.

*King Badr Leplz Nedeng Nzvztrpqng Mangr-
nzangiongr Nzawi-krbzlr Mz Yawe Nzaovxio-krdr*

- 19 King malqtrpz yz, rpile kx, “Lvpxxm bange
naonrx ngr Mangr-nzangiongr Yawe,
Murde navztrx elr mz nzawi-krbo bade.”
- 20 X pris neng Yawe nzayzlubzlr natqde kx, “Krlc
naonrx nyz Yawe,
X kxnztubqng txpwz kx navztrng elr.”
- 21 Mz nzvztrkr King elr, rpile kx, “Yawe, awi-
zvzbo bam murde ayzlu-ngrme nzkrka'-
krnge,
Mz nzarlapx-krme ninge mz mq enqmi rn-
geng.”

*Leplz Neng Yawe Amrlx Nzangiopx-lxblrlr
Nide*

- 22 Leplz amrlx kcng tzyrlwr-lxblrng Mangr-
nzangiongr nzrpilr kx,
“Rplz kc etu tzpctxpx-ngdrdr ncblo kcng tzrwz-
ngrng ma,

- Nzaelwapxngr kx nide nou rplz kc
tqmyatxpx-zlwzbz.” ☆
- 23 Da lc Yawe kxrwngr.
X abrtztx-zlwz-ngrgu.
- 24 Krlc z bq kx wzpxngr Yawe.
X na-awi-ngrbzku bade.
Murde nide kc tqrbatrp z bq lc
Nzrmulvzngr nzaovxio-krgu mz vea.
- 25 Ayzlu-ngrmle natqgu kx, “Yawe, arlapx nigr
Mz nzokatr-krm nzaovxio-krgu.”
- 26 Yawe, glqlzkr nide kc tqvzm mz drtqm.
Glqlzkr nide mrka mz Mangr-nzangiongr. ☆
- 27 Yawe nide Gct kc tqokatr-zlwzle nigu.
Delc naelami-ngrgu leu ngr nzaovxiongrr,
Mz nzvz-ngale-krgu olta nyzde
Kc tqtr-esz'ngr.
- 28 Yawe, nim Gct rnge x na-awi-ngrbo bamq
Nzmyalz-esz'ngr-krmq. Yawe, nim Gct rnge.
- 29 **Aodu-zvzle nigu. Awi-ngrbzku bade**
Nzmrlz-esz'ngr-krde. Aodu-zvzle nigu.

Sam Kratrtqki-esz'-nznpu- esz'-nrade-rpwxmz (119)

Yawe, Natqm Mrlzvxi

Kzdq Nabz Ngr A, B, C

Alvztr-zvz-ngrn Ninge mz Natqm

☆ **Sam Kratrtqki-esz'-nznpu-esz'-nrade-rtqmz (118):22**
Matiu 21:42; Mak 12:10-11; Luk 20:17; Aposol 4:11; Efisz 2:20;
1 Pita 2:7 ☆ **Sam Kratrtqki-esz'-nznpu-esz'-nrade-rtqmz**
(118):26 Matiu 21:9; 23:39; Mak 11:9-10; Luk 13:35; 19:38; Jon
12:13

- 1 Awi Yawe! Namrlzbz mz leplz kx trnzvz-
rbrung,
A' nzvz-nqblqlr Loukxtr scm,
- 2 X namrlz-kzpz mz krkcng tzlxngitilr natqm,
X nzrtangrtilr nim mz nabzdr atwrnrngr,
- 3 X krkcng tzalelr da kxtubq,
X nzo-zlilr lrpzki rm.
- 4 Alvztr-zvzq nigr
Murde nalolvz-amqngikr nqmq krm.
- 5 Navz zvz
Nzrtangrti-krnge me pnz drtwrm.
- 6 Murde ma tqmyangr drtqnge
Mz nzaoti-zvzkr drtwrnge Nzryrngrkxtr.
- 7 Alqngitipeq ninge,
Glqlz-ngrne nim nztubqkr nabznge.
- 8 Alex da kx pitimeng bange.
A' bzkq amnctxn ninge esz'-krnge.
Bilvz-zlwzx Nzti Rm
- 9-10 Bzkq rlr-ngrme nzrlasz-krnge nim,
Murde sa tqabzx nzwztr-krbo bam mz drtwr
kxpq.
Nzlolvz-amqngikr obla natqm okatrle nide
Mz nztu-amqngi-krde mz nzmncngr kxtubq.
- 11 Abrtz-ngrne Nzryrngrkxtr
Murde natubq-zvzbo mz nzobq-krm.
- 12 Yawe, glqlzx nim.
X suti drtwrnge nzkrly-zpwx-krnge nqmq
krm.
- 13 Natqnge etu zvz
Mz nzpipx-krnge Loukxtr scm.
- 14 Nzabrtzngr kx vzpxm mz nzvz-nqblq-krnge
nim
Myaszipxle nznrgisc-krnge trau kxkqlu.

- 15 Nadcpx mz drtwrnge me pnz drtwrm.
Mz nzaoti-zvzkr drtwrnge nzalvztr-krmqng.
- 16 Bilvz-zlwzx nzti rm,
X trmrbrtru mz drtwrnge natqm.
Clve Ninge Mz Loukxtr Scm
- 17 Clve ninge murde ninge kxnzawz nem,
X nayrlq-zvzx natqm mz nzmnc-krnge.
- 18 Okatrp ninge mz nzrmcti-krnge
Da kxmrlzting kx nzprpxmqng mz Loukxtr
scm.
- 19 Ninge kxvztimle nrlc.
Bzkq yrlq-kapqme bange me pnz drtwrm.
- 20 Pq zvz mz drtwrnge
Nzkrllz-krnge nqm q krm.
- 21 Ayrplapxq kxnzqlpax-lzbqng
Keng tznzlvzolzr natqm.
- 22 Bzkq rlrpx-ngrn nzobqszo-krdr x nzyrpalelvz-
krdr ninge,
Murde vz-nqblqx natqm.
- 23 X kxmule-esz' kxnzetung nzpikitiir ninge,
A' sa tqotr-zvzngr drtwrnge nzalvztr-
krmqng.
- 24 Clve ninge mz Nzryrngrkxtr
Murde abrtz-ngrne nzmailz-krdr ninge.
Da Kx Mailzle Ninge Nangi Lrpzki Rm
- 25 Drtqng me wetx-zlwzpe x ycpe pipz nzbz-
krnge.
Ka-mop nzlungr bange, mz nzvz-nqblq-krde
natqm.
- 26 Mzli kc tqplzpx-ngrbo bam alwx rngeng, ayzlu-
ngrme natqng,
X alvztrpe' bange nqm q krm.
- 27 Okatrp ninge mz nzrkrllz-krnge Loukxtr scm,

Murde na-aoti zvv drtwrnge nzwz-krmqng
kcng tqmyalz.

28 Nzrtxlvlzkr nzvzkr drtwrnge etutx-zlwzpe.
Amqtrp drtwrnge da kc tqwai nzesalz-krmle.

29 Okatrp ninge mz nzo-zli-zvv-krnge nzti kxtubq,
X alvztrp bange Nzryrngrkxtr mz zmrlz
ngrm.

30 Pnzpe drtwrnge kx navz-nqblq-zvzpex nim,
Mz nzale-zvv-krnge me pnz drtwrm.

31 Yawe, bzkq rlrpx-ngrn nzamyati-ngrm
drtqnge,
Murde lolvv-amqngix nzalvztr-krmqng.

32 Da kx mailzle ninge nangi lrpzki rm
Mz nzokatr-krm ninge.

Esalz-ngrn X Angidatiq Natqm

33 Eu Yawe, alvztrp bange me pnz drtwrm,
Murde nayrlq-zvzx.

34 X okatrp ninge mz nzvv-nqblq-krnge Loukxtr
scm,
Murde naesz'-ngrde nabznge.

35 Abrtz-ngrne lrpzki rm
Mrkc tqmailz-zvv-ngrn ninge.

36 Okatrp ninge mz nzpqtkr drtwrnge natqm,
Murde myaszpxle nzrngisc-krnge da kxkqlu.

37 X bzkq rlr-ngrme nzsutikr drtwrnge da kx-
mane,
A' axplr-mop ninge mz nzo-zli-krnge nzti rm.

38 Angidatim bange nzesalz-krmqng,
Da kc tqwaibzme mz leplz kcng tzamrluelr
nim.

39 Okatrp ninge murde mwxlrtix enqmi rngeng
nzxtrnga-krdr ninge.
A' mrlz-esz'-ngrm bange nzpnana-krmqng.

40 Esalz-ngrm bange kx na-alvztrq ninge,
Murde nztubq-krm naka-mople bange nzx-
plrngr.

Gct, Brti Drtwrnge Drtwr Kcng Tqyrlqqng

41 Gct, arlapx ninge mz nivz lrm,
Mz nzangidati-krm nzesalz-krmqng.

42 Murde na-ayzlu-ngrbo natq krkcng tzyrpalelv-
zlr ninge,

Mz nzbrtikr drtwrnge natqm.

43 Okatrp ninge mz nzrpi-zvz-krnge da angidr,
Murde brti kz drtwrnge drtwr kcng tqyr-
lqqng.

44 X nzmqngitr-zlwzkr drtwrnge mz Loukxtr scm
Tqvzpe, tqvzpe.

45 X drtqng sa naopx mz nzvzne-krngeng
Murde o-zlix lrpzki rm.

46 X trtxpnzngr nzmyamikr naonge
Nzpipx-krbo natqm mz kxnzetung.

47-48 Gct, abrtz-ngrne nzyrlq-angidr-krnge
Nqmq krm x me pnz drtwrm.

Murde nzmrlzmqng bange x nzmatqng mz
drtwrnge.

X na-aoti zvz drtwrnge nzalvztr-krmqng.

Ipqqeq Ninge Mz Nzdcpxkr Mz Drtwrm

Nzesalz-krm

49 Ipqqeq ninge mz nzdcpxkr mz drtwrm
nzesalz-krm.

Murde obqtipxx zmrlz ngrm.

50 X amqtrple drtwrnge mz mzlr nzxpung.
Murde rmcti-ngrne nzlungr mz nzrlwx-
krnge Loukxtr scm.

51 Kxmule-esz' kxnglqpx-lzbqng nzxtrnga-ngrdr
ninge,

A' tresablqtiwxu Nzryrngrkxtr.

52 Yawe, mz nzaotr-zvzkr drtwrnge Lou scm kc
bqnc,
Okatrple ninge.

53 Drtwrnge apulzmle nyr,
Mz nzpxtpxkr kxdrka'-ngrng nqmq krm.

54 Mzli ka tqlobe-ngrne mz nrlc,
Natqm nangi zvz nabz nenge.

55 Yawe, mwible-zvzx nim mz nrlckxbq,
X suti drtwrnge nzyrlq-angidr-krnge me pnz
drtwrm.

56 Ikkr ninge murde nabznge napq,
X na-ale-zvzx nzalvztr-krmqng.

Jzs Ninge, Murde Suti Txpwz Drtwrnge Nim

57 Jzs ninge, murde suti txpwz drtwrnge nim,
X mrlzm bange nzlolvz-amqngi-krnge
natqm.

58 Mz nabznge atwrnrngr, rlx tibo bam
Nzmrlzti-krm ninge da kc tqwai nzesalz-
krmle.

59 Mzli kc tqdwa-rbrti-ngrne lrpzki rnge mz nzvz-
nqblq-krnge nim,
Yzlu-mopwc' nzo-zli-krnge nzti rm.

60 X trasatiwxu nzyrlq-krnge Loukxtr scm.
A' rnekititxpwo nzale-krnge me pnz drtwrm.

61 X kxmule-esz' prtzx mz trtxki sc kxdrka'-ngrng,
A' trmrbrtru mz drtwrnge Nzryrngrkxtr.

62 Tulzmc mz nzawi-krbo bam mzli kc mz aurn-
rlc,
Murde drtwr kcng tqyrlqq tubq-esz'ngr.

63 Ninge kzte krkcng tzamrluelr nim,
Tzalelr nzalvztr-krmqng.

64 Yawe, mz nzaodu-krm kc tqyc-ngalelvzle nrlc
tulvzo,
Alvztrp bange nqmq krm.

Kxakrlz, Alvztrp Bange Lrpzki Rm

65 Kxetu, aleme bange da kxmrlz,
Mz nzvz-nqblq-krde nzesalz-krm.

66 Kxakrlz, alvztrp bange nzkrlzngr x drtwr
kxmrlz,
Mz nzlxngiti-krnge Nzryrngrkxtr.

67 Mzli kc ena vz-rbrpex, x ayrplapxq ninge,
A' mzli ka ale-zvzpex da kxtubq mz nzobq-
krm.

68 Mz nzmrlz-esz'ngr-krm x nqmq krm kx mr-
lvxi
Alvztrp bange nqmq krm.

69-70 Drtwrnge elalzm mz Loukxtr scm.
A' kxnzglqpx-lzbqng trpnzngr nzkrlz-krdr.

Kxmule-esz' nzpokiatitrlr ninge,
A' lolvz-amqngi-zvzx nzalvztr-krm mz drtwr
kxbr.

71 Mrlzm bange nzayrplapx-krm ninge,
Murde nakrlz-ngrne nzvz-rbr-krnge.

72 Kxakrlz, natqm nzmrlz-krmle bange
Myaszipxle blzmr trau mz nrlc.

Loukxtr Scm Mrlzm Bange

73 Lalztqm mz nzkrka'-krnge murde nakrlzx me
pnz drtwrm,
Murde wz-ngrn ninge x aclve-angidrq ninge.

74 Krkcng tzamrluelr nim na-abrtzlvzlr ninge
Mz nzlxngiti-krnge natqm.

75 Yawe, krlzx kx takitrde nzayrplapx-krm ninge

- Murde vz zvz nzokatr-krm leplz nemqng. ☆
- 76 Amqtrp drtwrnge mz nzaodu-zvz-krm ninge,
Da kc tqwai nzesalz-krm bange.
- 77 Mz nzabrtzlvz-krnge Loukxtr,
Nayc mz drtwrm ninge, murde ma tqbzx.
- 78 Amyatxbz drtq kxnzqlqpx-lzbqng mz
nzpokratitr-krdr ninge,
Murde aoti zvz drtwrnge nzalvztr-krm.
- 79 Batrpz mz kxnzamrluelr nim nzaxvctr-lzbq-
krmlr bange,
Krkng tzkrlz-angidrlr Loukxtr scm.
- 80 Lod, batrpz mz nabzng nztubq-krde mz
nzobq-krm,
Murde drtqng ma tqmya.
- Mevalu, Mailz Ninge Murde Navz-nqblqx Me Pnz
Drtwrm*
- 81-82 Mevalu, mewepengr drtqng x mzke'
ngqbqttrpebz
Mz nzaenzli-krnge nim.
- ?Myx mzli kx na-arlapx-ngrn ninge,
Mz nzangidati-krm nzesalz-krm kc tqbrti
drtwrnge?
- 83 Kxmule-esz' nzobqszong apux da kx nzrtctx-
pengr,
A' dcpz zvz mz drtwrnge me pnz drtwrm.
- 84 ?Myx mzli kx nayrkrpxngr nzxpu-krngeng?
?X myx mzli kx na-ayrplapx-ngrn krkng
tzatrkatiir ninge?
- 85 Kxnzqlqpx-lzbqng nzekqng gq kx nangi trtxki
rnge,
Mz nzpxtxpx-krdr Loukxtr scm.

☆ **Sam Kratrtqki-esz'-nzpnu-esz'-nrade-rpwxmz (119):75** Hi-
bru 12:10

⁸⁶ Mailz ninge mz nzbrtikr drtwrnge Nzryrngrkx-
trng amrlx.

Murde trpnzngr badr nou nzatrkatikrdr
ninge.

⁸⁷ Kxmule-esz' ycpwz pipz nzayrkrpx-krdr ninge,
A' sc tqlolvz-amqngix nzalvztr-krmqng.

⁸⁸ Mevalu, arlapx ninge mz nzaodu-krm ninge.
Murde nayrlq-angidrx natqm.

Natqm Tqyc Tqyc

⁸⁹ Natqm tqyc, tqyc,
X yc amqngi zvz Heven.

⁹⁰ Wz-ngrn nrlc x yc amqngi zvz.
Delc tqbrti-zvzngr drtwr nim.

⁹¹ Da amrlx mz nrlc nzvz-nqblqlr me pnz
drtwrm,
Murde nzwztrpzng bam.

⁹² Trbz-ngrneu nzxpu-krngeng,
Murde Loukxtr scm okatrle ninge mz
nzaelalz-krmle drtwrnge.

⁹³ X trtxpnzngr nzmrbtrkr mz drtwrnge Nzryrn-
grkxtrng,
Murde nzrpwa'-ngrmlr bange mz nzvz-
rbrngr.

⁹⁴ Arlapx ninge, murde ninge doa nem,
X abz-zvzx nzale-krnge nzalvztr-krmqng.

⁹⁵ Kxmule-esz' kxdrka'-ngrng nzyrlqlr br ngr
nznibq-krdr ninge,
A' na-aoti zvz drtwrnge nqm q krm.

⁹⁶ Natqm tqyc tqyc,
Kxmule-esz' da kxmyapxbz amrlx nzyrkr-
pxng,

Okatrp Ninge Mz Nzo-zli-krnge Nzti Rm

⁹⁷ Oliq-zvzx nzaotikr drtwrnge Loukxtr scm,

Murde mrlz-zlwzm bange.

98 Nzrkr lz-krnge myaszipxle enqmi rngeng,
Murde Nzryrngrkxtr yc zvz mz drtwrnge.

99 X nzwzkr narng myaszipxle kxnzalvztrlr
ninge,
Murde ale-zvzx me pnz drtwrm.

100 X nzyrplapx-krnge myaszipxle lrtzlvzng,
Murde yrlq-angidrx natq kx kame bange.

101 Yrlqpx-lzbqng mz nzmncngr kxdrka'ngr,
Mz nzvz-nqblq-krnge da kx tubq mz nzobq-
krm.

102 Trpxtpx-ngrneu drtwr keng tqyrlqq,
Murde nzalvztrlr ninge.

103 Natqm nzlqngi-esz'ngr-krde mz nzxlrng
Myaszipxle nzmrlzkr dakxnzng amrlx.

104 Okatr-zvzq ninge mz nzalvztr-krm murde
nakrlzx nzti kxtubq.

Delc tqmamwe-ngrne nqm q kx vz-rbr amrlx.

Pqtr Zvz Mz Drtwrnge Natqm

105 Pqtr zvz mz drtwrnge natqm,
Kc tqngi zyzlr ngr nzti rne mz nzmailz-krm
ninge.

106 Nzesalz-krngeng nayrlq-angidr-zvzxng,
Mz nzo-zli-krnge nztubqkr lrpzki rm.

107 Okatr ninge da kc tqwai nzesalz-krmle,
Murde nzxpu-krngeng amrlx ma tznibqlr
ninge.

108 Yawe, alvztrp bange nzaolvz-krmqng
X abrtzlvz nabz nenge mz nzangrlvz-krnge
nim.

109 Kxmule-esz' da kxtrka prtzm bange,
A' trmrbrtru mz drtwrnge Loukxtr scm.

- 110 X kxmule-esz' kxdrka'-ngrng nzamwitiolr
ninge trtxki,
A' vz zvz nzatutr-krnge nzalvztr-krmqng.
- 111 X lolvz-amqngi-zvzx Nzryrngrkxtrng,
Murde nzaelalzmlr drtwrnge.
- 112 Pnzpe drtwrnge kx navz-nqblq-zvzx me pnz
drtwrm,
Murde nzokatrng r kx vzpxm elr vztx alo.
*Rblxm Bange Nzmlrztz-krnge Krkcng Drtwrdr
Tqlitprz Bam*
- 113 Rblxm bange nzmlrztz-krnge krkcng drtwrdr
tqlitprz bam,
A' mrlz-zlwzm bange Loukxtr scm.
- 114 Nim me rlakitr x temz ngr lomrge kc
tqyrputrng nripna,
X abrtpr drtwrnge mz natqm.
- 115 Esablqtix kxdrka'-ngrng
Murde navz-nqblqx nqm q krm.
- 116 Bzkq mya ngr drtqng nzbtrtkr drtwrnge nim,
A' arlapx ninge da kc tqwai nzesalz-krmle,
murde ma tqbzx.
- 117 Natu-ngrme mz nibrge mz nzarlapx-krm
ninge,
Murde namatq zvz mz drtwrnge drtwr kcng
tqyrlqq.
- 118 Pxtxpx-ngrn krkcng tpxtxpx-ngrdr Nzryrn-
grkxtr.
Murde nzesabrng x nzpokieng.
- 119 Obqsozq kxdrka'-ngrng mz nzapu-krdr dcvi.
Delc tqmrlz-ngrm bange nzalvztr-krmqng.
- 120 Rnrcti-lzbqng mz nzmwxlrzi-krnge nim,
Murde ma trtubqwxu mz nzobq-krm.
Suti Drtwrge Nzryrngrkxtr

- 121 Suti drtwrnge nzarlapx-khme ninge mz mq
enqmi rngeng,
Murde nqmq krnge rsakrlrngr x tubq.
- 122 Bzkq rlr-ngrbzme mz kxnzglqpx-lzbqng
nzatrkti-krdr ninge.
A' amnc zpxw ninge.
- 123 Mzke' ngqbqtxtrpebz mz nzaenzli-krnge
Nzvz-nqblq-krm nztubqkr nzesalz-krm.
- 124 Alvztrp bange nqmq krm
Mz nzaodu-zvz-krm ninge.
- 125 Okatrp nzyrplapx-krnge,
Murde nakrlz-angidrx nzaolvz-krmqng.
- 126 Yawe, mzli r nzayrplapx-krm leplz dekape.
Murde nznzlvzo-zvzlr Loukxtr scm.
- 127 Mz nzmu-krde lcde, natqm nzmrlz-krmle
bange
Myaspxle da kx lqlwx amrlx.
- 128 Sa natubq-zvzm bange nzalvztr-krmqng am-
rlx.
X mamwe-ngrne nqmq amrlx kx vz-rbr.
Takitrde Nzlolvz-amqngi-krnge Nzalvztr-krmqng
- 129 Takitrde nzlolvz-amqngi-krnge nzalvztr-
krmqng
Murde nzmrlz-zlwzng.
- 130 Natqm apule zyzlr,
Murde aelwa-ngrbzle lrpzki kxtubq mz leplz
amrlx.
- 131 Nzsutikr drtwrnge nqmq krm apule nzbr-
lxkztikr drtwrnge lue,
Murde narmcti-ngrne nzlungr angidr.
- 132 Nayc mz drtwrm ninge,
Da kc tqwaibzme mz krkcng tzamrluelr nim.

- 133 Okatrp ninge mz nzvz-nqblq-krnge me pnz
drtwrn,
Murde alwx ma tqmailz-rbrle ninge.
- 134 Arlapxbz ninge mz mq leplz kcng tzakxputilr
ninge,
Murde nayrlq-zvzx da kx tubq mz nzobq-
krm.
- 135 Okatrp ninge mz nzxngi-krnge nim,
X alvztrp bange Nzryrngrkxtr.
- 136 Trtakitrdeu nznzlvzongr Loukxtr scm.
X yrnitx-zlwz-ngrne alwx ngrdr lc.
Vz-nqblq-zvzq Nzmnncngr Kxtubq
- 137 Vz-nqblq-zvzq nzmncngr kxtubq-esz'ngr,
X drtwr kcng tqyrlqq rsakrlrng.
- 138 Natq kcng tqkapxq nzabrkitr drtwr,
Murde nztubq-zvzng.
- 139 Zngya ngr drtwrnge apule nyr kc tqngc,
Murde enqmi rngeng mrbrtr mz drtwrdr
Nzryrngrkxtr.
- 140 Nzesalz-krm pq zlwz mz drtwrnge
Murde angidati-zvzme bange.
- 141 Kxmule-esz' leplz nzobqszolr ninge,
A' trmrbrtru mz drtwrnge nzalvztr-krmqng.
- 142 Yawe, nztubq-krm tqyc, tqyc,
X Loukxtr scm ngi da angidr zvz.
- 143 Delc kxmule-esz' nzxpung x nzvzkr drtwr
nzprtzmqng bange,
A' abrtz-ngrne nzo-zli-zvz-krnge nzti rm.
- 144 Vz zvz nzokatr-krm ninge nzmc-krnge
Nztubq-zvzkr natqm, murde ma tqbzx.
Wztx-ngrpwo Nzkrka'-krbo Bam
- 145 Wztx-ngrpwo nzkrka'-krbo bam.
X ayzlum natqngc, murde nao-zlix lrpzki rm.

- 146 Yrnimi-zvzbo bam nzarlapx-krm ninge,
Murde nayrlq-angidrx Loukxtr scm.
- 147 Kqle-zvzx nim mz nourla kxtpwz mz
nzokatr-krm ninge,
Murde abtrtpo drtwrnge mz nzesalz-krm.
- 148 Obqtx-zvzx mz nrlckxbq,
Mz nzaotikr drtwrnge me pnz drtwrm.
- 149 Mz nzaodu-zvz-krm ninge, xlrn natqnge,
X mailz ninge mz nzalvztr-krmqng.
- 150 Kxmule-esz' kxnzxpqbrlr-ngrdr nqm q krm
Nzesolvztilr ninge, a' trmwxlrxu.
- 151 Murde eso-aepztrpe' bange,
X drtwr amrlx kcng tqyrlqq da angidr zvz.
- 152 Wz-ngrn natqm murde nayc-alo,
Da kc tqwai nzklrz-krngele, abzo mzli kc pnz.
Xlrn Natqnge Da Kc Tqwai Nzesalz-krmle
- 153 Xlrn natqnge x arlapx ninge mz nzkxpu-
krnge,
Murde dcpz zvz mz drtwrnge Loukxtr scm.
- 154 X pipxbz mz leplz kx nqm q krnge tubq,
Da kc tqwai nzesalz-krmle, murde ma tqbzx.
- 155 Kxdrka'-ngrng trtxpnzngr nzrlapx-krdr,
Murde trnzrtangrtilru nzti rm.
- 156 Yawe, axplr mou ninge mz nzetukr nzaodu-
krm,
Murde vz-nqblqx me pnz drtwrm.
- 157 Kxmule-esz' enqmi ngeng nzqqlu-zlwzng,
A' trtxpnzngr nzesablqti-krnge Nzryrngrkxtr.
- 158 Pxtxpx-ngrne kx drtwrdr litrpz bam,
Murde trnzlxngitilru da kxtubq mz nzobq-
krm.
- 159 Yawe, arlapx ninge mz nivz lrm,
Murde mrlzm bange nzalvztr-krmqng.

- 160 X natqm mqngio mz da kxtubq.
 Delc drtwr amrlx kcng tqyrlqq nztubq-kzng.
Yrlq-angidrx Nzalvztr-krmqng
- 161 Yawe, kxnzetung nzatrkatikrdr ninge
 trpnzngr noude,
 A' amatq-zlwzx natqm.
- 162 Apux bcnyr kc tqrmctile da kxpqtr mz nabzde,
 Murde abrtz-ngrne Nzryrngrkxtr
- 163 Trkam bange natq ngr nzpokianger,
 A' mrlzm bange natqm.
- 164 Glqpx-zvzx nim mz zbq kang kqlu,
 Murde drtwr kcng tqyrlqq tubq-esz'ngr.
- 165 Krkcng tzmrlz badr Loukxtr scm, nzmnc-
 zpwngx.
 X trpnzngr doa x da kx na-ataole nidr.
- 166 Yawe, brti drtwrnge nzarlapx-krm ninge,
 Mz nzale-zvz-krnge da kx pitimeng.
- 167 Lolvz-amqngix nqm q krm,
 Mz nzmrlz-zlwz-krmle bange.
- 168 Yrlq-angidrx nzalvztr-krm,
 Da kc tqwai nzmc-krmle.
Zyzlr Ngrm Napnamilxtile Nabznge
- 169 Zyzlr ngrm napnamilxtile nabznge,
 Mz nzayzlu-krmle natqng m z nzvz-nqblq-
 krde nzesalz-krm.
- 170 Lalztq-ngrm nzkrka'-krnge,
 X arlapx ninge mz nzvz-nqblq-krde natqm.
- 171 Naglqlz-zvz-ngrne nim
 Mz nzalvztr-krmle bange nqm q krm.
- 172 Na-angrlvzx nzesalz-krm,
 Murde drtwr amrlx kcng tqyrlqq tubq-
 esz'ngr.
- 173 Oliqm mz nzokatr-krm ninge,

Murde lolvz-amqngi-zvzx me pnz drtwrm.

174 Yawe, obqtipxx nzarlapx-krm ninge,
Murde mrlzm bange Loukxtr scm.

175 Okatrp ninge mz Nzryrngrkxtr
Murde naglqpxx nim mzli ka tqlu-ngrne.

176 Zmrlz ngrm nakqlelvzti-zvzle ninge.
Murde kxmule-esz' vecpx-lzbqbo bam,
A' trmrbrtitru mz drtwrnge lrpzki rm.

Sam Kratrtqki-esz'-nzpnu-li (120)

Ncblo Ngr Nrwx

Nabz kx nzngernelzng Jerusalem mz nzangiongr.

1 Mzli kc tqmnc-ngrne mz nzkxpung, kqlx
Yawe,
X ayzlu-ngrmle natqnge.

2 Rpibo bade kx, “Yawe, arlapxbz ninge
Mz leplz kxnzpokiang x nzesabrng.”

3 ?Nimu leplz kxnzpokiang,
Krlzpeamu da kx nawaisrngr Yawe nimu?

4 Sa na-ayrplapx-zlwzle nimu
Mz nipna sc ncblo ngr vea x mz nyr kxpg
zlwz.

5 Nzmnc-lxblr-krgru trka-zlwzm bange,
Apule kx mnckr badr leplz kxdrka'-ngrng.

6 Mzli boitx zlwz mnctibo bamu,
Nimu leplz kcng tzpctxpx-ngrdr nrwx.

7 Dekc mzli kc tqryapwxtr-ngrne mz nrwx,
Suti alzu drtwrmu nzotangr.

Sam Kratrtqki-esz'-nzpnu-li-nrade-esz' (121)

Gct Aclve-zpwxle Nigu

Nabz kx nzngnrelzngr Jerusalem mz nzangiongr.

¹ ?Myx me narmcti-ngrne kxnaokatrle ninge?

?Sa navzom mz newz ngr nrlc ka?

² Trtingr. Murde Yawe Kxrpalz kc tqwz-ngrde
bongavz x drtc',

Nide txpwz kx naokatrle ninge.

³⁻⁴ Da zpwx! Murde Yawe obq zvz,

X aclve-angidrle nigu lr Israel,

Mz nzapu-krgru sip nedeng.

A' tramau x trmwiu, murde ma tqtaoku.

⁵ Yawe ngi tegu badr,

X tu-zvzm mz nibrgu,

⁶ Murde trtxpnzngr doa x da kx na-atrkatile nigu

Mz nrlckxgrlx x mz nrlckxbq.

⁷ Yawe arlapxle nigu mz nzkxpu-krgrung amrlx,

Murde namnc-zpwxku.

⁸ X aclve-zvzle nzvz-krgru x nzmnc-krgru,

Mzli ka x tqyc, tqyc.

Sam Kratrtqki-esz'-nzpnu-li-nrade-li (122)

Jerusalem Ngı Mzteadau Nyz Yawe

Nabz ne Devet kx nzngnrelzngr Jerusalem mz nzangiongr.

¹⁻² Drtwrnge elalzm mz nzrpi-ngrm bange
kx, "Navzdzpeku mz Mangr-nzangiongr
Yawe."

- Zbz sc tqvztrpekr mz naobz ngr mzteadau
nyzde.
- ³ Jerusalem lc nzlrnztio nzwzng,
X mzte opx nzmwitr-lxblrkr ma ngrdeng.
- ⁴ Nigu neidu lr Israel vzmgu mrlcde mz nzawi-
krbzku mz Yawe,
Da kc tqwai nzpi-krdele.
- ⁵ X Jerusalem ngi mzteadau nyz king rgung, kcng
tzvzpxmqng mz nqvi lr Devet.
X nzaclvelr leplz nedrng elr mz nzwxbuo-
krdr mz tron.
- ⁶⁻⁷ Delc, nakrka'-ngrgu Jerusalem mz nwrpi-krgr
kx, "Gct rgr, aclve zpwz nigr lr Jerusalem,
Murde leplz nemqng kcng tzmrlztilr nim
Namnc-zpwzng mz ma nyzdr,
X narmctilr nrwx mz nzmncpx-krmlr mz
drkq ngr mzteadau nyzm.
- ⁸⁻⁹ Yawe, rlxibzkr bam
Kx na-clve-kzpzme lr mrnyzgr x kztegrng
kcng tzmncng elr.
Amrlz zvz leplz amrlx kcng tzmncng elr
Mz nzmrlzti-krdr Mangr-nzangiongr nim.
Eu, angida."

Sam Kratrtqki-esz'-nzpnu-li- nrade-tq (123)

Yawe, Nayc Mz Drtwrm Nigr

Nabz kx nzngnrelzngr Jerusalem mz nzangiongr.

¹ Yawe, mnc-xglex nim

Mz nzwxbu-krm mz tron nyzm Heven.

² X nzmnc-xgle-zvz-krgr nim navz navz nakrlzb-
zle mzli kx ycng mz drtwrm nigr.

Murde apukr ncblo x olvz kx nzawzng kx
nzmnc-xglelr kxnzetu rdrng.

³ Yawe, nayc mz drtwrm nigr mz nzokatr-krm
nigr.

Murde kxnzakxputing nzapusr-ngrdr nigr
brmrda.

⁴ X drtqgr satxtrpebz nzxtrngatitrkr kxnzrngis-
cng nigr,

X kxnzglqlz-lzbqng nzobqszo-zvzlr nigr.

Sam Kratrtqki-esz'-nzpnu-li- nrade-pwx (124)

Yawe Arlapxe Leplz Nedeng

Nabz ne Devet kx nzngnelnzgr Jerusalem mz
nzangiongrr.

¹ Nigu lr Israel nakrlz-angidrku

Kx Yawe ngi-te-zvzku badr mz nzotangr.

² X mz nzngi-te-zvz-krgr badr

Mzli kc enqmi rgung nzrpilr na-atrkati-ngrdr
nigu,

³ Rblxbz badr nzmilxtxo-krdr nigu

Mz nzngyati-zlwzkr drtwrdr nigu.

⁴⁻⁵ X trznibqlru nigu mz nzapu-krdr srkau kx
mrilvzole nigu.

X nrc kxetu ngr srkau lc trabooleu nigu.

⁶ Delc na-awi-ngrbzku mz Yawe

Mz trnzrlr-krpwwzleu nigu mz mq enqmi
rgung.

⁷ Mzli lc sc tqapupeku utc mz nzdwapx-krmgu
mz br sc kxnzmmwang,

X drtqgu opxpe murde Yawe pingebzle br
scdr.

- ⁸ Yawe nide Kxrpalz kc tqwz-ngrde bongavz x
drtc',
X Mevalu kc tqokatrle nigu, mz zmatq
drtqde.

Sam Kratrtqki-esz'-nzpnu-li- nrade-nzlvqn (125)

Kxnztubqng X Kxdrka'-ngrng

Nabz kx nzngernelzng Jerusalem mz nzangiongr.

- ¹ Nigu kcng nzabrtrpzlr drtwrdr mz Yawe,
Apuku Newz Saeon kx trycnglr, a' tutx alo.
- ² X Yawe apule newz kcng tztu-ngalelvzlr
Jerusalem,
Murde vz zvz nztu-krmle mz nibrgu, nigu
leplz nedeng.
- ³ X tr-rlr-ngrpwzleu mz kxdrka'-ngrng nzacive-
alo-krdr mrnyzgu, nigu kxnztubqng.
Murde ma tqvz-nqblqku nqm q krdr kxtrka.
- ⁴ Delc Yawe, krka'-ngrgr kx na-amrlzq nigr lr
Israel kxnztubqng
Mz nzyrlq-angidr-krgr natqm.
- ⁵ A' mzli kc na-ayrplapx-ngrn kxdrka'-ngrng,
Mrlzm bagr nzayrplapx-kz-krm kzdung nigr
Kcng tzpxtxp-ngdr nzvz-nqblqng nim.
A' amnc zpwx nigr lang.

Sam Kratrtqki-esz'-nzpnu-li- nrade-esz'mz (126)

Yawe Amnc-zpwx-moule Lr Jerusalem

Nabz kx nzngernelzng Jerusalem mz nzangiongr.

- 1 Mzli kc Yawe tqamnc-zpwx-mou-ngrde nigu lr
Jerusalem,
Opxm kx trngiu da zpwx, a' rmwibleku.
- 2 Mzli lcde, yrpale-twzku x ngr-katoku, mz
nzabrtz-zlwz-rgu.
Zbz sc tzrpipe lr mrkzbleng kx, “Yawe rwz-
ngrbz da kxetuting kx okatr-ngrde nidr.”
- 3 X abrtztz-zlwz-nrgu
Da lcdeng tgetuting tqwz-ngrmleng bagu.
- 4 Delc Yawe, na-amnc-zpwx-mou-ngrde nigu mzli
ka,
Da kc tqwai tewa nzdc-krde x lrti-moungr
ningali kx pztipeng.
- 5 Murde leplz kcng tzyrning mzli kc tzpe-ngrdr
dakxnzng mz drtc',
Na-abrtzng mzli kc narkqlz-ngrdr.
- 6 X leplz kcng tzyrning mzli kc tzrtwz-ngrdr
dakxnzng kx napetilr mz nrlanc,
Sa nangr-abrtzng mzli kc nartwz-ngrmlr
dakxnzng brma mz mzli r nzrkqlzng.

Sam Kratrtqki-esz'-nzpnu-li- nrade-rlimz (127)

Nqvi Lr Ncblo

Nabz ne Solomon kx nzngnelzngr Jerusalem mz
nzangiong.

- 1 Nzmu Yawe trnangiu Kxetu r nqvi lrgu le,
Mane nzaetunepx-rgu nqvi lrgu.
Nzmu trna-aukztileu lr mrnyzgu,
Mane nzaclve-rgu nidr.
- 2 Nzmu trna-abrtzpwzkuu drtwrgu mz Yawe
Mz nzrka-krmle dakxnzng bagu,

Mane nzo-rlangr mz nzwz-katongr x nyzylu-
ngrm mz nina,
Murde krlz-kzle nzrka-krmle da bagu mzli kc
tqmwi-ngrgu.

³⁻⁵ X Yawe nide kz kx rkam doa kxnztopwzng mz
nqvi lrgu,

Mzli kc tqngi-oblaben-grgu.

Murde mzli kc tqngi-lrtzlvzpe-ngrgu, doa lcng
na-acvelr nigu.

Sa namrlzbz mz ncblo kc mrlxde tqkqlu.

Murde mzli kc kzdq ncblo narnqniti-lzbq-ngdrdr
bade,

Mrlxdeng sa natubzng mz nibrde.

X mz nzrka-krbz kxnzrmailzng drtwr kxtubq,

Drtqde trnamyau murde nztu-krbz mrlx-
deng lcng mz nibrde.

Sam Kratrtqki-esz'-nzpnu-li- nrade-rtqmz (128)

Trte Kx Mailzle Lr Ma Nyzde

Nabz kx nzngnrelzng Jerusalem mz nzangiongr.

¹ Yawe sa na-amrlzle trte kx amrluele nide,

X o-zli-zvzle nzti rde.

² Murde da kx naokatrle lr ma nyzde navzpxm
mz nzwz-krde,

X na-abrtz-ngrde nzmnc-zpwx-krdr.

³ Olvz nalzde na-apule nc bia kc nrade tqkqlu,

Murde doa nedrng kalr na-apulr nrtr ngr nc
brpi mz nzwxbu-ngalelvz-krdr nyr pnrde.

⁴ Delc Yawe tqamrlz-ngrde

Trte kx amrluele nide.

⁵⁻⁶ Yawe, mz nzmncpx-khme Mangr-nzangiongr,

Amrlz nigr lr Israel, murde namnc-zpwxkr.
X trtegr lcngr namc-zvzlr da kxmrlzting kcng
tqaleme bagr, nigr lr Jerusalem.
X namc-kzlr nzmncr doa ne doa nedrng, x
sc tzbz-ateng.

Sam Kratrtqki-esz'-nzpnu-li- nrade-rpwxmz (129)

Enqmi r Lr Israel

Nabz kx nzngnelzng Jerusalem mz nzangiongr.

¹ Nigu lr Israel nadcpz mz drtwrgu kx enqmi
rgung nzatrkatilr nigu

Yzuo mzli kc tqpipzbe-nrgu mrnyzgu.

² A' kxmule-esz' enqmi rgung nzatrkatilr-zlwzlr
nigu,

Yzuo mzli kc tqpipzbe-nrgu mrnyzgu, a'
trnzaovxio-pnzlr nigu.

³ X kxmule-esz' nzikla-zlwzlr nigu,

X bzmrde mnz-aboitxtr-alom mz nibrgu,

⁴ A' Yawe kc tqtubq-esz'ngr,

Aopxpebzle drtqgu mz mqdr.

⁵ Delc Yawe, nigr lr Saeon rlxibzkr bam,

nzmaneutipx-krbzme enqmi rgrng amrlx,

Murde drtqdr namyatx-zlwzng.

⁶ X ayangrng nigr

Mzli lc tztopwzbe-ngrdr.

⁷ Murde ma tqtakitrde nigr nzota-moungr,

Nzmu enqmi rgr kc-kzng tzrlxtibzlr badr

nzokatr-krdr nigr mz vea.

⁸ X bzkr rlrpx-ngrn ngrpi-krbz badr kx,

“Amrlzkr nimu mz drtq Yawe!”

Sam Kratrtqki-esz'-nzpnu-tq (130)

Nzoliq-zvzkr Yawe Mz Nzokatr-krde Leplz Nedeng

Nabz kx nzngernelzngr Jerusalem mz nzangiongr.

¹ Yawe, kqlex nim mz nzokatr-krm ninge
Mz mzlir nzkxpu-krngeng.

² Lalztqm mz nzkrka'-krnge, kx Kxetu,
X ayzlum natqnge.

³ Yawe, nzmu napx-ngrn nzipqpx-krm alwx
rgrng,
Trpnzngr kx narlapxbz mz nzayrplapxngr.

⁴ A' oliq-zvzq nzipq-krm nigr,
Murde na-amrluekr nim.

⁵⁻⁶ Yawe, obqtipxx nzokatr-krm ninge.
X brti drtwrnge kx sa na-atutrq natqm.

Da kc tzwai kxnzaukzng mz nzaenzli-krdr rngalx
nzpnamilxtilz-ani-krmle,
Murde nzkrllzlr kx nepi sa naprkilz-zvzm mz
nourla kang kqlu.

A' suti zlwx drtwrnge nzvz-ani-khme,
Myaszpxle nzsutikr drtwrdr nzprtz-krm
nepi.

⁷ X nigu lr Israel, na-abrtrpzku drtwrngu mz Yawe,
murde aodu-zvzle nigu.
X oliq zvz nzarlapx-krde nigu.

⁸ X sa naxpepxle nigu
Mz alwx nrgung amrlx.

Sam Kratrtqki-esz'-nzpnu-tq-nrade-esz' (131)

Apux Doa Kx Yrpz Lxede

Nabz ne Devet kx nzngernelzngr Jerusalem mz nzangiongrr.

¹ Yawe, trglqpx-lzbqpc'u bam, mz nzvz-lvi-krnge bz kc tqyrlqme bange.

X tramatq-lzbqwxu murde naptrpo mz kxnzetung mz nzycmnetr-krdr mz da kxmyaszpxle nzrkrlz-krnge.

² Murde abrtz-ngrne nzapu-krnge doa kxtpowz kx yrpz lxede.

Delc tqmnc-zpwx-ngrne mz nrlc.

³ X nigu lr Israel navz zvz nzabrtr-krbzku drtwrgu mz Yawe,
Murde namnc-zpwx-kzku.

Sam Kratrtqki-esz'-nzpnu-tq-nrade-li (132)

Nzesz'tikr Drtwr Yawe Ncdr Devet

Nabz kx nzngernelzngr Jerusalem mz nzangiongrr.

Devet Suti Drtwrde Nzrwzngr Mangr-nzangiongrr Yawe

¹ Yawe, na-aoti drtwrm nzcxpukr Devet,

Mz nzwztr-krbzle bam.

² Nim Gct kc tqrninr tqangio Jekop.

X Devet esalzbz bam.

³⁻⁴ Rpibzle kx, “Yawe, trtxpnzngr nzvz-krnge ma nyznge o mz nelvq nyznge,

X trtxpnzngr nzama-krnge x nzmwi-krnge,

⁵ A' nawzti-kaix dq ma kx namnc-ngrrn,

Mz nzngini-krm Gct r Jekop.”

*Devet Rmctile Bokis Kc Tqyclz-ngrm Nzesz'tikr
Drtwrdr Badr Gct*

⁶ Mzli kc Devet badr ncblo nedeng tzmnc-ngrdr
Efrata,

Nzxlrlr nrpa ngr Bokis kc tqyclz-ngrm Nzesz'tikr
Drtwrdr Badr Gct.

X sc tzmctipelr mz mztea Jerim mz nrlarn-
rlc lcde.

⁷ X sc tizrpielr kx, “Naglppeku Bokis lc mz
Tentkxtr nyz Yawe.

Mz nzangio-krqu nide mrkc tqwxbu-ngrde
mz tron.”

⁸ X sc tizrpipebzlz mz Gct kx, “Yawe, vzm mz
Tentkxtr nyzm,

Murde namnc-zvzq mrkc tqycngr Bokis ngr
zmatq ngrm.

⁹ Murde pris nemqng nayapwxtipxbzlz nztubq-
esz'ngr-krm mz leplz nedrng,

Kcng na-angrlvzlr nim.”

Nzesz'tikr Drtwr Yawe Ncdr Devet

¹⁰ Yawe, mzli ka bzkq ptxpx-ngrn king rgr kc
tqmcpxbzme,

A' atutr nzesalz-krbzme mz kxnzawz nem,
King Devet.

¹¹ Murde esalz-ngrbzme bade da kx trnzkatxu,

Mz nzirpi-krbzme bade kx, “Sa nayrlqbo dq
mrlxm kx nangingide king kx na-acivele lr
Israel mz nibrm. ☆

¹² X nzmu mrlxdrng nayrlq-angidrlr nzesz'tikr
drtwrgr badr,

☆ **Sam Kratrtqki-esz'-nzpnu-tq-nrade-li (132):11** Aposol 2:30

X navz-nqblqlr natqnge kc tqkapxbo badr,
Sa nangini-zvzdr king,
Badr mrlxdrng, tqyc tqyc.”

Mevalu Kc Navzpxm Mz Nqvi Lr Devet

- ¹³ Yawe, rlxibzkr nzamrlz-krm king nem.
Murde mcpqx Jerusalem nangi mztea nyzm,
¹⁴ Mz nzirpi-krm kx, “Krlc mztea kx namnc-alo-
ngrne,
Mz nzvz-nqblq-krde me pnz drtwrnga.
¹⁵ Sa nakabo mz lr mztea nyznga lc da kxmrlzting
kxkqlu.
X sa na-aputrx kxtrnzrngiscung murde
nelzdr nakrlc x naesatpxp zpx.
¹⁶ Sa nabatrpo mz pris nengeng nzyapwxtipx-
krbzlr mz leplz nengeng nzarlapx-krnga
nidr,
Murde leplz kxnztr lcng namalqlvzlr ninge.
¹⁷ Sa nayrlqx king kc tqmatq Jerusalem kx
navzpxm mz nqvi lr Devet,
X nzaclve-krde trtxpnzng nzesaki-krde.
¹⁸ Sa na-amyalz nide mz nzalao-krbo kraon mz
narde,
A' sa nabatrpo nzmyakr drtq enqmi rdeng.”

Sam Kratrtqki-esz'-nzpnu-tq-nrade-tq (133)

Nzesz'tikr Drtwrgu

Nabz ne Devet kx nzngnelzngr Jerusalem mz
nzangiong.

- ¹ Lqngipx x mrlzvxi

- Mzli kc leplz tzmnc-tr-lxblr-ngrdr mz
nzesz'tikr drtwrdr.
- ² Nzesz'tikr drtwr lqngipx apule nzyrleokr tolo
mz nar Eron x nrpnr naode, krlzo-kzpzle
lrpzde,
Mzli kc tzaelu-ngrde tolo mz nzngini-krde
Nardr Pris.
- ³ X nzesz'tikr drtwr mrlzvxi apule nzdco-krm
tewa
Mz newz nyzgung mrkc tqmingr zvz.
Murde da kc tqmrlzting amrlx tqkam Yawe bagu
nzvzpxmqng Jerusalem,
Myapxbz nzmnc-zpwx-zvz-krgru mz drtc'
nyzgu.

Sam Kratrtqki-esz'-nzpnu-tq-nrade-pwx (134)

Naglqpxku Yawe

- Nabz kx nzngnrlzngr Jerusalem mz nzangiongr.
- ¹ Naglqpxku Yawe, nigu kxnxawz nedeng.
Naprtkrku mz Mangr-nzangiongr nide.
- ² Glalzku mqgu Mrkc Tqtr.
Glqpxku Yawe mz nrlckxbq.
- ³ X krka'-ngrgr kx Yawe na-amrlzle nimu mz
nzmnc-krde Mzteadau nyzde.
Nide kc tqwz-ngrde bongavz x drtc'.

Sam Kratrtqki-esz'-nzpnu-tq-nrade-nzlvqn (135)

Nigu Nqvi Lr Israel Naglqlzku Yawe

- Nabz kx nzngnrlzngr Jerusalem mz nzangiongr.

Mcpx Gct Nqvi Lr Israel

1-2 Naglqlz-zvzku Yawe,

Murde nide Gct rgu.

X nigu kxnzawz nedeng na-amrlueku nide

Mz nzkrka'-krmu mz Mangr-nzangiongr x
makoa ngrde.

3 Na-amatqku nide murde mrlz-esz'ngr.

X na-angrlvz-ngrgu nide nivz lrde.

4 Murde mcpxle nqvi lr Jekop, nigu lr Israel,

Mz nzngini-krgru leplz nedeng.

Kxrpalz

5 Krlzku kx Kxetu rgu, Yawe, nide Gct kc
tqmyatxlz-esz'ngr,

Myaszlzle kxnzmncng mzlilxlr amrlx.

6 Vz-nqblq-tpwzle me pnz drtwrde mz da kx
alele

Kxmule-esz' mz bongavz, nrlc, prla, x me
boo-ngrng.

7 Wz-ngrde zbo nzvzdz-krdr mz lclxlr mz bon-
gavz,

X bzlrpc nzvzmi-krm trlipu le.

X batrpzle nzwqkr nenq.

Kxaovxio

8 Sc tqnibqtile ncblo kx ayrnrngr Ijipt,

Kr neng leplz x kr neng animol.

9 Rwngr da kxnzkctipxng kxkqlu mrlcde,

Mz nzayrplapx-krde king rdr x kxnzetu ne-
deng.

10 Aovxiole lr mrkzbleng kxkqlu

Mz nznibqti-krde king kxnzxplr-zlwzng.

11 Krlcng King Sihon, King Og, x kzdu-kzng king

Kcng tzaclveng mz drtc' Kenan.

- 12 X drtc' nyzdrng katimleng bagu,
Nigu lr Israel, da kc tqwai nzpi-krmlele bagu.

Gct Angidr

- 13 Nqmq kr Yawe tqyc tqyc.
X nzrkrlzng drtqde tqvzpe tqvzpe.
- 14 Yawe sa napipxbzle mz leplz nedeng kxnvz-
rbrng o trtingr,
X sa na-aodu-zvzle nidr.
- 15 Kxnmnc-mrbrng nzangioldr mqngr da kx nzlz,
Kcng twwzng ncblo mz silvz x gol.
- 16 Mqngr da kxnlz lcng naodr x mztr ycbz,
A' trnzycmneung x trnzrmcung da.
- 17 Nradrtqdr x nctqdr ycbz,
A' trnzxlrungr da x trnzycmini-kzung.
- 18 Leplz kcng twwz-ngrng nzapu-kzlr mqngr
lcng.
Murde nznabung, trnzobqung, nradrtqdr
ngq, x trpnzng nzlungr badr.

Lr Israel Naglqlzlr Yawe

- 19 A' Nigu nqvi lr Israel, naglqlzku Yawe.
X nimu pris, nqvi lr Eron, na-amrlue-kzamu
nide.
- 20 X nimu kxnvawz nedeng, nqvi lr Livae, na-
amatqamu nide.
Nigu amrlx kcng tzamrluelr nide, na-
angrlvzku nide.
- 21 Na-angioku Yawe Jerusalem, mz Newz Saeon.
Naglqlz-zvzku Yawe.

Sam Kratrtqki-esz'-nzpnu-tq-nrade-esz'mz (136)

Aodu-zvzle Nigu

Kxrpalz

- ¹ Aodu-zvzle nigu. Awi-ngrbzku bade
Mz nzmrlz-esz'ngr-krde. Aodu-zvzle nigu.
- ²⁻³ Aodu-zvzle nigu. Kxetu r kxnzetung
Myaszlzle kxnmncng mzlilxl. Aodu-zvzle
nigu.
- ⁴⁻⁵ Aodu-zvzle nigu. Wz-ngrde rkx kxmatq,
Bongavz mz nzyrplapx-krde. Aodu-zvzle
nigu.
- ⁶ Aodu-zvzle nigu. Wznedz-ngrmle drtc'
Me boongr prla. Aodu-zvzle nigu.
- ⁷⁻⁸ Aodu-zvzle nigu. X wz-ngrde nepi
Nayzlr mz nrckxngrlx. Aodu-zvzle nigu.
- ⁹ Aodu-zvzle nigu. Wz-ngrde temz badr vri
Nayzlrng mz nrckxbq. Aodu-zvzle nigu.

Aovxiole Enqmi Rgung

- ¹⁰ Aodu-zvzle nigu. Nibqtile enqmi rgung,
Kxmztr nzmc kai ne lr Ijpt. Aodu-zvzle nigu.
- ¹¹ Aodu-zvzle nigu. Rkamilmle nigu
Lr Israel mz mzlir lr Ijpt. Aodu-zvzle nigu.
- ¹²⁻¹⁴ Aodu-zvzle nigu. Mz zmatq ngrde kx xplr,
Akipxle Prla Bla. Aodu-zvzle nigu.
- Aodu-zvzle nigu. X mailzkimle nigu,
Leplz nedeng mz nzti rde. Aodu-zvzle nigu.
- ¹⁵ Aodu-zvzle nigu. A' rtco-ngrde prla
King x ami r lr Ijpt. Aodu-zvzle nigu.
- ¹⁶ Aodu-zvzle nigu. X mailztrle nigu

- Leply nedeng lzke. Aodu-zvzle nigu.
17-18 Aodu-zvzle nigu. Nibqtile king kxnzxprrng.
Apoopemle king kxnzmatqng. Aodu-zvzle
nigu.
19 Aodu-zvzle nigu. Nibqle King Sihon,
King r lr Amctq. Aodu-zvzle nigu.
20 Aodu-zvzle nigu. X aovxiole King Og,
Kc tqngi king r lr Basan. Aodu-zvzle nigu.
21-22 Aodu-zvzle nigu. Aprcmle drtc' nyzdr
Bagu, nigu lr Israel. Aodu-zvzle nigu.

Aclve-zvzle Nigu

- 23 Aodu-zvzle nigu. Trmrbrtru mz drtwrde
Nzkxpu-zlwz-krngung. Aodu-zvzle nigu.
24 Aodu-zvzle nigu. Arlapxbzle nigu
Mz mq enqmi rgung. Aodu-zvzle nigu.
25 Aodu-zvzle nigu. X rkabz dakxnzng
Mz krkcng tzlung amrlx. Aodu-zvzle nigu.
26 Aodu-zvzle nigu. Glqlzku Gct kc Heven,
X awibzku bade, aodu-zvzle nigu.

Sam Kratrtqki-esz'-nzpnu-tq-nrade-rilmz (137)

Rblx Nznggr-abrtz-krgr Mz Nzmmc-krgr Bxbilon

- 1 Kx dcpz mz drtwrgr nzodatingr Jerusalem,
Sc tqyrnipekz mz nzwxnbune-krgr mrkzble
mz nqlvi r ningaling Bxbilon.
2 X gita negrng adotxlzpekrng
Mz nounc kx nztung mrlcde.
3 Krkcng tzlolvztillr nigr, tzxtrnga-ngdrdr nigr,
nzzpimlr bagr kx,
“Ngr-ngrmamu du bagr nabz kxtr nemung.”

- ⁴ A' mz drtwrgr rpikr kx, “Rblx nzngr-abrtz-krbzkr mz Yawe,
Mz nzmnc-krgr mz mztea nyz kxtrnzrlxngitiung.
- ⁵ Murde nzmu kx tqmrbrtitr drtwrnge Jerusalem,
Namrbrtitr kz drtwrnge kxmu nzayrnkrnge gita nenge.
- ⁶ X nzmu kx tqrbxl nzdcpx-kaikr Jerusalem mz nabznge,
Narblx kz nzngr-krnge nabz ngrdeng.”
- ⁷ Yawe, nadcpxpwx mz drtwrm alwx ngr lr Edom.
Murde mzli kc lr Bxbilon tzodati-ngrdr Jerusalem,
Sc tzipibzlr badr kx, “Odatiamu!
Odatiamu x natutx-lxlrngr.”
- ⁸ Yawe, rlxtibzkr bam nzamlrzkrm ncblo kc naodati-atwrnr-ngrde lr Bxbilon,
Mz nzayzlu-krbzle badr da kcng tzwaisr-ngrdr nigr. ☆
- ⁹ Murde na-abrtz-ngrde nzlolvzti-krde doa lcngr,
Mz nztamyrtitx-krde nidr.

Sam Kratrtqki-esz'-nzpnu-tq-nrade-rtqmz (138)

Drtq Yawe X Natqde

Nabz ne Devet.

- ¹ Yawe, awibo bam mz nabznge atwrnrngr.
X angrlvzx nim mz mz kxnzmatqng.

² Lxlvrkibo Mangr-nzangiongr nim mz nzglqlz-krnge drtqm.

X awi-ngrbo bam nqmq krm,
Nzaodu-krm, x nzangidati-krm.

Murde drtqm x natqm nzmyatxpx-esz'ngr.

³ Mzli kc tqkrka'-ngrbo bam, ayzlume natqnge,
Mz nzaetunepx-krm nzxplr-krnge.

⁴ Yawe, king amrlx mz nrhc sa naglqlzlr nim,
Mz nzxlr-krdr nzmrlzkr natqm.

⁵ X sa na-angrlvzlr kxmu nzale-krmqng da,
Mz nzmhc-krdr kx myatxlz-esz'ngrn.

⁶ Kxmule-esz' myalz-esz'ngrn, a' sc tqaclve-zvzq
kxznzavzo-lzbqng.

X avzome kxznzqlqpx-lzbqng.

⁷ X kxmule-esz' nzfxpungr nzprtmqng bange, a'
amnc-zpwxq ninge.

X tu-zvzme mz nibrnge mz nzngyatikr drtwr
enqmi rngeng ninge.

X arlapxq ninge mz zmatq ngrm.

⁸ Yawe, krlzx kx sa na-angidatiq drtwr amrlx
kcng tqyrlq-pz'liti-ngrn ninge.

Murde nzaodu-krm tqyc tqyc.

Bzkq esaki nzacive-krm krkcng amrlx tqwz-
ngrn.

Sam Kratrtqki-esz'-nzpnu-tq-nrade-rpwxmz (139)

*Nzrkrhlzkr Yawe Myatxlz-esz'ngr X Krlz-kzle
Nqmq Nr Nabzm*

Nabz ne Devet kx yrbzle mz kxrmailz ngr dzbe
kxznzngng.

Obqplxq Nabznge

- ¹ Yawe, obqplxq nabznge,
X krlz-atwrnr-ngrn ninge.
- ² Krlzq da amrlx kcng tqalex.
Kxmule-esz' mncme rlru, a' krlz-zvzq nzaokrnge drtwrnge.
- ³ Kxmule-esz' wzx o amax, a' sa tqmc-zvzq ninge.
X krlz-kaiq da amrlx kcng nartrngztibo mz
zbq kxes'.
- ⁴ Abzo pnz mzli kc trycmneka-ngrne
Nzkrlz-kai-krm natq kznike napixng.
- ⁵ Zmatq ngm okatrle ninge
Mz nztu-ngalelvz-krde ninge.
- ⁶ Nzkrlz-krm ninge etu zlwz.
X trtakitrpwc'u nzkrlz-krm.

Esz'-ngrn Nrle

- ⁷ ?Drive kc navzkix murde trnamcwq ninge?
Trpnzngr kxnamule lc murde esz'-ngrn nrle.
- ⁸ X kxmule-esz' vzdzx Heven, a' sc tqmncq elr.
X kxmule-esz' bzx x nzyrtzmqnge, a' sc
tqmnc-kzq elr.
- ⁹ Kxmule-esz' alilvc-kzx me prkilzm nepi
O me takiole,
- ¹⁰ A' sc tqmncq elr mz nzokatr-krm ninge
X nzrmailz-krm ninge mz mqm.
- ¹¹ Kxmule-esz' mnc-kapqx mz nzlo
X mz drtwrnge nrckxngrlx nangitx nrck-
xbq,
- ¹² A' nzlo x nrckxbq rblx nzamnc-kapq-krdr
ninge,
Murde nzlo x zyzlr kxnamu-tpwzlr esz' mz
nzobq-krm.

Nzlrmtio-krm Ninge

13-15 Murde mzli kc tqmclq ninge mz nelz lxenge
Nim txpwz kx rkrlz nzmnc-lrpipx-krmc mrl-
cde.

Wz-ngrn dalr nrkrdrtnge x nrvr rngeng.

X amwitr-lxblr-kzqng amrlx, mz nzvz-nqblq-
krde me pnz drtwrm.

X kctipxx x awitx-ngrbo bam

Nzlrmtio-krm ninge.

16 X mzli kc trnmckangr mzke',

Yrlqpe-kaiq me nakrlzbz me nangi bz ngr
nzlu-krnge.

Rblxm Bange Nzao-krm Drtwrm

17 A' rblxm bange nzkriz-angidr-krnge nzao-krm
drtwrm

Murde nzkqlu-zlwzng.

18 A' nzmu narlwxxleng drtwrnge mrbrtrpz,

Murde nzmyaszpxlr drta' ngr prla amrlx.

X kxmule-esz' nayrkrpx nzrlwx-krngeleng,

A' tryatrkapc' nzkriz-angidr-krnge nim.

Kxdrka'-ngrng

19 Murde rblxbep bange drtwr ngr nqm q krm.

? Memule tqasa-ngrn nzayrplapx-krm kxdrka'-
ngrng?

?Myx kxmule trnamilxtxokalq nidr?

20 Murde nzpiti-ngldr nim natq kxtrka,

X nznzlvzlr nqm q krm.

21-22 Yawe, pxtxpx-ngrne krkng tpxtxpx-ngldr
nim x ni-kzdr enqmi rngeng.

Murde trnmnczpwzung mz zmatq ngrm.

Aelwa-ngrm Bange Nqm q Krnge Kxtrka

- 23 Gct, obqplxti zpxw nqmq nr nabznge
Mz nzkriz-krm nzao-krnge drtwrnge.
24 Murde na-aelwa-ngrme bange nqmq krnge
kxtrka,
X namailzq ninge mz nzti kxtubq.

Sam Kratrtqki-esz'-nzpnu-pwx (140)

Kxna-atrkatilr Ninge

Nabz ne Devet kx yrbzle mz kxrmailz ngr dzbe
kxzngrng.

Arlapxbz Ninge

- 1 Yawe, arlapxbz ninge mz kxdrka'-ngrng
Keng tzsuti drtwrdr nzatrkatikrdr ninge.
2 Nzryrlq-zvzng drtwr kxtrka mz nabzdr,
X nzapqtr-zvzlr drtwr ngr nzotangr.
3 Natqdr nzlvati apule nipna kr ningidoe kc tqrtq,
Mz nzrpikitingr x nzrpibqtingr. ☆

Mz Mq Enqmi Rngeng

- 4 Yawe, arlapxbz ninge mz zmatq ngrdr.
X aclve-angidrbz ninge mz krkcng tzryrlqng
drtwr kx na-atrkati-ngrdr ninge.
5 Sc tzglqpx-lzbqng nzamwi-kapqlr trtxki kx
naprtz-ngrne mz nzatu-krdr br mz nzti
rnge.
X tzryrlqng drtwr kx nalolvz-ngrdr ninge.

Nim Gct Rnge

- 6 Yawe, xlrn nzkrka'-krnge,

Murde rpi-zvzbo bam kx, “Yawe, nim Gct rnge.”

⁷ Kxetu rnge, nzxplr-krm arlapxle ninge.
X amyaq narng m z nzvecngr.

⁸ Bzkq rlr-ngrbzme nzngidatigr drtwr kcngr tzyrlq
kxdrka'-ngrng lcngr
Mz nzbilvz-krdr nzlolvz-krdr ninge, kxmule-
esz' nzsuti zlvz drtwrdr.

Ayrplapx Nidr

⁹ Enqmi lcngr tztu-ngalelvzlr ninge.
Batrpz nzayzlu-krbz badr natq ngr zngya
kcngr tzipmlr bange, murde nangq-moule
nidr.

¹⁰ X nyr natatiom nangc-ngrdr,
X nartctiongr nidr mz gq kx trnarlapx-
ngrdru.

¹¹ Suti drtwrng kx krkcng tzpokiang nzmnc-
krdr mz drtc' natangqneo.
X da kxtrka nadwatibzle krkcng tzota-zvzng
mz nzodati-krde nidr.

Okatr Ninge

¹² Yawe, krlzx kx tu-zvzbzme mz nibr kx
trpnzngr scde zmatq,
X okatrq kxnzkxpung mz nzatubqti-krm da
kx vz-rbr.

¹³ Leplz kxnztubqng sa na-awibzng bam,
X namnc-zvzamu badr.

Sam Kratrtqki-esz'-nzpnu-pwx-nrade-esz' (141)

Arlapxbz Ninge Mz Zmatq Ngr Alwx X Kxdrka'-ngrng

Nabz ne Devet.

¹ Yawe, kqle-zvzx nim. Xlrm natqnge.

Vz-anim x okatrp ninge. Yawe, kqle-zvzx nim.

² Abrtzlvz nzkrka'-krnge nzvzdz-krbzle bam na-apule zsikapu ngr bqlr nc ninz kc tzangcbz bam.

X nzglalz-krnge mqnge na-apubzle bam blz ngr milzpq.

³ Yawe, mailz ninge murde ma tqrpitix natq kxtrka,

A' nzymne-krnge natubqpwx.

⁴ Bzkq rlr-ngrme nzsutikr drtwrnge da kx-drka'ngr,

Murde ma tqprtrpo badr kxnzaleng alwx

Mz nzale-krdr da kxvz-rbr,

X ma tqprlvz mzke' da kxtrka.

⁵ A' mz nzprtr-krbo badr, mrlzvxitx nzayr-plapxngr ninge.

Murde nzatubqtingr apule tolo ngr nzamrlzngr.

Bzkq narnge mqngi,

Murde krka'-zvz-ngrne kx nayrlqpx-lzbqnge mz nzvz-rbr-krdr.

⁶ X ncblo sa na-abrtz-ngrdr natq ngr nzatubqti-krnge nidr

Mzli kc namc-ngrdr nzbzkr kxnzetu r kxdrka'-ngrng mz nzayrplapxngr nidr.

- ⁷ X nrvr ngrdr sa natwzbetxne mz drtc'
Mz nzapu-krdr lrdz kcng tqalvxlz nrc.
- ⁸ Yawe, nim Gct rnge, abrtr-zvzbo drtwrnge bam.
Nanginim lrpalc nyznge, murde ma tqmnc-
lxlr.
- ⁹ Mailz ninge murde ma tqprtzx mz trtxki sc
kxdrka'-ngrng,
X ma tqtaox mz gq kx nzekqtilr.
- ¹⁰ Mrlzvxitx nzdwatr-mou-krdr mz br scdr,
A' drtqnge naopx zvz.

Sam Kratrtqki-esz'-nzpnu- pwx-nrade-li (142)

Aopxbz Drtqnge Mz Nzxpukrngeng

Nabz ne Devet mzli kc tqmncpx-ngrmle mz
butqbr.

- ¹ Yawe, yrni-katobo bam,
Murde naokatrq ninge.
- ² X pibo bam da kx lctr-ngrbz drtwrnge,
X nzxpungr kcng tqprtzmqng bange.
- ³ Kxmule-esz' nabznge baonepe, a' nim kc tqrt-
wayz zvz mz nzvz-krnge.
Murde enqmi rngeng nzryrlq-kapqpeng
trtxki mz lrpzki rnge.
- ⁴ X kx obq-ngalex kc nrlc, trpnzngr kx mcx kx
naokatrle ninge,
X trpnzngr kz kx na-acle-zpwxle ninge.
- ⁵ Yawe, kqlx nim,
Murde nim me rlakitr, x nim nou nzmnc-
zpwx-krnge.
- ⁶ Ayzlum natqnge
Murde nabznge talvzo zlwz.

- ⁷ Aopxbz drtqnge mz nzxpu-krngeng murde na-
awibo bam,
X kxntubqng natu-ngalelvzlr ninge mz
nzglqlz-krdr nim mz nzamlz-zlwz-krm
ninge.

Sam Kratrtqki-esz'-nzpnu- pwx-nrade-tq (143)

Nzadwatrlr Ninge Mz Nzlo

Nabz ne Devet.

Xlrm Nzkrka'-krnge

- ¹ Yawe, xlrm nzkrka'-krnge x ayzlum natqnge,
Murde tubq-esz'ngrn x angidati-zvzq.
² Bzq ayrplapxq ninge, kxnzawz nem,
Murde trpnzngr leplz mz nrlc kxtubq mz
nzobq-krm.
³ Enqmi rngeng nzmaneutilr ninge x nznzbrti-
olr ninge mz drtc',
X nzadwatrlr ninge mz nzlo, apux kxbz kx
mnczm mz gq.
⁴ Nabznge baonepe,
X talvzo zlwz.
⁵ A' amqtrx drtwrnga mz nzaotikr drtwrnga zbq
kcng tqvztxpeng.
X dcpz mz drtwrnga da kxznkctipxng kcng
tqalemeng bagr.
⁶ Delc tqglalz-ngrbo mqnge bam,
Murde brlxkztitx zlwz drtwrnga nim.

Ayzlum Natqnge

- ⁷ Yawe, ayzlu-anim natqnge murde nabznge
baonepe.

- Bzkq rlaszq ninge, murde ma tqbzx.
8 A' pi-zvzm bange mz rngalx kang kqlu kx aodu-
zvzq ninge,
Murde abtrtpo drtwrnge bam.
X mailz ninge mz lrpzki kx nao-zlix,
Murde mnc-xgle-zvzx nim.
9 Yawe, bzkq rlr-ngrbzme mz enqmi rngeng
nzlolvz-krdr ninge,
Murde nim me rlakitr.
10 Gct rnge, alvztrp bange nzale-krnge me pnz
drtwrm.
X rtwayzm bange mz zmrlz ngrm, murde
namnc-zpwx.
11 Yawe, arlapx ninge da kc tqwai nzpi-krmle
murde ma tqbzx.
X tum mz nibrnge mz nzxpu-krngeng am-
rlx, murde tubq-esz'ngrn.
12 Lolvzting enqmi rngeng x miltxo alo nidr.
Murde aodu-zvzq ninge, kxnzawz nem.

Sam Kratrtqki-esz'-nzpnu- pwx-nrade-pwx (144)

Sa Namrlzbz Mz Leplz Mrkcng Amrlx Tqamrlz
Yawe
Nabz ne Devet.

Mevalu Rnge

- 1 Yawe, glqpxx nim, murde nim butqbr nyznge.
X alvztrpe' bange nzrpnangr x axplr q ninge
mz nzotangr.
2 Brti drtwrnge nzngini-krm lrpalc nyznge.
Nim Mevalu kx xplr x me rlakitr.
Nim temz ngr lomrnge kc tqyrputrngr nipna.

X okatr-zvzq ninge mz nzaovxio-krnge lr
mrkzbleng.

³ ?A' memule tqmatq-ngrgr mz drtwrm?

?X memule tqmrlzti-ngrn nigr leplz txneng?

⁴ Nzmrbcnekr nzlukr leplz apule nzyrplaokr nrc
kxes'.

X apu-kzle zmio kc tqmrbr mz milzpq.

⁵ Yawe, lvxpx bongavz mz nzvzo-krme.

Maletr newz murde nasikapung nzapulr tr-
mami.

⁶ Atwzlro-ngrm bzlrpc mz nzaodaliti-krm enqmi
rngeng.

Pnzting nidr mz nipna scmng murde
navotxng.

⁷ Yawe, rtrngztion ninge mz nzokatr-krm ninge,
Na-apule kx veclzme ninge me boongr prla.

X arlapxbz ninge mz mq lr mrkzbleng.

⁸ Murde nzmrlzti-tpwzlr nigr mz nzymne-krdr.

A' trnzatutrlru nzes'tikr drtwrgr badr.

Nzkrka'-krnge

⁹ Gct, sa nangr-ngrbo bam nabz kxmna.

X na-angrlvzx nim mz nzayrni-krnge gita.

¹⁰ Murde okatr-zvzq king nemng mz nzaovxio-
krdrng.

X sc tqarlapxpebzme ninge mz toki r vea
kxmalc, murde ninge kxnzawz nem.

¹¹ Mzli ka arlapx-mopwz ninge mz mq lr
mrkzbleng murde nzmrlzti-tpwzlr nigr
mz nzymne-krdr.

A' trnzatutrlru nzes'tikr drtwrgr badr.

¹² Delc mz nzqqlukr enqmi rgrng,

Krka'-ngrgr kx na-amrlzq nigr lr mrnym.

Murde obla negrng naxplrneizm mz nzapu-krdr
nounc kx xplr.

X olvi negrng naxplr-kzng x mztr nalqngi mz
nzapu-krdr nctrpou ngr ma nyz king.

¹³ Dalr nrlanc nyzgrng nalvc-angidrng,
Murde bxli scgrng nayrbu zvz mz dakxnzng.

X animol negrng naeloting
Murde neidrng nayrlwrtxne.

¹⁴ X kxnzrmailz rgrng na-ale-zpwxlr nzwz-krdr,
Murde leplz ma tztangetrplr drkq ngr mztea
nyzgr mz nzvzmi-krdr nigr mrnyzdr,
X lr mztea nyzgrng ma tzodalineg mz
nzvzdz-krm nelzdr.

¹⁵ Yawe, leplz kcng tqokatrq mz da lcng, sa na-
abrtz-ngdr nzmnc-zpwx-krdr.
Murde leplz amrlx kcng tqnginim Gct rdr sa
namnc-zpwx-zvzng.

Sam Kratrtqki-esz'-nzpnu- pwx-nrade-nzlvqn (145)

Zluli X Zmatq Ngr Yawe

Nabz ngr nzrglqpxngr ne Devet.

Kzdz Nabz Ngr A, B, C

¹ Awi-zvzbo bam mz nzglqpx-krnge nim,
Murde nim Gct rnge x mnclzbo bam.

² Bilyzx nim mz nzawi-krbo bam.
X sa naglqpx-zvzx nim mz zbq kang kqlu.

³ Clveq nrlc mz zmatq ngrm kx trpnzng kxrkrz.
Yawe, myatxlz-esz'ngrn x takitrde ngr-
glqlzng nim.

4 Doa nemqng sa nayapwxti-zvzbzlr mz doa nedrng,

Da kcng tqetuting tqmatq tqaletiqng.

5 Eu, x sa na-aoti-zvz-kzx drtwrng nzwz-krmqng kxmrlzvxing,

X nzetu-esz'ngr-krm mz zmatq.

6 Gct, sa nayapwxtipx leplz da kxnzkctipxng kcng tqwz-ngrn.

X sa napipxx nzmyalz-esz'ngr-krm.

7-8 Ipq-anig leplz murde yc mz drtwrm nidr.

Murde nivz lrm x nzaodu-krm tqyc tqyc.

Jzsiq leplz mz nztubqngr x sa na-angrlvzlr nim.

Sa nalepxlr nrpa ngr nzmrlz-esz'ngr-krm.

9 Kxetu, mrlztiq leplz amrlx,

X yc zlwz mz drtwrm doa amrlx kcng tqwz-ngrn.

10 Leplz nemqng amrlx sa na-awibzng bam,

X doa amrlx kcng tqwz-ngrn sa naglqlzlr nim.

11 Mz nrlc tulvzo, sa nayapwxtipxlr nzmyalz-esz'ngr-krm,

X nzetukr zmatq ngrm mz nzngini-krm king.

12 Nrpa ngr nzwz-krmqng etu, mz da kxmrlzting kcng tqwz-ngrn mz nzacive-krm,

Sa nakrlz leplz amrlx.

13 Obqom mz nrlc mz nzacive-krm kc tqyc tqyc,

X nzngini-krm king tqvzpe tqvzpe.

Pipx-zvzq natq kx na-angidatiq,

X aelwapx-zvzq nivz lrm mz da amrlx kcng tqaleq.

14 Rngiscm zmatq kx okatrle leplz kcng tzkxpung,

X axplrlle nabz leplz kcng tqtalvzo.

15 Sa narkabzme dakxnzng mz kxnzung amrlx,

- Mz nzmnc-xgle-krdr nim mz da amrlx.
16 Tekqtrq nzbrtale-krdr mz nzakrlc-krbzme
nelzdr,
X drtwrdr esatpxp zpxw.
17 Vz zvz nzale-krm da kx tubq-esz'ngr,
X aelwapx-zvzq nivz lrm mz da amrlx kcng
tqaleq.
18 Wxbu-aepztrpzme mz krkcng tzkqler nim,
Mz nzbtri-zpwxkr drtwrdr nim.
19 Xlrq nzyrnikr leplz kcng tzamrluelr nim,
X ayzlubzme natqdr mz nzarlapx-krm nidr.
20 Yawe, tu-zvzbzme mz nibr leplz kx nzmrlztilr
nim,
A' odati-atwrnr-ngrn kxdrka'-ngrng.
21 Zbq kalvz sa naglqlzx nim.
X krkcng tzlung tqwz-ngrn, nzangio-krdr
nim tqvzpe tqvzpe.

Sam Kratrtqki-esz'-nzpnu-pwx-nrade-esz'mz (146)

Na-abrtxtrpwzku Drtwrgu Mz Yawe

- 1 **Naglqlzku Yawe!**
Na-angiox nide mz nabznge.
2 Naglqlzx Gct rnge mzli ka tqlobe-ngrne,
X na-angrlvzx nide.
3 Bzkq abrtzrpzku drtwrgu mz kxnzrmailzng,
Murde leplz trnzkrzlru nzarlapx-krdr nigu.
4 Nabzng x nzyrtzmng mz drtc',
X mzli lcpwz drtwr kcng tzyrlqlr botxpx-
kzpz.
5 A' nangi da kxmrlz nzabrtr-krbzku drtwrgu mz
Yawe.

Murde takitrde mz nzmnc-xgle-kgu Gct r
Jekop.

⁶ X Yawe nide Kxrpaz,
Kc tqwz-ngrde bongavz, nrle, x prla, x daldrng
amrlx.

X atutr-zvzle natqdenng amrlx.

⁷ Nzatubqti-krbz Yawe da mz kxnzkxpung tubq.
X rka-zvzbz dakxnzng mz kxnzbrtaleng.

X aopxbzle drtq kxnzmnczbzng mz mq
enqmi rdrng.

⁸⁻⁹ X nide kz kx aopxbzle mzku.

X atulzmle kxnzobqszong.

Yawe aclvele lr mrkzbleng kx mnckung badr.

X okatrle kxnzbzszng x kxnzabzong.

Mrlztile kxnztubq nedeng,

A' odatile drtwr kcng tzyrlq kxdrka'-ngrng.

¹⁰ Yawe ni-alode King!

Nzavlvekr Gct rgu, nigu lr Jerusalem, tqvzpe
tqvzpe.

Naglqlzku Yawe!

Sam Kratrtqki-esz'-nzpnu- pwx-nrade-rimz (147)

*Yawe Amrlzle Nigu Leplz Nedeng Mz Zmatq
Ngrde*

Yawe Rngisc Zmatq Kx Xplr

¹ **Naglqlzku Yawe!**

Mrlzvxitx nzangrlvz-kgu Gct rgu.

Brngzvxitx x takitrde nzglqlz-kgu nide.

² Yawe yrlq-zpwx-moule Jerusalem,

Mz nzvzmi-kr-mople lr Israel kcng tzlolvzt-ing enqmi rdrng.

³ Rka-mopwz nzabrtzngr mz leplz lcng drtwrdr tqtalvzo,

Mz nzawxo-krbzle drtwrdr apule kx pnutibzle kxsqki rdr.

⁴ Krlzle me krlzbz nzkqlukr vri,
X yrlqtibzle drtqdrng amrlx.

⁵ Yawe etu-esz'ngr x rngisc zmatq kx xplr.
X trpnzng kx rkrlzlbz nzyrplapx-krde.

⁶ Atubxlzle kxnzobqszong,
A' rnzbrtiole kxdrka'-ngrng mz drtc'.

Mnc-xgleku Zmatq Rde

⁷ Nangr-ngrgu nabz kx yrlvi mz nzayrni-krbzku gita mz Yawe,

Mz nzawi-krbzku bade.

⁸ Murde yrlqtibzle dcbz mz bongavz x adco-ngrmle tewa nalrprngr drtc',
Murde nalutingr nabr kxvo mz nra.

⁹ Rkabz dakxnzng mz animol amrlx,
X aputrle nei utc amrlx mz nzyrni-krbzlr bade mz dale ngr nelzdr.

¹⁰ Delc trmrlz-ngrpwzleu mz Yawe nzabrtr-ngrbzku drtwrgu mz nzxplrkr hcsi ngr vea negung,
X nzaovxiokr ncblo ngr vea negung.

¹¹ A' mrlzbz bade krkcng tzamrluelr nide,
X tzmnc-xglelr nzaodu-zvz-krde nidr.

Zmatq Ngr Natqde

¹² Nigu lr Jerusalem kcng tzangiolr Yawe mz Newz Saeon,
Naglqlzku nide, kc tqngi Gct rgu.

- 13-14 Murde amqngitibzle naonrx ngr Jerusalem
x bz ngr mrnyzgr.
Amrlz-zvzle lr mzteadau nyzde,
X amnc-zpwxle nigu leplz nedeng amrlx
Mz nizrka-krmle bagu da kxmrlzting.
- 15 Mzli kc tqycmnepx-ngrde
Dalr nrlc nzvz-nqblq-anilr natqde.
- 16 Mz mzli r zbao, sncu prlxlvztxde drtc' apule
lrpz kxprki.
X dcbz vzom mz nrlc apule zikapu.
- 17 X muli-aes rlxom mrkcng amrlx.
Murde da amrlx lcng nayclzbzng mz zmatq
ngr zbao.
- 18 A' mz nzymne-mou-krde, nrlc kc tqpqpe,
X nzwqkr nenq kxpq ayrle-mouleng lue kcng
tqngi aes.
- 19 X natq lc tqmatq tqpm Yawe bagu, nigu leplz
nedeng,
Murde nayrlq-angidrku nzalvztr-krdeng x
Loukxtr scde.
- 20 Trpipxpwxleu lou scdeng mz lr mrkzbleng,
A' nigu txpwz, mz nzngini-rgu leplz nedeng.
Naglqlzku Yawe.

Sam Kratrtqki-esz'-nzpnu- pwx-nrade-rtqmz (148)

Nzrglqlz-zvzngr Yawe

- 1-2 **Glqlz-zvzamu Yawe**, nimu lr Heven amrlx.
Nimu enjrl nedeng, glqlz-zvzamu Yawe.
- 3 Glqlz-zvzamu Yawe, nepi ncd r temz.
X nimu vri amrlx, glqlz-zvzamu Yawe.
- 4 Glqlz-zvzamu nide, dalr bongavz amrlx.

- X nimu lue kcng wq, glqlz-zvzamu nide.
5 Glqlz-zvzamu drtqde. Kxrpalz wz-ngrde nimu,
Mz natq kx kapxle. Glqlz-zvzamu drtqde.
6 Natqde tqyc tqyc. Yrlqti-lxblrbzle
Me namnc-alo-ngrnamu. Natqde tqyc tqyc.
7 Glqlz-zvzamu Yawe, nimu nc x mepwz amrlx
Ngr prla x me boongr. Glqlz-zvzamu Yawe.
8 Vz-nqblqamu natqde, bzlrpc x muli aes.
Dcbz, nenq x tewa, vz-nqblqamu natqde.
9 Glqlz-zvzamu Yawe, newz x nra amrlx.
Nimu nounc ngr peto, glqlz-zvzamu Yawe.
10 Glqlz-zvzamu nide, animol x utc amrlx.
X da kx nzngri laneng, glqlz-zvzamu nide.
11 Naglqlz-kzku Yawe, nigu lr nrlc amrlx.
Kxnzeturng x kxnzrmailzng, naglqlz-kzku
Yawe.
12 Naglqlz-kzku nide, nigu obla x olvi.
Itoto x lrtzlvzng, naglqlz-kzku nide.
13 Naglqlzku drtqde, nigu amrlx ngrgu.
Drtqde myatxlz-esz'ngr. Naglqlzku drtqde.
Nzmyalz-esz'ngr-krde myaszlzle drtc',
X bongavz kz. Nzmyalz-esz'ngr-krde!
14 Naglqlz-zvzku Yawe, nigu lr Israel nedeng.
Axplrle x aodule nigu, **naglqlz-zvzku Yawe.**

Sam Kratrtqki-esz'-nzpnu-pwx-nrade-rpwxmz (149)

Nzbilvz-krgr Nzaovxiokr Yawe

1 Naglqlzku Yawe!

Nangr-ngrbzku bade nabz kxmrna.

Naglqlzku nide mz nzyrlwrpx-krm leplz nedeng mz Mangr-nzangiong nide.

- ² Nigu lr Israel na-abrtzlvzku Yawe mz nzngini-krde Kxrpalz.
X nigu lr Jerusalem naelalz-ngrm drtwrgu King rgu.
- ³ Naelabzku bade
Mz nizrta-krqu kte x nzayrni-krqu gita.
- ⁴ Murde Yawe abrtz-zlwz-ngrde nigu leplz nedeng,
X aovxiole enqmi rgung mz nzmnc-xgle-krqu nide.
- ⁵ Delc nigu kxnztrng nabilvzku nzaovxio-krqu.
X nangr-abrtzku mz nrlckxbq krlzbzle mz nrlckxngrlx.
- ⁶ Naogu namalqlvzlr Gct.
X narmaleku toki r vea mz mqu.
- ⁷ Murde na-ayzlvbzku da mz lr mrkzbleng,
Mz nzatutr-krqu nzaryplapxkr Gct leplz lcng.
- ⁸ X nape-amqngiku king rdrng,
Badr kxnzrmailz rdrng amrlx mz nzaovxio-krqu nidr.
- ⁹ Mz nzamatqkr Gct nigu, rlr-ngrmle bagu, nigu leplz nedeng,
Nzprtr-krqu mz nzatutr-krde natqde mz nzayrplapx-krqu lr mrkzbleng.
Nagqlzku Yawe!

Sam Kratrtqki-esz'-nzpnu-nzlvqn (150)

Naelabzku Mz Yawe

- ¹ **Nagqlzku Yawe** mz nzmnc-krde Mangr-nzangiongr,

X nzmnc-krde Heven kc tqmyalz.

² Na-angrlvzku nide nzmyalz-esz'ngr-krde
Mz nzale-krde da kcng tqmatq.

³⁻⁵ Naelamibzku nrasrpwale

X natz-katobzku bade kcte.

Naelabzku bade navzmi nzayrpla-rgu da,
Nzrta-rgu da, x nzayrlewz-rgu da mz
mqgu.

Navxubzku trpu x ncblei.

X na-ayrniku gita x ukzlele mz nzglqlz-rgu
nide.

⁶ Nigu kxnzlung amrlx, naelalz-ngrm drtwrgu
Yawe.

Naglqlzku Yawe!

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 11 Nov 2022 from source files dated 30 Nov 2021

fb2b7f06-e254-5fb7-b59d-ee21d5d7a93f